

Namo tassa bhagavato arahato sammāsambuddhassa

Āṅuttaranikāye

Ekakanipāta-ṭīkā

Ganthārambhakathā

Anantañāṇaṃ karuṇāniketaṃ,
Namāmi **nāthaṃ** jītaṇṇamāraṃ;
Dhammaṃ visuddhaṃ bhavanāsahetaṃ,
Saṅghaṇca seṭṭhaṃ hatasabbapāpaṃ.

Kassapaṃ taṃ mahātheraṃ, saṅghassa pariṇāyakaṃ;
Dīpasmiṃ tambapaṇṇimhi, sāsanaodayakāraṃ.

Paṭipattiparādhīnaṃ, sadārañṇaniṅgasaṃ;
Pākaṭaṃ gagane canda-maṇḍalaṃ viya sāsane.

Saṅghassa pitaraṃ vande, vinaye suvisāraṃ;
Yaṃ nissāya vasantoṃ, vuḍḍhipattosmi sāsane.

Anutheraṃ mahāpaññaṃ, **sumedhaṃ** sutivissutaṃ;
Avikhaṇḍitasīlādi-parisuddhaguṇodayaṃ.

Bahussutaṃ satimantaṃ, dantaṃ santaṃ samāhitaṃ;
Namāmi sirasā dhīraṃ, garuṃ me gaṇavācakaṃ.

Āgatāgamatakkesu, saddasatthanayañṇesu;
Yassantevāsibhikkhūsu, sāsanaṃ suppatiṭṭhitaṃ.

Yo sīhaḷindo dhītimā yasassī,
Uḷārapañño nipuṇo kalāsu;
Jāto visuddhe ravisomavaṃse,
Mahabbalo abbhutavuttitejo.

Jitvārivaggaṃ atiduppasayaṃ,
Anaññaśādhāraṇavikkamena;
Pattābhiseko jinadhammasevī,
Abhippasanno ratanattayamhi.

Ciraṃ vibhinne jinasāsanaṃ,
Paccatthike suṭṭhu viniggahetvā;
Sudhamva sāmaggiraṃ pasatthaṃ,
Pāyesi bhikkhū parisuddhasīle.

Katvā vihāre vipule ca ramme,
Tatrappitenekasahassasaṅkhe;
Bhikkhū aseṣe catupaccayehi,
Santappayanto suciraṃ akhaṇḍaṃ.

Saddhammavuddhiṃ abhikaṅkhamāno,
Sayampi bhikkhū anusāsayingivā;
Niyojayaṃ ganthavipassanāsu,
Akāsi vuddhiṃ jinasāsanassa.

Tenāhamaccantamanuggahīto,
Anaññasādhāraṇasaṅgahena;
Yasmā parakkantabhujavhayena,
Ajjhesito bhikkhugaṇassa majjhe.

Tasmā anuttānapadānamatthaṃ,
Setthāya aṅguttaravaṇṇanāya;
Sandassayingisaṃ sakalaṃ subodduṃ,
Nissāya pubbācariyappabhāvaṃ.

Ganthārambhakathāvaṇṇanā

1. Saṃvaṇṇanārambhe ratanattayaṃ namassitukāmo tassa viṣiṭṭhagaṇayogasandassanatthaṃ “**karuṇāsītalahadaya**”ntiādimāha. Viṣiṭṭhagaṇayogena hi vandanārahabhāvo, vandanārahe ca katā vandanā yathādhīppetamatthaṃ sādheti. Ettha ca saṃvaṇṇanārambhe ratanattayappaṇāmakaraṇappayojanam tatha tatha bahudhā papañcenti ācariyā, mayaṃ pana idhādhīppetameva payojanam dassayingisāma, tasmā saṃvaṇṇanārambhe ratanattayappaṇāmakaraṇam yathāpaṭiññātasamvaṇṇanāya anantarāyena parisamāpanatthanti veditabbaṃ. Idameva hi payojanam ācariyena idhādhīppetam. Tathā hi vakkhati –

“Iti me pasannamatino, ratanattayavandanāmayam puññaṃ;
Yam suvihatantarāyo, hutvā tassānubhāvenā”ti.

Ratanattayappaṇāmakaraṇena cettha yathāpaṭiññātasamvaṇṇanāya anantarāyena parisamāpanam ratanattayapūjāya paññāpāṭavato, tāya paññāpāṭavañca rāgādimalavidhamanato. Vuttañhetam –

“Yasmiṃ, mahānāma, samaye ariyasāvako tathāgataṃ anussarati, nevassa tasmim samaye rāgapariyuṭṭhitam cittam hoti, na dosapariyuṭṭhitam cittam hoti, na mohapariyuṭṭhitam cittam hoti, ujugatamevassa tasmim samaye cittam hoti”tiādi (a. ni. 6.10; 11.11).

Tasmā ratanattayapūjanena vikkhālitamalāya paññāya pāṭavasiddhi.

Atha vā ratanattayapūjanassa paññāpadaṭṭhānasamādhīhetuttā paññāpāṭavaṃ. Vuttañhi tassa samādhīhetuttam –

“Ujugatacitto kho pana, mahānāma, ariyasāvako labhati atthavedam, labhati dhammavedam, labhati dhammūpasamhitam pāmojjaṃ, pamuditassa pīti jāyati, pītimanassa kāyo passambhati, passaddhakāyo sukham vediyati, sukhino cittam samādhīyatī”ti (a. ni. 6.10; 11.11).

Samādhissa ca paññāya padaṭṭhānabhāvo vuttoyeva – “samāhito yathābhūtam pajānātī”ti (saṃ. ni. 3.5; 4.99; 5.1071). Tato evam paṭubhūtāya paññāya paṭiññāmahattakataṃ khedamabhibhuyya anantarāyena saṃvaṇṇanam samāpayissati.

Atha vā ratanattayapūjāya āyuvaṇṇasukhabalavaḍḍhanato anantarāyena parisamāpanam veditabbaṃ. Ratanattayappaṇāmena hi āyuvaṇṇasukhabalāni vaḍḍhanti. Vuttañhetam –

“Abhivādanasīlissa, niccam vuddhāpacāyino;

Cattāro dhammā vaḍḍhanti, āyu vaṇṇo sukhaṃ bala’’nti. (dha. pa. 109) –

Tato āyuvaṇṇasukhabalavuddhiyā hoteva kāriyaniṭṭhānaṃ.

Atha vā ratanattayagāravassa paṭibhānāparihānāvahattā. Aparihānāvahañhi tīsupi ratanesu gāraṃ. Vuttañhetam –

“Sattime, bhikkhave, aparihānīyā dhammā. Katame satta? Satthugāravatā, dhammagāravatā, saṅghagāravatā, sikkhāgāravatā, samādhigāravatā, sovacassatā, kalyāṇamittatā’’ti (a. ni. 7.34).

Hoteva ca tato paṭibhānāparihānena yathāpaṭiññātaparisamāpanaṃ.

Atha vā pasādavatthūsu pūjāya puññātisayabhāvato. Vuttañhi tassā puññātisayattaṃ –

“Pūjārahe pūjayato, buddhe yadi va sāvake;
Papañcasamatikkante, tiṇṇasokapariddave.

Te tādise pūjayato, nibbute akutobhaye;
Na sakkā puññaṃ saṅkhātum, imettamapi kenaci’’ti. (dha. pa. 195-196; apa. therā 1.10.1-2);

Puññātisayo ca yathādhīpetaparisamāpanūpāyo. Yathāha –

“Esa devamanussānaṃ, sabbakāmadado nidhi;
Yaṃ yadevābhīpatthenti, sabbametena labbhati’’ti. (khu. pā. 8.10);

Upāyesu ca paṭipannassa hoteva kāriyaniṭṭhānaṃ. Ratanattayapūjā hi niratisayapuññakkhetasambuddhiyā aparimeyyappabhāvo puññātisayoti bahuvīdhanārāyepi lokasannivāse antarāyanibandhanasakalasaṃkilesaviddhamśanāya pahoti, bhayādiupaddavañca nivāreti. Tasmā vuttaṃ – “saṃvaṇṇanārambhe ratanattayappaṇāmakaraṇaṃ yathāpaṭiññātasamvaṇṇanāya anantarāyena parisamāpanattha’’nti.

Evañca sappayojanaṃ ratanattayavandanaṃ kattukāmo paṭhamaṃ tāva bhagavato vandanaṃ kātuṃ tammūlakattā sesaratanānaṃ “**karuṇāsītalahadayaṃ...pe... gativimutta**’’nti āha. Tattha yassā desanāya saṃvaṇṇanaṃ kattukāmo, sā na vinayadesanā viya karuṇāpadhānā, nāpi abhidhammadesanā viya paññāpadhānā, atha kho karuṇāpaññāpadhānāti tadubhayappadhānameva tāva sammāsambuddhassa thomaṃ kātuṃ “**karuṇāsītalahadayaṃ, paññāpajjotavihatamohatama**’’nti vuttaṃ. Tattha kiratīti karuṇā, paradukkhaṃ vikkipati apañcīti attho. Atha vā kiṇṭīti karuṇā, paradukkhe sati kāruṇikaṃ hiṃsati vibādhatīti attho. Paradukkhe sati sādhuṇaṃ kampanaṃ hadayakhedaṃ karotīti vā karuṇā. Atha vā kamiti sukhaṃ, taṃ rundhatīti karuṇā. Esā hi paradukkhaṇayanakāmatālakkaṇā attasukhanirapekkhatāya kāruṇikānaṃ sukhaṃ rundhati vibandhatīti attho. Karuṇāya sītalaṃ karuṇāsītalaṃ, karuṇāsītalaṃ hadayaṃ assatī karuṇāsītalahadayo, taṃ **karuṇāsītalahadayaṃ**.

Tattha kiñcāpi paresaṃ hitopasaṃhārasukhādiaparihānicchanasabhāvatāya, byāpādāratīnaṃ ujuvipaccanīkatāya ca sattasantānagatasantāpavicchedanākārapavattiyā mettāmoditānaṃpi cīttasītalahāvākāraṇatā upalabbhati, tathāpi dukkhāpanayanākārapavattiyā parūpatāpāsahanarasā avihīmsabhūtā karuṇā vīsesena bhagavato cīttassa cīttappassaddhi viya sītībhāvanimittanti vuttaṃ – “**karuṇāsītalahadaya**’’nti. Karuṇāmukhena vā mettāmoditānaṃpi hadayasītalahāvākāraṇatā vuttatī daṭṭhabbaṃ. Atha vā asādhāraṇāññāvisesānibandhanabhūtā sātīsayam niravasesaṃca sabbaññūtaññānaṃ viya savīsayabyāpitāya mahākāruṇābhāvaṃ upagatā karuṇāva bhagavato atīsayena hadayasītalahāvahetūti āha – “**karuṇāsītalahadaya**’’nti. Atha vā satīpi mettāmoditānaṃ sātīsaye hadayasītībhāvanibandhanatte sakalabuddhaguṇavīsesakāraṇatāya tāsampi kāraṇanti karuṇāva bhagavato “hadayasītalahāvākāraṇa’’nti vuttā. Karuṇānidānā hi sabbepi buddhaguṇā. Karuṇānubhāvanībāpīyamānasamśaradukkhasantāpassa hi

bhagavato paradukkhāpanayanakāmatāya anekānīpi asaṅkhyeyyāni kappānaṃ akilantarūpasseva niravasesabuddhakaradhammasambharaṇaniratassa samadhigatadhammādhīpateyyassa ca sannihitesupi sattasaṅkhārasamupanītahadayūpatāpanimittesu na īsakampi cittasītibhāvassa aññathattamahosīti. Etasmiṅca atthavikappe tīsupi avatthāsu bhagavato karuṇā saṅgahitāti daṭṭhabbaṃ.

Pajānātīti paññā, yathāsabhāvaṃ pakārehi paṭivijjhatīti attho. Paññāva ñeyyāvaraṇappahānato pakārehi dhammasabhāvāvajotanaṭṭhena pajjototi paññāpajjoto. Savāsanappahānato visesena hatam samugghātitaṃ vihatam. Paññāpajjotena vihatam paññāpajjotavihatam, muyhanti tena, sayam vā muyhati, mohanamattameva vā tanti moho, avijjā. Sveva visayasabhāvappaṭicchādanato andhakārasarikkhatāya tamo viyāti mohatamo, paññāpajjotavihato mohatamo etassāti paññāpajjotavihatamohatamo, taṃ **paññāpajjotavihatamohatamaṃ**. Sabbesampi hi khīṇāsavānaṃ satipi paññāpajjotena avijjandhakārassa vihatabhāve saddhādhimuttehi viya diṭṭhippattānaṃ sāvakehi paccekasambuddhehi ca savāsanappahānena sammāsambuddhānaṃ kilesappahānassa viseso vijjatīti sātīsayena avijjāpahānena bhagavantaṃ thomento āha – **“paññāpajjotavihatamohatama”**nti.

Atha vā antarena paropadesaṃ attano santāne accantaṃ avijjandhakāravigamassa nibbattitattā, tattha ca sabbaññūtāya balesu ca vasībhāvassa samadhigatattā, parasantatiyaṅca dhammadesanāṭīsayānubhāvena sammadeva tassa pavattitattā bhagavāva visesato mohatamavigamena thometabboti āha – **“paññāpajjotavihatamohatama”**nti. Imasmiṅca atthavikappe **“paññāpajjoto”**ti padena bhagavato paṭivedhapaññā viya desanāpaññāpi sāmāññaniddesena, ekasesanayena vā saṅgahitāti daṭṭhabbaṃ.

Atha vā bhagavato ñāṇassa ñeyyapariyantikattā sakalañeyyadhammasabhāvāvabodhanasamatthena anāvaraṇaññāsaṅkhātena paññāpajjotena sabbañeyyadhammasabhāvachchādakassa mohandhakārassa vidhamitattā anaññāsādhāraṇo bhagavato mohatamavināsoti katvā vuttaṃ – **“paññāpajjotavihatamohatama”**nti. Ettha ca mohatamavidhamanante adhigatattā anāvaraṇaññānaṃ kāraṇopacārena sasantānamohatamavidhamanaṃ daṭṭhabbaṃ. Abhinīhārasampattiyā savāsanappahānameva hi kilesānaṃ ñeyyāvaraṇappahānanti, parasantāne pana mohatamavidhamanassa kāraṇabhāvato anāvaraṇaññānaṃ **“mohatamavidhamana”**nti vuccatīti.

Kim pana kāraṇaṃ avijjāsamugghātōyeveko pahānasampattivasena bhagavato thomanānimittaṃ gayhati, na pana sātīsayaniravasesakilesappahānanti? Tappahānavacaneneva tadekatṭhatāya sakalasaṅkilesagaṇasamugghātassa vuttattā. Na hi so tādiso kilesō atthi, yo niravasesaavijjāpahānena na pahīyatīti.

Atha vā vijjā viya sakalakusaladhammasamuppattiyā, niravasesākusaladhammanibbattiyā saṃsārappavattiyā ca avijjā padhānakāraṇanti tabbighātavacanena sakalasaṅkilesagaṇasamugghāto vutto eva hotīti vuttaṃ – **“paññāpajjotavihatamohatama”**nti.

Narā ca amarā ca narāmarā, saha narāmarehīti sanarāmaro, sanarāmaro ca so loko cāti sanarāmaraloko, tassa garūti sanarāmaralokagaru, taṃ **sanarāmaralokagaruṃ**. Etena devamanussānaṃ viya tadavasiṭṭhasattānampi yathārahaṃ guṇavisesāvahatāya bhagavato upakāratam dasseti. Na cettha padhānappadhānabhāvo codetabbo. Añño hi saddakkamo, añño atthakkamo. Īdisesu hi samāsapadesu padhānampi appadhānaṃ viya niddisīyati yathā **“sarājīkāya parisāyā”**ti (cūḷava. 336). Kāmañcettha sattasaṅkhārabhājanavasena tividho loko, garubhāvassa pana adhippetattā garukaraṇasamatthasseva yujjanato sattalokassa vasena attho gahetabbo. So hi lokīyanti ettha puññāpāpāni tabbipāko cāti **“loko”**ti vuccatīti. Amaraggahaṇena cettha upapattidevā adhippetā.

Atha vā samūhattho lokasaddo samudāyavasena lokīyati paññāpīyatīti. Saha narehīti sanarā, sanarā ca te amarā cāti sanarāmarā, tesam lokoti sanarāmaralokoti purimanayeneva yojetabbaṃ. Amarasaddena cettha visuddhidevāpi saṅgayhanti. Tepi hi maraṇābhāvato paramatthato amarā. Narāmarānaṃyeva ca gahaṇaṃ ukkaṭṭhaniddesavasena yathā **“sathā devamanussāna”**nti (dī. ni. 1.157). Tathā hi sabbānattaparīharaṇapubbaṅgamāya niravasesahitasukhavidhānatapparāya niratisayāya payogasampattiyā sadevamanussāya pajāya accantūpakāritāya aparimitanirupamappabhāvaguṇavisesasamaṅgitāya ca

sabbasattuttamo bhagavā aparimāṇāsu lokadhātūsu aparimāṇānaṃ sattānaṃ uttamagāravatṭhānaṃ.
Tena vuttam – “**sanarāmaralokagaru**”nti.

Sobhanaṃ gataṃ gamaṇaṃ etassāti sugato. Bhagavato hi veneyyanūpasāṅkamaṇaṃ ekantena tesam hitasukhanipphādanato sobhanaṃ, tathā lakkhaṇānubyañjanappaṭimaṇḍitarūpakāyatāya dutavilambitakhalitānukaḍḍhananippīlanukkuṭikakuṭīlakuṭīlatādi-dosarahitamavahasitarājahaṃsavasabhavāraṇamigarājagamaṇaṃ kāyagamaṇaṃ ñāṇagamaṇaṇca vipulanimmalakarūṇāsativīriyādiguṇavisesasahitamabhinīhārato yāva mahābodhi anavajjatāya sobhanamevāti. Atha vā sayambhuññaṇena sakalampi lokaṃ pariññābhisamayavasena pariḷānanto ñāṇena sammā gato avagatoti sugato, tathā lokasamudayaṃ pahānābhisamayavasena pajahanto anuppattidhammataṃ āpādentoti sammā gato atītoti sugato, lokanirodhaṃ nibbānaṃ sacchikiriyābhisamayavasena sammā gato adhigatoti sugato, lokanirodhagāminipaṭipadaṃ bhāvanābhisamayavasena sammā gato paṭipannoti sugato. “Sotāpattimaggena ye kilesā pahīnā, te kilese na puneti na pacceti na paccāgacchatīti sugato”tiādinā (cūḷani. mettagūmānavapucchānidde 27) nayena ayamatto vibhāvetabbo. Atha vā sundaraṃ ṭhānaṃ sammāsambodhiṃ, nibbānameva vā gato adhigatoti sugato, yasmā vā bhūtaṃ tacchaṃ atthasamhitam veneyyānaṃ yathārahaṃ kālayuttameva ca dhammaṃ bhāsati, tasmā sammā gadatīti sugato, da-kārassa ta-kāraṃ katvā. Iti sobhanagamaṇatādīhi sugato, taṃ **sugataṃ**.

Puññapāpakammehi upapajjanavasena gantabbato gatiyo, upapattibhavavisesā. Tā pana nirayādivasena pañcavidhā. Tāhi sakalassapi bhavagāmikammaṃ ariyamaggādhigamena avipākārahābhāvakarāṇena nivattitattā bhagavā pañcahi gatihi suṭṭhu mutto viṣamuyuttoti āha – “**gativimutta**”nti. Etena bhagavato katthacipi gatiyā apariyāpannataṃ dasseti, yato bhagavā “devātidevo”ti vuccati. Tenevāha –

“Yena devūpapatyassa, gandhabbo vā vihaṅgamo;
Yakkhattaṃ yena gaccheyyaṃ, manussattaṇca abbaje;
Te mayhaṃ āsavā khīṇā, viddhastā vinaḷīkatā”ti. (a. ni. 4.36);

Taṃtaṃgatisaṃvattanikānañhi kammakilesānaṃ aggamaggena bodhimūleyeva suppahīnattā natthi bhagavato gatipariyāpannatāti accantameva bhagavā sabbabhavayonigativīññāṇatṭhitisattāvāsasattanikāyehi supparimutto, taṃ **gativimuttaṃ**. **Vandeti** namāmi, thomemīti vā attho.

Atha vā **gativimuttanti** anupādisesanibbānadhātuppattiyā bhagavantaṃ thometi. Ettha hi dvīhi ākārehi bhagavato thomanā veditabbā atthasamvattito parahitappaṭipattito ca. Tesu atthasamvattito anāvaraṇāññādhigamato savāsānaṃ sabbesaṃ kilesānaṃ accantappahānato anupādisesanibbānappattito ca veditabbā, parahitappaṭipatti lābhasakkārādinirapekkhacittassa sabbadukkhanīyānikadhammadesanato viruddhesupi niccaṃ hitajjhāsayato ñāṇaparipākakālāgamaṇato ca. Sā panettha āsayato payogato ca duvidhā, parahitappaṭipatti tividhā ca, atthasamvattito pakāsītā hoti. Kathaṃ? “Karūṇāsītalahaḍaya”nti etena āsayato parahitappaṭipatti, sammāgadanatthena sugatasaddena payogato parahitappaṭipatti, “paññāpajjotavihatamohatamaṃ gativimutta”nti etehi catusaccasamvattidhanatthena ca sugatasaddena tividhāpi atthasamvattito, avasiṭṭhena “paññāpajjotavihatamohatama”nti etena cāpi atthasamvattito parahitappaṭipatti pakāsītā hotīti.

Atha vā tīhi ākārehi bhagavato thomanā veditabbā hetuto, phalato, upakārato ca. Tattha **hetu** mahākarūṇā, sā paṭhamapadena dassitā. **Phalaṃ** catubbidhaṃ ñāṇasampadā, pahānasampadā, ānubhāvasampadā, rūpakāyasampadā cāti. Tāsu ñāṇappahānasampadā dutiyapadena saccappaṭivedhanatthena ca sugatasaddena pakāsītā honti, ānubhāvasampadā tatiyapadena, rūpakāyasampadā yathāvuttakāyagamaṇasobhanatthena sugatasaddena lakkhaṇānubyañjanaparipūriyā vinā tadabhāvato. **Upakāro** anantaraṃ abāhiraṃ karitvā tividhayānamukhena vimuttidhammadesanā. So sammāgadanatthena sugatasaddena pakāsito hotīti veditabbam.

Tattha “karūṇāsītalahaḍaya”nti etena sammāsambodhiyā mūlaṃ dasseti. Mahākarūṇāsañcoditamānaso hi bhagavā saṃsārapāṅkato sattānaṃ samuddharaṇatthaṃ katābhinīhāro

anupubbena pāramiyo pūretvā anuttaram sammāsambodhiṃ adhigatoti karuṇā sammāsambodhiyā mūlaṃ. “Paññāpajjotavihatamohatama”nti etena sammāsambodhiṃ dasseti. Anāvaraṇañānapadaṭṭhānañhi maggañāṇaṃ, maggañāṇapadaṭṭhānañca anāvaraṇañāṇaṃ “sammāsambodhi”ti vuccatīti. Sammāgamanatthena sugatasaddena sammāsambodhiyā paṭipattiṃ dasseti līnuddhaccapatiṭṭhānāyūhanakāmasukhallikattakilamathānuyogasassatucchedābhinivesādiantadvayarahitāya karuṇāpaññāpariggahitāya majjhimāya paṭipattiyā pakāsanato sugatasaddassa. Itarehi sammāsambodhiyā padhānappadhānabhedam payojanam dasseti. Saṃsāramahoghato sattasantāraṇañhettha padhānam payojanam, tadaññamappadhānam. Tesu padhānena parahitappaṭipattiṃ dasseti, itarena attahitasampattiṃ. Tadubhayena attahitāya paṭipannādīsu catūsu puggalesu bhagavato catutthapuggalabhāvaṃ dasseti. Tena ca anuttaradakkhiṇeyyabhāvaṃ uttamavandaneyyabhāvaṃ attano ca vandanakiriyāya khettaṅgatabhāvaṃ dasseti.

Ettha ca karuṇāgahaṇena lokiyesu mahaggatabhāvappattāsādhāraṇaguṇadīpanato bhagavato sabbalokiyaguṇasampatti dassitā hoti, paññāgahaṇena sabbaññūtaññānapadaṭṭhānamaggañāṇadīpanato sabbalokuttaraguṇasampatti. Tadubhayaggahaṇasiddho hi attho “sanarāmaralokagaru”ntiādinā papañcīyatīti. Karuṇāgahaṇena ca upagamanam nirupakkilesam dasseti, paññāgahaṇena apagamanam. Tathā karuṇāgahaṇena lokasamaññānurūpaṃ bhagavato pavattiṃ dasseti lokavohāraṇavisaṃyattā karuṇāya, paññāgahaṇena samaññāya anātibhāvanam. Sabhāvānavabodhena hi dhammānam samaññam atidhāvitvā sattādīparāmasanam hotīti. Tathā karuṇāgahaṇena mahākaruṇāsamaṃpattivihāram dasseti, paññāgahaṇena tīsu kālesu appaṭihataññam catusaccaññam, catupaṭisambhidāññam, catuvesārājjaññam. Karuṇāgahaṇena mahākaruṇāsamaṃpattiññāssa gahitattā sesāsādhāraṇaññāni, cha abhiññā, aṭṭhasu parisāsu akampanaññāni, dasa balāni, cuddasa buddhaññāni, soḷasa ñāṇacariyā, aṭṭhārasa buddhadhammā, catucattālīsa ñāṇavattūni, sattasattati ñāṇavattūnīti evamādīnam anekesam paññāpabhedānam vasena ñāṇacāram dasseti. Tathā karuṇāgahaṇena caraṇasampattiṃ, paññāgahaṇena vijjāsampattiṃ. Karuṇāgahaṇena attādhipatitā, paññāgahaṇena dhammādhipatitā. Karuṇāgahaṇena lokanāthabhāvo, paññāgahaṇena attanāthabhāvo. Tathā karuṇāgahaṇena pubbakāribhāvo, paññāgahaṇena kataññūtā. Tathā karuṇāgahaṇena aparantapatā, paññāgahaṇena anattantapatā. Karuṇāgahaṇena vā buddhakaradhammasiddhi, paññāgahaṇena buddhabhāvasiddhi. Tathā karuṇāgahaṇena paresam tāraṇam, paññāgahaṇena sayamtarāṇam. Tathā karuṇāgahaṇena sabbasattesu anuggahacittatā, paññāgahaṇena sabbadhammesu virattacittatā dassitā hoti.

Sabbesañca buddhaguṇānam karuṇā ādi tannidānabhāvato, paññā pariyosānam tato uttarikaraṇīyābhāvato. Iti ādipariyosānadassanena sabbe buddhaguṇā dassitā honti. Tathā karuṇāgahaṇena sīlakkhandhapubbaṅgamo samādhikkhandho dassito hoti. Karuṇānidānañhi sīlam tato pāṇātipātādiviratippavattito, sā ca jhānattayasampayoginīti. Paññāvacanena paññākkhandho. Sīlañca sabbesam buddhaguṇānam ādi, samādhī majjhe, paññā pariyosānanti evampi ādimajjhāpariyosānakalyāṇā sabbe buddhaguṇā dassitā honti nayato dassitattā. Eso eva hi niravasesato buddhaguṇānam dassanupāyo, yadidaṃ nayaggahaṇam, aññathā ko nāma samattho bhagavato guṇe anupadam niravasesato dassetuṃ? Tenevāha –

“Buddhopi buddhassa bhaṇeyya vaṇṇam,
Kappampi ce aññamabhāsamāno;
Khīyetha kappo ciradīghamantare,
Vaṇṇo na khīyetha tathāgatassā”ti. (dī. ni. aṭṭha. 1.304; 3.141; ma. ni. aṭṭha. 2.425; udā. aṭṭha. 53; bu. vaṃ. aṭṭha. 4.4; apa. aṭṭha. 2.7.parappasādakattheraapadānavāṇṇanā);

Teneva ca āyasmatā sārīputtattherenapi buddhaguṇaparicchedanam pati anuyuttana “no hetam, bhante”ti paṭikkhipivā “apica me, bhante, dhammanvayo vidito”ti vuttam.

2. Evaṃ sañkhepena sakalasabbaññūguṇehi bhagavantam abhitthavitvā idāni saddhammam thometuṃ “**buddhopi**”tiādimāha. Tattha **buddhoti** kattuniddeso. **Buddhabhāvanti** kammaniddeso. **Bhāvetvā sacchikatvāti** ca pubbakālakiriyāniddeso. **Yanti** aniyamato kammaniddeso. **Upagatoti** aparakālakiriyāniddeso. **Vandeti** kiriyāniddeso. **Tanti** niyamanam. **Dhammanti** vandanakiriyāya

kammaniddeso. **Gatamalaṃ anuttaranti** ca tabbisesanaṃ.

Tattha buddhasaddassa tāva “bujjhitaṃ saccānīti buddho, bodhetā pajāyāti buddho”tiādīnā (mahāni. 192; cūḷani. pārāyanatthutigāthāniddeso 97; paṭi. ma. 1.162) niddesanayena attho veditabbo. Atha vā savāsānāya aññāṇaniddāya accantavigamato, buddhiyā vā vikaṣitabhāvato buddhavāti **buddho** jāgaraṇavikasanatthavasena. Atha vā kassaci pi ñeyyadhammassa anavabuddhassa abhāvena ñeyyavisesassa kammabhāvena aggahaṇato kammavacanicchāya abhāvena avagamanatthavaseneva kattuniddeso labbhatīti buddhavāti buddho yathā “dikkhito na dadāti”ti. Atthato pana pāramitāparibhāvito sayambhuññāṇena saha vāsānāya vihataviddhamṣitaniravasesakilesa mahākaruṇāsabbaññūtaññāṇādiaparimeyyaguṇagaṇādhāro khandhasantāno buddho. Yathāha –

“Buddhoti yo so bhagavā sayambhū anācariyako pubbe ananussutesu dhammesu sāmaṃ saccāni abhisambujjhi, tattha ca sabbaññutaṃ patto balesu ca vasībhāva”nti (mahāni. 192; cūḷani. pārāyanatthutigāthāniddeso 97; paṭi. ma. 1.161).

Api-saddo sambhāvane. Tena “evaṃ guṇavisesayutto sopi nāma bhagavā”ti vakkhamāṇaguṇadhamme sambhāvanāṃ dīpeti. **Buddhabhāvanti** sammāsambodhiṃ. **Bhāvetvāti** uppādetvā vaḍḍhetvā ca. **Sacchikatvāti** paccakkhaṃ katvā. **Upagatoti** patto, adhigatoti attho. Etassa buddhabhāvanti etena sambandho. **Gatamalanti** vigatamalaṃ, niddosanti attho. **Vandeti** paṇamāmi, thomemi vā. **Anuttaranti** uttararahitaṃ, lokuttaranti attho. **Dhammanti** yathānusiṭṭhaṃ paṭipajjamāne apāyato ca saṃsārato ca apatamāne katvā dhāretīti dhammo. Ayañhettha saṅkhepattho – evaṃ vividhaguṇagaṇasamānāgato buddhopi bhagavā yaṃ ariyamaggasaṅkhātāṃ dhammaṃ bhāvetvā, phalanibbānaṃ pana sacchikatvā anuttaraṃ sammāsambodhiṃ adhigato, tamevaṃ buddhānampi buddhabhāvahetubhūtaṃ sabbadosamalarahitaṃ attano uttaritarābhāvena anuttaraṃ paṭivedhasaddhammaṃ namāmīti. Pariyattisaddhammassapi tappakāsanattā idha saṅgaho daṭṭhabbo.

Atha vā “abhidhammanayasamuddaṃ adhigañchi, tīṇi piṭakāni sammasī”ti ca aṭṭhakathāyaṃ vuttattā pariyattidhammassapi sacchikiriyāsammasanapariyāyo labbhatīti sopi idha vutto evāti daṭṭhabbaṃ. Tathā “yaṃ dhammaṃ bhāvetvā sacchikatvā”ti ca vuttattā buddhakaradhammabhūtāhi pāramitāhi saha pubbabhāge adhisīlasikkhādayopi idha dhammasaddena saṅgahitāti veditabbā. Tāpi hi vigatappaṭipakkhatāya gatamālā, anaññāsādhāraṇatāya anuttarā cāti. Tathā hi sattānaṃ sakalavaṭṭadukkhanissaraṇāya katamahābhinihāro mahākaruṇādhivāsana pesalajjhāsayo paññāvisesapariyodātanimmalānaṃ dānadamasaññamādīnaṃ uttamadhammānaṃ satasahassādhikāni kappānaṃ cattāri asaṅkhyeyyāni sakkaccaṃ nirantaraṃ niravasesānaṃ bhāvanāpaccakkhakarāṇehi kammādīsu adhigatavasībhāvo acchariyācinteyyamahānubhāvo adhisīlaadhicittānaṃ paramukkaṃsapāramippatto bhagavā paccayākāre catuvīsati koṭṭisatasahassamukhena mahāvajiraññaṃ pesetvā anuttaraṃ sammāsambodhiṃ abhisambuddhoti.

Ettha ca “bhāvetvā”ti etena vijjāsampadāya dhammaṃ thometi, “sacchikatvā”ti etena vimuttisampadāya. Tathā paṭhamena jhānasampadāya, dutiyena vimokkhasampadāya. Paṭhamena vā samādhisampadāya, dutiyena samāpattisampadāya. Atha vā paṭhamena khayaññābhāvena, dutiyena anuppādaññābhāvena. Paṭhamena vā vijjūpamatāya, dutiyena vajirūpamatāya. Purimena vā virāgasampattiya, dutiyena nirodhasampattiya. Tathā paṭhamena niyyānabhāvena, dutiyena nissaraṇabhāvena. Paṭhamena vā hetubhāvena, dutiyena asaṅkhatabhāvena. Paṭhamena vā dassanabhāvena, dutiyena vivekabhāvena. Paṭhamena vā adhipatibhāvena, dutiyena amatabhāvena dhammaṃ thometi. Atha vā “yaṃ dhammaṃ bhāvetvā buddhabhāvaṃ upagato”ti etena svākkhātāya dhammaṃ thometi, “sacchikatvā”ti etena sandiṭṭhikatāya. Tathā purimena akālikatāya, pacchimena ehipassikatāya. Purimena vā opaneyyikatāya, pacchimena paccattaṃ veditabbatāya dhammaṃ thometi. “Gatamala”nti iminā saṃkilesābhāvadīpanena dhammassa parisuddhataṃ dasseti, “anuttara”nti etena aññassa viṣiṭṭhassa abhāvadīpanena vipulaparipuṇṇataṃ. Paṭhamena vā pahānasampadaṃ dhammassa dasseti, dutiyena pabhavasampadaṃ. Bhāvetabbatāya vā dhammassa gatamalahāvo yojetabbo. Bhāvanāguṇena hi so dosānaṃ samugghātako hotīti. Sacchikātabbābhāvena anuttarabhāvo yojetabbo. Sacchikiriyānibbattito hi taduttarikaṇṭiyābhāvato anaññāsādhāraṇatāya anuttaroti. Tathā “bhāvetvā”ti etena saha

pubbabhāgasīlādīhi sekkhā sīlasamādhīpaññākkhandhā dassitā honti. “Sacchikatvā”ti etena saha asaṅkhatāya dhātuyā asekkhā sīlasamādhīpaññākkhandhā dassitā hontīti.

3. Evaṃ saṅkhepeva sabbadhammaguṇehi saddhammaṃ abhittavitvā idāni ariyaṅghaṃ thometuṃ “**sugatassā**”tiādimāha. Tattha **sugatassā**ti sambandhaniddeso. “Tassa puttāna”nti etena sambandho. **Orasānanti** puttavisesanaṃ. **Mārasenamathanānanti** orasaputtabhāve kāraṇaniddeso tena kilesappahānameva bhagavato orasaputtabhāve kāraṇaṃ anujānātīti dasseti. **Aṭṭhannanti** gaṇanaparicchedaniddeso. Tena ca satipi tesam sattavisesabhāvena anekasatasahassabhāve imaṃ gaṇanaparicchedaṃ nātivattantīti dasseti maggaṭṭhaphalaṭṭhabhāvānavattanato. **Samūhanti** samudāyaniddeso. **Ariyaṅghanti** guṇavisiṭṭhasaṃhatabhāvaniddeso. Tena asatipi ariyapuggalaṇaṃ kāyasāmaggiyaṃ ariyaṅghabhāvaṃ dasseti diṭṭhisīlasamaññena saṃhatabhāvato.

Tattha urasi bhavā jātā saṃbaddhā ca orasā. Yathā hi sattānaṃ orasaputtā attajatāya pitu santakassa dāyajjassa visesena bhāgino honti, evametepi ariyapuggalā sammāsambuddhassa savanante ariyāya jātiyā jātātāya bhagavato santakassa vimuttisukhassa ariyadhammaratanassa ekantena bhāginoti orasā viya orasā. Atha vā bhagavato dhammadesanānubhāvena ariyabhūmiṃ okkamamānā okkantā ca ariyasāvaka bhagavato ure vāyāmājanitābhijātītāya nippariyāyena orasaputtāti vattabataṃ arahanti. Sāvakehi pavattiyamānāpi hi dhammadesanā “bhagavato dhammadesanā” icceva vuccati taṃmūlakattā lakkhaṇādivisesābhāvato ca.

Yadipi ariyasāvakaṇaṃ ariyamaggādhigamasamaye bhagavato viya tadantarāyakaraṇatthaṃ devaputtamāro, māravāhinī vā na ekantena apasādeti, tehi pana apasādetabbatāya kāraṇe vimathite tepi vimathitā eva nāma hontīti āha – “mārasenamathanāna”nti. Imasmiṃ panatthe “māramārasenamathanāna”nti vattabbe “mārasenamathanāna”nti ekadesasarūpekaseso katoti daṭṭhabbaṃ. Atha vā khandhābhisaṅkhāramāraṇaṃ viya devaputtamārasapi guṇamāraṇe sahāyabhāvūpagamanato kilesabalakāyo “senā”ti vuccati. Yathāha – “kāma te paṭhamā senā”tiādi (su. ni. 438; mahāni. 28, 68, 149). Sā ca tehi diyaḍḍhasahassabhedā, anantabhedā vā kilesavāhinī satidhammavicayavīriyasamathādiguṇappaharaṇehi odhiso vimathitā vihatā viddhastā cāti **mārasenamathanā**, ariyasāvaka. Etena tesam bhagavato anujātaputtataṃ dasseti.

Ārakattā kilesehi, anaye na iriyanato, aye ca iriyanato ariyā niruttinayena. Atha vā sadevakena lokena saraṇanti araṇīyato upagantabbato, upagatānañca tadatthasiddhito ariyā, ariyānaṃ saṅghoti ariyaṅgho, ariyo ca so saṅgho cāti vā ariyaṅgho, taṃ **ariyaṅghaṃ**. Bhagavato aparabhāge buddhadhammaratanānampi samadhigamo saṅgharatanādhīnoti assa ariyaṅghassa bahūpakāraṭaṃ dassetuṃ idheva “**sirasā vande**”ti vuttanti daṭṭhabbaṃ.

Ettha ca “sugatassa orasānaṃ puttāna”nti etena ariyaṅghassa pabhavasampadaṃ dasseti, “mārasenamathanāna”nti etena pahānasampadaṃ sakalasaṃkilesappahānadīpanato. “Aṭṭhannampi samūha”nti etena nāṇasampadaṃ maggaṭṭhaphalaṭṭhabhāvādīpanato. “Ariyaṅgha”nti etena pabhavasampadaṃ dasseti sabbasaṅghānaṃ aggabhāvādīpanato. Atha vā “sugatassa orasānaṃ puttāna”nti ariyaṅghassa visuddhanissayabhāvādīpanaṃ, “mārasenamathanāna”nti sammāujuñāyasāmicippaṭipannabhāvādīpanaṃ, “aṭṭhannampi samūha”nti āhuneyyādibhāvādīpanaṃ, “ariyaṅgha”nti anuttarapuññakkhettabhāvādīpanaṃ. Tathā “sugatassa orasānaṃ puttāna”nti etena ariyaṅghassa lokuttarasaraṇagamanasabbhāvamaṃ dīpeti. Lokuttarasaraṇagamanena hi te bhagavato orasaputtā jātā. “Mārasenamathanāna”nti etena abhinīhārasampadāsiddhaṃ pubbabhāge sammāpaṭipattiṃ dasseti. Katābhinihārā hi sammāpaṭipannā māraṃ mārapariṣamaṃ vā abhivijjanti. “Aṭṭhannampi samūha”nti etena viddhastavipakkhe sekkhāsekkhadhamme dasseti puggalādhīṭṭhānena maggaphaladhammaṇaṃ pakāsītā. “Ariyaṅgha”nti aggadakkhiṇeyyabhāvaṃ dasseti. Saraṇagamaṇaṃ sāvakaṇaṃ sabbaguṇānaṃ ādi, sapubbabhāgappaṭipadā sekkhā sīlakkhandhādayo majjhe, asekkhā sīlakkhandhādayo pariyoṣānanti ādimajjhapariyoṣānakalyāṇā saṅkhepato sabbe ariyaṅghaguṇā pakāsītā honti.

4. Evaṃ gāthāttayena saṅkhepato sakalaguṇasaṃkittanamukhena ratanattayassa paṇāmaṃ katvā idāni taṃnipaccakāraṃ yathādhīpete payojane pariṇāmento “**iti me**”tiādimāha. Tattha ratījananaṭṭhena **ratanam**, buddhadhammasaṅghā. Tesañhi “itipi so bhagavā”tiādinā yathābhūtaguṇe āvajjentaṃ

amatādhigamahetubhūtaṃ anappakaṃ pītipāmojjaṃ uppajjati. Yathāha –

“Yasmiṃ, mahānāma, samaye ariyasāvako tathāgataṃ anussarati, nevassa tasmiṃ samaye rāgapariyuṭṭhitaṃ cittaṃ hoti, na dosa...pe... na mohapariyuṭṭhitaṃ cittaṃ hoti, ujugatamevassa tasmiṃ samaye cittaṃ hoti tathāgataṃ ārabha. Ujugatacitto kho pana, mahānāma, ariyasāvako labhati atthavedaṃ, labhati dhammavedaṃ, labhati dhammūpasamhitaṃ pāmojjaṃ, pamuditassa pīti jāyati”tiādi (a. ni. 6.10; 11.11).

Cittīkatādibhāvo vā ratanaṭṭho. Vuttañhetam –

“Cittīkataṃ mahagghañca, atulaṃ dullabhadassanaṃ;
Anomasattaparibhogaṃ, ratanaṃ tena vuccatī”ti. (dī. ni. aṭṭha. 2.33; sam. ni. aṭṭha. 3.5.223; khu. pā. aṭṭha. 6.3; su. ni. aṭṭha. 1.226);

Cittīkatabhāvādayo ca anaññasādhāraṇā buddhādīsu eva labbhantīti.

Vandanāva **vandanāmayaṃ** yathā “dānamayaṃ, sīlamaya”nti (dī. ni. 3.305; itivu. 60). Vandanā cettha kāyavācācettehi tiṇṇaṃ ratanānaṃ guṇaninnatā, thomanā vā. Pujjabhāvaphalanibbattanato **puññaṃ**, attano santānaṃ punātīti vā. **Suvihatantarāyoti** suṭṭhu vihatantarāyo. Etena attano pasādasampattiyā, ratanattayassa ca khettabhāvasampattiyā taṃ puññaṃ atthappakāsanassa upaghātaupaddavānaṃ vihanane samatthanti dasseti. **Hutvāti** pubbakālakiriyā. Tassa “atthaṃ pakāsāyissāmī”ti etena sambandho. **Tassāti** yaṃ ratanattayavandanāmayaṃ puññaṃ, tassa. **Ānubhāvenāti** balena.

5. Evaṃ ratanattayassa nipaccakāraṇe payojanaṃ dassetvā idāni yassā dhammadesanāya atthaṃ samvaṇṇetukāmo, tassā tāva guṇābhittavanavasena upaññāpanatthaṃ “**ekakadukādipaṭimaṇḍitassā**”tiādimāha, ekakādīni aṅgāni uparūpari vaḍḍhetvā desitehi suttantehi paṭimaṇḍitassa viṣiṭṭhassati attho. Etena “aṅguttaro”ti ayaṃ imassa āgamassa atthānugatā samaññāti dasseti. Nanu ca ekakādivasena desitāni suttāniyeva āgamo. Kassa pana ekakadukādīhi paṭimaṇḍitabhāvoti? Saccametam paramatthato, suttāni pana upādāya paññatto āgamo. Yatheva hi atthabyañjanasamudāye suttanti vohāro, evaṃ suttasamudāye āgamoti vohāro. Ekakādīhi aṅgehi uparūpari uttaro adhikoti aṅguttaro, āgamissanti ettha, etena, etasmā vā attatthaparattādayoti āgamo, ādikalyāṇādiguṇasampattiyā uttamattāhena taṃtaṃ abhipatthitasamiddhihetutāya paṇḍitehi varitabbato varo, āgamo ca so varo ca seṭṭhatṭhenāti āgamavaro, āgamasammatehi vā varoti āgamavaro. Aṅguttaro ca so āgamavaro cāti **aṅguttarāgamavaro**, tassa.

Puṅgavā vuccanti usabhā, asantasanaparissayasahanassa paripālanādiguṇehi taṃsadsatāya dhammakathikā eva puṅgavāti **dhammakathikapuṅgavā**, tesam.
Hetūpamādippaṭimaṇḍitanānāvidhadesanāyaviccittatāya **vicittapaṭibhānajanassa**. **Sumaṅgalavilāsini**ādīsu (dī. ni. aṭṭha. 1.ganthārambhakathā; ma. ni. aṭṭha. 1.ganthārambhakathā; sam. ni. aṭṭha. 1.1.ganthārambhakathā) pana “buddhānubuddhasamvaṇṇitassā”ti vuttaṃ. Buddhānañhi saccappaṭivedhaṃ anugamma paṭividdhasaccā aggasāvakādayo ariyā buddhānubuddhā. Ayampi āgamo tehi atthasamvaṇṇanāvasena guṇasamvaṇṇanāvasena ca samvaṇṇito eva. Atha vā buddhā ca anubuddhā ca buddhānubuddhāti yojetabbam. Sammāsambuddheneva hi tiṇṇaṃ piṭakānaṃ atthavaṇṇanākkamo bhāsito, yā “pakiṇṇakadesanā”ti vuccati. Tato saṅgāyanādivaseneva sāvakehīti ācariyā vadanti. Idha pana “dhammakathikapuṅgavānaṃ vicittapaṭibhānajanassa”icceva thomanā katā. Samvaṇṇanāsu cāyaṃ ācariyassa pakati, yā taṃtaṃ samvaṇṇanāsu ādito tassa tassa samvaṇṇetabbassa dhammassa visesaṅgakkittanena thomanā. Tathā hi sumaṅgalavilāsiniṃ papañcasūdanīsāratthappakāsanāsu aṭṭhasālinīādīsu ca yathākkamaṃ “saddhāvahaguṇassa, paravādamathanassa, fīṇappabhedajanassa, tassa gambhīraññehi ogaḷhassa abhiṇhaso nānāyaviccittassā”tiādinā thomanā katā.

6. Attho kathīyati etāyāti atthakathā, sā eva **aṭṭhakathā**, ttha-kārassa ṭṭha-kāraṃ katvā yathā “dukkhassa piḷanaṭṭho”ti (paṭi. ma. 1.17; 2.8). **Āditoti**ādimhi paṭhamasaṅgītiyaṃ. Chaḷabhiññatāya

paramena cittavasābhāvena samannāgatattā jhānādīsu pañcavidhavasitāsabbhāvato ca **vasino**, therā mahākassapādayo, tesam **satehi pañcahi**. **Yāti** yā aṭṭhakathā. **Saṅgītāti** attham pakāsetum yuttaṭṭhāne “ayaṃ etassa attho, ayaṃ etassa attho”ti saṅgahetvā vuttā. **Anusaṅgītā** ca yasattherādīhi **pacchāpi** dutiyatatiyasaṅgītīsu. Iminā attano saṃvaṇṇanāya āgamanavisuddhiṃ dasseti.

7. Sīhassa lānato gahaṇato sīhaḷo, sīhakumāro. Tamvaṃsajātātāya tambapaṇṇidīpe khattiyānaṃ, tesam nivāsātāya tambapaṇṇidīpassa ca sīhaḷabhāvo vedītabbo. **Ābhatāti** jambudīpato ānītā. **Athāti** pacchā. Aparabhāge hi asaṅkarattham sīhaḷabhāsāya aṭṭhakathā ṭhapitāti. Tena sā mūlatṭhakathā sabbasādhāraṇā na hotīti idaṃ atthappakāsaṇaṃ ekantena karaṇīyanti dasseti. Tenevāha – “**dīpavāsīnamatthāyā**”ti. Tattha **dīpavāsīnanti** jambudīpavāsīnaṃ, **dīpavāsīnanti** vā sīhaḷadīpavāsīnaṃ atthāya sīhaḷabhāsāya ṭhapitāti yojanā.

8. **Apanetvānāti** kañcukasadisaṃ sīhaḷabhāsapaṇetvāna. **Tatoti** aṭṭhakathāto. **Ahanti** attānaṃ niddisati. **Manoramaṃ bhāsanti** māgadhābhāsam. Sā hi sabhāvaniruttibhūtā paṇḍitānaṃ manam ramayatīti. Tenevāha – “**tantinayānucchavika**”nti, pālīgatiyā anulomikaṃ pālīcchāyānuvidhāyininti attho. **Vigatadosanti** asabhāvaniruttibhāsantararāhitam.

9. **Samayaṃ avilomentoti** siddhantaṃ avirodhento. Etena atthadosābhāvamāha. Aviruddhattā eva hi theravādāpi idha pakāsīyissanti. **Theravaṃsadīpānanti** thirehi sīlakkhandhādīhi samannāgatattā therā, mahākassapādayo, tehi āgatā ācariyaparamparā theravaṃso. Tappariyāpannā hutvā āgamādhigamasampannattā paññāpajjotena tassa samujjālanato theravaṃsadīpā, mahāvihāravāsino therā, tesam. Vividhehi ākārehi nicchīyatīti vinicchayo, gaṇṭhiṭṭhānesu khīlamaddanākārena pavattā vimaticchedakathā. Suṭṭhu nipuṇo saṅho vinicchayo etesanti **sunipuṇavinicchayā**. Atha vā vinicchīnōtīti vinicchayo, yathāvuttatthavisayaṃ ṇāṇam. Suṭṭhu nipuṇo cheko vinicchayo etesanti **sunipuṇavinicchayā**. Etena mahākassapādītheraparamparābhato, tatoyeva ca aviparīto saṅhasukhumo mahāvihāravāsīnaṃ vinicchayoti tassa pamāṇabhūtataṃ dasseti.

10. **Sujanassa cāti ca**-saddo sampiṇḍanatto. Tena “na kevalam jambudīpavāsīnaṃyeva atthāya, atha kho sādhujanānaṃ tosanatthañcā”ti dasseti. Tena ca “tambapaṇṇidīpavāsīnampi atthāyā”ti ayamatto siddho hotī ugghaṇādisukaratāya tesampi bahūpakārattā. **Ciraṭṭhitatthanti** ciraṭṭhitattham, ciraḷāvaṭṭhānāyāti attho. Idāñhi atthappakāsaṇaṃ aviparītabyañjanasunikkhepassa atthasunītassa ca upāyabhāvato saddhammassa ciraṭṭhitīyā saṃvattati. Vuttañhetam bhagavatā –

“Dveme, bhikkhave, dhammā saddhammassa ṭhītiyā asammosāya anantaradhānāya saṃvattanti. Katame dve? Sunikkhitañca padabyañjanaṃ, attho ca sunīto”ti (a. ni. 2.21).

11-12. Yaṃ atthavaṇṇanaṃ katthukāmo, tassā mahantattaṃ pariharitum “**sāvattipabhūtīna**”ntiādimāha. Tenāha – “na idha vitthārakatham karissāmi, na tam idha vicārayissāmi”ti ca. Tattha **dīghassāti** dīghanikāyassa. **Majjhimassāti** majjhimanikāyassa. “Saṅgītīnaṃ dvinnam yā me attham vadantenā”tipi pāṭho. Tatthapi **saṅgītīnaṃ dvinnanti** dīghamajjhimanikāyānanti attho gahetabbo. **Meti** karaṇatthe sāmivacanaṃ, mayāti attho. **Sudanti** nipātamattaṃ. Heṭṭhā dīghassa majjhimassa ca attham vadantena sāvattipabhūtīnaṃ nagaraṇaṃ yā vaṇṇanā katā, tassā vitthārakatham na idha bhīyyo karissāmīti yojetabbaṃ. Yāni ca tattha vatthūni vitthāravasena vuttāni, tesampi vitthārakatham na idha bhīyyo karissāmīti sambandho.

13. Idāni “na idha vitthārakatham karissāmi”ti sāmāññato vuttassa atthassa pavaram dassetum – “**suttānaṃ panā**”tiādi vuttaṃ. Suttānaṃ ye atthā vatthūhi vinā na pakāsantīti yojetabbaṃ.

14. Yaṃ aṭṭhakatham kattukāmo, tadekadesabhāvena visuddhimaggo ca gahetabboti kathikānaṃ upadesam karonto tattha vicāritadhamme uddesavasena dasseti – “**sīlakathā**”tiādinā. Tattha **sīlakathāti** cārittavāritādivasena sīlassa vitthārakathā. **Dhutadhammāti** piṇḍapātikaṅgādayo terasa kilesadhunanakadhammā. **Kammaṭṭhānāni sabbānīti** pālīyam āgatāni aṭṭhatimsa, aṭṭhakathāyaṃ dveti

niravasesāni yogakammassa bhāvanāya pavattiṭṭhānāni. **Cariyāvidhānasahitoti** rāgacaritādīnaṃ sabhāvādividhānena sahito. **Jhānāni** cattāri rūpāvacarajjhānāni, **samāpattiyo** catasso āruppasamāpattiyo. Aṭṭhapi vā paṭiladdhamattāni **jhānāni** samāpajjanavasībhāvappattiyā **samāpattiyo**. **Jhānāni** vā rūpārūpāvacarajjhānāni, **samāpattiyo** phalasarāpattinirodhasamāpattiyo.

15. Lokiyalokuttarabhedā cha abhiññāyo **sabbā abhiññāyo**. Nāṇavibhaṅgādīsū āgatanayena ekavidhādīnā paññāya saṃkaletvā sampiṇḍetvā nicchayo **paññāsaṅkalananicchayo**.

16. Paccayadhammānaṃ hetuādīnaṃ paccayuppannadhammānaṃ hetupaccayādivhāvo paccayākāro, tassa desanā **paccayākāradesanā**, paṭiccasamuppādakathāti attho. Sā pana ghanavinibbhogassa sudukkaratāya saṅhasukhumā, nikāyantaraladdhisāṅkararahitā, ekattanayādisahitā ca tattha vicāritāti āha – **“suparisuddhanipuṇanayā”**ti. Paṭisambhidādīsū āgatanayaṃ avissajjtvā vicāritattā **avimuttatantimaggā**.

17. **Iti pana sabbanti iti**-saddo parisamāpane, **pana**-saddo vacanāṅkare, etaṃ sabbanti attho. **Idhāti** imissā aṭṭhakathāya **na vicārayissāmi** punaruttibhāvatoti adhippāyo.

18. Idāni tasseva avicāraṇassa ekantakāraṇaṃ niddhārento **“majjhe visuddhimaggo”**tiādīmāha. Tattha **“majjhe ṭhatvā”**ti etena majjhabhāvadīpanena visesato catunnaṃ āgamānaṃ sādharmaṇaṭṭhakathā visuddhimaggo, na sumāgalavilāsīnādayo viya asādharmaṇaṭṭhakathāti dasseti. **“Visesato”**ti ca idaṃ vinayābhiddhammānampi visuddhimaggo yathārahaṃ atthavaṇṇanā hoti evāti katvā vuttaṃ.

19. **Icevāti** iti eva. **Tampīti** visuddhimaggampi. **Etāyāti** manorathapūraṇiyā. Ettha ca **“sīhaḷadīpaṃ ābhata”**tiādīnā atthappakāsanassa nimittaṃ dasseti, **“dīpavāsīnamatthāya** sujanassa ca tuṭṭhatthaṃ ciratṭhitatthaṃca dhammassā”ti etena payojanaṃ, apanetvāna tatohaṃ, sīhaḷabhāsa”ntiādīnā. **“Sāvatthipabhutīna”**ntiādīnā ca karaṇappakāraṃ. Heṭṭhimanikāyesu visuddhimagge ca vicāritānaṃ atthānaṃ avicāraṇampi hi idha karaṇappakāro evāti.

Ganthārambhakathāvaṇṇanā niṭṭhitā.

1. Rūpādivaggavaṇṇanā

Nidānavāṇṇanā

Vibhāgavantānaṃ sabhāvavibhāvaṇṇaṃ vibhāgadassanavaseneva hotīti paṭhamānaṃ tāva nipātasuttavasena vibhāgaṃ dassetuṃ **“tattha aṅguttarāgamo nāma”**tiādīmāha. Tattha **tatthāti** **“aṅguttarāgamaṃ atthaṃ pakāsayissāmi”**ti yadidaṃ vuttaṃ, tasmīṃ vacane, **“yassa atthaṃ pakāsayissāmi”**ti paṭiññātaṃ, so aṅguttarāgamo nāma nipātasuttavasena evaṃ vibhāgoti attho. Atha vā **tatthāti** **“aṅguttaranissitaṃ attha”**nti etasmīṃ vacane yo aṅguttarāgamo vutto, so nipātasuttādivasena edisoti attho.

Idāni taṃ ādito paṭṭhāya saṃvaṇṇitukāmo attano saṃvaṇṇanāya paṭhamamahāsaṅgītiyaṃ nikkhittānukkamena pavattabhāvadassanattaṃ **“tassa nipātesu...pe... vuttaṃ nidānamādī”**tiādīmāha. Tattha yathāpaccayaṃ tattha tattha desitattā paññattattā ca vippariṇānaṃ dhammavinayānaṃ saṅgahetvā gāyanaṃ kathaṃ saṅgīti. Etena taṃtaṃsikkhāpadānaṃ suttānaṃca ādipariyosānesu antarantarā ca sambandhavasena ṭhapitaṃ saṅgītikāravacanaṃ saṅgahitaṃ hoti. Saṅgīyamānassa atthassa mahantatāya pūjanīyatāya ca mahatī saṅgīti mahāsaṅgīti, paṭhamā mahāsaṅgīti paṭhamamahāsaṅgīti, tassā pavattikālo paṭhamamahāsaṅgītikālo, tasmīṃ **paṭhamamahāsaṅgītikāle**. Nidadāti desanaṃ desakālādivasena aviditaṃ viditaṃ katvā nidassetīti **nidānaṃ**. Yo lokiyehi upogghātoti vuccati, svāyamettha **“evaṃ me suta”**ntiādiko gantho veditabbo. Na **“sanidānāhaṃ, bhikkhave, dhammaṃ desemi”**tiādīsū (a. ni. 3.126) viya ajjhāsayaḍidesanuppattihetu. Tenevāha – **“evaṃ me sutantiādikaṃ āyasmatā ānandena paṭhamamahāsaṅgītikāle vuttaṃ nidānamādī”**ti.

uppattihetu etassāti **anekajjhāsayasamuṭṭhānaṃ. Atthabyañjanasampannanti** atthabyañjanaparipuṇṇaṃ upanetabbābhāvato.

Sankāsanapakāsanavivaraṇavibhajanauttānīkaraṇapaññattivāsena chahi atthapadehi akkharapadabyañjanākāraniruttiniddesavasena chahi byañjanapadehi ca samannāgatanti vā attho daṭṭhabbo.

Vividhapāṭihāriyanti ettha pāṭihāriyapadassa vacanattamaṃ “paṭipakkhaharaṇato rāgādikilesāpanayanato ca pāṭihāriya”nti vadanti. Bhagavato pana paṭipakkhā rāgādayo na santi, ye haritabbā. Puthujjanānampi vigatūpakkilese aṭṭhaguṇasamannāgate citte hatapaṭipakkhe iddhividhaṃ pavattati, tasmā tattha pavattavohārena ca na sakkā idha “pāṭihāriya”nti vatthumaṃ. Sace pana mahākāruṇikassa bhagavato veneyyagatā ca kilesā paṭipakkhā, tesamaṃ haraṇato “pāṭihāriya”nti vuttaṃ, evamaṃ sati yuttametamaṃ. Atha vā bhagavato ca sāsanaṃ ca paṭipakkhā titthiyā, tesamaṃ haraṇato pāṭihāriyamaṃ. Te hi diṭṭhiharaṇavasena ca diṭṭhippakāsane asamatthabhāvena ca iddhiādesanānusāsanihi haritā apanitā hontīti. “Paṭi”ti vā ayamaṃ saddo “pacchā”ti etassa atthamaṃ bodheti “tasmimaṃ paṭipaviṭṭhamhi, añño āgañchi brāhmaṇo”tiādīsu (su. ni. 985; cūḷani. pārāyanavaggo, vatthugāthā 4) viya, tasmā samāhite citte vigatūpakkilese katakiccena pacchā haritabbaṃ pavattetabbanti pāṭihāriyamaṃ, attano vā upakkilesesu catutthajjhānamaggehi haritesu pacchā haraṇamaṃ pāṭihāriyamaṃ, iddhiādesanānusāsaniyo ca vigatūpakkilesena katakiccena ca sattahitatthamaṃ puna pavattetabbā, haritesu ca attano upakkilesesu parasattānaṃ upakkilesaharaṇāni hontīti pāṭihāriyāni bhavanti. Pāṭihāriyameva pāṭihāriyamaṃ, pāṭihāriye vā iddhiādesanānusāsaniyamudāye bhavaṃ ekamekaṃ pāṭihāriyanti vuccati. Pāṭihāriyamaṃ vā catutthajjhānaṃ maggo ca paṭipakkhaharaṇato, tattha jātaṃ, tasmimaṃ vā nimittabhūte, tato vā āgatanti pāṭihāriyamaṃ. Tassa pana iddhiādibhedena visayabhedena ca bahuviddhassa bhagavato desanāyamaṃ labbhamānattā āha – **“vividhapāṭihāriya”**nti.

Na aññathāti bhagavato sammukhā sutākārato na aññathāti attho, na pana bhagavato desitākārato. Acinteyyānubhāvā hi bhagavato desanā. Evañca katvā “sabbappakārena ko samattho viññātu”nti idaṃ vacanaṃ samatthitaṃ bhavati, dhāraṇabaladassanañca na virujjhati sutākārāvirujjhanassa adhippetattā. Na hettha atthantarātāparihāro dvinnaṃ atthānaṃ ekavisayattā, itarathā thero bhagavato desanāya sabbathā paṭiggahaṇe samattho asamattho cāti āpajjeyāti.

“Yo paro na hoti, so attā”ti evamaṃ vuttāya niyakajjhattasankhātāya sasantatiyamaṃ vattanato tividhopi me-saddo kiñcāpi ekasmiṃyeva atthe dissati, karaṇasampadānāsāminiddesavasena pana vijjamānabhedamaṃ sandhāyāha – **“me-saddo tīsu atthesu dissati”**ti.

Kiñcāpi upasaggo kiriyaṃ viseseti, jotakabhāvato pana satipi tasmimaṃ suta-saddo eva taṃ tamatthamaṃ vadatīti anupasaggassa suta-saddassa atthuddhāre saupasaggassa gahaṇamaṃ na virujjhatīti dassento **“saupasaggo ca anupasaggo cā”**ti āha. Assāti sutasaddassa. Kammabhāvasādhanāni idha sutasadde sambhavanti vuttaṃ – **“upadhāritanti vā upadhāraṇanti vā attho”**ti. **Mayāti atthe satīti** yadā me-saddassa kattavasena karaṇaniddeso, tadāti attho. **Mamāti atthe satīti** yadā sambandhavasena sāminiddeso, tadā.

Sutasaddasanniṭṭhāne payuttana **evamaṃ**-saddena savanakiriyājotakena bhavitabbanti vuttaṃ – **“evanti sotaviññādiviññāpakiccanidassana”**nti. **Ādi**-saddena sampaṭicchanaḍḍānaṃ sotadvārikaviññāṇaṃ tadabhinīhaṇānañca manodvārikaviññāṇaṃ gahaṇamaṃ veditabbaṃ. Sabbesampi vākyānaṃ evakāratthasahitattā “suta”nti etassa sutamevāti ayamattho labbhatīti āha – **“assavanabhāvappaṭikkhepato”**ti. Etena avadhāraṇena niyāmatamaṃ dasseti. Yathā ca sutamaṃ sutamevāti niyāmetabbaṃ, **taṃ** sammā sutamaṃ hotīti āha – **“anūnādhikāviparītaggahaṇanidassana”**nti. Atha vā saddantarathāpohanavasena saddo atthamaṃ vadatīti sutanti assutamaṃ na hotīti ayametassa atthoti vuttaṃ – **“assavanabhāvappaṭikkhepato”**ti. Iminā diṭṭhādivinivattanaṃ karoti. Idaṃ vuttaṃ hoti – na idaṃ mayā diṭṭhamaṃ, na sayambhuññaṇena sacchikataṃ, atha kho sutamaṃ, tañca sammadevāti. Tenevāha – **“anūnādhikāviparītaggahaṇanidassana”**nti. Avadhāraṇatthe vā **evamaṃ**-saddo ayamatthayojanā – “karīyatī”ti tadapekkhassa suta-saddassa ayamattho vutto “assavanabhāvappaṭikkhepato”ti. Tenevāha – **“anūnādhikāviparītaggahaṇanidassana”**nti. Savana-saddo cettha kammattho veditabbo “suyyatī”ti.

Evam savanahetusavanavisesavasena padattayassa ekena pakārena atthayojanam dassetvā idāni pakārantarehi tam dassetum – **“tathā eva”**ntiādi vuttam. Tattha **tassāti** yā sā bhagavato sammukhā dhammassavanākārena pavattā manodvāraṇāvīṇānavīthi, tassā. Sā hi nānappakārena ārammaṇe pavattitum samatthā. Tathā ca vuttam – **“sotadvārānusārenā”**ti. **Nānappakārenāti** vakkhamānānam anekavihitānam byañjanatthaggaṇānam nānākārena. Etena imissā yojanāya ākāratto evam-saddo gahitoti dīpeti. **Pavattibhāvappakāsananti** pavattiyā atthibhāvappakāsanam. **Sutanti dhammappakāsananti** yasmim ārammaṇe vuttappakārā viññānavīthi nānappakārena pavattā, tassa dhammattā vuttam, na sutasaddassa dhammatthattā. Vuttassevatthassa pākāṭikaraṇam **“ayañhetthā”**tiādi. Tattha **viññānavīthiyāti** karaṇatthe karaṇavacanam, **mayāti** kattuatthe.

Evanti niddisitabbappakāsananti nidassanatham evam-saddam gahetvā vuttam nidassetabbassa nidassitabbattābhāvābhāvato. Tena evam-saddena sakalampi suttam paccāmaṭṭhanti dasseti. Sutasaddassa kiriyāsaddattā savanakiriyāya ca sādharmaṇaviññānappabandhapaṭibaddhattā tattha ca puggalavohāroti vuttam – **“sutanti puggalakiccappakāsana”**nti. Na hi puggalavohārahite dhammappabandhe savanakiriyā labbhatī.

Yassa cittasantānassātiādi pi ākārathameva evam-saddam gahetvā purimayojanāya aññathā atthayojanam dassetum vuttam. Tattha **ākārapaññattī** upādāpaññattī eva dhammānam pavattiākārupādānavasena tathā vuttā. **Sutanti visayaniddesoti** sotabbabhūto dhammo savanakiriyākattupuggalassa savanakiriyāvasena pavattiṭṭhānanti katvā vuttam. Cittasantānavinimuttassa paramatthato kassaci kattuabhāvepi saddavohārena buddhiparikappitabhedavacanicchāya cittasantānato aññam viya taṃsamaṅgiṃ katvā vuttam – **“cittasantānena taṃsamaṅgīno”**ti. Savanakiriyāvisayopi sotabbadhammo savanakiriyāvasena pavattacittasantānassa idha paramatthato kattubhāvato, savanavasena cippavattiyā eva vā savanakiriyābhāvato taṃkiriyākattu ca visayo hotīti katvā vuttam – **“taṃsamaṅgīno kattuvīsaye”**ti. Sutākārassa ca therassa sammānicchitabhāvato āha – **“gahaṇasanniṭṭhāna”**nti. Etena vā avadhāraṇattham evam-saddam gahetvā ayamatthayojanā katāti daṭṭhabbam.

Pubbe sutānam nānavihitānam suttasaṅkhātānam atthabyañjanānam upadhāritarūpassa ākārassa nidassanassa, avadhāraṇassa vā pakāsanasabhāvo evam-saddoti tadākārādiupadhāraṇassa puggalapaññattiyā upādānabhūta dhammappabandhabyāpārātāya vuttam – **“evanti puggalakiccaniddeso”**ti. Savanakiriyā pana puggalavādinopi viññānanirapekkhā natthīti visesato viññānabyāpāroti āha – **“sutanti viññānakiccaniddeso”**ti. Meti saddappavattiyā ekanteneva sattavisayattā viññānakiccassa ca tattheva samodahitabbato **“meti ubhayakiccayuttapuggalaniddeso”**ti vuttam. Avijjamānapaññattivijjamānapaññattisabhāvā yathākkamaṃ evam-saddasutasaddānam atthāti te tathārūpapaññattīupādānabyāpārābhāvena dassento āha – **“evanti puggalakiccaniddeso, sutanti viññānakiccaniddeso”**ti. Ettha ca karaṇakiriyākattukammavisesappakāsanavasena puggalabyāpāravisayapuggalabyāpāranidassanavasena gahaṇākāraggāhakatabbisayavisesaniddesavasena kattukaraṇabyāpārakattuniddesavasena ca dutiyādayo catasso atthayojanā dassitāti daṭṭhabbam.

Sabbassapi saddādhigamanīyassa atthassa paññattimukheneva paṭipajjitabbattā sabbapaññattīnaṅca vijjamānādivasena chasu paññattibhedesu antogadhattā tesu **“eva”**ntiādinam paññattīnam sarūpam niddhārento āha – **“evanti ca meti cā”**tiādi. Tattha evanti ca meti ca vuccamānassatthassa ākārādino dhammānam asallakkaṇabhāvato avijjamānapaññattibhāvoti āha – **“saccikaṭṭhaparamatthavasena avijjamānapaññattī”**ti. Tattha **saccikaṭṭhaparamatthavasenāti** bhūtatthauttamatthavasena. Idam vuttam hoti – yo māyāmarīciādayo viya abhūtattho, anussavādīhi gahetabbo viya anuttamattho ca na hoti, so rūpasaddādisabhāvo, rupanānubhavanādisabhāvo vā attho saccikaṭṭho paramattho cāti vuccati, na tathā **“evam me”**tipadānam atthoti. Etamevattham pākāṭataram katum **“kiñhettha ta”**ntiādi vuttam. Sutanti pana saddāyatanam sandhāyāha – **“vijjamānapaññattī”**ti. Teneva hi **“yañhi tam ettha sotena upaladdha”**nti vuttam. **“Sotadvārānusārena upaladdha”**nti pana vutte atthabyañjanādi sabbam labbhati. **Tam tam upādāya vattabbatoti** sotapathamāgate dhamme upādāya tesam upadhāritākārādino paccāmasanavasena evanti, sasantatipariyāpanne khandhe upādāya meti vattabbattāti attho. Diṭṭhādisabhāvarahite saddāyatane pavattamānopi sutavohāro **“dutyam tatiya”**ntiādiko viya paṭhamādīni diṭṭhamutaviññāte apekkhitvā pavattoti āha – **“diṭṭhādīni upanidhāya vattabbato”**ti. Assutam na hotīti hi

sutanti pakāsito ayamatthoti.

Attanā paṭividdhā suttassa pakāravisesā evanti therena paccāmaṭṭhāti āha – “**asammohaṃ dīpetī**”ti. **Nānappakārapaṭivedhasamattho hotīti** etena vakkhamānassa suttassa nānappakāratam duppaṭivijjhatañca dasseti. **Sutassa asammosaṃ dīpetīti** sutākārassa yāthāvato dassiyamānattā vuttaṃ. **Asammohenāti** sammohābhāvena, paññāya eva vā savanakālasambhūtāya taduttarikālapaññāsiddhi. Evaṃ **asammosenāti** etthāpi vattabbaṃ. Byañjanānaṃ paṭivijjhitaṃ ākāro nātigambhīro, yathāsutadhāraṇameva tattha karaṇīyanti satiyā byāpāro adhiko, paññā tattha guṇībhūtāti vuttaṃ – “**paññāpubbaṅgamāyā**”tiādi “paññāya pubbaṅgamā”ti katvā. Pubbaṅgamatā cettha padhānabhāvo “manopubbaṅgamā”tiādīsu (dha. pa. 1, 2) viya, pubbaṅgamatāya vā cakkhuvīññānādīsu āvajjanādīnaṃ viya appadhānante paññā pubbaṅgamā etissāti ayampi attho yujjati, evaṃ **satipubbaṅgamāyāti** etthāpi vuttanayānusārena yathāsambhavamatto veditaṃ. **Atthabyañjanasampannasāti** atthabyañjanaparipuṇṇassa, saṅkāsanappakāsanavivaraṇavibhajanauttānīkaraṇapaññāttivasena chahi atthapadehi akkharapadabyañjanākāraniruttiniddesavasena chahi byañjanapadehi ca samannāgatassāti vā attho daṭṭhabbo.

Yonisomanasikāraṃ dīpeti evaṃ-saddena vuccamānānaṃ ākāranidassanāvadhāraṇatthānaṃ aviparītasaddhammavisayattāti adhippāyo. **Avikkhepaṃ dīpetīti** “cittapariyādānaṃ kattha bhāsita”ntiādi pucchāvase pakaraṇappattassa vakkhamānassa suttassa savanaṃ samādhānamantarena na sambhavatīti katvā vuttaṃ. **Vikkhittacittasāti**ādi tassevatthassa samatthanavasena vuttaṃ. **Sabbasampattiyāti** atthabyañjanadesakappayojanādisampattiyā. Aviparītasaddhammavisayehi viya ākāranidassanāvadhāraṇatthehi yonisomanasikāraṃ, saddhammassavanena viya ca avikkhepassa yathā yonisomanasikārena phalabhūtena attasammāpaṇidhipubbekatapuññatānaṃ siddhi vuttā tadavinābhāvato. Evaṃ avikkhepena phalabhūtena kāraṇabhūtānaṃ saddhammassavanasappurisūpanissayānaṃ siddhi dassetabbā siyā assutavato sappurisūpanissayarahitassa ca tadabhāvato. **Na hi vikkhittacittoti**ādinā samatthanavacanena pana avikkhepena kāraṇabhūtena sappurisūpanissayena ca phalabhūtassa saddhammassavanassa siddhi dassitā. Ayaṃ panettha adhippāyo yutto siyā, saddhammassavanasappurisūpanissayā na ekantena avikkhepassa kāraṇaṃ bāhiraṅgattā, avikkhepo pana sappurisūpanissayo viya saddhammassavanassa ekantakāraṇanti. Evampi avikkhepena sappurisūpanissayasiddhijotanā na samatthitāva. No na samatthitā vikkhittacittānaṃ sappurisapayirupāsānābhāvassa atthasiddhattā. Ettha ca purimaṃ phalena kāraṇassa siddhidassanaṃ nadīpūrena viya upari vuṭṭhisabbhāvassa, dutiyaṃ kāraṇena phalassa siddhidassanaṃ daṭṭhabbaṃ ekantavassinā viya meghavuṭṭhānena vuṭṭhippavattiyā.

Bhagavato vacanassa atthabyañjanappabhedaparicchedavasena sakalasāsanasampattiogāhanākāro niravasesaparahitaparīpūrītākāraṇanti vuttaṃ – “**evaṃ bhaddako ākāro**”ti. Yasmā na hotīti sambandho. **Pacchimakakkadvayasampattinti** attasammāpaṇidhipubbekatapuññatāsāṅkhāttaguṇadvayaṃ. Aparāparaṃ vuttiyā cettha cakkabhāvo, caranti etehi sattā sampattibhavesūti vā. Ye sandhāya vuttaṃ – “cattārimāni, bhikkhave, cakkāni, yehi samannāgatānaṃ devamanussānaṃ catucakkaṃ vattatī”tiādi (a. ni. 4.31). Purimapacchimabhāvo cettha desanākkamavasena daṭṭhabbo. **Pacchimakakkadvayasiddhiyāti** pacchimakakkadvayassa atthitāya. Sammāpaṇihitatto pubbe ca katapuñño suddhāsāyo hoti tadasiddhihetūnaṃ kilesānaṃ dūrībhāvatoti āha – “**āsayasuddhi siddhā hotī**”ti. Tathā hi vuttaṃ – “sammāpaṇihitaṃ cittaṃ, seyyaso naṃ tato kare”ti (dha. pa. 43), “katapuññosi tvam, ānanda, padhānamanuyuñja, khippaṃ hohisi anāsavo”ti (dī. ni. 2.207) ca. Tenevāha – “**āsayasuddhiyā adhigamabyattisiddhi**”ti. **Payogasuddhiyāti** yonisomanasikārapubbaṅgamassa dhammassavanappayogassa visadabhāvena. Tathā cāha – “**āgamabyattisiddhi**”ti, sabbassa vā kāyavacīpayogassa niddosabhāvena. Parisuddhakāyavacīpayogo hi vipaṭisārābhāvato avikkhittacitto pariyaṭṭiyānaṃ visārado hotīti.

Nānappakārapaṭivedhadīpakenātiādinā atthabyañjanesu therassa evaṃ-saddasuta-saddānaṃ asammohadīpanato catuppaṭisambhidāvasena atthayojanaṃ dasseti. Tattha **sotappabhedapaṭivedhadīpakenāti** etena ayaṃ suta-saddo evaṃ-saddasannidhānato, vakkhamānāpekkhāya vā sāmāññeneva sotabbadhammavisesaṃ āmasatīti dasseti. Manodīṭṭhikaraṇānaṃ

pariyattidhammānaṃ anupekkhanasuppaṭivedhā visesato manasikārappaṭibaddhāti te vuttanayena yonisomanasikāradīpakena evaṃ-saddena yojetvā, savanadhāraṇavacīparicayā pariyattidhammā visesena sotāvadhānappaṭibaddhāti te avikkhepadīpakena suta-saddena yojetvā dassento sāsanasampattiya dhammassavane ussāhaṃ janeti. Tattha **dhammāti** pariyattidhammā. **Manasā anupekkhitāti** “idha sīlaṃ kathitaṃ, idha samādhī, idha paññā, ettakā ettha anusandhaya”tiādīnā nayena manasā anu anu pekkhitā. **Diṭṭhiyā suppaṭividdhāti** nijjhānakkhanti bhūtāya, ñātapariññāsānkhātāya vā diṭṭhiyā tattha tattha vuttarūpārūpadhamme “iti rūpaṃ, ettakaṃ rūpa”ntiādīnā suṭṭhu vavatthapetvā paṭividdhā.

Sakalena vacanenāti pubbe tīhi padehi visuṃ visuṃ yojitattā vuttaṃ. **Asappurisabhūminti** akataññutaṃ, “idhekacco pāpabhikkhu tathāgatappaveditaṃ dhammavinayaṃ pariyāpuṇitvā attano dahatī”ti (pārā. 195) evaṃ vuttaṃ anariyavohārāvattaṃ. Sā eva anariyavohārāvattā asaddhammo. Nanu ca ānandattherassa “mamedāṃ vacana”nti adhimānassa, mahākassapattherādīnañca tadāsānkhāya abhāvato asappurisabhūmisamatikkamādivacanaṃ niratthakanti? Nayidamevaṃ, “evaṃ me suta”nti vadantena ayampi attho vibhāvitoti dassanato. Keci pana “devatānaṃ parivitakkāpekkhaṃ tathāvacananti edisī codanā anavakāsā”ti vadanti. Tasmīṃ kira khaṇe ekaccānaṃ devatānaṃ evaṃ cetaso parivitakko udapādi “bhagavā parinibbuto, ayañca āyasmā desanākusalo idāni dhammaṃ deseti, sakyakulappasuto tathāgatassa bhātā cūlapituputto, kiṃ nu kho sayāṃ sacchikataṃ dhammaṃ deseti, udāhu bhagavato eva vacanaṃ yathāsuta”nti, evaṃ tadāsānkitappakārato asappurisabhūmisamokkamādito atikkamādi vibhāvitanti. **Attano adahantoti** “mameda”nti attani aṭṭhapento. **Appetīti** nidasseti. **Diṭṭhadhammikasamparāyikaparamatthesu** yathārahaṃ satte netīti netti, dhammoyeva netti **dhammanetti**.

Daḷhataraniviṭṭhā vicikicchā **kañkhā**. Nātisamsappanaṃ matibhedamattaṃ **vimati**. **Assaddhiyaṃ vināseti** bhagavatā bhāsītattā sammukhā cassa paṭiggahitattā khalitaduruttādiggahaṇadosābhāvato ca. Ettha ca pañcamādayo tisso atthayojanā ākārādīatthesu aggahitavisesameva evaṃ-saddaṃ gahetvā dassitā, tato parā catasso ākārattameva evaṃ-saddaṃ gahetvā vibhāvitā, pacchimā pana tisso yathākkamaṃ ākārattaṃ nidassanattaṃ avadhāraṇatthañca evaṃ-saddaṃ gahetvā yojitāti daṭṭhabbaṃ.

Eka-saddo aññasetṭhaasahāyasañkhādīsu dissati. Tathā hesa “sassato attā ca loko ca, idameva saccāṃ moghamaññanti ittheke abhivadanti”tiādīsu (ma. ni. 3.27) aññatthe dissati, “cetaso ekodibhāva”ntiādīsu (dī. ni. 1.228; pārā. 11) setṭhe, “eko vūpakatṭho”tiādīsu (dī. ni. 1.405; 2.215; ma. ni. 1.80; sam. ni. 3.63; cūlava. 445) asahāye “ekova kho, bhikkhave, khaṇo ca samayo ca brahmacariyavāsāyā”tiādīsu (a. ni. 8.29) sañkhāyaṃ. Idhāpi sañkhāyanti dassento āha – “**ekanti gaṇanaparicchedaniddeso**”ti. **Kālañca samayañcāti** yuttakālañca paccayasāmaggiñca. **Khaṇoti** okāso. Tathāgatuppādādiko hi maggabrahmacariyassa okāso tappaccayappaṭilābhahetuttā. Khaṇo eva ca samayo. Yo khaṇoti ca samayoti ca vuccati, so eko evāti hi attho. **Mahāsamayoti** mahāsamūho. **Samayopi khoti** sikkhāpadapūraṇassa hetupi. **Samayappavādaketi** diṭṭhippavādake. Tattha hi nisinnā titthiyā attano attano samayaṃ pavadantīti. **Atthābhisamayāti** hitappaṭilābhā. Abhisametabboti abhisamayo, abhisamayo attho **abhisamayaṭṭhoti** pīlanādīni abhisametabbabhāvena ekibhāvaṃ upanetvā vuttāni. Abhisamayassa vā paṭivedhassa visayabhūto attho **abhisamayaṭṭhoti** tāneva tathā ekattena vuttāni. Tattha **pīlanaṃ** dukkhasaccassa taṃsamaṅgino hiṃsanaṃ avipphārikatākaraṇaṃ. **Santāpo** dukkhadukkhatādivasena santapanāṃ paridhanaṃ.

Tattha sahakārikāraṇe sanijjhaṃ sameti samavetīti **samayo**, samavāyo. Sameti samāgacchati ettha maggabrahmacariyaṃ tadādhārapuggalehīti **samayo**, khaṇo. Sameti ettha, etena vā saṃgacchati satto, sabhāvadhammo vā sahaṇatādīhi, uppādādīhi vāti **samayo**, kālo. Dhammappavattimattāya atthato abhūtopi hi kālo dhammappavattiyā adhikaraṇaṃ karaṇaṃ viya ca kappanāmattasiddhena rūpena voharīyatīti. Samaṃ, saha vā avayavānaṃ ayaṇaṃ pavatti avatṭhānanti **samayo**, samūho yathā “samudāyo”ti. Avayavasahāvattṭhānameva hi samūhoti. Avasesapaccayānaṃ samāgame eti phalaṃ etasmā uppajjati pavattati cāti **samayo**, hetu yathā “samudayo”ti. Sameti saṃyojanabhāvato sambaddho eti attano visaye pavattati, daḷhaggahaṇabhāvato vā saṃyuttā ayanti pavattanti sattā yathābhinivesaṃ etenāti **samayo**, diṭṭhi. Diṭṭhisamyojanena hi sattā ativiya bajjantīti. Samiti saṅgati samodhānanti **samayo**, paṭilābho. Samassa yānaṃ, sammā vā yānaṃ apagamoti **samayo**, pahānaṃ. Abhimukhaṃ ñāṇena sammā etabbo abhisametabboti **abhisamayo**, dhammānaṃ aviparīto sabhāvo. Abhimukhabhāvena sammā eti gacchati

bujjhatīti **abhisamayo**, dhammānaṃ aviparītasabhāvāvabodho. Evaṃ tasmim̄ tasmim̄ atthe samayasaddassa pavatti veditabbā. Samayasaddassa atthuddhāre abhisamayasaddassa udāharaṇaṃ vuttanayena veditabbaṃ. **Assāti** samayasaddassa. **Kālo attho** samavāyādīnaṃ atthānaṃ idha asambhavato, desadesakaparīsaṇaṃ viya suttassa nidānabhāvena kālassa apadisitabbato ca.

Kasmā panettha aniyamitavaseneva kālo niddiṭṭho, na utusaṃvaccharādivasena niyametvāti āha – **“tattha kiñcāpī”**tiādi. Utusaṃvaccharādivasena niyamaṃ akatvā samayasaddassa vacane ayampi guṇo laddho hotīti dassento **“ye vā ime”**tiādīmāha. Sāmaññajotanā hi visese avatiṭṭhatīti. Tattha **diṭṭhadhammasukhavihārasamayo** devasikaṃ jhānasamāpattīhi vītināmanakālo, visesato sattasattāhāni. **Suppakāsāti** dasasahassilokadhātuyā pakampanaobhāsapātubhāvādīhi pākaṭā. Yathāvuttabhedesu eva samayesu ekadesaṃ pakārantarehi saṅgahetvā dassetuṃ **“yo cāya”**ntiādīmāha. Tathā hi ñāṇakiccasamayo atthapattipattisamayo ca abhisambodhisamayo, ariyatunhībhāvasamayo diṭṭhadhammasukhavihārasamayo, karuṇākiccaparahitappaṭipattidhammikathāsamayo desanāsamayo yeva.

Karaṇavacanena niddeso katoti sambandho. **Tatthāti** abhidhammavinayesu. **Tathāti** bhummakaraṇehi. **Adhikaraṇattho** ādhārattho. Bhāvo nāma kiriyā, kiriyāya kiriyantaralakkhaṇaṃ **bhāvenabhāvalakkhaṇaṃ**. Tattha yathā kālo sabhāvadhammaparicchinno sayamaṃ paramatthato avijjamānopi ādhārabhāvena paññāto taṅkhaṇappavattānaṃ tato pubbe parato ca abhāvato “pubbaṅhe jāto, sāyanhe gacchati”ti ca ādīsu, samūho ca avayavavinimutto avijjamānopi kappanāmattasiddho avayavānaṃ ādhārabhāvena paññāpīyati “rukkhe sākhā, yavarāsīyaṃ sambhūto”tiādīsu, evaṃ idhāpīti dassento āha – **“adhikaraṇaṃ...pe... dhammāna”**nti. Yasmim̄ kāle, dhammapuñje vā kāmāvacaraṃ kusalaṃ cittaṃ uppannaṃ hoti, tasmim̄ eva kāle, dhammapuñje ca phassādayopi hontīti ayañhi tattha attho. Yathā “gāvīsu duyhamānāsu gato, duddhāsu āgato”ti dohanakiriyāya gamanakiriyā lakkhīyati, evaṃ idhāpīti “yasmim̄ samaye, tasmim̄ samaye”ti ca vutte “sati”ti ayamattho viññāyamāno eva hoti padatthassa sattāvīrahābhāvatoti samayassa sattākiriyāya cittaṃ uppādakiriyā, phassādīnaṃ bhavanakiriyā ca lakkhīyatīti. **Yasmim̄ samayeti** yasmim̄ navame khaṇe, yasmim̄ yonisomanasikārādihetumhi, paccayasamavāye vā sati kāmāvacaraṃ kusalaṃ cittaṃ uppannaṃ hoti, tasmim̄ yeva khaṇe hetumhi paccayasamavāye ca phassādayopi hontīti ubhayattha samayasadde bhummaniddeso kato lakkhaṇabhūtabhāvayuttoti dassento āha – **“khaṇa...pe... lakkhīyati”**ti.

Hetuattho karaṇattho ca sambhavati “annena vasati, ajjhenena vasati, pharasunā chindati, kudālena khaṇatī”tiādīsu viya. Vītikkamañhi sutvā bhikkhusaṅghaṃ sannipātāpetvā otiṇṇe vatthusmim̄ taṃ puggalaṃ paṭipucchitvā vīgārahitvā ca taṃ taṃ vatthuṃ otiṇṇakālaṃ anatikkamitvā teneva kālena sikkhāpadāni paññāpento bhagavā viharati sikkhāpadapaññattihetuṅca apekkhamāno tatiyapārājikādīsu viya.

Accantameva ārambhato paṭṭhāya yāva desanāniṭṭhānaṃ parahitappaṭipattisaṅkhātena **karuṇāvihārena. Tadattahajotanatthanti** accantasamyogattahajotanatthaṃ. **Upayogavacananiddeso kato** yathā “māsaṃ ajjhetī”ti. **Porāṇāti** aṭṭhakathācariyā. **Abhilāpamattabhedoti** vacanamattena viseso. Tena suttavinayesu vibhattibyattayo katoti dasseti.

Idāni “bhagavā”ti imassa atthaṃ dassento āha – **“bhagavāti garū”**tiādi. **Bhagavāti vacanaṃ seṭṭhanti** seṭṭhavācakaṃ vacanaṃ, seṭṭhaguṇasahacaraṇaṃ seṭṭhanti vuttaṃ. Atha vā vuccatīti vacanaṃ, attho. Yasmā yo “bhagavā”ti vacanena vacanīyo attho, so seṭṭhoti attho. **Bhagavāti vacanamuttamanti** etthāpī eseva nayo. **Gāravayuttoti** garubhāvayutto garuṇayogato. Garukaraṇaṃ vā sātisayaṃ arahatīti gāravayutto, gāravārohoti attho. Sippādisikkhāpakā garū honti, na ca gāravayuttā, ayaṃ pana tādiso na hoti, tasmā garūti vatvā gāravayuttoti vuttanti keci. **Vutto yeva**, na idha vattabbo visuddhimaggassa imissā aṭṭhakathāya ekadesabhāvatoti adhippāyo.

Dhammasarīraṃ paccakkhaṃ karotīti “yo vo, ānanda, mayā dhammo ca vinayo ca desito paññatto, so vo mamaccayena satthā”ti (dī. nī. 2.216) vacanato dhammassa satthubhāvaparīyāyo vijjatīti katvā vuttaṃ. **Vajirasaṅghātasamānakāyo** parehi abhejjasarīratā. Na hi bhagavato rūpakāye kenaci sakkā

antarāyo kātunti. **Desanāsampattiṃ niddisati** vakkhamānassa sakalasuttassa evanti niddisanato. **Sāvakasampattiṃ niddisati** paṭisambhidāpattena pañcasu ṭhānesu bhagavatā etadagge ṭhapitena mayā mahāsāvakena sutam, tañca kho mayā sutam, na anussutikaṃ, na paramparābhatanti imassa atthassa dīpanato. **Kālasampattiṃ niddisati** “bhagavā”ti padassa sannidhāne payuttassa samayasaddassa kālassa buddhuppādappaṭimaṇḍitabhāvadīpanato. Buddhuppādaparamā hi kālasampadā. Tenetaṃ vuccati –

“Kappakasāye kaliyuge, buddhuppādo aho mahacchariyaṃ;
Hutāvahamaññhe jātaṃ, samuditamakaramaravinda”nti. (dī. ni. ṭī. 1.1; saṃ. ni. ṭī. 1.1.1 devatāsaṃyutta);

Bhagavāti desakasampattiṃ niddisati guṇavasiṭṭhasattuttamagarugāravādhivacanabhāvato.

Evamṇāmake nagareti kathaṃ panetaṃ nagaraṃ evamṇāmakeṃ jātanti? Vuccate, yathā kākandassa isino nivāsaṭṭhāne māpitā nagarī kākandī, mākandassa nivāsaṭṭhāne māpitā mākandī, kusambassa nivāsaṭṭhāne māpitā kosambīti vuccati, evaṃ savatthassa isino nivāsaṭṭhāne māpitā nagarī sāvattthīti vuccati. Evaṃ tāva akkharacintakā vadanti. Aṭṭhakathācariyā pana bhaṇanti – “yaṃ kiñci manussānaṃ upabhogaparibhogaṃ, sabbamettha atthī”ti sāvattthi. Satthasamāyoge ca ‘kiṃ bhaṇḍamatthī’ti pucchite ‘sabbamatthī’ti vacanamupādāya sāvattthi.

“Sabbadā sabbūpakaraṇaṃ, sāvattthiyaṃ samohitaṃ;
Tasmā sabbamupādāya, sāvattthīti pavuccati. (ma. ni. aṭṭha. 1.14; khu. pā. aṭṭha. 5.maṅgalasuttavaṇṇanā; udā. aṭṭha. 5; paṭi. ma. 2.1.184);

“Kosalānaṃ puraṃ rammaṃ, dassaneyyaṃ manoramaṃ;
Dasahi saddehi avivittaṃ, annapānasamāyutaṃ.

“Vuddhiṃ vepullataṃ pattam, iddham phītam manoramaṃ;
Āḷakamandāva devānaṃ, sāvattthipuramuttama”nti. (ma. ni. aṭṭha. 1.14; khu. pā. aṭṭha. 5.maṅgalasuttavaṇṇanā);

Avisesenāti na visesena, viharabhāvasāmaññenāti attho. **Iriyāpathavihāro...pe... vihāresūti** iriyāpathavihāro dibbavihāro brahmavihāro ariyavihāroti etesu catūsu vihāresu. **Samaṅgiparidīpananti** samaṅgibhāvapariḍāpanaṃ. **Etanti** viharatīti etaṃ padaṃ. Tathā hi taṃ “idhekacco gihisaṃsaṭṭho viharati sahanandī sahasokī”tiādīsu (saṃ. ni. 4.241) iriyāpathavihāre āgataṃ, “yasmim samaye, bhikkhave, bhikkhu vivicceva kāmehi ... paṭhamaṃ jhānaṃ upasampajja viharatī”tiādīsu (dha. sa. 499; vibha. 624) dibbavihāre, “so mettāsahagatena cetasā ekaṃ disaṃ pharivā viharatī”tiādīsu (dī. ni. 1.556; 3.308; ma. ni. 1.77, 459, 509; 2.309, 315, 451, 471; 3.230, vibha. 642, 643) brahmavihāre, “so khoḥaṃ, aggivessana, tassāyeva kathāya pariyoṣāne tasmimyeva purimasmim samādhinimutte ajjhataṃ cittaṃ saṅṭhapemi sannisādemī ekodiṃ karomi, samādahāmi, yena sudaṃ niccakkappaṃ viharāmi”tiādīsu (ma. ni. 1.387) ariyavihāre.

Tattha iriyanaṃ pavattanaṃ iriyā, kāyappayogo. Tassā pavattanūpāyabhāvato ṭhānādi **iriyāpatho**. Ṭhānasamaṅgī vā hi kāyena kiñci kareyya gamanādīsu aññatarasamaṅgī vā. Atha vā iriyati pavattati etena attabhāvo, kāyakiccaṃ vāti iriyā, tassā pavattiyā upāyabhāvato pathoti iriyāpatho, ṭhānādi eva. So ca atthato gatinivattiādiākārena pavatto catusantirūpappabandho eva. Viharaṇaṃ, viharati etenāti vā **vihāro**. Divi bhavo dibbo, tattha bahulappavattiyā brahmapārisajjādevaloke bhavoti attho. Tattha yo dibbānubhāvo, tadatthāya saṃvattatīti vā dibbo, abhiññābhinihāravasena mahāgatikattā vā dibbo, dibbo ca so vihāro cāti **dibbavihāro**, catasso rūpāvacarasamāpattiyō. Arūpasamāpattiyopi ettheva saṅghaṃ gacchanti. Brahmānaṃ, brahmāno vā viharā **brahmavihārā**, catasso appamaññāyo. Ariyo, ariyānaṃ vā viharo **ariyavihāro**, cattāri sāmāññaphalāni. **So hi ekaṃ iriyāpathabādhananti**ādi yadipi bhagavā ekenapi iriyāpathena cirataraṃ kālaṃ attabhāvaṃ pavattetaṃ sakkoti, tathāpi upādinnakasarīrassa ayaṃ sabhāvoti dassetaṃ vuttaṃ. Yasmā vā bhagavā yattha kathaci vasanto veneyyānaṃ dhammaṃ desento

nānāsamāpattīhi ca kālaṃ vītināmento vasatīti sattānaṃ attano ca vividhahitasukhaṃ harati upaneti uppādeti, tasmā vividhaṃ haratīti viharatīti evamettha attho veditabbo.

Jetassa rājakumārassāti ettha attano paccatthikajanaṃ jinātīti jeto. Sotasaddo viya hi kattusādhano jetasaddo. Atha vā rañña pasenadikosalena attano paccatthikajane jite jātoti jeto. Rañño hi jayaṃ āropetvā kumāro jītavāti jetoti vutto. Maṅgalakāmatāya vā tassa evaṃnāmameva katanti jeto. Maṅgalakāmatāya hi jeyyoti etasmiṃ atthe jetoti vuttaṃ. **Vitthāro panāti**tiadinā “anāthapiṇḍikassa ārāme”ti ettha sudatto nāma so, gahapati, mātāpitūhi katanāmasasena, sabbakāmasamiddhatāya pana vigatamaccheratāya karuṇādiguṇasamaṅgitāya ca niccakālaṃ anāthānaṃ piṇḍamadāsi. Tena anāthapiṇḍikoti saṅkhaṃ gato. Āramanti ettha pāṇino, visesena vā pabbajitāti **ārāmo**, tassa pupphaphalādisobhāya nātīdūranaccāsannatādīpañcavidhasenāsanāṅgasampattiyā ca tato tato āgamma ramanti abhiramanti, anukkaṅṭhitā hutvā nivasantīti attho. Vuttapakārāya vā sampattiyā tattha tattha gatepi attano abhantaramyeva ānetvā rametīti ārāmo. So hi anāthapiṇḍikena gahapatinā jetassa rājakumārassa hatthato aṭṭhārasahiraññaḷoṭīhi santhārena kiṇitvā aṭṭhārasahiraññaḷoṭīhi senāsanāni kārapetvā aṭṭhārasahiraññaḷoṭīhi vihāramahaṃ niṭṭhāpetvā evaṃ catupaññāsahiraññaḷoṭīpariccāgena buddhappamukhassa bhikkhusaṅghassa niyyātito, tasmā “anāthapiṇḍikassa ārāmo”ti vuccatīti imamatthaṃ nidasseti.

Tatthāti “ekaṃ samayaṃ bhagavā sāvatthiyaṃ viharati jetavane anāthapiṇḍikassa ārāme”ti yaṃ vuttaṃ vākyam, tattha. **Siyāti** kassaci evaṃ parivittakko siyā, vakkhamānākārena kadāci codeyya vāti attho. **Atha tattha viharatīti** yadi jetavane anāthapiṇḍikassa ārāme viharati. **Na vattabbanti** nānāṭṭhānabhūtattā sāvatthijetavanānaṃ, “ekaṃ samaya”nti ca vuttattāti adhippāyo. Idāni codako tameva attano adhippāyaṃ “**na hi sakkā**”tiadinā vivarati. Itaro sabbametaṃ aviparītaṃ atthaṃ ajānantena tayā vuttanti dassento “**na kho panetaṃ evaṃ daṭṭhabba**”ntiadinā. Tattha **etanti** “sāvatthiyaṃ viharati jetavane anāthapiṇḍikassa ārāme”ti etaṃ vacanaṃ. **Evanti** “yadi tāva bhagavā”tiadinā yaṃ taṃ bhavatā coditaṃ, taṃ atthato evaṃ na kho pana daṭṭhabbaṃ, na ubhayattha apubbaṃ acarimaṃ vihāradassanathanti attho. Idāni attanā yathādhippetam aviparītamattaṃ, tassa ca paṭikacceva vuttabhāvaṃ, tena ca appaṭividdhataṃ pakāsento “**nanu avocumha...pe... jetavane**”ti āha. Evampi “jetavane anāthapiṇḍikassa ārāme viharati”cceva vattabbam, na “sāvatthiya”nti codanaṃ manasi katvā vuttaṃ – “**gocaragāmanidassanatta**”ntiadi.

Avassañcetta gocaragāmakittanaṃ kattabbam. Tathā hi taṃ yathā jetavanādikittanaṃ pabbajitānuggahakaraṇāḍianekappayojanaṃ, evaṃ gocaragāmakittanampi gahaṭṭhānuggahakaraṇādivividhapayojananti dassento “**sāvatthivacanaṇā**”tiadinā. Tattha paccayaggahaṇena upasaṅkamapayirupāsanaṃ okāsādānena dhammadesanāya saraṇesu sīlesu ca patīṭṭhāpanena yathūpanissayaṃ uparivisesādhigamāvahanena ca **gahaṭṭhānuggahakaraṇam**, uggahaparipucchānaṃ kammaṭṭhānānuyogassa ca anurūpavasaṇaṭṭhānapariggahenettha **pabbajitānuggahakaraṇam** veditabbam. **Karuṇāya upagamaṇam**, na lābhādinimittaṃ. **Paññāya apagamaṇam**, na virodhādinimittanti upagamanāpagamaṇaṃ nirupakkilesataṃ vibhāveti. **Dhammikasukhaṃ** nāma anavajjasukhaṃ. **Devatānaṃ upakārahulata** janavivittatāya. Pacurajanavivittaṇi ṭhānaṃ devā upasaṅkamitabbam maññanti. **Tadatthapariniṭṭhādananti** lokatthanipphādanam, buddhakiccasampādananti attho. **Evamādināti ādi**-saddena sāvatthikittanena rūpakāyassa anuggaṇhanaṃ dasseti, jetavanādikittanena dhammakāyassa. Tathā purimena parādhīnakiriyākaraṇam, dutiyena attādhīnakiriyākaraṇam. Purimena vā karuṇākiccaṃ, itarena paññākiccaṃ. Purimena cassa paramāya anukampāya samannāgamaṃ, pacchimena paramāya upekkhāya samannāgamaṃ dīpeti. Bhagavā hi sabbasatte paramāya anukampāya anukampati, na ca tattha sinehadosaṇupatito paramupekkhakabhāvato. Upekkhako ca na parahitasukhakarāṇe apposukko mahākāruṇikabhāvato. Tassa mahākāruṇikatāya lokanāthata, upekkhatāya attanāthata.

Tathā hesa bodhisattabhūto mahākāruṇāya sañcoditamānaso sakalalokahitāya ussukkamāpanno mahābhīnīhārato paṭṭhāya tadatthanipphādanatthaṃ puññañāṇasambhāre sampādentō aparimitaṃ kālaṃ anappakaṃ dukkhamanubhosi, upekkhatāya sammā patitehi dukkhehi na vikampitā. Mahākāruṇikatāya saṃsārābhīmukhatā, upekkhatāya tato nibbindanā. Tathā upekkhatāya nibbānābhīmukhatā, mahākāruṇikatāya tadadhigamo. Tathā mahākāruṇikatāya paresaṃ ahimsāpanaṃ, upekkhatāya sayam

parehi abhāyanam. Mahākāruṇikatāya param rakkhato attano rakkhaṇam, upekkhakatāya attānam rakkhato paresam rakkhaṇam. Tenassa attahitāya paṭipannādīsu catutthapuggalabhāvo siddho hoti. Tathā mahākāruṇikatāya saccādhīṭṭhānassa ca cāgādhīṭṭhānassa ca pāripūrī, upekkhakatāya upasamādhīṭṭhānassa ca paññādhīṭṭhānassa ca pāripūrī. Evaṃ purisuddhāsayaṃ appayogassa mahākāruṇikatāya lokahitattameva rajjasampadādibhavasampattiyā upagamanam, upekkhakatāya tiṇyāyapi amaññamānassa tato apagamanam. Iti suvisuddhāupagamāpagamassa mahākāruṇikatāya lokahitattameva dānavasena sampattīnam pariccajanā, upekkhakatāya cassa phalassa attano apaccāsīsanā. Evaṃ samudāgamanato paṭṭhāya acchariyabbhutaḡaṇasamannāgatassa mahākāruṇikatāya paresam hitasukhattham atidukkarakāritā, upekkhakatāya kāyampi analaṅkāritā.

Tathā mahākāruṇikatāya carimattabhāve jiṇṇaturamatadassanena sañjātasamvego, upekkhakatāya ulāresu devabhogasadisesu bhogesu nirapekkho mahābhinnikkhamaṇam nikkhami. Tathā mahākāruṇikatāya “kiccham vatāyam loko āpanno” tiādīnā (dī. ni. 2.57; sam. ni. 2.4, 10) karuṇāmukheneva vipassanārambho, upekkhakatāya buddhabhūtaṇṇassa satta sattāhāni vivekasukheneva vītināmanaṇam. Mahākāruṇikatāya dhammagambhīratam paccavekkhitvā dhammadesanāya appossukkanam āpajjitvāpi mahābrahmuno ajjhesanāpadesena okāsakaraṇam, upekkhakatāya pañcavaggiyādiveneyyānam ananurūpasamudācārepi anaññathābhāvo. Mahākāruṇikatāya katthaci paṭighātābhāvenassa sabbattha amittasaññābhāvo, upekkhakatāya katthacipi anurodhābhāvena sabbattha sinehasanthavābhāvo. Mahākāruṇikatāya paresam pasādanā, upekkhakatāya pasannākārehi na vikampanā. Mahākāruṇikatāya dhammānurāgābhāvena tattha ācariyamuttībhāvo, upekkhakatāya sāvakanurāgābhāvena parivāraparikammatābhāvo. Mahākāruṇikatāya dhammam desetum parehi saṃsaggamupagacchatopi upekkhakatāya na tattha abhirati. Mahākāruṇikatāya gāmadīnam āsannaṭṭhāne vasatopi upekkhakatāya araññāṭṭhāne eva viharanaṇam. Tena vuttam – **“purimenassa paramāya anukampāya samannāgamaṇam dīpeti”**ti.

Tanti tatrāti padaṇ. “Desakālaparidīpana”nti ye desakālā idha viharanaṇakiriyāvisesanabhāvena vuttā, tesam paridīpananti dassento **“yam samayam...pe... dīpeti”**ti āha. Tam-saddo hi vuttassa atthassa paṭiniddeso, tasmā idha kālassa desassa vā paṭiniddeso bhavitumarahati, na aññassa. Ayaṇ tava tatra-saddassa paṭiniddesabhāve atthavibhāvanā. Yasmā pana idisesu ṭhānesu tatra-saddo dhammadesanāvīsīṭṭham desakālañca vibhāveti, tasmā vuttam – **“bhāsittabbayutte vā desakāle dīpeti”**ti. Tena **tatrāti** yatra bhagavā dhammadesanattam bhikkhū ālapati bhāsati, tādise dese, kāle vāti attho. **Na hīti**ādīnā tamevattham samattheti. Nanu ca yattha ṭhito bhagavā “akālo kho tāvā” tiādīnā bhāyissa dhammadesanaṇam paṭikkhipi, tattheva antaravīthiyam ṭhito tassa dhammam desesīti? Saccametam, adesetabbakāle adesanāya idaṇ udāharaṇam. Tenevāha – **“akālo kho tāvā”**ti.

Yam pana tattha vuttam – “antaragharaṇam pavīṭṭhamhā”ti, tampi tassa akālabhāvasseva pariyāyena dassanattam vuttam. Tassa hi tadā addhānaparissamena rūpakāye akammaññatā ahosi, balavapīvegena nāmakāye. Tadubhayassa vūpasamaṇam āgamento papañcaparihārattham bhagavā “akālo kho”ti pariyāyena paṭikkhipi. Adesetabbadese adesanāya pana udāharaṇam “atha kho bhagavā maggā okkamma aññatarasmiṇ rukkhamūle nisīdi (sam. ni. 2.154), vihārapacchāyāyam paññatte āsane nisīdi”ti (dī. ni. 1.363) ca evamādikam idha ādisaddena saṅgahitam. “Atha kho so, bhikkhave, bālo idha pubbe nesādo idha pāpāni kammāni karitvā” tiādīsu (ma. ni. 3.251) padapūraṇamatte kho-saddo, “dukkham kho agāro viharatī appatīso” tiādīsu (a. ni. 4.21) avadhāraṇe, “kittāvatā nu kho, āvuso, satthu pavivittassa viharato sāvakā vivekam nānusikkhanti” tiādīsu (ma. ni. 1.31) ādikālatthe, vākyārambheti attho. Tattha padapūraṇena vacanālaṅkāramattam kataṇ hoti, ādikālatthena vākyassa upaññāsamattam. Avadhāraṇatthena pana niyamadassanaṇam, tasmā āmantesi evāti āmantane niyamo dassito hoti.

Bhagavāti lokagarudīpananti kasmā vuttam, nanu pubbepi bhagavāsaddassa attho vuttoti? Yadi pi vutto, tam panassa yathāvutte ṭhāne viharanaṇakiriyāya kattu visesadassanattam kataṇ, na āmantanakiriyāya, idha pana āmantanakiriyāya, tasmā tadattam puna “bhagavā”ti pāḷiyam vuttanti tassattam dassetum “bhagavāti lokagarudīpana”nti āha. Tena lokagarubhāvato tadanurūpaṇam paṭipattim patthento attano santikam upagātānam bhikkhūnam ajjhāsāyānurūpaṇam dhammam desetum te āmantesīti dasseti. **Kathāsavanayuttapuggalavacananti** vakkhamānāya cittapariyādānadesanāya savanayoggapuggalavacanaṇam. Catūsupi parisāsu bhikkhū eva edisānam desanānam visesena bhājanabhūṭāti

sātisayaṃ sāsanasampañciggāhakabhāvadassanattamaṃ idha bhikkhuggahaṇanti dassetvā idāni saddatthamaṃ dassetuṃ “**apicā**”tiādīmāha. Tattha **bhikkhakoti bhikkhūti** bhikkhanadhammatāya bhikkhūti attho. **Bhikkhācariyaṃ ajjhupagatoti** buddhādīhi ajjhupagataṃ bhikkhācariyaṃ, uñhācariyaṃ, ajjhupagatatā anuṭṭhitattā bhikkhu. Yo hi appaṃ vā mahantaṃ vā bhogakkhandhaṃ pahāya agārasmā anagāriyaṃ pabbajito, so kasigorakkhādijīvikākappaṇaṃ hitvā līngasampañcchaneneva bhikkhācariyaṃ ajjhupagatatā bhikkhu, parappaṭibaddhajīvikattā vā vihāramajjhe kājabhattaṃ bhuñjamānopi bhikkhācariyaṃ ajjhupagatoti bhikkhu, piṇḍiyālopabhojanaṃ nissāya pabbajjāya ussāhajātattā vā bhikkhācariyaṃ ajjhupagatoti bhikkhūti evamettha attho daṭṭhabbo. **Ādinā nāyēnāti** “chinnabhinnapaṭadharoti bhikkhu, bhindati pāpake akusale dhammeti bhikkhu, bhinnattā pāpakānaṃ akusalānaṃ dhammānaṃ bhikkhū”tiādīnā (vibha. 510) **vibhaṅge** āgatanayena. **Ñāpaneti** avabodhane, paṭivedaneti attho.

Bhikkhanasīlatāti bhikkhanena jīvanasīlatā, na kasivāṇijjādīnā jīvanasīlatā. **Bhikkhanadhammatāti** “uddissa ariyā tiṭṭhantī”ti (jā. 1.7.59) evaṃ vuttā bhikkhanasabhāvatā, na yācanakohaññasabhāvatā. **Bhikkhane sādhu-kāritāti** “uttīṭṭhe nappamajjeyyā”ti (dha. pa. 168) vacanaṃ anussarivā tattha appamajjanā. Atha vā **sīlaṃ** nāma pakatisabhāvo, idha pana tadadhiṭṭhānaṃ. **Dhammoti** vataṃ. **Sādhu-kāritāti** sakkaccakāritā ādarakiriya. **Himādhikajanasevanti** ye bhikkhubhāve ṭhitāpi jātimadādivasena uddhatā unnaḷā, ye ca gihibhāve paresaṃ adhikabhāvampi anupagatatā bhikkhācariyaṃ paramakāruññataṃ maññanti, tesamaṃ ubhayesampi yathākkamaṃ “bhikkhavo”ti vacanena hīnajanehi daliddehi paramakāruññataṃ pattehi parakulesu bhikkhācariyāya jīvikaṃ kappentehi sevitaṃ vuttim pakāsento **uddhatabhāvaniggahaṃ karoti**. Adhikajanehi ulārabhogakhattiyakulādito pabbajitehi buddhādīhi ājīvavisodhanattamaṃ sevitaṃ vuttim pakāsento dīnabhāvaniggahaṃ karotīti yojetabbaṃ. Yasmā “bhikkhavo”ti vacanaṃ āmantanabhāvato abhimukhīkaraṇaṃ, pakaraṇato sāmattiyato ca sussusājananaṃ sakkaccasavanamanasikāranijojanañca hoti, tasmā tamatthamaṃ dassento “**bhikkhavoti iminā**”tiādīmāha. Tattha **sādhukaṃ savanamanasikāreti** sādhu-kasavane sādhu-kamanasikāre ca. Kathamaṃ pana pavattitā savanādayo sādhu-kamaṃ pavattitā hontīti? “Addhā imāya sammāpaṭipattiyā sakalasāsanasampatti hatthagatā bhavissatī”ti ādaragāravayogena kathādīsu aparibhavādīnā ca. Vuttañhi “pañcahi, bhikkhave, dhammehi samannāgato suṇanto saddhammaṃ bhabbo niyāmaṃ okkamituṃ kusalesu dhammesu sammattaṃ. Katamehi pañcahi? Kathamaṃ na paribhoti, kathitaṃ na paribhoti, na attānaṃ paribhoti, avikkhittacitto dhammaṃ suṇāti ekaggacitto, yoniso ca manasikaroti. Imehi kho, bhikkhave, pañcahi dhammehi samannāgato suṇanto saddhammaṃ bhabbo niyāmaṃ okkamituṃ kusalesu dhammesu sammatta”nti (a. ni. 5.151). Tenevāha – “**sādhukaṃ savanamanasikārāyattā hi sāsanasampatti**”ti.

Pubbe sabbaparīsāsādhāraṇatṭepi bhagavato dhammadesanāya “jeṭṭhaseṭṭhā”tiādīnā bhikkhūnaṃ eva āmantane kāraṇaṃ dassetvā idāni bhikkhū āmantetvāva dhammadesanāya payojanaṃ dassetuṃ “**kimatthamaṃ pana bhagavā**”ti codanaṃ samuṭṭhāpeti. Tattha **aññaṃ cintentāti** aññavihitā. **Vikkhittacittāti** asamāhitacittā. **Dhammaṃ paccavekkhantāti** hiyyo tato paraṃ divasesu vā sutadhammaṃ pati pati manasā avekkhantā. Bhikkhū āmantetvā dhamme desiyamāne ādīto paṭṭhāya desanaṃ sallakkhetuṃ sakkontīti imamatthamaṃ byatirekamukhena dassetuṃ “**te anāmantetvā**”tiādi vuttaṃ.

Bhikkhavoti cettha sandhivasena i-kāralopo daṭṭhabbo. **Bhikkhavo itīti** ayaṃ iti-saddo hetuparisamāpanādiatthapadatthavipariyāyapakārāvadhāraṇanidassanādiānekattappabhedo. Tathā hesa “ruppatīti kho, bhikkhave, tasmā rūpanti vuccatī”tiādīsu (saṃ. ni. 3.79) hetvatthe dissati. “Tasmātiha me, bhikkhave, dhammadāyādā bhavatha, mā āmisadāyādā. Atthi me tumhesu anukampā. Kinti me sāvakā dhammadāyādā bhaveyyuṃ, no āmisadāyādā”tiādīsu (ma. ni. 1.19) parisamāpane. “Iti vā iti evarūpā naccagītavādītavisūkadassanā paṭivirato”tiādīsu (dī. ni. 1.13) ādiatthe. “Māgaṇḍiyoti tassa brāhmaṇassa saṅkhā samañña paññattī vohāro nāmaṃ nāmakammaṃ nāmadheyyaṃ nirutti byañjanamabhilāpo”tiādīsu (mahāni. 73, 75) padatthavipariyāye. “Iti kho, bhikkhave, sappātibhayo bālo, appātibhayo paṇḍito, saupaddavo bālo, anupaddavo paṇḍito, saupasaggo bālo, anupasaggo paṇḍito”tiādīsu (ma. ni. 3.124) pakāre. “Atthi idappaccayā jarāmarāṇanti puṭṭhena satā, ‘ānanda, atthī’ tissa vacanīyaṃ. ‘Kim paccayā jarāmarāṇa’nti iti ce vadeyya. Jātipaccayā jarāmarāṇaṃ iccassa vacanīya’ntiādīsu (dī. ni. 2.96) avadhāraṇe. “Atthīti kho, kaccāna, ayameko anto, natthīti kho, kaccāna, ayaṃ dutiyo anto”tiādīsu (saṃ. ni. 2.15; saṃ.

ni. 3.90) nidassane. Idhāpi nidassane eva daṭṭhabbo. Bhikkhavoti hi āmantanākāro. Tamesa iti-saddo nidasseti “bhikkhavoti āmantesī”ti. Iminā nayena “bhaddante”tiādīsupi yathārahaṃ iti-saddassa attho veditabbo. Pubbe “bhagavā āmantesī”ti vuttatā “bhagavato paccassosu”nti idha “bhagavato”ti sāmivacanaṃ āmantanameva sambandhiantaraṃ apekkhatīti iminā adhippāyena “**bhagavato āmantanaṃ paṭiassosu**”nti vuttaṃ. “Bhagavato”ti pana idaṃ paṭissavasambandhena sampadānavacanaṃ yathā “devadattāya paṭissuṇoti”ti. Yaṃ nidānaṃ bhāsītanti sambandho. **Imassa suttassa sukhāvagāhaṇatthanti** kamalakuvalayujjalavimalasādurasasalilāya pokkharāṇiyā sukhāvatarāṇattham nimmalasilātalaracānāvīlāsasobhitaratanasopānaṃ vippakiṇṇamuttātalasadisavālukācuṇṇapaṇḍarabhūmibhāgaṃ titthaṃ viya suvibhattabhittivicitravedikāparikkhittassa nakkhattapathaṃ phusitukāmatāya viya paṭivijambhitasamussayassa pāsādarassa sukhārohanattham dantamayasaṇhamuduphalakāñcanalatāvinaddhamaṇigaṇappabhāsamudayujjalasobhaṃ sopānaṃ viya suvaṇṇavalayanūpurādisaṅghaṭṭanasaddasammissitassa kathitahasitamadhurassaragehajanavijambhitavīcaritassa ulāraissariyavibhavasobhitassa mahāgharassa sukhappavesanattham suvaṇṇarajatamaṇimuttāpavāḷādiṇḍivissaravijjotitasuppatiṭṭhitavisāladvārābāhaṃ mahādvāraṃ viya ca atthabyaṅjanasampannassa buddhānaṃ desanāñṇagambhīrabhāvasaṃsūcakassa imassa suttassa sukhāvagāhattham.

Etthāha – “kimatthaṃ pana dhammavinayaśaṅgahe kayiramāne nidānavacanaṃ, nanu bhagavatā bhāsītavacanasseva saṅgaho kātabbo”ti? Vuccate, desanāya ṭhītiasammosasaddheyabhāvasampādanattham. Kālatesadesakanimittaparisāpadesehi upanibandhitvā ṭhapitā hi desanā ciraṭṭhitikā hoti asammosadhammā saddheyā ca. Desakālakattuhetunimittehi upanibaddho viya vohāravinicchayo. Teneva ca āyasmātā mahākassapena “cittapariyādānasuttaṃ, āvuso ānanda, kattha bhāsita”ntiādīnā desādīpucchāsu katāsu tāsaṃ vissajjanaṃ karontena dhammabhaṇḍāgārikena “evaṃ me suta”ntiādīnā imassa suttassa nidānaṃ bhāsitaṃ. Apica satthusampattippakāsanattham nidānavacanaṃ. Tathāgatassa hi bhagavato pubbacaraṇānumānāgamatakkābhāvato sammāsambuddhabhāvasiddhi. Na hi sammāsambussa pubbacaraṇādīhi attho atthi sabbattha appaṭihatañācārātāya ekappamaṇattā ca ñeyyadhammesu. Tathā ācariyamuttīhidhammacchariyasāsanasāvākānānurāgābhāvato khīṇāsavabhāvasiddhi. Na hi sabbaso khīṇāsavassa te sambhavantīti suvisuddhassa parānuggahappavatti. Evaṃ desakasamkilesabhūtānaṃ diṭṭhisīlasampadādūsakānaṃ avijjātanhānaṃ accantābhāvasaṃsūcakehi ñāṇappahānasampadābhīyaṅjanakehi ca sambuddhavisuddhabhāvehi purimavesārajjadvayasiddhi, tato ca antarāyikanīyānikadhammesu sammohābhāvasiddhito pacchimavesārajjadvayasiddhīti bhagavato catuvesārajjasamannāgamo attahitaparāhitappaṭipatti ca nidānavacanaṃ pakāsītā hoti. Tattha tattha sampattaparisāya ajjhāsāyānurūpaṃ ṭhānuppattikappaṭibhānena dhammadesanādīpanato, idha pana rūpaṅgarukānaṃ puggalānaṃ ajjhāsāyānurūpaṃ ṭhānuppattikappaṭibhānena dhammadesanādīpanatoti yojetabbaṃ. Tena vuttaṃ – “satthusampattippakāsanattham nidānavacana”nti.

Tathā sāsanasampattippakāsanattham nidānavacanaṃ. Ñāṇakarūṇāpariggahitasabbakiriyassa hi bhagavato natthi niratthakā paṭipatti, attahitatthā vā. Tasmā paresaṃ eva atthāya pavattasabbakiriyassa sammāsambuddhassa sakalampi kāyavacīmanokammaṃ yathāpavattaṃ vuccamānaṃ diṭṭhadhammikasamparāyikaparamatthehi yathārahaṃ sattānaṃ anusāsanaṭṭhena sāsanaṃ, na kapparaṇā. Tayidaṃ satthucaritaṃ kālatesadesakaparisāpadesehi saddhiṃ tattha tattha nidānavacanehi yathārahaṃ pakāsīyati. “Idha pana rūpaṅgarukānaṃ puggalāna”ntiādī sabbam purimasadisameva. Tena vuttaṃ – “sāsanasampattippakāsanattham nidānavacana”nti. Apica satthuno pamāṇabhāvappakāsanena vacanena sāsanaṃ pamāṇabhāvadassanattham nidānavacanaṃ, tañca desakappamaṇābhāvadassanaṃ heṭṭhā vuttanāyānusāreṇa “bhagavā”ti ca iminā padena vibhāvītanti veditabbaṃ. Bhagavāti hi tathāgatassa rāgadosamohādisabbakilesamaladuccaritadosappahānadīpanena vacanena anaññasādhāraṇasuparisuddhañāṇakarūṇādīguṇavisesayogaparidīpanena tato eva sabbasattuttamabhāvādīpanena ayamattho sabbathā pakāsito hotīti. Idamettha nidānavacanappayojanassa mukhamattanidassanaṃ.

Nikkhittassāti desitassa. Desanā hi desetabbassa sīlādīatthassa veneyyasantānesu nikkhipanato

“nikkhepo”ti vuccati. **Suttanikkhepaṃ vicāretvā vuccamānā pākaṭā hotīti** sāmāññato bhagavato desanāya samuṭṭhānassa vibhāgaṃ dassetvā “etthāyaṃ desanā evaṃsamuṭṭhānā”ti desanāya samuṭṭhāne dassite suttassa sammadeva nidānaparijānanena vaṇṇanāya suviññeyyattā vuttaṃ. Tatha yathā anekasataanekasahasabhedānīpi suttantāni saṃkilesabhāgiyādiṭṭhānanayavasena soḷasavidhataṃ nātivattanti, evaṃ attajjhāsayādisuttanikkhepavasena catubbidhabhāvanti āha – “**cattāro hi suttanikkhepā**”ti. Ettha ca yathā attajjhāsayassa aṭṭhuppattiyā ca parajjhāsayapucchāhi saddhiṃ saṃsaggabhedo sambhavati “attajjhāsayo ca parajjhāsayo ca, attajjhāsayo ca pucchāvasiko ca, aṭṭhuppattiko ca parajjhāsayo ca, aṭṭhuppattiko ca pucchāvasiko cā”ti ajjhāsayapucchānusandhisabbhāvato, evaṃ yadipi aṭṭhuppattiyā attajjhāsayenapi saṃsaggabhedo sambhavati, attajjhāsayādīhi pana purato ṭhitehi aṭṭhuppattiyā saṃsaggo natthīti na idha niravaseso vitthāranayo sambhavatīti “cattāro suttanikkhepā”ti vuttaṃ. Tadantogadhattā vā sesanikkhepānaṃ mūlanikkhepavasena cattārova dassitā. Yathādassanañhettha ayaṃ saṃsaggabhedo gahetabboti.

Tatrāyaṃ vacanattho – nikkhipīyatīti nikkhepo, suttam eva nikkhepo **suttanikkhepo**. Atha vā nikkhipanaṃ nikkhepo, suttassa nikkhepo **suttanikkhepo**, suttadesanāti attho. Attano ajjhāsayo attajjhāsayo, so assa atthi kāraṇabhūtoti **attajjhāsayo**. Attano ajjhāsayo etassāti vā **attajjhāsayo**. **Parajjhāsayepi** eseva nayo. Pucchāya vaso pucchāvaso, so etassa atthīti **pucchāvasiko**. Suttadesanāvattubhūtaṃ atthassa uppatti atthuppatti, atthuppattiyeva aṭṭhuppatti ttha-kārassa ṭṭha-kāraṃ katvā. Sā etassa atthīti **aṭṭhuppattiko**. Atha vā nikkhipīyati suttam etenāti **suttanikkhepo**, attajjhāsayādi eva. Etasmim atthavikappe attano ajjhāsayo **attajjhāsayo**. Paresaṃ ajjhāsayo **parajjhāsayo**. Pucchīyatīti pucchā, pucchitabbo attho. Pucchāvasena pavattaṃ dhammappaṭiggāhakānaṃ vacanaṃ pucchāvasikaṃ, tadeva nikkhepasaddāpekkhāya pulliṅgavasena vuttaṃ – “**pucchāvasiko**”ti. Tathā aṭṭhuppatti eva **aṭṭhuppattikoti** evamettha attho veditabbo.

Apicettha paresaṃ indriyaparipākādikāraṇanirapekkhattā attajjhāsayassa visuṃ suttanikkhepabhāvo yutto kevalaṃ attano ajjhāsayeneva dhammatantiṭṭhapanatthaṃ pavattitadesanattā. Parajjhāsayapucchāvasikānaṃ pana paresaṃ ajjhāsayapucchānaṃ desanāpavattihetubhūtaṃ uppattiyam pavattitānaṃ kathamaṭṭhuppattiyā anavarodho, pucchāvasikaṃ aṭṭhuppattikānaṃ vā parajjhāsayānurodhena pavattitānaṃ kathaṃ parajjhāsaye anavarodhoti? Na codetabbametam. Paresaṃhi abhinīhāraparipucchādivinimuttasseva suttadesanākāraṇuppādassa aṭṭhuppattibhāvena gahitattā parajjhāsayapucchāvasikānaṃ visuṃ gahaṇam. Tathā hi brahmajālādhammāyādasuttādīnaṃ vaṇṇavaṇṇaāmisuppādādidetanānimittaṃ “aṭṭhuppatti”ti vuccati. Paresaṃ puccham vinā ajjhāsayam eva nimittaṃ katvā desito parajjhāsayo, pucchāvasena desito pucchāvasikoti pākaṭoyamatthoti. **Attano ajjhāsayeneva kathesīti** dhammatantiṭṭhapanatthaṃ kathesi. **Vimuttiparipācāniyā dhammā** saddhindriyādayo. **Ajjhāsayanti** adhimuttiṃ. **Khantinti** diṭṭhinijjhānakkhantiṃ. **Mananti** paññatticittaṃ. **Abhinīhāranti** pañidhānaṃ. **Bujjhanabhāvanti** bujjhanasabhāvaṃ, paṭivijjhanākāraṃ vā. **Rūpagarukānanti** pañcasu ārammaṇesu rūpārammaṇagarukā rūpagarukā. Cittena rūpaninnā rūpapoṇā rūpapabbhārā rūpadassanappasutā rūpena ākaḍḍhitahadayā, tesam rūpagarukānaṃ.

Paṭisedhatthoti paṭikkhepattho. Kassa pana paṭikkhepatthoti? Kiriyāpadhānañhi vākyam, tasmā “na samanupassāmī”ti samanupassanākiriyaṃ paṭisedhattho. Tenāha – “**imassa pana padassā**”tiādi. Yo paro na hoti, so attāti lokasamaññamattasiddham sattasantānaṃ sandhāya – “aha”nti satthā vadati, na bāhirakaparikkappitaṃ ahaṃkāraṃ visayaṃ ahaṃkāraṃ bodhimūleyeva samucchinnattā. Lokasamaññanātikamantā eva hi buddhānaṃ lokiye visaye desanāpavatti. **Bhikkhaveti** ālapane kāraṇam heṭṭhā vuttameva. Aññanti apekkhāsiddhattā aññatthassa “**idāni vattabbaitthirūpato añña**”nti āha. **Ekampi rūpanti** ekaṃ vaṇṇāyatanaṃ. Samaṃ visamaṃ sammā yāthāvato anu anu passatīti **samanupassanā**, ñānaṃ. Saṃkilissanavasena anu anu passatīti **samanupassanā**, diṭṭhi. **No niccatoti** ettha **iti**-saddo ādiattho, evamādikoti attho. Tena “dukkhato samanupassatī”ti evamādinī saṅgaṇhāti. **Olokontopīti** devamanussavimānakapparukkhamāṇikanakādīgatāni rūpāni anavasesaṃ sabbaññūtaññāna olokontopi. Sāmaññāvacaṇopi yaṃ-saddo “ekarūpampi”ti rūpassa adhigatattā rūpavisayo icchitoti “**yaṃ rūpa**”nti vuttaṃ. Tathā purisasaddo pariyādiyitabbacittapuggalavisayoti **rūpagarukassāti** visesitaṃ. **Gahaṇam** “khepana”nti ca adhippetam, **pariyādānañca** uppattinivāraṇanti āha – “**catubhūmakakusalacitta**”nti. Tañhi rūpaṃ tādissassa parittakusalassapi uppattiṃ nivāreti, kimaṅgam

pana mahaggatānuttaracittassāti lokuttarakusalacittassapi uppattiyā nivāraṇaṃ hotuṃ samatthaṃ, lokiyakusaluppattiyā nivārakatte vattabbameva natthīti **“catubhūmakakusalacittam pariyaḍiyitvā”**ti vuttaṃ. Na hi kāmagaṇassādappasutassa purisassa dānādivasena savipphārikā kusaluppatti sambhavati. **Gaṇhitvā khepetvāti** attānaṃ assādetvā pavattamānassa akusalacittassa paccayo hontaṃ pavattinivāraṇena muṭṭhigataṃ viya gahetvā anuppādanirodhena khepetvā viya tiṭṭhati. Tāva mahati lokasannivāse tassa pariyaḍiyatṭhānaṃ avicchedato labbhatīti āha – **“tiṭṭhati”**ti yathā ‘‘pabbatā tiṭṭhanti, najjo sandantī’’ti. Tenāha – **“idha ubhayampi vaṭṭati”**tiādi.

Yathayidanti sandhivasena ākāraṃ rassattaṃ yakārāgamo cāti āha – **“yathā ida”**nti. **Itthiyā rūpanti** itthisarāgataṃ tappaṭibaddhaṅca rūpāyatanaṃ. Paramatthassa niruḷho, paṭhamaṃ sādharmaṇato saddasatthalakkhaṇāni vibhāvetabbāni, pacchā asādhāraṇatoti tāni pāḷivasena vibhāvetuṃ – ‘‘ruppatīti kho...pe... veditabba’’nti āha. Tattha **ruppatīti** sītādivirodhapaccayehi vikāraṃ āpāḍiyati, āpajjati vā attho. Vikāruppatti ca virodhipaccayasannipāte visadisuppatti vibhūtatarā, kuto panāyaṃ visesoti ce? ‘‘Sītenā’’tiādivacanato. Evaṅca katvā vedanādīsu anavasesarūpasamaññā sāmāññalakkhaṇanti sabbarūpadhammasādhāraṇaṃ rūppanaṃ. Idāni atthuddhāranayena rūpasaddaṃ saṃvaṇṇento **“ayaṃ panā”**tiādimāha. **Rūpakkhandahe vattatīti** ‘‘oḷārikaṃ vā sukumaṃ vā’’tiādivacanato (ma. ni. 1.361; 2.113; 3.86, 89; vibha. 2). **Rūpūpapattiyāti** ettha rūpabhavo rūpaṃ uttarapadalopena. Rūpabhavūpapattiyāti ayañhettha attho. **Kasiṇanimitteti** pathavīkasiṇādisaññite paṭibhāganimitte. Rūpatti attano phalassa sabhāvaṃ karotīti rūpaṃ, sabhāvaḥetūti āha – **“sarūpā...pe... ettha paccaye”**ti. Karacaraṇādiavayavasāṅghātabhāvena rūpīyati nirūpīyatīti rūpaṃ, rūpakāyoti āha – **“ākāso...pe... ettha sarīre”**ti.

Rūpayati vaṇṇavikāraṃ āpajjamānaṃ hadayaṅgatabhāvaṃ pakāsetīti rūpaṃ, vaṇṇāyatanaṃ. Ārohapariṇāhādibhedarūpagataṃ saṅghānasampattim nissāya pasādaṃ āpajjamāno rūpappamāṇoti vuttoti āha – **“ettha saṅghāne”**ti. **Piyarūpanti**ādīsu sabhāvattho rūpasaddo. Ādisaddena rūpajjhānādīnaṃ saṅgaho. ‘‘Rūpī rūpāni passatī’’ti ettha ajjhataṃ kesādīsu parikkamasaññāvasena paṭiladdharūpajjhānaṃ rūpaṃ, taṃ assa atthīti rūpīti vutto. **Itthiyā catusamuṭṭhāne vaṇṇeti** itthisarārapariyāpannameva rūpaṃ gahitaṃ, tappaṭibaddhavatthālaṅkāradirūpampi pana purisacittassa pariyaḍāyakaṃ hotīti dassetuṃ – **“apicā”**tiādi vuttaṃ. Gandhavaṇṇaggahaṇena vilepanaṃ vuttaṃ. Kāmaṃ ‘‘asukāya itthiyā pasādhana’’nti sallakkhitassa akāyappaṭibaddhassapi vaṇṇo paṭibaddhacittassa purisassa cittaṃ pariyaḍāya tiṭṭheyya, taṃ pana na ekantikanti ekantikaṃ dassento **“kāyappaṭibaddho”**tiāha. **Upakappatīti** cittaṃ pariyaḍānāya upakappati. **Purimassevāti** pubbe vuttaatthasseva daḷhīkaraṇatthaṃ vuttaṃ yathā ‘‘dvikkhattuṃ bandhaṃ subandha’’nti. Nigamanavasena vā etaṃ vuttanti daṭṭhabbaṃ. **Opammavasena vuttanti** ‘‘yaṃ evaṃ purisassa cittaṃ pariyaḍāya tiṭṭhatī’’ti sakalamevidaṃ purimavacanaṃ upamāvasena vuttaṃ, tattha pana upamābhūtaṃ atthaṃ dassetuṃ – **“yathayidaṃ...pe... itthirūpa”**nti vuttaṃ. Pariyaḍāne ānubhāvo sambhavo **pariyaḍānānubhāvo**, tassa dassanavasena vuttaṃ.

Idaṃ pana ‘‘itthirūpa’’ntiādivacanaṃ **pariyaḍānānubhāve** sādhetabbe dīpetabbe **vatthu** kāraṇaṃ. **Nāgo** nāma so rājā, dīghadāṭhikattā pana ‘‘mahādāṭhikanāgarājā’’ti vutto. **Asaṃvaraniyāmenāti** cakkhuvārikena asaṃvaranīhārena. **Nimittaṃ gahetvāti** rāgupattihetubhūtaṃ rūpaṃ subhanimittaṃ gahetvā. **Visikādasanaṃ gantvāti** sivathikadassanaṃ gantvā. Tattha hi ādīnavānupassanā ijjhati. Vatthulobhena kuto tādisāya maraṇanti asaddahanto **“mukhaṃ tumhākaṃ dhūmavaṇṇa”**nti te daharasāmaṇere uppaṇḍento vadati.

Ratanattaye suppasannattā kākavaṇṇatissādīhi visesanatthaṅca so tissamahārājā saddhāsaddena visesetvā vuccati. **Daharassa cittaṃ pariyaḍāya tiṭṭhatīti** adhikāravasena vuttaṃ. **Niṭṭhituddesakiccoti** gāme asappāyarūpadassanaṃ imassa anattāya siyāti ācariyena nivāritagāmapaveso pacchā niṭṭhituddesakicco hutvā ṭhito. Tena vuttaṃ – **“atthakāmānaṃ vacanaṃ aggahetvā”**ti. **Nivatthavatthaṃ sañjānitvāti** attanā diṭṭhadivase nivatthavatthaṃ tassā matadivase sivathikadassanatthaṃ gatena laddhaṃ sañjānitvā. **Evampīti** evaṃ maraṇasampāpanavasenapi. Ayaṃ tāvettha aṭṭhakathāya anuttānatthadīpanā.

Nettinayavaṇṇanā

pariyādiyati, evaṃ paṭisaṅkhānabhāvanābalapariggahitā indriyesu guttadvāratā upāyo. Purisassa kusalacittapariyādānenassa rūpassa aññarūpāsādhāraṇatādassanāpadesena atthakāmehi tato cittaṃ sādhukaṃ rakkhitabbaṃ. Ayamettha bhagavato āṇattīti ayaṃ **desanāhāro**. Assādādisandassanavibhāvanalakkhaṇo hi desanāhāro. Vuttañhettaṃ **nettippakaraṇe** –

“Assādādinavatā, nissaraṇampi ca phalaṃ upāyo ca;
Āṇattī ca bhagavato, yogīnaṃ desanāhāro”ti. (netti. 4 niddesavāra);

Desīyati saṃvaṇṇīyati etāya suttatthoti desanā, desanāya saha caraṇato vā desanā. Nanu ca aññepi hārā desanāsaṅkhātassa suttassa atthasaṃvaṇṇanāto desanāya saha caratīti vattabbaṃ arahatī, na tathāpare. Na hi assādādinavanissaraṇādisandassanarahitā suttadesanā atthi. Kiṃ pana tesāṃ assādādināṃ anavasesānaṃ vacanaṃ desanāhāro, udāhu ekaccānanti? Niravasesānaṃyeva. Yasmiñhi sutte assādādinavanissaraṇāni sarūpato āgatāni, tattha vattabbaṃ natthi. Yattha pana ekadesena āgatāni, na ca sarūpena, tattha anāgataṃ atthavasena niddhāretvā hāro yojetabbo.

Sayaṃ samantacakkhubhāvato taṃdassanena sabhāvato ca “**aha**”nti vuttaṃ. Bhikkhanasīlatādiguṇayogato abhimukhīkaraṇatthaṅca, “**bhikkhave**”ti vuttaṃ. Attābhāvato aparatādassanatthaṅca “**añña**”nti vuttaṃ. Ekassa anupalabbhadassanatthaṃ anekabhāvappaṭisedhanatthaṅca “**ekarūpampī**”ti vuttaṃ. Tādisassa rūpassa abhāvato adassanato ca “**na samanupassāmi**”ti vuttaṃ. Tassa paccāmasanato aniyamato ca “**ya**”nti vuttaṃ. Idāni vuccamānākāraparāmasanato tadaññākāranisedhanato ca “**eva**”nti vuttaṃ. Visabhāgindriyavattutho sabhāgavatthusmiṃ tadabhāvato ca “**purisassā**”ti vuttaṃ. Nimittaggāhassa vatthubhāvato tathā parikkappitā ca “**cittaṃ pariyādāya tiṭṭhatī**”ti vuttaṃ. Evanti vuttākāraparāmasanatthaṅceva nidassanatthaṅca “**yathā**”ti vuttaṃ. Attano paccakkhabhāvato bhikkhūnaṃ paccakkhakarāṇatthaṅca “**ida**”nti vuttaṃ. Itthisantānapariyāpannato tappaṭibaddhabhāvato ca “**itthirūpa**”nti vuttanti evaṃ anupadavicayato **vicayo hāro**. Vicīyanti etena, ettha vā padapañhādayoti vicayo, vicitī eva vā tesanti vicayo. Padapucchāvissajjanapubbāparānuggahanaṃ assādādināṅca visesaniddhāraṇavasena pavicayalakkhaṇo hi vicayo hāro. Vuttampi cettaṃ –

“Yaṃ pucchitaṅca vissajjitaṅca, suttassa yā ca anugīti;
Suttassa yo pavicayo, hāro vicayoti niddiṭṭho”ti. (netti. 4 niddesavāra);

Anādimati saṃsāre itthipurisānaṃ aññamaññarūpābhīrāmatāya “itthirūpaṃ purisassa cittaṃ pariyādāya tiṭṭhatī”ti yujjatīti ayaṃ **yuttihāro**. Byañjanatthānaṃ yuttāyuttavibhāgavibhāvanalakkhaṇo hi yuttihāro. Vuttampi cettaṃ –

“Sabbesaṃ hārānaṃ, yā bhūmī yo ca gocaro tesāṃ;
Yuttāyuttiparikkhā, hāro yuttīti niddiṭṭho”ti. (netti. 4 niddesavāra);

Yuttīti ca upapatti sādhanayutti, idha pana yuttivicāraṇā yutti uttarapadalopena “rūpabhavo rūpa”nti yathā. Yuttisahacaraṇato vā yutti.

Itthirūpaṃ ayoniso olokiyamānaṃ indriyesu aguttadvāratāya padaṭṭhānaṃ, sā kusalānaṃ dhammānaṃ abhāvanāya padaṭṭhānaṃ, sā sabbassapi saṃkilesapakkhassa parivuddhiyā padaṭṭhānaṃ. Byatirekato pana itthirūpaṃ yoniso olokiyamānaṃ satipaṭṭhānabhāvanāya padaṭṭhānaṃ, sā bojjhaṅgānaṃ bhāvanāpāripūriyā padaṭṭhānaṃ, sā vijjāvimuttīnaṃ pāripūriyā padaṭṭhānaṃ, kusalassa cittaṃ pariyādānaṃ sammohābhīnivesassa padaṭṭhānaṃ, so saṅkhārānaṃ padaṭṭhānaṃ, saṅkhārā viññāṇassatī sabbaṃ āvattati bhavacakkaṃ. Byatirekato pana kusalassa cittaṃ pariyādānaṃ tesāṃ tesāṃ kusalānaṃ dhammānaṃ uppādāya pāripūriyā padaṭṭhānanti ayaṃ tāva avisesato nayo. Visesto pana sīlassa pariyādānaṃ avipparisāraṇaṃ padaṭṭhānaṃ, avipparisāro pāmojjassatīādinā yāva anupādāparinibbānaṃ netabbaṃ. Ayaṃ **padaṭṭhāno hāro**. Sutte āgatadhammānaṃ padaṭṭhānabhūte dhamme tesāṅca padaṭṭhānabhūte sambhavato

padaṭṭhānabhūtaḍḍhammaniddhāraṇalakkhaṇo hi padaṭṭhāno hāro. Vuttañcetaṃ –

“Dhammaṃ deseti jino, tassa ca dhammassa yaṃ padaṭṭhānaṃ;
Iti yāva sabbadhammā, eso hāro padaṭṭhāno”ti. (netti. 4 niddesavāra);

Padaṭṭhānanti āsanna-kāraṇaṃ. Idha pana padaṭṭhānavicāraṇā padaṭṭhānotiādi yuttihāre vuttanayeneva veditaḍḍhaṃ.

Ekarūpanti ca rūpāyatanaggahaṇena channampi bāhirānaṃ āyatanānaṃ gahaṇaṃ bāhirāyatanabhāvena ekalakkhaṇattā. **Cittanti** manāyatanaggahaṇena channampi ajjhātikānaṃ āyatanānaṃ gahaṇaṃ ajjhātikāyatanabhāvena ekalakkhaṇattā. Evaṃ khandhadhātādivasena ekalakkhaṇatā vattabbā. Ayaṃ **lakkhaṇo hāro**. Lakkhīyanti etena, ettha vā ekalakkhaṇadhammā avuttāpi ekaccavacanaṇāti lakkhaṇo. Sutte anāgatepi dhamme vuttappakāre āgate viya niddhāretvā yā saṃvaṇṇanā, so lakkhaṇo hāro. Vuttampi cetaṃ –

“Vuttamhi ekadhamme, ye dhammā ekalakkhaṇā keci;
Vuttā bhavanti sabbe, so hāro lakkhaṇo nāmā”ti. (netti. 4 niddesavāra);

Nidāne imissā desanāya rūpaḍḍharukānaṃ puggalānaṃ rūpasmiṃ anādīnavadassitā vuttā, “kathaṃ nu kho ime imaṃ desanaṃ sutvā rūpe ādīnavadassanamukhena sabbasmimpi khandhapañcake sabbaso chandarāgaṃ pahāya sakalavaṭṭadukkhato mucceyyuṃ, pare ca tatha paṭiṭṭhāpeyyu”nti ayamettha bhagavato **adhippāyo**. Padanibbacanaṃ **niruttaṃ**, taṃ “eva”ntiādinidānapadānaṃ “nāha”ntiādi-pāḷipadānaṇca aṭṭhakathāyaṃ tassā līnatthavaṇṇanāya ca vuttanayānusārena sukarattā na vitthārayimha.

Padapadattadesanādesanānikkhepasuttasandhivasena pañcavidhā **sandhi**. Tatha padassa padantarena sambandho **padasandhi**. Padattassa padattantarena sambandho **padattasandhi**, yo “kiriyākārasambandho”ti vuccati. Nānānusandhikassa suttassa taṃtaṃanusandhīhi sambandho, ekānusandhikassa ca pubbāparasambandho **desanāsandhi**, yā aṭṭhakathāyaṃ “pucchānusandhi, ajjhāsāyānusandhi, yathānusandhī”ti tidhā vibhattā. Ajjhāsāyo cettha attajjhāsāyo parajjhāsāyoti dvidhā veditaḍḍha. **Desanānikkhepasandhi** catunnaṃ suttanikkhepānaṃ vasena veditaḍḍha. **Suttasandhi** idha paṭṭhamanikkhepavaseneva veditaḍḍha. “Kasmā panettha idameva citta-pariyādānasuttaṃ paṭṭhamam nikkhitta”nti nāyamanuyogo katthaci na pavattati. Apica ime sattā anādimati saṃsāre paribbhamantā itthipurisā aññaṃaññaṃsaṃ pañcakāmaguṇasaṅkhātārūpābhīrāmā, tatha itthī purisassa rūpe sattā giddhā gadhitā laggā laggitā āsattā, sā cassā tatha āsatti dubbivecanīyā. Tathā puriso itthiyā rūpe, tatha ca dassanaṃsaṃsāro garutaro itaresaṇca mūlabhūto. Teneva hi bhagavā “kathaṃ nu kho mātugāme paṭipajjitabba”nti (dī. ni. 2.203) puṭṭho “adassanamevā”ti avoca. Tasmā bhagavā pañcasu kāmāguṇesu rūpe chandarāgahāpanatthaṃ idameva suttam paṭṭhamam desesi. Nibbānādhigamāya paṭipattiyā ādi resā paṭipattitī. Yaṃ pana ekissā desanāya desanantarena saṃsandanaṃ, ayampi desanāsandhi. Sā idha evam veditaḍḍha. “**Nāhaṃ, bhikkhave...pe... tiṭṭhati**”ti ayaṃ desanā. “Ye kho, bhikkhave, cakkhuvīññeyyā rūpā iṭṭhā kantā manāpā piyarūpā kāmūpasamhitā rajanīyā, tañce bhikkhu abhinandati abhivadati ajjhosāya tiṭṭhati, tassa taṃ abhinandato abhivadata ajjhosāya tiṭṭhato uppajjanti aneke pāpakā akusalā dhammā”ti (saṃ. ni. 4.118) imāya desanāya saṃsandati. Tathā “rūpe maññati, rūpesu maññati, rūpato maññati, rūpaṃ ‘me’ti maññati. Rūpaṃ, bhikkhave, anabhijānaṃ aparijānaṃ avirājayaṃ appajahaṃ abhabbo dukkhakkhayāyā”ti (saṃ. ni. 4.112) evamādīhi desanāhi saṃsandatīti ayaṃ **catubyūho hāro**. Viyūhīyanti vibhāgena piṇḍīyanti etena, ettha vāti byūho, nibbānādināṃ catunnaṃ byūhoti catubyūho, catunnaṃ vā byūho etthāti catubyūho. Nibbānādhippāyādināṃ catunnaṃ vibhāgalakkhaṇo hi catubyūho hāro. Vuttañhetam –

“Neruttamadhippāyo, byañjanamatha desanānidānaṇca;
Pubbāparānusandhī, eso hāro catubyūho”ti. (netti. 4 niddesavāra);

“**Nāhaṃ, bhikkhave, aññaṃ...pe... itthirūpa**”nti etena ayonisomanasikāro dīpito. Yaṃ tattha cittaṃ pariyādiyati, tena yonisomanasikāro. Tattha ayonisomanasikaroto taṇhāvijjā parivaḍḍhanti, tāsū taṇhāgahaṇena nava taṇhāmūlakā dhammā āvaṭṭanti, avijjāgahaṇena avijjāmūlakam sabbaṃ bhavacakkam āvaṭṭati, yonisomanasikāraggahaṇena ca yonisomanasikāramūlakā dhammā āvaṭṭanti, catubbidhaṇca sampatticakkanti. Ayaṃ **āvaṭṭo hāro**. Āvaṭṭayanti etena, ettha vā sabhāgavisabhāgā ca dhammā, tesam vā āvaṭṭananti āvaṭṭo. Desanāya gahitadhammānaṃ sabhāgāsabhāgadhammavasena āvaṭṭanalakkhaṇo hi āvaṭṭo hāro. Vuttampi cetam –

“Ekamhi padaṭṭhāne, pariyesati sesakam padaṭṭhānaṃ;
Āvaṭṭati paṭipakkhe, āvaṭṭo nāma so hāro”ti. (netti. 4 niddesavāra);

Rūpaṃ catubbidham kammamuṭṭhānaṃ, cittamuṭṭhānaṃ, utusamuṭṭhānaṃ, āhārasamuṭṭhānaṃ, tathā iṭṭhaṃ iṭṭhamajjhataṃ anīṭṭhaṃ anīṭṭhamajjhattanti. Idha pana iṭṭhaṃ adhippetam. Cittaṃ kusalacittamettha veditabbaṃ. Tam kāmāvacaram, rūpāvacaram, arūpāvacaram, lokuttaranti catubbidham. Vedanādisampayuttadhammabhedato anekavidhanti ayaṃ **vibhattihāro**. Vibhajiyanti etena, ettha vā sādharmaṇāsādharaṇānaṃ saṃkilesavodānadhammānaṃ bhūmiyoti vibhatti. Vibhajanaṃ vā etesaṃ bhūmiyoti vibhatti. Saṃkilesadhamme vodānadhamme ca sādharmaṇāsādharaṇato padaṭṭhānato bhūmito vibhajanalakkhaṇo hi vibhattihāro. Vuttampi cetam –

“Dhammaṇca padaṭṭhānaṃ, bhūmiṇca vibhajate ayaṃ hāro;
Sādharaṇe asādharaṇe ca neyyo vibhatti”ti. (netti. 4 niddesavāra);

Itthirūpaṃ purisassa cittaṃ pariyādāya tiṭṭhati ayoniso manasikaroto, yoniso manasikaroto na pariyādiyati susaṃvutindriyattā sīlesu samāhitassāti ayaṃ **parivatto hāro**. Paṭipakkhasena parivattiyanti iminā, ettha vā sutte vuttadhammā, parivattanaṃ vā tesanti parivatto. Niddiṭṭhānaṃ dhammānaṃ paṭipakkhato parivattanalakkhaṇo hi parivatto hāro. Vuttañhetam –

“Kusalākusale dhamme, niddiṭṭhe bhāvite pahīne ca;
Parivattati paṭipakkhe, hāro parivattano nāmā”ti. (netti. 4 niddesavāra);

Bhikkhave, samaṇā pabbajitāti pariyāyavacanaṃ. Aññaṃ paraṃ kiñcīti pariyāyavacanaṃ. Rūpaṃ vaṇṇaṃ cakkhuviññeyyanti pariyāyavacanaṃ. Samanupassāmi olokessāmi jānāmīti pariyāyavacanaṃ. Evaṃ itthaṃ imaṃ pakāraṇti pariyāyavacanaṃ. Purisassa puggalassāti pariyāyavacanaṃ. Cittaṃ viññānaṃ manoti pariyāyavacanaṃ. Pariyādāya gahetvā khetvāti pariyāyavacanaṃ. Tiṭṭhati dharati ṭhātīti pariyāyavacanaṃ. Yathā yena pakārena yenākārenāti pariyāyavacanaṃ. Itthī nārī mātugāmoti pariyāyavacanaṃ ayaṃ **vevacano hāro**. Vividham vacanaṃ ekassevatthassa vācakamethāti vivacanaṃ, vivacanameva vevacanaṃ. Vividham vuccati etena atthoti vā vivacanaṃ, vivacanameva vevacanaṃ. Ekasmiṃ atthe anekapariyāyasaddappayojanalakkhaṇo hi vevacano hāro. Vuttañhetam –

“Vevacanāni bahūni tu, sutte vuttāni ekadhammassa;
Yo jānāti suttavidū, vevacano nāma so hāro”ti. (netti. 4 niddesavāra);

Rūpaṃ kāḷasāmādivasena anekadhā paññattaṃ. Puriso khattiyādivasena anekadhā paññatto. Cittaṃ parittamahaggaṭādivasena anekadhā paññattaṃ. “Pariyādāyā”ti ettha pariyādānaṃ pariyādāyakaṇaṃ pāpadhammānaṃ vasena vītikkamapariyuṭṭhānādinaṃ ca anekadhā paññattaṃ. Ayaṃ **paññattihāro**. Pakārehi, pabhedato vā ñāpīyanti iminā, ettha vā atthāti paññatti. Ekekassa dhammassa anekāhi paññattīhi paññāpetabbākāravibhāvanalakkhaṇo hi paññattihāro. Vuttañhetam –

“Ekam bhagavā dhammaṃ, paññattīhi vividhāhi deseti;
So ākāro ñeyyo, paññattī nāma so hāro”ti. (netti. 4 niddesavāra);

Virodhipaccayasamavāye visadisuppattiruppanavaṇṇavikārāpattiyā taṃsamaṅgino

hadayaṅgatabhāvappakāsanam rūpaṭṭhoti aniccatāmukhena otaraṇam, aniccassa pana dukkhattā dukkhatāmukhena, dukkhassa ca anattakattā suññatāmukhena otaraṇam. Cittaṃ manoviññāṇadhātu, tassā pariyādāyikā taṇhā tadekaṭṭhā ca pāpadhammā dhammadhātūti dhātumukhena otaraṇam. Evaṃ khandhāyatanādikumhehipi otaraṇam vattabbanti ayaṃ **otaraṇo hāro**. Otāriyanti anuppavesiyanti etena, ettha vā suttagatā dhammā paṭiccasamuppādādisūti otaraṇo. Paṭiccasamuppādādimukhena suttatthassa otaraṇalakkhaṇo hi otaraṇo hāro. Vuttañhetam –

“Yo ca paṭiccuppādo, indriyakhandhā ca dhātuāyatanā;
Etehi otarati yo, otaraṇo nāma so hāro”ti. (netti. 4 niddesavāra);

Nāham, bhikkhave...pe... samanupassāmīti ārambho. **Evaṃ purisassa cittaṃ pariyādāya tiṭṭhatīti** padasuddhi, na pana ārambhasuddhi. **Yathayidanti**ādi padasuddhi ceva ārambhasuddhi cāti ayaṃ **sodhano hāro**. Sodhiyanti samādhīyanti etena, ettha vā sutte padapadatthapañhārambhāti sodhano. Sutte padapadatthapañhārambhānam sodhanalakkhaṇo hi sodhano hāro. Vuttañhetam –

“Vissajjitamhi pañhe, gāthāyaṃ pucchitāyamārabbha;
Suddhāsuddhaparikkhā, hāro so sodhano nāmā”ti. (netti. 4 niddesavāra);

Aññanti sāmāññato adhiṭṭhānam kassaci visesassa anāmaṭṭhattā. **Ekarūpampīti** taṃ avikappetvā visesavacanam. **Yathayidanti** sāmāññato adhiṭṭhānam aniyamavacanabhāvato. **Itthirūpanti** taṃ avikappetvā visesavacananti ayaṃ **adhiṭṭhāno hāro**. Adhiṭṭhīyanti anuppavattīyanti etena, ettha vā sāmāññaviseshabhūtā dhammā vinā vikappenāti adhiṭṭhāno. Suttāgatānam dhammānam avikappanavaseneva sāmāññaviseshaniddhāraṇalakkhaṇo hi adhiṭṭhāno hāro. Vuttampi cetaṃ –

“Ekattatāya dhammā, yepi ca vemattatāya niddiṭṭhā;
Tena vikappayitabbā, eso hāro adhiṭṭhāno”ti. (netti. 4 niddesavāra);

Rūpassa kammāvijjādayo kammacittādayo ca hetu. Samanupassanāya āvajjanādayo. Kusalassa cittassa yoniso manasikārādayo. **Pariyādāyāti** ettha pariyādānassa ayonisomanasikārādayoti ayaṃ **parikkhāro hāro**. Parikaroti abhisaṅkharoti phalanti parikkhāro, hetu paccayo ca. Parikkhāram ācikkhatīti parikkhāro, hāro. Parikkhāraṇavisayattā, parikkhārasahacaraṇato vā parikkhāro. Sutte āgatadhammānam parikkhārasaṅkhātahetupaccaye niddhāretvā saṃvaṇṇanālakkhaṇo hi parikkhāro hāro. Vuttañhetam –

“Ye dhammā yaṃ dhammaṃ, janayantippaccayā paramparato;
Hetumavakaḍḍhayitvā, eso hāro parikkhāro”ti. (netti. 4 niddesavāra);

Purisassa cittaṃ pariyādāya tiṭṭhatīti ettha pariyādāyikā visesato taṇhāvijjā veditabbā tāsam vasena pariyādānasambhavato. Tāsu taṇhāya rūpamadhiṭṭhānam, avijjāya arūpaṃ. Visesato taṇhāya samatho paṭipakkho, avijjāya vipassanā. Samathassa cetovimutti, phalavipassanāya paññāvimutti. Tathā hi tā rāgavirāgā avijjāvīrāgāti visesetvā vuccantīti ayaṃ **samāropano hāro**. Samāropīyanti etena, ettha vā padaṭṭhānādikumhena dhammāti samāropano. Sutte āgatadhammānam padaṭṭhānavevacanabhāvanāpahānasamāropanavicāraṇalakkhaṇo hi samāropano hāro. Vuttañhetam –

“Ye dhammā yaṃ mūlā, ye cekatthā pakāsītā muninā;
Te samāropayitabbā, esa samāropano hāro”ti. (netti. 4 niddesavāra);

Ettāvatā ca –

“Desanā vicayo yutti, padaṭṭhāno ca lakkhaṇo;
Catubyūho ca āvaṭṭo, vibhatti parivattano.

Vevacano ca paññatti, otaraṇo ca sodhano;

Adhiṭṭhāno parikkhāro, samāropano soḷaso’’ti. (netti. 1 uddesavāra) –

Evam vuttā soḷasa hārā dassitāti veditabbā. Harīyanti etehi, ettha vā suttageyyādivisayā aññāṇasaṃsayavipallāsāti hārā. Haranti vā sayam tāni, haraṇamattameva vāti hārā phalūpacārena. Atha vā harīyanti voharīyanti dhammasaṃvaṇṇakadharmappaṭiggāhakehi dhammassa dānaggahaṇavasenāti hārā. Atha vā hārā viyāti hārā. Yathā hi anekaratanāvalisamūho hārasaṅkhāto attano avayavabhūtaratanasamphassehi samupajaniyamānahilādasukho hutvā tadupabhogijjanasarīrasantāpaṃ nidāghapariḷhūpajanitaṃ vūpasameti, evameva tepi nānāvidhapparamattharatanappabandhā saṃvaṇṇanāviseṣā attano avayavabhūtaparamattharatanādighamena samuppādiyamānanibbutisukhā dhammappaṭiggāhakajanahadayaparitāpaṃ kāmarāgādikilesahetukaṃ vūpasamentīti. Atha vā hārayanti aññāṇādīnīhāraṃ apagamaṃ karonti ācikkhantīti vā hārā. Atha vā sotujanacittassa haraṇato ramaṇato ca hārā niruttinayena yathā “bhavesu vantaḡamaṇo bhagavā’’ti (visuddhi. 1.144; pārā. aṭṭha. 1.verañjakaṇḡavaṇṇanā).

Ito paraṃ pana nandiyāvaṭṭādīpaṇcavidhanayā veditabbā – tattha taṇhāvijjā samudayasaccaṃ, tāsam adhiṭṭhānādībhūtā rūpadhammā dukkhasaccaṃ, tesam appavatti nirodhasaccaṃ, nirodhappajānanā paṭipadā maggasaccaṃ. Taṇhāgahaṇena cettha māyāsāṭṭheyyamānātīmānamadappamādapāpicchatāpāpamittatāahirikaanottappādivasena akusalapakkho netabbo. Avijjāgahaṇena viparītamanasikārakodhūpanāhamakkhapaḷāsaissāmacchariya-sārambhadvacassatābhavadiṭṭhivibhavadiṭṭhīdivasena akusalapakkho netabbo. Vuttavīpariyāyato kusalapakkho netabbo. Kathaṃ? Amāyāsāṭṭheyyādivasena avīparītamanasikārādivasena ca. Tathā samathapakkhiyānaṃ saddhindriyādīnaṃ, vipassanāpakkhiyānaṃ aniccasaññādīnaṃ vasena vodānapakkho netabboti ayaṃ **nandiyāvaṭṭassa nayassa bhūmi**. Yo hi taṇhāvījjāhi saṃkilesapakkhassa suttatthassa samathavīpassanāhi vodānapakkhassa ca catusaccayojanamukhena nayanalakkaṇo saṃvaṇṇanāviseṣo, ayaṃ nandiyāvaṭṭanayo nāma. Vuttañhetam –

“Taṇhaṇca avijjampi ca, samathena vipassanāya yo neti;
Saccehi yojayitvā, ayaṃ nayo nandiyāvaṭṭo’’ti. (netti. 4 niddesavāra);

Nandiyāvaṭṭassa viya āvaṭṭo etassāti nandiyāvaṭṭo. Yathā hi nandiyāvaṭṭo anto ṭhitena padhānāvayavena bahiddhā āvaṭṭati, evamayampi nayoti attho. Atha vā nandiyā taṇhāya pamodassa vā āvaṭṭo etthāti nandiyāvaṭṭo.

Heṭṭhā vuttanayena gahitesu taṇhāvījjātappakkhiyadhammesu taṇhā lobho, avijjā moho, avijjāya sampayutto lohite sati pubbo viya taṇhāya sati sijjhamāno āghāto doso iti tīhi akusalamūlehi gahitehi, tappaṭipakkhato kusalacittaggahaṇena ca tīhi kusalamūlāni gahitāni eva honti. Idhāpi lobho sabbāni vā sāsavakusalamūlāni samudayasaccaṃ, tannibbattā tesam adhiṭṭhānagocarabhūtā upādānakkhandhā dukkhasaccantiādīnā saccayojanā veditabbā. Phalaṃ panettha vimokkhattayavasena niddhāretabbaṃ, tīhi akusalamūlehi tivīdhaduccaritasamkilesamalavisamaakusalasaññāvitakkādivasena akusalapakkho netabbo, tathā tīhi kusalamūlehi tivīdhasucaritasamakusalasaññāvitakkasaddhammasamādhivimokkhamukhādivasena vodānapakkho netabboti ayaṃ **tipukkhalassa nayassa bhūmi**. Yo hi akusalamūlehi saṃkilesapakkhassa kusalamūlehi vodānapakkhassa suttatthassa ca catusaccayojanāmukhena nayanalakkaṇo saṃvaṇṇanāviseṣo, ayaṃ **tipukkhalanayo** nāma. Tīhi avayavehi lobhādīhi saṃkilesapakkhe, alobhādīhi ca vodānapakkhe pukkhalo sobhanoti tipukkhalo. Vuttañhetam –

“Yo akusale samūlehi,
Neti kusale ca kusalamūlehi;
Bhūtam tatham avitatham,
Tipukkhalam tam nayaṃ āhū’’ti. (netti. 4 niddesavāra);

Vuttanayena gahitesu taṇhāvījjātappakkhiyadhammesu visesato taṇhādīṭṭhīnaṃ vasena asubhe “subha’’nti, dukkhe “sukha’’nti ca vipallāsā, avijjādīṭṭhīnaṃ vasena anicce “nicca’’nti, anattani “attā’’ti

Sīhavikkīlīto nāma, tatiyo nayalañjako.

Disālocanamāhaṃsu, catutthaṃ nayamuttamaṃ;

Pañcama añkuso nāma, sabbe pañca nayā gatā’’ti. (netti. 1 uddesavāra) –

Evamaṃ vuttapañcanayāpi ettha dassitāti veditabbā. Nayati saṃkilesaṃ vodānañca vibhāgato ñāpetīti nayo, lañjeti pakāseti suttatthanti lañjako, nayo ca so lañjako cāti **nayalañjako**. Idañca suttamaṃ soḷasavidhe suttantapaṭṭhāne saṃkilesabhāgiyaṃ byatirekamukhena nibbedhāsekkhabhāgiyanti daṭṭhabbaṃ. Aṭṭhavīsatividhe pana suttantapaṭṭhāne lokiyalokuttaraṃ sattadhammādhiṭṭhānaṃ ñāṇaññeyyaṃ dassanabhāvanaṃ sakavacanaṃ vissajjanīyaṃ kusalākusalaṃ anuññātaṃ paṭikkhittañcāti veditabbāṃ.

Tattha soḷasavidhasuttantaṃ paṭṭhānaṃ nāma ‘‘saṃkilesabhāgiyaṃ suttamaṃ, vāsanābhāgiyaṃ suttamaṃ, nibbedhabhāgiyaṃ suttamaṃ, asekkhabhāgiyaṃ suttamaṃ, saṃkilesabhāgiyañca vāsanābhāgiyañca suttamaṃ, saṃkilesabhāgiyañca nibbedhabhāgiyañca suttamaṃ, saṃkilesabhāgiyañca asekkhabhāgiyañca suttamaṃ, vāsanābhāgiyañca nibbedhabhāgiyañca suttamaṃ, vāsanābhāgiyañca asekkhabhāgiyañca suttamaṃ, nibbedhabhāgiyañca asekkhabhāgiyañca suttamaṃ, saṃkilesabhāgiyañca vāsanābhāgiyañca nibbedhabhāgiyañca suttamaṃ, saṃkilesabhāgiyañca vāsanābhāgiyañca asekkhabhāgiyañca suttamaṃ, saṃkilesabhāgiyañca nibbedhabhāgiyañca asekkhabhāgiyañca suttamaṃ, vāsanābhāgiyañca nibbedhabhāgiyañca asekkhabhāgiyañca suttamaṃ, saṃkilesabhāgiyañca vāsanābhāgiyañca nibbedhabhāgiyañca asekkhabhāgiyañca suttamaṃ, neva saṃkilesabhāgiyaṃ na vāsanābhāgiyaṃ na nibbedhabhāgiyaṃ na asekkhabhāgiyaṃ sutta’’nti (netti. 89) evamaṃ vuttasoḷasasāsanapaṭṭhānāni.

Tattha saṃkilissanti etenāti saṃkilesa, saṃkilesabhāge saṃkilesakoṭṭhāse pavattaṃ **saṃkilesabhāgiyaṃ**. Vāsanā puññabhāvanā, vāsanābhāge pavattaṃ **vāsanābhāgiyaṃ**, vāsanā bhajāpetīti vā **vāsanābhāgiyaṃ**. Nibbijjhanāṃ lobhakkhandhādīnaṃ padālanāṃ nibbedho, nibbedhabhāge pavattaṃ, nibbedhaṃ bhajāpetīti vā **nibbedhabhāgiyaṃ**. Pariniṭṭhitasikkhā dhammā asekkhā, asekkhabhāge pavattaṃ, asekkhe bhajāpetīti vā **asekkhabhāgiyaṃ**. Tesu yattha taṇhādīsaṃkilesa vibhatta, idaṃ saṃkilesabhāgiyaṃ. Yattha dānādīpuññakiriyavatthu vibhattaṃ, idaṃ vāsanābhāgiyaṃ. Yattha sekkhā sīlakkhandhādayo vibhattā, idaṃ nibbedhabhāgiyaṃ. Yattha pana asekkhā sīlakkhandhādayo vibhattā, idaṃ asekkhabhāgiyaṃ. Itarāni tesamaṃ vomissakanayavasena vuttāni. Sabbāsavasamaṃvarapariyāyādīnaṃ vasena sabbabhāgiyaṃ veditabbāṃ. Tattha hi saṃkilesadhammā lokiyasucaritadhammā sekkhā dhammā asekkhā dhammā ca vibhattā. Sabbabhāgiyaṃ pana ‘‘passamaṃ na passatī’’tiādikaṃ udakādiyanuvādavacanaṃ veditabbāṃ.

Aṭṭhavīsatividhaṃ suttantapaṭṭhānaṃ pana ‘‘lokiyaṃ, lokuttaraṃ, lokiyañca lokuttarañca, sattādhiṭṭhānaṃ, dhammādhiṭṭhānaṃ, sattādhiṭṭhānañca dhammādhiṭṭhānañca, ñāṇaṃ, ñeyyaṃ, ñāṇañca ñeyyañca, dassanaṃ, bhāvanā, dassanañca bhāvanā ca, sakavacanaṃ, paravacanaṃ, sakavacanañca paravacanañca, vissajjanīyaṃ, avissajjanīyaṃ, vissajjanīyañca avissajjanīyañca, kammaṃ, vipāko, kammañca vipāko ca kusalaṃ, akusalaṃ, kusalañca akusalañca anuññātaṃ, paṭikkhittaṃ, anuññātañca paṭikkhittañca, thavo’’ti (netti. 112) evamaṃgatāni aṭṭhavīsati sāsanaṃpaṭṭhānāni. Tattha **lokiyanti** loke niyutto, loke vā vidito lokiyo. Idha pana lokiyo attho yasmaṃ sutte vutto, taṃ suttamaṃ lokiyaṃ. Tathā **lokuttaraṃ**. Yasmaṃ pana sutte padesena lokiyaṃ, padesena lokuttaraṃ vuttaṃ, taṃ **lokiyañca lokuttarañca**. Sattaadhippāyasattapaññattimukhena desitaṃ **sattādhiṭṭhānaṃ**. Dhammavasena desitaṃ **dhammādhiṭṭhānaṃ**. Ubhayavasena desitaṃ **sattādhiṭṭhānañca dhammādhiṭṭhānañca**. Iminā nayena sabbapadesu attho veditabbo. Buddhādīnaṃ pana guṇābhittavanavasena pavattaṃ suttamaṃ **thavo** nāma –

‘‘Maggānaṭṭhaṅgiko seṭṭho, saccānaṃ caturo padā;

Virāgo seṭṭho dhammānaṃ, dvīpadānañca cakkhumā’’ti. (dha. pa. 273; netti. 170; peṭako. 30) ādikaṃ viya –

Nettinayavaṇṇanā niṭṭhitā.

2. **Saddagarukādīnanti** ādisaddena gandharasaphoṭṭhabbagaruke saṅgaṇhāti. **Āsayavasenāti** ajjhāsayavasena. Utusamuṭṭhānopi itthisantānagato saddo labbhati, so idha nādhippetoti **“cittasamuṭṭhāno”**ti vuttaṃ. **Kathitasaddo** ālāpādisaddo. **Gītasaddo** sarena gāyanasaddo. Itthiyā hasanasaddopettha saṅghetabbo tassapi purisena assādetabbato. Tenāha – “apica kho mātugāmassa saddaṃ suṇāti tirokuṭṭā vā tiropākārā vā hasantiyā vā bhaṇantiyā vā gāyantiyā vā, so tadassādeti”tiādi. **Nivatthanivāsanassāti** khalitthaddhassa nivāsanassa. **Alaṅkārasati** nūpurādikassa alaṅkārasa. **Itthisaddotveva veditabboti** itthipaṭibaddhabhāvato vuttaṃ. Tenāha – **“sabbopi”**tiādi. **Avidūraṭṭhāneti** tassa hatthikulassa vasanaṭṭhānato avidūraṭṭhāne. **Kāyūpapannoti** sampannakāyo thirakathinamahākāyo. **Mahāhatthīti** mahānubhāvo hatthī. **Jeṭṭhakaṃ katvāti** yūthapatiṃ katvā.

Kathinatikkabhāvena siṅgasadisattā aḷasaṅkhātāni siṅgāni etassa atthīti **siṅgī**, suvaṇṇavaṇṇatāya mahābalatāya ca sīhahatthiādīmigasadisattā migo viyāti **migo**. Tattha tattha kiccaṃ netubhāvena cakkhuyeva nettaṃ, taṃ uggataṭṭhena āyataṃ etassāti **āyatacakkhunetto**. Aṭṭhi eva taco etassāti **aṭṭhittaco**. **Tenābhībūtōti** tena migena abhibhūto ajjhotthaṭṭo niccalaggahito hutvā. **Karuṇaṃ rudāmīti** kāruṇṇapatto hutvā rodāmi viravāmi. Paccatthikabhayato mutti nāma yathā tathā sahāyavato hoti, na ekākinoti āha – **“mā heva maṃ pāṇasamaṃ jaheyyā”**ti. Tattha **mā heva** manti maṃ evarūpaṃ byasanaṃ pattaṃ attano pāṇasamaṃ piyasāmikaṃ tvaṃ māheva jahi.

Kuñce girikūṭe ramati abhīramati, tattha vā vicarati, koṇjanādaṃ nadanto vā vicarati, ku vā pathavī, tadabhighātena jīratīti **kuñjaro**. **Saṭṭhihāyananti** jātiyā saṭṭhivassakālasmiṃ kuñjarā thāmena parihāyanti, taṃ sandhāya evamāha. **Pathabyā cāturantāyāti** catūsu disāsu samuddaṃ patvā ṭhitāya cāturantāya pathaviyā. **Suppiyoti** suṭṭhu piyo. **Tesaṃ tvaṃ vārijo seṭṭhoti** ye samudde vā gaṅgāya vā yamunāya vā nammadānadiyā vā kuḷirā, tesaṃ sabbesaṃ vaṇṇasampattiyā mahantattena ca vārimhi jātattā vārijo tvameva seṭṭho pasatthataro. **Muñca rodantiyā patinti** sabbesaṃ seṭṭhattā tameva yācāmi, rodamānāya mayhaṃ sāmikaṃ muñca. **Athāti** gahaṇassa sīhilakaraṇasamanantameva. **Etassāti** paṭisattumaddanassa.

Pabbatagahanaṃ nissāyāti tisso pabbatarājiyo atikkamitvā catutthāya pabbatarājiyaṃ pabbatagahanaṃ upanissāya. **Evaṃ vadatīti** “udetayaṃ cakkhumā”tiādinā (jā. 1.2.17) imaṃ buddhamantaṃ mantento vadati.

Tattha **udetīti** pācīnalokadhātuto uggacchati. **Cakkhumāti** sakalacakkavāḷavāsīnaṃ andhakāraṃ vidhamitvā cakkhuppaṭilābhakaraṇena yantena tesaṃ dinnāṃ cakkhu, tena cakkhunā cakkhumā. **Ekarājāti** sakalacakkavāḷe ālokarānaṃ antare seṭṭhattena raṅjanaṭṭhena ca ekarājā. **Harissavaṇṇoti** harisamānavāṇṇo, suvaṇṇavaṇṇoti attho. Pathaviṃ pabhāsetīti **pathavippabhāso**. **Taṃ taṃ namassāmīti** tasmā taṃ evarūpaṃ bhavantaṃ namassāmi vandāmi. **Tayājja guttā viharemha divasanti** tayā ajja rakkhitā hutvā imaṃ divasaṃ catuiriyāpathavihārena sukhaṃ vihareyyāma.

Evaṃ bodhisatto imāya gāthāya sūriyaṃ namassitvā dutiyagāthāya atīte parinibbute buddhe ceva buddhaguṇe ca namassati **“ye brāhmaṇā”**tiādinā. Tattha **ye brāhmaṇāti** ye bāhitapāpā parisuddhā brāhmaṇā. **Vedagūti** vedānaṃ pāraṃ gatā, vedehi pāraṃ gatāti vā vedagū. Idha pana sabbe saṅkhatadhamme vidite pākaṭe katvā katāti vedagū. Tenevāha – **“sabbadhamme”**ti. Sabbe khandhāyanadhātudhamme salakkhaṇasāmaññalakkhaṇavasena attano ñāṇassa vidite pākaṭe katvā tiṇṇaṃ māraṇaṃ matthakaṃ madditvā sammāsambodhiṃ pattā, saṃsāraṃ vā atikkantāti attho. **Te me namoti** te mama imaṃ namakkāraṃ paṭicchantu. **Te ca maṃ pālayantūti** evaṃ mayā namassitā ca te bhagavanto maṃ pālayantu rakkhantu. **Namattu buddhānaṃ...pe... vimuttiyāti** ayaṃ mama namakkāro atītānaṃ parinibbutānaṃ buddhānaṃ attho, tesaṃyeva catūsu phalesu ñāṇasaṅkhātāya bodhiyā attho, tathā tesaññeva arahattaphalavimuttiyā vimuttānaṃ attho, yā ca nesaṃ tadaṅgavikkhambhanasamucchedappaṭippassaddhinissaraṇasaṅkhātā pañcavidhā vimutti, tāya vimuttiyāpi ayaṃ mayhaṃ namakkāro atthūti attho. **Imaṃ so parittaṃ katvā, moro carati esanāti** idaṃ pana padadvayaṃ satthā abhisambuddho hutvā āha. Tassattho – bhikkhave, so moro imaṃ parittaṃ imaṃ rakkhaṃ katvā attano gocarabhūmiyaṃ pupphaphalādīnaṃ atthāya nānappakārāya esanāya caratīti.

Evaṃ divasaṃ caritvā sāyaṃ pabbatamatthake nisīditvā atthaṃ gacchantam sūriyaṃ olokento buddhagūṇe āvajjetvā nivāsaṭṭhāne rakkhāvaraṇatthāya puna brahmanantaṃ vadanto “**apetaya**”ntiādīmāha. Tenevāha – “**divasaṃ gocaraṃ gahetvā**”tiādi. Tattha **apetīti** apayāti atthaṃ gacchati. **Imaṃ so parittaṃ katvā moro vāsamakappayīti** idampi abhisambuddho hutvā āha. Tassattho – bhikkhave, so moro imaṃ parittaṃ imaṃ rakkhaṃ katvā attano nivāsaṭṭhāne vāsaṃ saṃkappayitthāti. **Parittakammato puretamevāti** parittakammakaraṇato puretameva. **Morakukkuṭikāyāti** kukkuṭikāsadisāya moracchāpikāya.

3. Tatiye rūpāyatanassa viya gandhāyatanassapi samuṭṭhāpakapaccayavasena viseso natthīti āha – “**catusamuṭṭhānika**”nti. Itthiyā sarīragandhassa kāyaruḥhaanulepanādīgandhassa ca tappaṭibaddhabhāvato avisesena gahaṇappasaṅge idhāhippetagandhaṃ niddhārento “**svāya**”ntiādīmāha. Tattha **itthiyāti** pākatikāya itthiyā. **Duggandhoti** pākatikāya itthiyā sarīragandhabhāvato duggandho hoti. **Idhāhippetoti** iṭṭhabhāvato assādetabbattā vuttaṃ. Kathaṃ pana itthiyā sarīragandhassa duggandhabhāvoti āha – “**ekaccā hī**”tiādi. Tattha assassa viya gandho assā atthīti **assagandhinī**. Meṇḍakassa viya gandho assā atthīti **meṇḍakagandhinī**. Sedassa viya gandho assā atthīti **sedagandhinī**. Soṇitassa viya gandho assā atthīti **soṇitagandhinī**. **Rajjatevāti** anādīmati saṃsāre avijjādīkilesavāsānāya parikaḍḍhitahadayattā phoṭṭhabassādagadhītacittatāya ca andhabālo evarūpāyapi duggandhasarīrāya itthiyā rajjatiyeva. Pākatikāya itthiyā sarīragandhassa duggandhabhāvaṃ dassetvā idāni viṣiṭṭhāya ekaccāya itthiyā tadabhāvaṃ dassetuṃ – “**cakkavattino panā**”tiādīmāha. Yadi evaṃ īdisāya itthiyā sarīragandhopi idha kasmā nāhippetoti āha – “**ayaṃ na sabbāsaṃ hotī**”tiādi. Tiracchānagatāya itthiyā ekaccāya ca manussitthiyā sarīragandhassa ativiya assādetabbabhāvadassanato puna tampi avisesena anujānanto “**itthikāye gandho vā hotū**”tiādīmāha. **Itthigandhotveva vedītabboti** tappaṭibaddhabhāvato vuttaṃ.

4. Catutthādīsū **kiṃ tenāti** jivhāvīñṇeyyase idhāhippete kiṃ tena avayavarasādīnā vuttana payojanaṃ. Oṭṭhamasamā sammakkhetīti **oṭṭhamasasammakkhano**, kheḷādīni. Ādisaddena oṭṭhamasamakkhano tambulamukhavāsādiraso gayhati. **Sabbo so itthirasoti** itthiyāvassa gahetabbattā.

5. **Itthiphoṭṭhabboti** etthāpi eseva nayo. Yadi panettha itthigatāni rūpārammaṇādīni avisesato purisassa cittaṃ pariyādāya tiṭṭhanti, atha kasmā bhagavatā tāni visuṃ visuṃ gahetvā desitānīti āha – “**iti satthā**”tiādi. **Yathā hītiādīnā** tamevatthaṃ samattheti. **Gametīti** vikkhepaṃ gametī, ayameva vā pāṭho. **Gametīti** ca saṅgametī. **Na tathā sesā saddādayo, na tathā rūpādīni ārammaṇānīti** etena sattesu rūpādīgarukatā asaṃkiṇṇā viya dassitā, na kho panetaṃ evaṃ daṭṭhabbaṃ anekavidhattā sattānaṃ ajjhāsayassāti dassetuṃ – “**ekaccassa cā**”tiādi vuttaṃ. **Pañcagarukavasenāti** pañcārammaṇagarukavasena. Ekaccassa hi purisassa yathāvuttetu pañcasupi ārammaṇesu garukatā hoti, ekaccassa tattha katipayesu, ekasmiṃ eva vā, te sabbepi pañcagarukātveva vedītabbā yathā “**sattisayo aṭṭhavimokkhā**”ti. **Na pañcagarukajātakavasena** ekekārammaṇe garukasseva nāhippetattā. Ekekārammaṇagarukānañhi pañcannaṃ puggalānaṃ tattha āgatattā taṃ jātaṃ “**pañcagarukajātaka**”nti vuttaṃ. Yadi evaṃ tena idha payojanaṃ natthīti āha – “**sakkhibhāvattāyā**”ti. **Āharitvā kathetabbanti** rūpādīgarukatāya ete anayabyasanaṃ pattāti dassetuṃ kathetabbam.

6-8. **Tesanti** suttānaṃ. **Uppaṇḍetvā gaṇhituṃ na icchīti** tassa thokaṃ virūpadhātukattā na icchi. **Anatikkamantoti** saṃsando. **Dve hatthaṃ pattānīti** dve uppalāni hatthaṃ gatāni. **Pahaṭṭhākāraṃ dassetvāti** aparāhi itthīhi ekekaṃ laddhaṃ, mayā dve laddhānīti santuṭṭhākāraṃ dassetvā. **Parodīti** tassā pubbasāmikassa mukhagandhaṃ saritvā. Tassa hi mukhato uppalagandho vāyati. **Hāretvāti** tasmā ṭhānā apanetvā, “**harāpetvā**”ti vā pāṭho, ayamevattho.

Sādhu sādhuṭi bhāsati dhammakathāya anumodanavasena “**sādhu sādhu**”ti bhāsato. **Uppalaṃva yathodaketi** yathā uppalam uppalagandho mukhato nibbattoti. **Vaṭṭameva kathitanti** yathārutavasena vuttaṃ. Yadi pi evaṃ vuttaṃ, tathāpi yathārutamatthe avatvā vivaṭṭam nīharitvā kathetabbam vimuttirasattā bhagavato desanāya.

Rūpādivaggaṇṇanā niṭṭhitā.

Iti manorathapūraṇiyā aṅguttaranikāya-aṭṭhakathāya

Paṭhamavaggaṇṇanāya anuttānatthadīpanā niṭṭhitā.

2. Nīvaraṇappahānavaggaṇṇanā

11. Dutiyassāti dutiyavaggaṇṇassa. **Ekadhammampīti** ettha “ekasabhāvampī”ti iminā sabhāvatttho yaṃ dhammasaddo “kusalā dhammā”tiādīsu viyāti dassitaṃ hoti. Yadaggena ca sabhāvatttho, tadaggena nissattatttho siddho evāti “**nissattaṭṭhena dhammo veditabbo**”ti vuttaṃ. **Subhanimittanti** dhammapariyāyena vuttaṃ. Tañhi atthato kāmacchando vā siyā. So hi attano gahaṇākārena subhanti, tenākārena pavattanakassa aññassa kāmacchandassa nimittattā “subhanimitta”nti ca vuccati. Tassa ārammaṇaṃ vā subhanimittam. Itṭhañhi itṭhākārena vā gayhamānaṃ rūpādiārammaṇaṃ “subhanimitta”nti vuccati. Ārammaṇameva cettha nimittam. Tathā hi vakkhati – “subhanimittanti rāgaṭṭhāniyaṃ ārammaṇa”nti. Samuccayatttho vā-saddo anekattattthā nipātānaṃ. **Bhiyyobhāvāyāti** punappaṇaṃ bhāvāya. **Vepullāyāti** vipulabhāvāya, vaḍḍhiyāti attho. **Ajāto** nijjāto. Sesapadāni tasseva vevacanāni. **Kāmesūti** pañcasu kāmaguṇesu. **Kāmacchandoti** kāmasaṅkhāto chando, na kattukamyatāchando na dhammacchando. Kāmanavasena rajjanavasena ca kāmo eva rāgo **kāmarāgo**. Kāmanavasena nandanavasena ca kāmo eva nandīti **kāmanandī**. Kāmanavasena taṇhāyanavasena ca **kāmatāṇhā**. Ādisaddena “kāmasneho kāmapariḷāho kāmamucchā kāmajjhosāna”nti etesaṃ padānaṃ saṅgaho daṭṭhabbo. Tattha vuttanayeneva kāmattham viditvā sinehanaṭṭhena **kāmasneho**, pariḷāhanaṭṭhena **kāmapariḷāho**, mucchanatṭhena **kāmamucchā**, gilitvā pariniṭṭhāpanatṭhena **kāmajjhosānaṃ** veditabbaṃ. Kāmacchando eva kusallappavattīto cittassa nīvaraṇatṭhena **kāmacchandanivaraṇaṃ**, sotī kāmacchando. **Asamudācāravasenāti** asamudācārabhāvena. **Ananubhūtārammaṇavasenāti** “idaṃ nāmeta”nti vatthivasena utvā tasmim attabhāve ananubhūtassa ārammaṇassa vasena. Rūpasaddādibhedam pana ārammaṇaṃ ekasmimpi attabhāve ananubhūtam nāma nattheva, kimaṅgaṃ pana anādimati saṃsāre.

Yaṃ vuttaṃ – “asamudācāravasena cā”tiādī, taṃ atisaṃkhittanti vitthārato dassetuṃ – “**tatthā**”tiādīmāha. Tattha bhavaggahaṇena mahaggatabhavo gahito. So hi oḷārikakilesasamudācārarahito. Tajjanīyakammakatādīkāle pārivāsīkākāle ca caritabbāni **dveasīti khuddakavattāni** nāma. Na hi tāni sabbāsu avatthāsu caritabbāni, tasmā tāni na mahāvattesu antogadhānīti “**cuddasa mahāvattāni**”ti vuttaṃ. Tathā āgantukavattaāvāsīkagamika-anumodanabhattagga-piṇḍacārikaāraññakasenāsanajantāgharavaccakuṭiupajjhāya- saddhivihārikaācariya-antevāsīkavattānīti etāni cuddasa mahāvattāni nāmāti vuttaṃ. Itarāni pana “pārivāsīkānaṃ bhikkhūnaṃ vattaṃ paññāpessāmī”ti (cūḷava. 75) ārabhitvā “na upasampādetabbaṃ, na chamāyaṃ caṅkamante caṅkame caṅkamitabba”nti (cūḷava. 81) vuttāni pakatatte caritabbavattāni chasaṭṭhi, tato paraṃ “na, bhikkhave, pārivāsīkena bhikkhunā pārivāsīkavuḍḍhatarena bhikkhunā saddhim, mūlāyapaṭikassanārahena, mānattārahena, mānattacārikena, abhānārahena bhikkhunā saddhim ekacchane āvāse vatthabba”ntiādīni pakatatte caritabbhehi anaññattā visuṃ visuṃ agaṇetvā pārivāsīkavuḍḍhatarādīsu puggalantaresu caritabbattā tesam vasena sampiṇḍetvā ekekaṃ katvā gaṇitāni pañcāti ekasattativattāni. Ukkhepanīyakammakatavattesu vattapaññāpanavasena vuttaṃ – “na pakatattassa bhikkhuno abhivādanaṃ paccuṭṭhānaṃ...pe... piṭṭhiparikammaṃ sādītabba”nti idaṃ abhivādanādīnaṃ assādiyaṇaṃ ekaṃ, “na pakatatto bhikkhu sīlavipattiyā anuddhamsetabbo”tiādīni (cūḷava. 51) ca dasāti evaṃ dvāsīti honti. Etesveva pana kānici tajjanīyakammakatādivattāni kānici pārivāsīkādivattānīti aggahitaggahaṇena dvāvāsīvatattanti veditabbaṃ. “Cuddasa mahāvattāni”ti vatvāpi “āgantukagamikavattāni cā”ti imesaṃ visuṃ gahaṇaṃ imāni abhiṇṇaṃ sambhavanti katvā. **Kilesa okāsaṃ na labhati** sabbadā vattappaṭipattiyāyeva byāvaṭacittatāya. **Ayonisomanasikāraṇti** aniccādīsu “nicca”ntiādīnaṃ pavattaṃ anupāyamanasikāraṇaṃ. **Sativossagganti** satiyā vissajjanaṃ, sativirahanti attho. **Evampīti** vakkhamānāpekkhāya avuttasampiṇḍanatto **pi**-saddo.

Anusandhivasenāti pucchānusandhiādiānusandhivasena. **Pubbāparavasenāti** pubbāparaganthasallakkaṇavasena. **Gaṇhantassāti** ācariyamukhato gaṇhantassa. **Sajjhāyantassāti** ācariyamukhato uggahitaganthaṃ sajjhāyantassa. **Vācentassāti** pālīṃ tadatthañca uggaṇhāpanavasena paresaṃ vācentassa. **Desentassāti** desanāvasena paresaṃ dhammaṃ desentassa. **Pakāsentassāti** attano

attano saṃsayatṭhāne pucchantānaṃ yāthāvato atthaṃ pakāsentassa. **Kilesa okāsaṃ na labhati** rattindivaṃ ganthakammesuyeva byāvaṭacittatāya. **Evampīti** vuttasampiṇḍanattho **pi-saddo**. Evaṃ sesesupi.

Dhutaṅgadhāro hotīti vuttamevatthaṃ pakāseti “**terasa dhutaṅgagūṇe samādāya vattatī**”ti. **Bāhullāyāti** cīvarādipaccayabāhullāya. Yathā cīvarādayo paccayā bahulaṃ uppajjanti, tathā **āvattassa** pavattassāti attho. **Parihīnājjhānassāti** jhānantarāyakarena visabhāgarūpadassanādīnā kenaci nimittena parihīnājjhānassa. **Vissatṭhājjhānassāti** asamāpajjanavasena pariccattajjhānassa. **Bhassādīsūti ādi-saddena** gaṇasaṅgaṇikaniddānavakammādiṃ saṅgaṇhāti. **Sattasu vā anupassanāsūti** ettha satta anupassanā nāma aniccānupassanā dukkhānupassanā anattānupassanā nibbidānupassanā virāgānupassanā nirodhānupassanā paṭinissaggānupassanā khayānupassanā vayānupassanā vipariṇāmānupassanā animittānupassanā appaṇihītānupassanā suññātānupassanā adhipaññādharmavipassanā yathābhūtaññādadassanaṃ ādīnavānupassanā paṭisaṅkhānupassanā vivaṭṭānupassanāti imāsu atṭhārasasu mahāvīpassanāsu ādito vuttā aniccānupassanādi-paṭinissaggānupassanāpariyantā satta. Ettha yaṃ vattabbaṃ, taṃ **visuddhimaggasaṃvaṇṇanāto** (visuddhi. mahāṭī. 2.741) gahetabbaṃ.

Anāsevanatāyāti purimattabhāve jhānena vikkhambhitakilesassa kāmacchandādīsevanāya abhāvato. **Ananubhūtapubbanti** tasmīṃ attabhāve ananubhūtapubbaṃ. **Jātoti** etasseva vevacanaṃ **sañjātoti**ādi. Nanu ca khaṇikattā sabbadhammānaṃ uppannaṃ kāmacchandassa taṅkhaṇaṃyeva avassaṃ nirodhasambhavato niruddhe ca tasmīṃ puna aññasseva uppajjanato ca kathaṃ tassa punappunabhāvo rāsibhāvo cāti āha – “**tattha sakīṃ uppanno kāmacchando**”tiādi. **Atṭhānametanti** akāraṇametam. Yena kāraṇena uppanno kāmacchando na nirujjhati, niruddho ca sveva puna uppajjissati, tādissaṃ kāraṇaṃ natthīti attho.

Rāgaṭṭhāniyanti rāgajanakaṃ. Aniccādīsū niccādivasena viparītamanasikāro, idha ayonisomanasikāroti āha – “**anicce nicca**”ntiādi. **Ayonisomanasikāroti** anupāyamanasikāro, kusalaḍhammappavattiyā akāraṇabhūto manasikāroti attho. **Uppathamanasikāroti** kusalaḍhammappavattiyā amaggabhūto manasikāro. **Saccavippaṭikūlenāti** saccābhisamayassa anunulomavasena. **Āvajjanāti**ādinā āvajjanāya paccayabhūtā tato purimuppannā manodvārikā akusalajavanappavatti phalavohārena tathā vuttā. Tassa hi vasena sā akusalappavattiyā upanissayo hoti. **Āvajjanāti** bhavaṅgacittaṃ āvajjayatīti āvajjanā. Anu anu āvajjetīti **anvāvajjanā**. Bhavaṅgārammaṇato aññaṃ ābhujatīti **ābhogo**. Samannāharatīti **samannāhāro**. Tadevārammaṇaṃ attānaṃ anubandhitvā uppajjamāno manasi karoti ṭhapatīti **manasikāro**. **Ayaṃ vuccati ayonisomanasikāroti** ayaṃ anupāyauppathamanasikāralakkhaṇo ayonisomanasikāro nāma vuccati.

12. Dutiye **bhattabyāpatti viyāti** bhattassa pūtibhāvena vippakārappatti viya, **cittassa byāpajjananti** cittassa vikārabhāvāpādanaṃ. Tenevāha – “**pakativijahanabhāvo**”ti. Byāpajjati tena cittaṃ pūtikummāsādayo viya purimapakatiṃ jahatīti **byāpādo**. Paṭighoyeva uparūpari uppajjamānassa paṭighassa nimittabhāvato **paṭighanimittaṃ**, paṭighassa ca kāraṇabhūtaṃ ārammaṇaṃ paṭighanimittanti āha – “**paṭighassapi paṭighārammaṇassapi etaṃ adhivacana**”nti. **Atṭhakathāyanti** mahāatṭhakathāyaṃ.

13. Tatiye thinatā **thinam**, sappipiṇḍo viya avipphārikatāya cittassa ghanabhāvo baddhatīti attho. Medhatīti **middham**, akammaññabhāvena hiṃsatīti attho. “Yā tasmīṃ samaye cittassa akalyatā”tiādinā (dha. sa. 1162) thinassa, “yā tasmīṃ samaye kāyassa akalyatā”tiādinā (dha. sa. 1163) ca middhassa abhidhamme niddiṭṭhattā vuttaṃ – “**cittassa akammaññatā thinam, tiṇṇam khandhānaṃ akammaññatā middha**”nti. Satipi aññaṃaññāvippayoge cittakāyalahutādīnaṃ viya cittacetāsikānaṃ yathākkamaṃ taṃtaṃviseṣo siyā, yā tesam akalyatādīnaṃ viseṣapaccayatā, ayametesam sabhāvoti datṭhabbaṃ. **Kapimiddhassāti** vuttamevatthaṃ vibhāveti “**pacalāyikabhāvassā**”ti. Akkhiḍalānaṃ pacalabhāvaṃ karotīti pacalāyiko, pacalāyikassa bhāvo **pacalāyikabhāvo**, pacalāyikattanti vuttaṃ hoti. **Ubhinnanti** thinamiddhānaṃ. “Vitthāro veditabbo”ti iminā sambandho veditabbo. **Cittassa akalyatāti** cittassa gilānabhāvo. Gilāno hi akalyakoti vuccati. Vinayepi vuttaṃ – “nāhaṃ, bhante, akalyako”ti (pārā. 151). Kālaṃ khamatīti hi kalyaṃ, arogatā, tassaṃ niyutto kalyako, na kalyako **akalyako**. **Akammaññatāti**

cittagelaññasankhātova akammaññatākāro. **Olīyanāti** olīyanākāro. Iriyāpathūpatthambhitañhi cittaṃ iriyāpathaṃ sandhāretuṃ asakkontaṃ rukkhe vagguli viya khīle laggitaphāṇitavārako viya ca olīyati lambati, tassa taṃ ākāraṃ sandhāya – “olīyanā”ti vuttaṃ. Dutiyapadaṃ upasaggena vaḍḍhitaṃ. **Kāyassāti** vedanādikkhandhattayasankhātassa nāmakāyassa. **Akalyatā akammaññatāti** heṭṭhā vuttanayameva. Megho viya ākāsaṃ onayhatīti **onāho**. **Onayhatīti** ca chādeti avattharati vāti attho. Sabbatobhāgena onāhoti **pariyonāho**. **Aratiādīnaṃ** attho **vibhaṅge** (vibha. 856) vuttanayeneva vedītabboti tattha vuttapāliyā dassetuṃ – “**vuttaṃ heta**”ntiādīmāha.

Tattha **pantesūti** dūresu, vivittesu vā. **Adhikusalesūti** samathavipassanādhammesu. **Aratīti** ratippaṭikkhepo. **Aratitāti** aramanākāro. **Anabhiratīti** anabhiratabhāvo. **Anabhiramanāti** anabhiramanākāro. **Ukkaṇṭhitāti** ukkaṇṭhanākāro. **Paritassitāti** ukkaṇṭhanavaseneva paritassanā, ukkaṇṭhitasseva tattha tattha taṇhāyanāti vuttaṃ hoti. **Paritassitāti** vā kampanā. **Tandīti** jātiālasīyaṃ, pakatiālasīyanti attho. Tathā hi kusalakaraṇe kāyassa avipphārikatā līnatā jātiālasīyaṃ tandī nāma, na rogautujādīhi kāyagelaññaṃ. **Tandiyanāti** tandiyanākāro. **Tandimanatāti** tandiyā abhibhūtacittatā. Alasassa bhāvo **ālasyaṃ**, ālasyāyanākāro **ālasyaṃ**. Ālasyāyitassa bhāvo **ālasyaṃ**. Iti sabbehipi imehi padehi kilesavasena kāyālasīyaṃ kathitaṃ. Thinamidhakarāṇānañhi rāgādikilesānaṃ vasena nāmakāyassa ālasīyaṃ, tadeva rūpakāyassāpīti daṭṭhabbaṃ. **Jambhanāti** phandanā. Punappunaṃ jambhanā **vijambhanā**. **Ānamanāti** purato namanā. **Vinamanāti** pacchato namanā. **Sannamanāti** samantato namanā. **Paṇamanāti** yathā tantato uṭṭhitapesakāro kismiñcīdeva gahetvā ujūṃ kāyaṃ ussāpeti, evaṃ kāyassa uddhaṃ ṭhapanā. **Byādhiyakanti** uppannabyādhitā. Iti sabbehipi imehi padehi thinamidhakarāṇānaṃ rāgādikilesānaṃ vasena kāyabaddhanameva kathitaṃ. **Bhuttāvissāti** bhuttavato. **Bhattamucchāti** bhattagelaññaṃ. Balavabhattena hi mucchāpatto viya hoti. **Bhattakilamathoti** bhattena kilantabhāvo. **Bhattapariḷahoti** bhattadaratho. Tasmīñhi samaye pariḷahuppattiyā upahatindriyo hoti, kāyo jīratīti. **Kāyaduṭṭhullanti** bhattaṃ nissāya kāyassa akammaññataṃ. **Akalyatāti**adi heṭṭhā vuttanayameva. **Līnanti** avipphārikatāya paṭikuṭitaṃ. Itare dve ākārahāvaniddesā. **Thinanti** sappiṇḍo viya avipphārikatāya ghanabhāvena ṭhitaṃ. **Thiyanāti** ākāraniddeso. Thiyibhāvo **thiyitattaṃ**, avipphāraseneva baddhatīti attho. Imehi pana sabbehipi padehi thinamidhakarāṇānaṃ rāgādikilesānaṃ vasena cittaṃ gilānākāro kathitoti vedītabbo. **Purimā cattāro dhammāti** arati, tandī, vijambhitā, bhattasammadoti ete cattāro dhammā. Yadā thinamidhāṃ uppannaṃ hoti, tadā aratiādīnampi sambhavato “**upanissayakoṭiyā pana hoti**”ti vuttaṃ, upanissayakoṭiyā paccayo hotīti attho.

14. Catutthe uddatassa bhāvo **uddhaccaṃ**. Yassa dhammassa vasena uddhataṃ hoti cittaṃ, taṃsāmpayuttā vā dhammā, so dhammo **uddaccaṃ**. Kucchitaṃ kataṃ kukataṃ, duccharitaṃ sucaritañca. Akatampi hi kukatameva. Evañhi vattāro honti “yaṃ mayā na kataṃ, taṃ kukata”nti. Evaṃ katākataṃ duccharitaṃ sucaritañca kukataṃ, taṃ ārabba vipphaṇṣārasena pavattaṃ pana cittaṃ idha kukatanti vedītabbaṃ. Tassa bhāvo **kukkuccaṃ**. **Cittassa uddhatākāro**ti cittaṃ avūpasamākārova vutto. Avūpasamalakkhaṇāñhi uddhaccaṃ. Yathāpavattassa katākātākāravisiṭṭhassa duccharitasucaritassa anusocanavasena virūpaṃ paṭisāraṇaṃ **vippaṭisāro**. Kukkuccassapī katākātānusocanavasena cittavikkhepabhāvato avūpasamākāro sambhavatīti āha – “**cetaso avūpasamoti uddhaccakukkuccassevataṃ nāma**”nti. Sveva ca cetaso avūpasamoti uddhaccakukkuccameva niddiṭṭhaṃ. Tañca attanova attanā sahaṃjātaṃ na hotīti āha – “**ayaṃ pana upanissayakoṭiyā paccayo hoti**”ti. Upanissayapaccayatā ca purimuppannavasena vedītabbā.

15. Pañcame vigatā cicicchā assāti **vicikicchā**. Sabhāvaṃ vicinanto tāya kicchati vā **vicikicchā**.

16. Chaṭṭhe **hetuṃ vā paccayaṃ vā na labhatīti** ettha hetuggahaṇena janakaṃ kāraṇamāha, paccayaggaṇena anupālanakaṃ kāraṇaṃ. **Hetunti** vā upādānakāraṇaṃ. **Paccayanti** sahaṃkāraṇaṃ vuttaṃ. **Tanti** kilesaṃ. **Vivaṭṭetvā arahattaṃ gaṇhātīti** vivaṭṭabhīmukhaṃ cittaṃ pesetvā vipassanaṃ vaḍḍhento arahattaphalaṃ gaṇhātīti. Bhikkhāya caranti etthāti **bhikkhācāro**, gocaraḡāmassetaṃ adhivacanaṃ, tasmīñ bhikkhācāre. **Vayaṃ āgammāti** dārabharaṇānurūpaṃ vayaṃ āgama. **Āyūhantoti** upacinanto. **Āṅgārapakkanti** vītaccikaṅgāresu pakkaṃ. **Kim nāmetanti** bhikkhū garahanto āha. **Jīvamānapetakasattoti** jīvamāno hutvā “teneva attabhāvena petabhāvaṃ pattasatto bhavissatī”ti

parikkappavasena vuttaṃ. **Kuṭanti** pānīyaghaṭaṃ. **Yāva dāruṇanti** ativiya dāruṇaṃ. **Vipāko kīdiso bhavissatī** tayā katakammaṃ āyatīṃ anubhavittabbavipāko kīdiso bhavissati.

Visaṅkharitvāti chedanabhedanādīhi vināsetvā. **Dīpakamigapakkhinoti** attano nisinnabhāvassa dīpanato evaṃladdhanāmā migapakkhino, yena araṇṇaṃ netvā nesādo tesam saddena āgatāgate migapakkhino vadhitvā gaṇhāti. **Theranti** cūlapiṇḍapātīkatissattheraṃ. **Iddhiyā abhisāṅkharitvā**ti adhiṭṭhānādivasena iddhiṃ abhisāṅkharitvā. Upayogathe cetam karaṇavacanaṃ. **Aggipapaṭīkanti** accikaraṇaṃ, vipphuliṅganti attho. **Passantassevā**ti anādare sāmivacanaṃ. **Tassa therassā**ti tassa milakkhatissattherassa. **Tassā**ti tassā aggipapaṭīkāya. **Paṭibalassā**ti uggahaṇasajjhāyādīsu paṭibalassa. Dukkhaṃ upanisā karaṇametissāti **dukkhūpanisā**, dukkhanibandhanā dukkhaḥetukā saddhāti vuttaṃ hoti. Vattamukhena kammaṭṭhānassa kathitattā “**vattasīse ṭhatvā**”ti vuttaṃ. **Palālavaraṇakanti** palālapuñjaṃ.

Ārambhathāti samathavipassanādīsu vīriyaṃ karoṭha. **Nikkamathāti** kosajjato nikkhamatha, kāmānaṃ vā panūdanāya nikkhamatha, ubhayenapi vīriyameva vuttaṃ. Vīriyaṇhi ārambhanakavasena ārambho, kosajjato nikkhamanavasena “nikkamo”ti vuccati. **Yuñjatha buddhasāsaneti** buddhassa bhagavato pariyattipaṭipattipaṭivedhasāṅkhāte tividdhasāsane yuñjatha yogaṃ karoṭha. Evamanuyuñjantā **maccuno senaṃ dhunātha** viddhaṃsetha. Tattha **maccuno senanti** –

“Kāmā te paṭhamā senā, dutiyā arati vuccati;
Tatiyā khuppiṇāsā te, catutthī taṇhā pavuccati.

“Pañcamaṃ thinamiddhaṃ te, chaṭṭhā bhīrū pavuccati;
Sattamī vicikicchā te, makkho thambho te aṭṭhāmo.

“Lābho siloko sakkāro,
Micchāladdho ca yo yaso;
Yo cattānaṃ samukkaṃse,
Pare ca avajānāti.

“Esā namuci te senā, kaṇhassābhīppahārīnī;
Na naṃ asūro jināti, jetvā ca labhate sukha”nti. (su. ni. 438-441) –

Evamāgataṃ kāmādibhedaṃ maccuno senaṃ. Ettha ca yasmā āditova agāriyabhūte satte vatthukāmesu kilesakāmā mosayanti, te abhībhuyya anagāriyabhāvaṃ upagātānaṃ pantesu senāsanesu aññataraññataresu vā adhikusalesu dhammesu arati uppajjati. Vuttaṇhetam – “pabbajitena kho, āvuso, abhirati dukkarā”ti (saṃ. ni. 4.331). Tato te parappaṭibaddhājīvikattā khuppiṇāsā bādhati, tāya bādhitānaṃ pariyesanataṇhā cittaṃ kilamayati. Atha nesaṃ kilantacittānaṃ thinamiddhaṃ okkamati, tato visesamanadhigacchantānaṃ durabhisambhavesu araṇṇavanapatthesu pantesu senāsanesu viharataṃ utrāsasaññitā bhīru jāyati. Tesam ussaṅkitaparisaṅkitānaṃ dīgharattaṃ vivekarasamanassādayamānānaṃ viharataṃ “na siyā nu kho esa maggo”ti paṭipattiyam vicikicchā uppajjati. Tam vinodetvā viharataṃ appamattakena visesādhigamena mānamakkhathambhā jāyanti. Tepi vinodetvā viharataṃ tato adhikataraṃ visesādhigamaṇaṃ nissāya lābhasakkārasilokā uppajjanti. Lābhādīhi mucchitvā dhammappatirūpakāni pakāsento micchāyasaṃ adhigantvā tattha ṭhitā jātiādīhi attānaṃ ukkaṃsenti, paraṃ vambhenti, tasmā kāmādīnaṃ paṭhamasenādibhāvo veditabbo. **Naḷāgaranti** naḷehi vinaddhatīnacchannagehaṃ.

Vihassatīti uggahaṇasajjhāyanamanasikārādīhi viharissati. **Jātisaṃsāranti** punappunaṃ jātisāṅkhātasāṃsāraṇaṃ. **Dukkhasantaṃ karissatī**ti dukkhassa antasaṅkhātaṃ nibbānaṃ sacchikarissati. **Palālapuñjāhanti** palālapuñjaṃ ahanti padacchedo. **Tatiyaṃ ṭhānanti** anāgāmiṇaṃ sandhāya vadati.

Tivassabhikkhukāleti upasampadato tīṇi vassāni assāti tivasso, tivasso ca so bhikkhu cāti tivassabhikkhu, tassa, tena vā upalakkhito kālo tivassabhikkhukālo, tasmīṃ. Yādā so tivasso bhikkhu nāma

hoti, tadāti vuttaṃ hoti. **Kammaṃ karotīti** bhāvanākammaṃ karoti. **Ganthakammanti** ganthavisayaṃ uggahaṇādikammaṃ. **Piṇḍāpacitiṃ katvāti** antovasse temāsaṃ dinnapiṇḍassa kilesakkhayakaraṇena apacitiṃ pūjaṃ katvā. Piṇḍāpacitiṃ karonto hi bhikkhu yehi attano yo piṇḍapāto dinno, tesāṃ tassa mahapphalabhāvaṃ icchanto attano santānameva kilesakkhayakaraṇena visodhetvā arahattaṃ gaṇhāti.

Mahābhūtiti ettha pūjāvacaṇo mahantasaddo, bhūtiṃ ca nāmekadesena tissabhūtittheraṃ ālapati. Bhavati hi nāmekadesenapi vohāro yathā “devadatto datto”ti. **Mahābhūti**ti vā piyasamudāhāro, so mahati bhūti vibhūti puññañādisampadā assāti mahābhūti. **Channaṃ sepaṇṇigacchamūlanti** sākḥāpalāsādīhi channaṃ ghanacchāyaṃ sepaṇṇigacchamūlaṃ. **Asubhakammaṭṭhānaṃ pādakaṃ katvāti** kesādiyasubhakoṭṭhāsabhāvanāya paṭiladdhaṃ upacārasamādhim appanāsamādhim vā pādakaṃ katvā. Asubhavisayaṃ upacārajjhānadikammamevettha upari pavattetabbabhāvanākammassa kāraṇabhāvato ṭhānanti kammaṭṭhānaṃ.

Sahassadvisahassasaṅkhāmattattā “**mahāgaṇe**”ti vuttaṃ. **Attano vasanaṭṭhānato therassa santikaṃ gantvāti** attano vasanaṭṭhānato ākāseṇa gantvā vihārasamīpe otaritvā divāṭṭhāne nisinnattherassa santikaṃ gantvā. **Kim āgatosīti** kimkāraṇā āgatosī. **Sabbesu rattidivasabhāgesu okāsaṃ alabhantoti** so kira thero “tuyhaṃ okāso na bhavissati, āvuso”ti vuttepi “vitakkamaḷake ṭhitakāle pucchissāmi, bhante”ti vatvā “tasmim ṭhāne aññe pucchissanti”ti vutte “bhikkhācāramagge, bhante”ti vatvā “tatrāpi aññe pucchanti”ti vutte dupaṭṭhanivāsanaṭṭhāne, saṅghātipārūpanaṭṭhāne, pattanīharaṇaṭṭhāne, gāme caritvā āsanāsālāya yāgupītakāle, bhanteti. Tatthāpi therā attano kaṅkhaṃ vinodenti, āvusoti. Antogāmato nikkhamaṇakāle pucchissāmi, bhanteti. Tatrāpi aññe pucchanti, āvusoti. Antarāmagge, bhanteti. Bhojanāsālāya bhattakiccapariyosāne, bhante. Divāṭṭhāne pādadhovanakāle, bhanteti. Tato paṭṭhāya yāva aruṇā apare pucchanti, āvusoti. Dantakaṭṭhaṃ gahetvā mukhadhovanatthaṃ gamanakāle, bhanteti. Tadāpi aññe pucchanti. Mukhaṃ dhovitvā āgamaṇakāle, bhanteti. Tatrāpi aññe pucchissanti. Senāsanaṃ pavisitvā nisinnakāle, bhanteti. Tatrāpi aññe pucchanti, āvusoti. Evaṃ sabbesu rattidivasabhāgesu yācamāno okāsaṃ na labhi, taṃ sandhāyetaṃ vuttaṃ – “evaṃ okāse asati maraṇassa kathaṃ okāsaṃ labhissathā”ti. Bhante, nanu mukhaṃ dhovitvā senāsanaṃ pavisitvā tayo cattāro pallaṅke uṇhāpetvā yonisomanasikārakammaṃ karontānaṃ okāsalābhena bhavitabbaṃ siyāti adhippāyena vadati. **Maṇivaṇṇeti** indanīlamaṇivaṇṇe.

Ghaṭentassevāti vāyāmantasseva. **Visuddhipavāraṇanti** “parisuddho aha”nti evaṃ pavattaṃ visuddhipavāraṇaṃ. Arahantānameva hesā pavāraṇā. **Kālakam vāti** mahantaṃ kālakam sandhāya vadati, **tilako vāti** khuddakam sandhāya. Ubhayenapi sīlassa parisuddhabhāvameva vibhāveti.

Padhānakammikāti padhānakamme niyuttā. **Laddhamagganti** laddhūpāyaṃ, paṭhamameva laddhūpadesanti vuttaṃ hoti. **Apattānīti** chaḍḍitāni. **Alābūneva sārādeti** saradakāle vātātapahatāni tattha tattha vippakiṇṇaalābūni viya. **Kāpotakānīti** kapotakavaṇṇāni. **Tāni disvāna kā ratīti** tāni evarūpāni aṭṭhīni disvā tumhākaṃ kā nāma ratī, nanu appamattakāpi ratī kātuṃ na vaṭṭatiyevāti attho. **Dutiyakathaṃ akathitapubboti** attano vuḍḍhatarena saddhim vuttavacanassa paccanīkaṃ dutiyakathaṃ akathitapubbo.

Tadaṅgena, tadaṅgassa pahānaṃ **tadaṅgappahānaṃ**. Yañhi rattibhāge samujjalitena dīpena andhakārassa viya tena tena vipassanāya avayavabhūtena ñāṅaṅena paṭipakkhavaseneva tassa tassa pahātabbadhammassa pahānamidaṃ tadaṅgappahānaṃ nāma. Yathā kāmacchandādayo na cittaṃ pariyuṭṭhāya tiṭṭhanti, evaṃ pariyuṭṭhānassa nisedhanaṃ appavattikaraṇaṃ vikkhambhanaṃ **vikkhambhanappahānaṃ**. Yañhi sasevāle uduke pakkhittena ghaṭena sevālassa viya tena tena lokiyasamādhinā nīvaraṇādīnaṃ paccanīkadhammānaṃ vikkhambhanamidaṃ vikkhambhanappahānaṃ nāma. Sammā upacchijjanti etena kilesāti samucchedo, pahīyanti etena kilesāti pahānaṃ, samucchedasāṅkhātaṃ pahānaṃ niravasesappahānanti **samucchedappahānaṃ**. Yañhi asanivicakkābhīhatassa rukkhassa viya ariyamaggañāṇena saṃyojanādīnaṃ dhammānaṃ yathā na puna vattanti, evaṃ pahānamidaṃ samucchedappahānaṃ nāma. Paṭippassambhati vūpasammati kilesadaratho etāyāti paṭippassaddhi, phalaṃ, sāyeva pahānanti **paṭippassaddhippahānaṃ**. Sabbe kilesā sabbasaṅkhatā vā nissaranti apagacchanti etenāti nissaraṇaṃ, nibbānaṃ, tadeva pahānanti **nissaraṇappahānaṃ**. **Paṭippassambhayamānanti** paṭippassambhaṃ kilesavūpasamaṃ kurumānaṃ. **Lokiyalokuttarehīti**

tadaṅgavikkhambhanappahānānaṃ lokiyattā, itaresaṃ lokuttarattā vuttaṃ.

Nimīyati phalaṃ etena uppajjanaṭṭhāne pakkhipamānaṃ viya hotīti nimittaṃ, kāraṇassetamaṃ adhivacanaṃ. Asubhassa nimittaṃ, asubhameva vā nimittanti **asubhanimittaṃ**. Asubhanissitampi hi jhānaṃ nissite nissayavohārena asubhanti voharīyati yathā “mañcā ukkuṭṭhiṃ karontī”ti. Tenevāha – **“dasasu asubhesu uppannaṃ sārammaṇaṃ paṭhamajjhāna”**nti. **Anicce aniccantiādinā nayena vuttassāti** iminā catubbidhaṃ yonisomanasikāraṃ dasseti. Heṭṭhā cettha idha ca catubbidhassa ayonisomanasikāraṃ yonisomanasikāraṃ ca gahaṇaṃ niravasesadassanattaṃ katanti daṭṭhabbaṃ. Tesu pana asubhe “asubha”nti manasikāro idhādhippeto, tadanukūlattā vā itaresampi gahaṇaṃ daṭṭhabbaṃ.

Ekādasasu asubhesu paṭikūlakāraṃ uggaṇhanaṃ, yathā vā tattha uggaṇhanimittaṃ uppajjati, tathā paṭipatti **asubhanimittassa uggaho**. Upacārappanāvahāya asubhabhāvanāya anuyūjjanānaṃ **asubhabhāvanānuyo**. Bhojane mattañño thinamidhābhāvabhāvā otāraṃ alabhamāno kāmacchando pahīyatīti vadanti. Bhojananissitaṃ pana āhāre paṭikūlasaññaṃ, tabbipariṇāmassa tadādhāraṃ tassa ca udariyabhūtaṃ asubhatādasanaṃ, kāyassa ca āhāraṭṭhitikatādasanaṃ yo uppādeti, so visesato bhojane pamāṇaññū nāma, tassa ca kāmacchando pahīyateva. **Dasavidhāhi asubhanimittanti** pakaṭavasena vuttaṃ. Kāyagatāsatiṃ pana gahetvā ekādasavidhampi asubhanimittaṃ veditabbaṃ.

Abhutvā udakaṃ piveti pānīyassa okāsadānattaṃ cattāro pañca ālope abhutvā pānīyaṃ piveyyāti attho. Tena vuttaṃ – **“catunnaṃ pañcannaṃ ālopānaṃ okāse sati”**ti. Abhidhammaṭṭikākārena panettha “cattāro pañca ālope, bhutvāna udakaṃ pive”ti pāṭhaṃ parikappetvā aññathā attho vaṇṇito, so aṭṭhakathāya na sameti. **Asubhakammikatissatthero** dantaṭṭhidassāvī.

17. Sattame mijjati hitapharaṇavasena siniyatīti mitto, hitesī puggalo, tasmiṃ mitte bhavā, mittassa vā esāti **mettā**, hitesitā. Tattha “mettā”ti vutte appanāpi upacāropi vaṭṭati sādhaṇavacanabhāvato āha – **“mettāti ettāvataṃ pubbabhāgopi vaṭṭati”**ti. **Api**-saddo appanaṃ sampiṇḍeti. Appanaṃ appattāya mettāya suṭṭhu mucanassa abhāvato cetovimuttīti **“appanāva adhippetā”**ti vuttaṃ.

Sattesu mettāyanassa hitūpasamhāraṃ uppādanaṃ pavattanaṃ **mettānimittassa uggaho**. Paṭhamuppanno mettāmanasikāro parato uppajjanakassa kāraṇabhāvato mettāmanasikārova mettānimittaṃ. Kammaṃyeva sakaṃ etesanti kammassakā, sattā, tabbhāvo **kammassakatā**, kammadāyādātā. Dosamettāsu yāthāvato ādīnavānisamāsaṃ paṭisaṅkhānavīmaṃsā idha **paṭisaṅkhānaṃ**. Mettāvihārīkalyāṇamittavattatā idha **kalyāṇamittatā**. **Odissakaanodissakadisāpharaṇānanti** attatiyamaṃjhattaverivasena odissakatā, sīmāsambhede kate anodissakatā, ekādīdisāpharaṇavasena disāpharaṇatā mettāya uggaṇhe veditabbā. Vihāraracchagāmādivasena vā odissakadisāpharaṇaṃ. Vihārādiuddesarahitaṃ puratthimādidisāvasena anodissakadisāpharaṇaṃ. Evaṃ vā dvidhā uggaṇhaṃ sandhāya – “odissakaanodissakadisāpharaṇa”nti vuttaṃ. Uggaho ca yāva upacārā daṭṭhabbo. Uggahitāya āsevanā bhāvanā. Tattha sabbe sattā, pāṇā, bhūtā, puggalā, attabhāvaṃpariyāpannāti etesaṃ vasena pañcavidhā. Ekekasmīṃ averā hontu, abyāpajjhā, anīghā, sukhi attānaṃ pariharantūti catudhā pavattito vīsatividhā **anodhisopparaṇā** mettā. Sabbā itthiyo, purisā, ariyā, anariyā, devā, manussā, vinipātikāti sattādhikaraṇavasena pavattā sattavidhā aṭṭhavīsatividhā vā, dasahi disāhi disādhikaraṇavasena pavattā dasavidhā ca, ekekāya vā disāya sattādiitthādiverādibhedena asītādhikacatusatappabhedā ca **odhisopparaṇā** veditabbā. **Mettaṃ bhāventassāti** mettājānaṃ bhāventassa. **Tvaṃ etassa kuddhotiādi** paccavekkhaṇāvīdhiḍassanaṃ. **Appaṭicchitapaheṇakaṃ viyāti** asampaṭicchitapaṇṇākāraṃ viya. **Paṭisaṅkhāneti** vīmaṃsāyaṃ. Vattaniataviyaṃ **attaguttattherasadi**.

18. Aṭṭhame kusalahammasappaṭipattiyā paṭṭhapanasabhāvatāya tappaṭipakkhānaṃ visosanasabhāvatāya ca ārambhadhātuādīto pavattavīriyanti āha – **“paṭhamārambhavīriya”**nti. Yasmā paṭhamārambhamattassa kosajjavīdhamanaṃ thāmagamanañca natthi, tasmā vuttaṃ – **“kosajjato nikkhantattā tato balavatara”**nti. Yasmā pana aparāparuppattiyā laddhāsevanā uparūpari visesaṃ āvahantaṃ ativiya thāmagatameva hoti, tasmā vuttaṃ – **“paraṃ paraṃ thānaṃ akkamanato tatopi balavatara”**nti. **Panūdanāyāti** nīharaṇāya. Yathā mahato palighassa ugghāṭakajanassa mahanto ussāho

icchitabbo, evamidhāpīti “**nikkamo cetaso palighuggahāṇāyā**”ti vuttaṃ. Mahāparakkamo eva parena kataṃ bandhanaṃ chindeyya, evamidhāpīti vuttaṃ – “**parakkamo cetaso bandhanacchedanāyā**”ti.

Āraddhaṃ saṃsādhitaṃ paripūritaṃ vīriyaṃ etassāti **āraddhavīriyo**, nipphannavīriyo, āraddhaṃ paṭṭhapitaṃ vīriyaṃ etassāti **āraddhavīriyo**. Vīriyārambhappasutoti āha – “**āraddhavīriyassāti paripuṇṇavīriyassaceva paggahitavīriyassa cā**”ti. **Catudosāpagatanti** atilīnatādīhi catūhi dosehi apagataṃ. Catudosāpagatattameva vibhāveti “**na ca atilīna**”ntiādinā. Atilīnañhi bhāvanācittam kosajjapakkhikaṃ siyā, atipaggahitañca uddhaccapakkhikaṃ. Bhāvanāvīthiṃ anajjhogāhetvā saṅkocāpatti **atilīnatā**. Ajjhogāhetvā antosaṅkoco **ajjhataṃ saṃkhittatā**. **Atipaggahitā** accāraddhavīriyatā. **Bahiddhā vikkhittatā** bahivisaṭṭavittakkānuvānā. Tadeṭaṃ vīriyaṃ caṅkamādikāyikappayogāvahaṃ **kāyikaṃ**, tadaññaṃ **cetasikaṃ**. **Rattidivassa pañca koṭṭhāseti** pubbaṅhasāyanhapaṭhamamajjhimapacchimayāmasaṅkhāte pañca koṭṭhāse. **Tadubhayampīti** kāyikaṃ cetasikañca vīriyaṃ. **Milakkhatissattherassa mahāsivattherassa** ca vatthu heṭṭhā dassitameva.

Pītimallakattherassa vatthu pana evaṃ veditabbaṃ. So kira gihikāle mallayuddhāya āhiṇḍanto tīsu rajjesu paṭākāṃ gahetvā tambapaṇṇidīpaṃ āgamma rājānaṃ disvā raññā katānuggaho ekadivasaṃ kilañcakāsanāsālādvārena gacchanto “rūpaṃ, bhikkhave, na tumhākaṃ, taṃ pajahatha, taṃ vo pahīnaṃ dīgharattaṃ hitāya sukhāya bhavissatī”ti (saṃ. ni. 3.33-34; 4.102; ma. ni. 1.247) natumhākavaggaṃ sutvā cintesi – “neva kira rūpaṃ attano, na vedanā”ti. So taṃyeva ankuṣaṃ katvā nikkhamitvā mahāvihāraṃ gantvā pabbajjaṃ yācitvā pabbajito upasampanno dvemātikā paguṇaṃ katvā tiṃsa bhikkhū gahetvā avaravāliyaanṅaṇaṃ gantvā samaṇadhammaṃ akāsi. Pādesu avahantesu jaṇṇukehi caṅkamati. Tameṇaṃ rattiṃ eko migaluddako “migo”ti maññaṃano pahari, satti vinivijjhivā gatā. So taṃ sattiṃ harāpetvā pahāramukhāni tiṇavaṭṭiyā pūrāpetvā pāsānapitṭhiyaṃ attānaṃ nisīdāpetvā okāsaṃ kāretvā vipassanaṃ vaḍḍhetvā saha paṭisambhidāhi arahattaṃ patvā ukkāsitāsaddena āgatānaṃ bhikkhūnaṃ byākāritvā imaṃ udānaṃ udānesi –

“Bhāsitaṃ buddhasetṭhassa, sabbalokaggavādino;
Na tumhākaṃ idaṃ rūpaṃ, taṃ jaheyyātha bhikkhavo. (dī. ni. aṭṭha. 2.373; ma. ni. aṭṭha. 1.106);

“Aniccā vata saṅkhārā, uppādavayadhammino;
Uppajjitvā nirujjhanti, tesam vūpasamo sukho”ti. (dī. ni. aṭṭha. 2.373; ma. ni. aṭṭha. 1.106;
theragā. 1168);

Kuṭumbiyaputtatissattherassapi vatthu evaṃ veditabbaṃ. Sāvattiyaṃ kira tisso nāma kuṭumbiyaputto cattālīsa hiraññakoṭiyo pahāya pabbajitvā agāmake araññe viharati, tassa kaniṭṭhabhātubhariyā “gacchatha, naṃ jīvitā voropethā”ti pañcasate core pesesi, te gantvā theram parivāretvā nisīdiṃsu. Thero āha – “kasmā āgatatha upāsakā”ti? Taṃ jīvitā voropessāmāti. Pāṭibhogaṃ me upāsakā gahetvā ajjekarattiṃ jīvitaṃ dethāti. Ko te, samaṇa, imasmiṃ thāne pāṭibhogo bhavissatī? Thero mahantaṃ pāsānaṃ gahetvā ūruṭṭhīni bhinditvā “vaṭṭati upāsakā pāṭibhogo”ti āha. Te apakkamitvā caṅkamanasīse aggiṃ katvā nipajjiṃsu. Therassa vedanaṃ vikkhambhetvā sīlaṃ paccavekkhato parisuddhasīlaṃ nissāya pītipāmojjaṃ uppajji. Tato anukkamena vipassanaṃ vaḍḍhento tiyāmarattiṃ samaṇadhammaṃ katvā aruṇuggamane arahattaṃ patto imaṃ udānaṃ udānesi –

“Ubho pādāni bhinditvā, saññapessāmi vo ahaṃ;
Aṭṭiyāmi harāyāmi, sarāgamaraṇaṃ ahaṃ.

“Evāhaṃ cintayitvāna, yathābhūtaṃ vipassisaṃ;
Sampatte aruṇuggamhi, arahattaṃ apāpuṇi”nti. (visuddhi. 1.20; dī. ni. aṭṭha. 2.373; ma. ni. aṭṭha. 1.106);

Atibhojane nimittaggāhoti atibhojane thinamidhassa nimittaggāho, “ettake bhutte taṃ bhojanaṃ

thinamiddhassa kāraṇaṃ hoti, ettake na hotī”ti thinamiddhassa kāraṇākāraṇaggāho hotīti attho. Byatirekavasena cetam vuttam, tasmā ettake bhutte tam bhojanaṃ thinamiddhassa kāraṇaṃ na hotīti bhojane mattaññutāva atthato dassitāti daṭṭhabbam. Tenāha – “**catupañca...pe... tam na hotī**”ti. **Divā sūriyālokanti** divā gahitanimittam sūriyālokaṃ rattiyam manasikarontassapīti evamettha attho veditabbo. Dhutaṅganaṃ vīriyanissittatā vuttam – “**dhutaṅganissitasappāyakathāyapī**”ti.

19. Navame **jhānena vā vipassanāya vā vūpasamitacittassāti** jhānena vā vipassanāya vā avūpasamakarakilesavigamanena vūpasamitacittassa. Kukkuccampi katākatānusocanavasena pavattamānam cetaso avūpasamāvahatāya uddhaccena samānalakkhaṇanti ubhayassa pahānakāraṇaṃ abhinnaṃ katvā vuttam. Bahussutassa ganthato atthato ca sutādīni vicārentassa tabbahulavihārino atthavedādiṭṭhapaṭilābhasambhavato vikkhepo na hoti. Yathā vidhippaṭipattiyā yathānurūpapattikārappavattiyā ca vikkhepo ca katākatānusocanañca na hotīti “**bāhusaccenapi uddhaccakukkuccam pahīyati**”ti āha. Yadaggena bāhusaccena uddhaccakukkuccam pahīyati, tadaggena paripucchakatāvinayappakataññutāhipi tam pahīyatīti daṭṭhabbam. Vuddhasevitā ca vuddhasīlitaṃ āvahatīti cetaso vūpasamakaratā “**uddhaccakukkuccappahānakārī**”ti vuttam, vuddhataṃ pana anapekkhitvā kukkucavinodakā vinayadharā kalyāṇamittatī vuttatī daṭṭhabbam. Vikkhepo ca pabbajitānaṃ yebhuyyena kukkucchetuko hotīti “**kappiyākappiyaparipucchābahulassā**”tiādīnā vinayanayeneva paripucchakatādayo niddiṭṭhā.

20. Dasame bahussutānaṃ dhammasabhāvāvabodhasambhavato vicikicchā anavakāsā evatī āha – “**bāhusaccenapi...pe... vicikicchā pahīyati**”ti. Kāmaṃ bāhusaccaparipucchakatāhi sabbāpi aṭṭhavatthukā vicikicchā pahīyati, tathāpi ratanattayavicikicchāmūlikā sesavicikicchātī āha – “**tīṇi ratanāni ārabha paripucchābahulassapī**”ti. Ratanattayaguṇāvabodhehi “**satthari kaṅkhatī**”tiādivicikicchāya asambhavoti. Vinaye pakataññutā “**sikkhāya kaṅkhatī**”ti (dha. sa. 1008; vibha. 915) vuttāya vicikicchāya pahānaṃ karotīti āha – “**vinaye ciṇṇavasībhāvassapī**”ti. **Okappaniyasaddhāsaṅkhātāadhimokkhabahulassāti** saddheyyavatthuno anuppavisanasaddhāsaṅkhātāadhimokkkena adhimuccanabahulassa. Adhimuccanañca adhimokkhuppādanamevatī daṭṭhabbam. Saddhāya vā taṃninnaponatā adhimutti adhimokkho. Nīvaraṇānaṃ paccayassa ceva paccayaghātassa ca vibhāvitattā vuttam – “**vaṭṭavivaṭṭam kathita**”nti.

Nīvaraṇappahānavaggavaṇṇanā niṭṭhitā.

3. Akammaniyaavaggavaṇṇanā

21. Tatiyassa paṭhame **abhāvitanti** samathavipassanābhāvanāvasena na bhāvitaṃ tathā abhāvitattā. Tañhi “**avaḍḍhita**”nti vuccati paṭipakkhābhābhavena paribrūhanābhāvato. Tenāha bhagavā – “**akammaniyaṃ hotī**”ti.

22. Dutiye vuttavipariyāyena attho veditabbo. **Paṭhameti** tatiyavaggassa paṭhamasutte. **Vaṭṭavasenāti** vipākavaṭṭavasena. **Tebhūmakavaṭṭanti** tebhūmakavipākavaṭṭam. **Vaṭṭapaṭilābhāya kammanti** vipākavaṭṭassa paṭilābhāya upanissayabhūtaṃ kammaṃ, tassa sahāyabhūtaṃ kilesavaṭṭampi kammaggaṇeneva saṅgahitanti daṭṭhabbam. **Vivaṭṭapaṭilābhāya kammanti** vivaṭṭādhigamassa upanissayabhūtaṃ kammaṃ. Yaṃ pana carimabhavanibbattaṃ kammaṃ, tam vivaṭṭapaṭilābhāya kammaṃ hoti, na hotīti? Na hoti vaṭṭapādakabhāvato. Carimabhavaapaṭisandhi viya pana vivaṭṭūpanissayoti sakkā viññātuṃ. Na hi kadāci tihetukapaṭisandhiyā vinā visesādhigamo sambhavati. **Imesu suttesūti** imesu pana paṭhamadutiyasuttesu yathākkamaṃ vaṭṭavivaṭṭameva kathitaṃ.

23. Tatiye **abhāvitanti** ettha bhāvanā nāma samādhībhāvanā. Sā yattha āsankitabbā, tam kāmāvacaraṭṭhamamahākusalacittādiabhāvitanti adhippetanti āha – “**devamanussasampattiyo**”tiādi.

24. Catutthe yasmā **cittanti** vivaṭṭavaseneva uppannacittaṃ adhippetam, tasmā jātijarābyādhimaraṇasokādidukkhasa anibbattanato mahato atthāya saṃvattatīti yojanā veditabbā.

25-26. Pañcamachaṭṭhesu **uppannanti** avigatuppādādikhaṇattayampi abhāvitaṃ bhāvanārahitaṃ

apātubhūta meva paṇḍitasammatassa uppannakiccassa asāadhanato yathā “aputto”ti. So hi samattho hutvā pītu puttakiccaṃ asādhento aputtoti loke vuccati, evaṃ sampadamidaṃ. Tenāha – “**kasmā**”tiādi. **Tesu dhammesūti** lokuttarapādakajjhānādīsu. Thero pana matthakappattameva bhāvitam cittaṃ dassento “**maggacittamevā**”ti āha.

27-28. Sattamaṭṭhamesu **punappunaṃ akatanti** bhāvanābahulīkāravasena punappunaṃ na kataṃ. **Imānipi dveti** imesu dvīsu suttesu āgatāni imānipi dve cittāni.

29-30. Navame **adhivahatīti** āneti. **Dukkhenāti** kicchena. **Duppesanatoti** dukkhena pesetabbato. Matthakappattaṃ vipassanāsukhaṃ pākatikajjhānasukhato santatarapaṇītataramevāti āha – “**jhānasukhato vipassanāsukha**”nti. Tenāha bhagavā –

“Suññāgāraṃ pavitṭhassa, santacittassa bhikkhuno;
Amānusi rati hoti, sammā dhammaṃ vipassato.

“Yato yato sammasati, khandhānaṃ udayabbayaṃ;
Labhatī pītipāmojjaṃ, amataṃ taṃ vijānata”nti. (dha. pa. 374);

Taṅhi cittaṃ vassaṭṭhaindavajirasadisam amoghabhāvato.

Akammaniyavaggavaṇṇanā niṭṭhitā.

4. Adantavaggavaṇṇanā

31-36. Catutthassa paṭhame **adantanti** cittabhāvanāya vinā **na** dantaṃ. Tenāha – “**satisaṃvararahita**”nti. Catutthe tatiye vuttavipariyāyena attho vedītabbo. Pañcamachaṭṭhesu **purimasadisoyevāti** tatiyecatutthasadisō eva.

37-38. Sattamaṭṭhamesu **upamā panetthāti** yathā paṭhamādīsu adantahatthiassādayo upamābhāvena gahitā, evamettha sathamaṭṭhamesu “**asaṃvuttagharadvārādivasena vedītabbā**”ti vuttaṃ.

39-40. Navamadasamesu **catūhipi padehīti** adantādīhi catūhi padehi yojetvā navamadasamāni suttāni vuttānīti yojanā.

Adantavaggavaṇṇanā niṭṭhitā.

5. Paṇihitaacchavaggavaṇṇanā

41. Pañcamassa paṭhame upamāva opammaṃ, so eva attho, tasmim **opammatthe** bodhetabbe **nipāto**. **Seyyathāpīti** yathāti attho. Ettha ca tatra bhagavā katthaci atthena upamaṃ parivāretvā dasseti vatthasutte viya, **pāricchattakopama** (a. ni. 7.69) **aggikkhandhopamādi** (a. ni. 7.72) suttesu viya ca. Katthaci upamāya atthaṃ parivāretvā dasseti **loṇambilasutte** (a. ni. 3.101) viya, **suvanṇakārasattasūriyopamādisuttesu** (a. ni. 7.66) viya ca. Imasmim pana sālīsūkopame upamāya atthaṃ parivāretvā dassento “**seyyathāpi, bhikkhave**”tiādīmāhāti potthakesu likhanti, taṃ majjhimaṭṭhakathāya vatthasuttavaṇṇanāya (ma. ni. aṭṭha. 1.70) na sameti. Tattha hi idaṃ vuttaṃ –

Seyyathāpi, bhikkhave, vatthanti upamāvacanamevetaṃ. Upamaṃ karonto ca bhagavā katthaci paṭhamameva upamaṃ dassetvā pacchā atthaṃ dasseti, katthaci paṭhamam atthaṃ dassetvā pacchā upamaṃ, katthaci upamāya atthaṃ parivāretvā dasseti, katthaci atthena upamaṃ. Tathā hesa “seyyathāpissu, bhikkhave, dve agārā sadvārā, tattha cakkhumā puriso majjhe ṭhito passeyyā”ti sakalampi devadūtasuttaṃ (ma. ni. 3.261 ādayo) upamaṃ paṭhamam dassetvā pacchā atthaṃ

dassento āha. “Tirokuṭṭaṃ tiropākāraṃ tiropabbataṃ asajjamāno gacchati, seyyathāpi, ākāse”tiādinā pana nayena sakalampi iddhividhaṃ atthaṃ paṭhamam dassetvā pacchā upamaṃ dassento āha. “Seyyathāpi, brāhmaṇapuriso sārattiko sārāgavesī”tiādinā (ma. ni. 1.314) nayena sakalampi cūlasāropamasuttaṃ upamāya atthaṃ parivāretvā dassento āha. “Idha pana, bhikkhave, ekacce kulaputtā dhammaṃ pariyāpuṇanti suttaṃ...pe... seyyathāpi, bhikkhave, puriso alagaddatthiko”tiādinā nayena sakalampi alagaddasuttaṃ (ma. ni. 1.238) mahāsāropamasuttanti evamādīni suttāni atthena upamaṃ parivāretvā dassento āha. Svāyaṃ idha paṭhamam upamaṃ dassetvā pacchā atthaṃ dassetīti.

Ettha hi **cūlasāropamādīsu** (ma. ni. 1.312) paṭhamam upamaṃ vatvā tadanantaram upameyyatthaṃ vatvā puna upamaṃ vadanto upamāya atthaṃ parivāretvā dassetīti vutto. Alagaddūpamasuttādīsu pana atthaṃ paṭhamam vatvā tadanantaram upamaṃ vatvā puna atthaṃ vadanto atthena upamaṃ parivāretvā dassetīti vutto. Tenevettha līnatthappakāsiniyaṃ vuttaṃ – “upameyyatthaṃ paṭhamam vatvā tadanantaram atthaṃ vatvā puna upamaṃ vadanto upamāya atthaṃ parivāretvā dassetī”ti vutto. **Atthena upamaṃ parivāretvāti** etthāpi eseva nayoti. Idha pana katthaci atthena upamaṃ parivāretvā dassetī. “Vatthasutte viya pārīcchattakopamaaggikkhandhopamādīsuttesu viya cā”ti vuttaṃ. Tattha vatthasutte tāva “seyyathāpi, bhikkhave, vatthaṃ saṃkiliṭṭhaṃ malaggahitaṃ, tamenam rajako yasmiṃ yasmiṃ raṅgajāte upasaṃhareyya. Yadi nīlakāya, yadi pītakāya, yadi lohītakāya, yadi mañjīṭṭhakāya, durattavaṇṇamevassa aparīsuddhavaṇṇamevassa. Taṃ kissa hetu? Aparīsuddhattā, bhikkhave, vatthassa. Evameva kho, bhikkhave, citte saṃkiliṭṭhe duggatī pāṭīkaṅkhā”tiādinā (ma. ni. 1.70) paṭhamam upamaṃ dassetvā pacchā upameyyattho vutto, na pana paṭhamam atthaṃ vatvā tadanantaram upamaṃ dassetvā puna attho vutto. Yena katthaci atthena upamaṃ parivāretvā dassetī. Vatthasutte viyāti vadeyya.

Tathā pārīcchattakopamepi “yasmiṃ, bhikkhave, samaye devānaṃ tāvatīmsānaṃ pārīcchattako kovīlāro paṇḍupalāso hotī, attamaṇā, bhikkhave, devā tāvatīmsā, tasmiṃ samaye hontī paṇḍupalāso dānī pārīcchattako kovīlāro, na cirasseva dānī pannapalāso bhavissatī...pe... evameva kho, bhikkhave, yasmiṃ samaye ariyasāvako agārasmā anagāriyaṃ pabbajjāya cetetī. Paṇḍupalāso, bhikkhave, ariyasāvako tasmiṃ samaye hotī”tiādinā (a. ni. 7.69) paṭhamam upamaṃ dassetvā pacchā attho vutto. Aggikkhandhopame “passatha no tumhe, bhikkhave, amuṃ mahantaṃ aggikkhandhaṃ ādittaṃ sampajjalitaṃ sajotibhūtaṃ. Evaṃ, bhantetī. Taṃ kiṃ maññatha, bhikkhave, katamaṃ nu kho varaṃ yaṃ amuṃ mahantaṃ aggikkhandhaṃ ādittaṃ sampajjalitaṃ sajotibhūtaṃ ālīṅgetvā upanīśīdeyya vā upanīpajjeyya vā, yaṃ khattiyakaññaṃ vā brāhmaṇakaññaṃ vā gahapatikaññaṃ vā mudutalunahatthapādaṃ ālīṅgetvā upanīśīdeyya vā upanīpajjeyya vā”tiādinā (a. ni. 7.72) paṭhamam upamaṃyeva dassetvā pacchā attho vutto, na pana paṭhamam atthaṃ vatvā tadanantaram upamaṃ dassetvā puna attho vutto, tasmā “katthaci atthena upamaṃ parivāretvā dassetī vatthasutte viya pārīcchattakopamaaggikkhandhopamādīsuttesu viya cā”ti na vattabbaṃ.

Keci panettha evaṃ vaṇṇayanti “atthaṃ paṭhamam vatvā pacchā ca upamaṃ dassento atthena upamaṃ parivāretvā dassetī nāma, upamaṃ pana paṭhamam vatvā pacchā atthaṃ dassento upamāya atthaṃ parivāretvā dassetī nāma, tadubhayassapi āgataṭṭhānaṃ nidassento ‘vatthasutte viyā’tiādimāhā”ti. Tampi “katthaci atthena upamaṃ parivāretvā dassetī vatthasutte viya pārīcchattakopamaaggikkhandhopamādīsuttesu viya cā”ti vattabbaṃ, evaṇca vuccamāne “katthaci upamāya atthaṃ parivāretvā dassetī loṇambilasutte viyā”ti viṣuṃ na vattabbaṃ “aggikkhandhopamādīsutte viyā”ti ettha ādisaddeneva saṅgahitattā. Loṇambilasuttepi hi –

“Seyyathāpi, bhikkhave, paṇḍito byatto kusalo sūdo rājānaṃ vā rājamaḥāmatthaṃ vā nānaccayehi sūpehi paccupaṭṭhito assa ambīlaggehipi tittakaggehipi kaṭukaggehipi madhuraggehipi khārikehipi akhārikehipi loṇikehipi aloṇikehipi.

“Sa kho so, bhikkhave, paṇḍito byatto kusalo sūdo sakassa bhattassa nimittaṃ uggaṇhāti ‘idaṃ vā me ajja bhattasūpeyyaṃ ruccatī, imassa vā abhiharatī, imassa vā bahuṃ gaṇhāti, imassa vā vaṇṇaṃ bhāsati. Ambīlaggaṃ vā me ajja bhattasūpeyyaṃ ruccatī, ambīlaggassa vā abhiharatī, ambīlaggassa vā bahuṃ gaṇhāti, ambīlaggassa vā vaṇṇaṃ bhāsati...pe... aloṇikassa vā vaṇṇaṃ

bhāsati’ ti. Sa kho so, bhikkhave, paṇḍito byatto kusalo sūdo lābhī ceva hoti acchādanassa, lābhī vetanassa, lābhī abhihārānaṃ. Taṃ kissa hetu? Tathā hi so, bhikkhave, paṇḍito byatto kusalo sūdo sakassa bhattanimittaṃ uggaṇhāti. Evameva kho, bhikkhave, idhekacco paṇḍito byatto kusalo bhikkhu kāye kāyānupassī viharati...pe... vedanāsu...pe... citte...pe... dhammesu dhammānupassī viharati ātāpī sampajāno satimā vineyya loke abhiññādomanassaṃ. Tassa dhammesu dhammānupassino viharato cittaṃ samādhīyati, upakkilesā pahīyanti, so taṃ nimittaṃ uggaṇhāti.

“Sa kho, bhikkhave, paṇḍito byatto kusalo bhikkhu lābhī ceva hoti diṭṭheva dhamme sukhavihārānaṃ, lābhī hoti satisampajaññaṃ. Taṃ kissa hetu? Tathā hi so, bhikkhave, paṇḍito byatto kusalo bhikkhu sakassa cittassa nimittaṃ uggaṇhātī’ ti (saṃ. ni. 5.374) –

Evaṃ paṭhamam upamaṃ dassetvā pacchā attho vutto. “Suvaṇṇakārasūriyopamādisuttesu viya cā’ ti idaṅca udāharaṇamattena saṅghaṃ gacchati suvaṇṇakārasuttādisu paṭhamam upamāya adassitattā. Etesu hi suvaṇṇakāropamasutte (a. ni. 3.103) tāva –

“Adhicittamanuyuttena, bhikkhave, bhikkhunā tīṇi nimittāni kālena kālaṃ manasi kātabbāni, kālena kālaṃ samādhinimittaṃ manasi kātabbaṃ, kālena kālaṃ paggahanimittaṃ manasi kātabbaṃ, kālena kālaṃ upekkhānimittaṃ manasi kātabbaṃ. Sace, bhikkhave, adhicittamanuyutto bhikkhu ekantaṃ samādhinimittāyeva manasi kareyya, tṭhānaṃ taṃ cittaṃ kosajjāya saṃvatteyya. Sace, bhikkhave, adhicittamanuyutto bhikkhu ekantaṃ paggahanimittāyeva manasi kareyya, tṭhānaṃ taṃ cittaṃ uddhaccāya saṃvatteyya. Sace, bhikkhave, adhicittamanuyutto bhikkhu ekantaṃ upekkhānimittāyeva manasi kareyya, tṭhānaṃ taṃ cittaṃ na sammā samādhīyeyya āsavānaṃ khayāya. Yato ca kho, bhikkhave, adhicittamanuyutto bhikkhu kālena kālaṃ samādhinimittaṃ... pe... paggahanimittaṃ...pe... upekkhānimittaṃ manasi karoti, taṃ hoti cittaṃ muduṅca kammaniyaṅca pabhassaraṅca, na ca pabhaṅgu, sammā samādhīyati āsavānaṃ khayāya.

“Seyyathāpi, bhikkhave, suvaṇṇakāro vā suvaṇṇakārantevāsī vā ukkaṃ bandheyya, ukkaṃ bandhitvā ukkāmuḥkaṃ ālimpeyya, ukkāmuḥkaṃ ālimpitvā saṅḍāsena jātarūpaṃ gahetvā ukkāmuḥke pakkhippeyya, ukkāmuḥke pakkhipitvā kālena kālaṃ abhidhamati, kālena kālaṃ udakena paripphoseti, kālena kālaṃ ajjupekkhati. Sace, bhikkhave, suvaṇṇakāro vā suvaṇṇakārantevāsī vā taṃ jātarūpaṃ ekantaṃ abhidhameyya, tṭhānaṃ taṃ jātarūpaṃ daheyya. Sace, bhikkhave, suvaṇṇakāro vā suvaṇṇakārantevāsī vā taṃ jātarūpaṃ ekantaṃ udakena paripphoseyya, tṭhānaṃ taṃ jātarūpaṃ nibbāpeyya. Sace, bhikkhave, suvaṇṇakāro vā suvaṇṇakārantevāsī vā taṃ jātarūpaṃ ekantaṃ ajjupekkheyya, tṭhānaṃ taṃ jātarūpaṃ na sammā paripākaṃ gaccheyya. Yato ca kho, bhikkhave, suvaṇṇakāro vā suvaṇṇakārantevāsī vā taṃ jātarūpaṃ kālena kālaṃ abhidhamati, kālena kālaṃ udakena paripphoseti, kālena kālaṃ ajjupekkhati, taṃ hoti jātarūpaṃ muduṅca kammaniyaṅca pabhassaraṅca, na ca pabhaṅgu, sammā upeti kammāya. Yassā yassā ca piḷandhanavikatiyā ākaṅkhati, yadi paṭṭikāya yadi kuṇḍalāya yadi gīveyyakena yadi suvaṇṇamālāya, taṅcassa atthaṃ anubhoti.

“Evameva kho, bhikkhave, adhicittamanuyuttena bhikkhu...pe... sammā samādhīyati āsavānaṃ khayāya. Yassa yassa ca abhiññāsacchikaraṇīyassa dhammassa cittaṃ abhininnāmeti abhiññāsacchikiriyāya, tatra tatreva sakkhibhabbatam pāpuṇāti sati satiāyatane’ ti (a. ni. 3.103) –

Evaṃ paṭhamam attham dassetvā tadatantaram upamaṃ vatvā punapi attho evam paṭhamam attham dassetvā tadanantaram upamaṃ vatvā punapi attho vutto.

Sattasūriyopame ca –

“Aniccā, bhikkhave, saṅkhārā, adhuvā, bhikkhave, saṅkhārā, anassāsikā, bhikkhave, saṅkhārā, yāvañcidaṃ, bhikkhave, alameva sabbasaṅkhāresu nibbindiṭuṃ alaṃ virajjituṃ alaṃ vimuccituṃ. Sineru, bhikkhave, pabbatarājā caturāsītiyojanasahassāni āyāmena, caturāsītiyojanasahassāni vitthārena, caturāsītiyojanasahassāni mahāsamudde ajjhogāḷho, caturāsītiyojanasahassāni

mahāsamuddā accuggato. Hoti so kho, bhikkhave, samayo, yaṃ kadāci karahaci dīghassa addhuno accayena bahūni vassāni bahūni vassasatāni bahūni vassasahassāni bahūni vassasatasahassāni devo na vassati, deve kho pana, bhikkhave, avassante ye kecime bījagāmahūtagāmā osadhitiṇavanappatayo, te ussussanti visussanti na bhavanti. Evaṃ aniccā, bhikkhave, saṅkhārā, evaṃ adhvā, bhikkhave, saṅkhārā”tiādinā (a. ni. 7.66) –

Paṭhamam attham dassetvā tadanantaram upamam vatvā punapi attho vutto. Atha vā “sūriyassa, bhikkhave, udayato etaṃ pubbaṅgamaṃ etaṃ pubbanimittam, yadidaṃ aruṇuggam. Evameva kho, bhikkhave, bhikkhuno ariyassa aṭṭhaṅgikassa maggassa uppādāya etaṃ pubbaṅgamaṃ etaṃ pubbanimittam, yadidaṃ kalyāṇamittatā”ti yadetam **saṃyuttanikāye** (saṃ. ni. 5.49) āgataṃ, taṃ idha sūriyopamasuttanti adhippetam siyā. Tampi “katthaci upamāya attham parivāretvā dasseti”ti iminā na sameti paṭhamam upamam vatvā tadanantaram attham dassetvā puna upamāya avuttattā. Paṭhamameva hi tattha upamā dassitā, “imasmim pana sālīsūkopame upamāya attham parivāretvā dassento seyyathāpi, bhikkhaveti ādimāhā”ti. Idampi vacanamasaṅgahitam vatthasuttassa imassa ca visesābhāvato. Ubhayatthāpi hi paṭhamam upamam dassetvā pacchā attho vutto, tasmā evamettha pāṭhena bhavitabbaṃ “tatra bhagavā katthaci paṭhamameva upamam dassetvā pacchā attham dasseti vatthasutte viya **pāricchattakopama-** (a. ni. 7.69) **aggikkhandhopamādisuttesu** (a. ni. 7.72) viya ca, katthaci atthena upamam parivāretvā dasseti **suvanṇakārasattasūriyopamādisuttesu** (a. ni. 7.66) viya, imasmim pana sālīsūkopame paṭhamam upamam dassetvā pacchā attham dassento seyyathāpi, bhikkhaveti ādimāhā”ti. Aññathā **majjhimaṭṭhakathāya** virujjhati. Idhāpi ca pubbenāparam na sameti. Majjhimaṭṭhakathāya vuttanayeneva vā idhāpi pāṭho gahetabbo.

Kaṇasadiṣo sāliphallassa tuṅḍe uppajjanakavālo **sālīsūkam**, tathā **yavasūkam**. Sūkassa tanukabhāvato bhedavato bhedo nātimahā hotīti āha – “**bhindissati, chaviṃ chindissatīti attho**”ti. Yathā micchāṭṭhapitasālīsūkādī akkantampi hatthādiṃ na bhindati bhinditum ayoggabhāvena ṭhitattā, evaṃ ācayagāmicittam avijjam na bhindati bhinditum ayoggabhāvena uppannattāti imamattham dasseti “**micchāṭṭhapitenā**”tiādinā. **Aṭṭhasu ṭhānesūti** “dukkhe aññāṇa”ntiādinā vuttesu dukkhādīsu catūsu saccesu pubbantādīsu catūsu cāti aṭṭhasu ṭhānesu. **Ghanabahalanti** cirakālaparibhāvanāya ativiya bahalam. Mahāvisayatāya mahāpaṭipakkhatāya bahuparivāratāya bahudukkhatāya ca mahatī avijjāti mahāvijjā. Taṃ **mahāvijjam**. Mahāsaddo hi bahubhāvattthopi hoti “mahājano”tiādīsu viya. **Taṇhāvānato nikkhantabhāvenāti** tattha taṇhāya abhāvameva vadati.

42. Dutiye pādeneva avamaddite akkantanti vuccamāne hatthena avamadditam akkantam viya akkantanti ruḥhī hesāti āha – “**akkantanteva vutta**”nti. **Ariyavohāro**ti ariyadesavāsīnam vohāro. Mahantam aggahetvā appamattakasseva gahaṇe payojanam dassetum – “**kasmā panā**”tiādi āradham. Tena “vivatṭūpanissayakusalam nāma yoniso uppāditam appaka”nti na cintetabbaṃ, anukkamena laddhapaccayam hutvā vaḍḍhamānam khuddakanadī viya pakkhandamahoghā samuddam, anukkamena nibbānamahāsamuddameva purisam pāpetīti dīpeti. **Paccekabodhim buddhabhūminti** ca paccatte upayogavacanam. **Vatṭavivatṭam kathitanti** yathākkamena vuttaṃ.

43. Tatiye **dosena paduṭṭhacittanti** sampayuttadhammānam, yasmim santāne uppajjati, tassa ca dūsanena visasamsaṭṭhapūtimuttasadisena dosena padūsitacittam. **Attano cittenāti** attano cetopariyaññena sabbaññutaññānena vā sahitenā cittena. **Paricchinditvāti** ñānena paricchinditvā. Itthākārena etīti ayo, sukham. Sabbaso apeto ayo etassa, etasmāti vā **apāyo**, kāyikassa cetasikassa ca dukkhassa gati pavattiṭṭhānanti **duggati**, kāraṇāvasena vividham vikārena ca nipātiyanti etthāti **vinipāto**, appakopi natthi ayo sukham etthāti **nirayoti** evamettha attho veditabbo.

44. Catutthe **saddhāpasādena pasannanti** saddhāsaṅkhātena pasādena pasannam, na indriyānam avippasannatāya. **Sukhassa gatinti** sukhassa pavattiṭṭhānam. Sukhamevettha gacchanti, na dukkhanti vā **sugati**. Manāpiyarūpādītāya saha aggehīti **saggam**, lokam.

45. Pañcame pariḷahavūpasamakaro rahado etthāti rahado, udakapuṇṇo rahado **udakarahado**. Udakam

dahati dhāretīti **udakadaho**. Āviloti kalalabahulatāya ākulo. Tenāha – “**avippasanno**”ti. **Luḷitoti** vātena āloḷito. Tenāha – “**apariṣaṅghito**”ti. Vātābhīghātena vīcitarāṅgamalasaṃkulatāya hi parito na saṅghito vā **apariṣaṅghito**. Vātābhīghātena udakassa ca appabhāvena kalalībhūto kaddamabhāvappattoti āha – “**kaddamībhūto**”ti. **Sippiyo** muttasippiyādayo. **Sambukā** saṅkhasalākavisesā. **Carantampi tiṭṭhantampīti** yathālābhavacanamaṭaṃ daṭṭhabbaṃ. Tameva hi yathālābhavacanamaṭaṃ dassetuṃ – “**etthā**”tiādi āradhamaṃ.

Pariyonaddhenāti paṭicchādītena. Tayidaṃ kāraṇena āvilabhāvassa dassaṃaṃ. Diṭṭhadhamme imasmiṃ attabhāve bhavo **diṭṭhadhammiko**, so pana lokiyopi hoti lokuttaropīti āha – “**lokiyalokuttaramissako**”ti. Pecca samparetabbato **samparāyo**, paraloko. Tenāha – “**so hi parattha atthoti parattho**”ti. Iti dvidhāpi sakasantatipariyāpanno eva gahitoti itarampi saṅgahetvā dassetuṃ – “**apicā**”tiādimāha. **Ayanti** kusalakammaṭṭhasaṅkhāto dasavidho dhammo. **Satthantarakappāvasāneti** idaṃ tassa āsannabhāvaṃ sandhāya vuttaṃ. Yassa kassaci antarakappassāvasāneti veditabbaṃ. **Ariyānaṃ yuttanti** ariyānaṃ ariyabhāvāya yuttaṃ, tato eva **ariyabhāvaṃ kātuṃ samatthaṃ**. Nāṇameva ñeyyassa paccakkhakarāṇaṭṭhena **dassananti** āha – “**ñāṇameva hi**”tiādi. Kiṃ pana tanti āha – “**dibbacakkhū**”tiādi.

46. Chaṭṭhe **accho**ti tanuko. Tanubhāvameva hi sandhāya “**abhalo**”ti vuttaṃ. Yasmā pasanno nāma accho na bahalo, tasmā “**pasannotipi vaṭṭati**”ti vuttaṃ. **Vippasannoti** visesena pasanno. So pana sammā pasanno nāma hotīti āha – “**suṭṭhu pasanno**”ti. **Anāviloti** akaluso. Tenāha – “**parisuddho**”tiādi. **Saṅkhanti** khuddakasevālaṃ, yaṃ “tilabjaka”nti vuccati. **Sevālanti** kaṇṇikasevālaṃ. **Paṇakanti** udakamaṃ. Cittassa āvilabhāvo nīvaraṇahetukoti āha – “**anāvilenāti pañcanīvaraṇavimuttanā**”ti.

47. Sattame **rukkhajātānīti** ettha jātasaddena padavaḍḍhanameva kataṃ yathā “kosajāta”nti āha – “**rukkhānamevetamaṃ adhvācana**”nti. **Koci hi rukkho vaṇṇena aggo hoti** yathā taṃ rattacandanādi. **Koci gandhena** yathā taṃ gosītacandanamaṃ. **Koci rasena** khadirādi. **Koci thaddhatāya** campakādi. Maggaphalāvahatāya vipassanāvasena **bhāvitampi** gahitaṃ. “Tattha tattheva sakkhibhabbataṃ pāpuṇātī”ti (a. ni. 3.103) vacanato “**abhiññāpādakacatutthajjhānacittameva, āvuso**”ti phussamittatthero vadati.

48. Aṭṭhame cittassa parivattanaṃ uppādanirodhā evāti āha – “**evaṃ lahuṃ uppajjivā lahuṃ nirujjhanaka**”nti. **Adhimattapamāṇattheti** atikkantapamāṇatthe, pamāṇātītātāyanti attho. Tenāha – “**ativiya na sukarā**”ti. **Cakkhuvīññāṇampi adhippetamevāti** sabbassapi cittassa samānakhāṇattā vuttaṃ. Cittassa ativiya lahuparivattibhāvaṃ theravādena dīpetuṃ – “**imasmim panatthe**”tiādi vuttaṃ. **Cittasaṅkhārāti** sasampayuttaṃ cittaṃ vadati. **Vāhasatānaṃ kho, mahārāja, vīhīnanti** potthakesu likhanti, “vāhasataṃ kho, mahārāja, vīhīna”nti pana pāṭhena bhavitabbaṃ. **Milindapañhepi** (mi. pa. 4.1.2) hi kathaci ayameva pāṭho dissati. “Vāhasatāna”nti vā paccatte sāmivacanaṃ byattayena vuttanti daṭṭhabbaṃ. **Aḍḍhacūḷanti** thokena ūnaṃ upaḍḍhaṃ. Kassa pana upaḍḍhanti? Adhikārato vāhassāti viññāyati. “Aḍḍhacuddasa”nti keci. “Aḍḍhacatuttha”nti apare. Sādhikaṃ diyaḍḍhasataṃ vāhāti dalhaṃ katvā vadanti, vīmaṃsitabbaṃ. Catunālīko **tumbo. Pucchāya abhāvenāti** “sakkā pana, bhante, upamaṃ kātu”nti evaṃ pavattāya pucchāya abhāvena **na katā upamā. Dhammadesanāpariyosāneti** sannipatitaparīsāya yathāradhdhadhammadesanāya pariyosāne.

49. Navame **pabhassaranti** pariyodātaṃ sabhāvaparīsuddhaṭṭhena. Tenāha – “**paṇḍaram parisuddha**”nti. Pabhassaratādayo nāma vaṇṇadhātuyamaṃ labbhanakavisesāti āha – “**kiṃ pana cittassa vaṇṇo nāma atthi**”ti? Itaro arūpatāya “natthi”ti paṭikkhipitvā pariyāyakathā ayaṃ tādīsassa cittassa parisuddhabhāvanādīpanāyāti dassento “**nīlādīna**”ntiādimāha. Tathā hi “so evaṃ samāhite citte parisuddhe pariyodāte”ti (dī. ni. 1.243-244; ma. ni. 1.384-386, 431-433; pārā. 12-13) vuttaṃ. Tenevāha – “**idampi nirupakkilesatāya parisuddhanti pabhassara**”nti. Kiṃ pana bhavaṅgacittaṃ nirupakkilesanti? Āma sabhāvato nirupakkilesamaṃ, āgantukaupakkilesavasena pana siyā upakkiliṭṭhaṃ. Tenāha – “**tañca kho**”tiādi. Tattha attano tesañca bhikkhūnaṃ paccakkhabhāvato pubbe “ida”nti vatvā idāni paccāmasanavasena “**ta**”nti āha. Ca-saddo atthūpanayane. Kho-saddo vacanālaṅkāre, avadhāraṇe vā. Vakkhamānassa atthassa nicchitabhāvato bhavaṅgacittena sahāvattāhānābhāvato upakkilesānaṃ āgantukatāti āha – “**asahajātehi**”tiādi. Rāgādayo upecca cittasantānaṃ kilissanti vibādhenti upatāpentī cāti āha –

“**upakkilesehīti rāgādīhī**”ti. Bhavaṅgacittassa nippariyāyato upakkilesehi upakkiliṭṭhatā nāma natthi asaṃsaṭṭhabhāvato, ekasantatipariyāpannatāya pana siyā upakkiliṭṭhatāpariyāyoti āha – “**upakkiliṭṭhaṃ nāmāti vuccati**”ti. Idāni tamatthaṃ upamāya vibhāvetuṃ “**yathā hī**”tiādīmāha. Tena bhinnasantānagatāyapi nāma iriyāya loke gārayhatā dissati, pageva ekasantānagatāya iriyāyāti imaṃ visesaṃ dasseti. Tenāha – “**javanakkhaṇe...pe... upakkiliṭṭhaṃ nāma hotī**”ti.

50. Dasame **bhavaṅgacittameva cittanti** “pabhassaramidaṃ, bhikkhave, citta”nti vuttaṃ bhavaṅgacittameva. Yadaggena bhavaṅgacittaṃ tādīsapaccayasamavāye upakkiliṭṭhaṃ nāma vuccati, tadaggena tabbidhurapaccayasamavāye upakkilesato vimuttanti vuccati. Tenāha – “**upakkilesehi vippamuttaṃ nāma hotī**”ti. Sesamettha navamasutte vuttanayānusārena veditabbaṃ.

Paṇihitaacchavaggaṇṇanā niṭṭhitā.

6. Accharāsaṅghātavaggaṇṇanā

51. Chaṭṭhassa paṭhame **assutavāti** ettha “sādhu paññānavā naro”tiādīsu (jā. 2.18.101) atthitāmatassa bodhako vā-saddo. “Sīlavā hoti kalyāṇadhammo”tiādīsu (ma. ni. 3.381) pasamsāvisiṭṭhāya atthitāya. “Paññāvā hoti udayatthagāminiyā paññāya samannāgato”tiādīsu (dī. ni. 3.317; ma. ni. 2.25) atisayatthavisīṭṭhāya atthitāya, tasmā yassa pasatthaṃ atisayena vā sutam atthi, so sutavā, saṃkilesaviddhaṃsanasamatthaṃ pariyattidhammassavanaṃ, taṃ sutvā tathattāya paṭipatti ca “sutavā”ti iminā padena pakāsītā. Sotabbayuttaṃ sutvā kattabbanipphattivasena suṇṭi vā sutavā, tappaṭikkhepena na sutavāti **assutavā**.

Ayañhi akāro “ahetukā dhammā (dha. sa. 2 dukamātikā), abhikkhuko āvāso”tiādīsu (pāci. 1047) taṃsamāyoganivattiyam diṭṭho. “Appaccayā dhammā”ti (dha. sa. 7 dukamātikā) taṃsambandhibhāvanivattiyam. Paccayuppannañhi paccayasambandhīti apaccayuppannatā ataṃsambandhitā ettha jotitā. “Anidassanā dhammā”ti (dha. sa. 9 dukamātikā) taṃsabhāvanivattiyam. Nidassanañhi ettha daṭṭhabbatā. Atha vā passatīti nidassanaṃ, cakkhuvīññāṇam. Taggahetabbatānivattiyam, tathā “anāsavā dhammā”ti (dha. sa. 15 dukamātikā). “Appaṭighā dhammā (dha. sa. 10 dukamātikā) anārammaṇā dhammā”ti (dha. sa. 55 dukamātikā) taṃkiccanivattiyam. “Arūpino dhammā acetasikādhammā”ti taṃsabhāvanivattiyam. Tadaññatā hi idha pakāsītā. “Amanusso”ti tabbhāvamattanivattiyam. Manussattamattaṃ natthi, aññaṃ taṃsadisanti. Sadīsātā hi ettha sūcitā. “Assamaṇo samaṇapaṭiñño abrahmacārī brahmacāripaṭiñño”ti (a. ni. 3.13) ca taṃsambhāvanīyaguṇanivattiyam. Garahā hi idha ñāyati. “Kacci bhoto anāmayam (jā. 1.15.146; 2.20.129) anudarā kaññā”ti ca tadanappabhāvanivattiyam. “Anuppannā dhammā”ti (dha. sa. 17 tikamātikā) taṃsadisabhāvanivattiyam. Atītānañhi uppannapubbattā uppādidhammānaṃca paccayekadesasiddhiyā āradhuppādabhāvato kālavinimuttassa ca vijjamānatā uppannānukūlatā, pageva paccuppannānti tabbidhuratā hettha viññāyati. “Asekkhā dhammā”ti (dha. sa. 11 tikamātikā) tadapariyosānanivattiyam. Tanniṭṭhānañhettha pakāsītanti evaṃ anekesaṃ atthānaṃ jotako. Idha pana “arūpino dhammā (dha. sa. 11 dukamātikā), acetasikā dhammā”tiādīsu (dha. sa. 57 dukamātikā) viya taṃsabhāvanivattiyam daṭṭhabbo, aññattheti attho. Etenassa sutādiññānaviraḥam dasseti. Tena vuttaṃ – “**āgamādhigamābhāvā ñeyyo assutavā itī**”ti.

Idāni tassatthaṃ vivaranto “**yo hī**”tiādīmāha. Tattha yasmā khandhadhātādikosallenapi upakkilesaupakkiliṭṭhānaṃ jānanahetubhūtaṃ bāhusaccaṃ hoti. Yathāha – “kittāvatā nu kho, bhante, bahussuto hoti? Yato kho, bhikkhu, khandhakusalo hoti. Dhātu...pe... āyatana...pe... paṭiccasamuppādakusalo hoti. Ettāvatā kho, bhikkhu, bahussuto hotī”ti. Tasmā “**yassa ca khandhadhātuāyatanaṃpaccayākārasatipaṭṭhānādīsū**”tiādī vuttaṃ. Tattha vācuggatakaṇaṃ **uggaho**. Athaparipucchanam **puripucchā**. Kusalehi saha codanāpariharaṇavasena vinicchayakaṇaṃ **vinicchayo**. Ācariye pana payirupāsītvā atthadhammānaṃ āgamaṃ sutamayaññāvasena avabujjhaṃ **āgamo**. Maggaphalanibbānaṃ sacchikiriyā **adhigamo**.

Bahūnaṃ nānappakārānaṃ sakkāyaditṭhādīnaṃ avihatattā tā janenti, tāhi vā janitāti **puthujjanā**. Avighātameva vā jana-saddo vadati. **Puthu satthārānaṃ mukhullokikā**ti ettha puthū janā satthupaṭiñṇā etesanti **puthujjanā**. **Sabbagatīhi avuṭṭhitā**ti ettha Janetabbā, jāyanti vā ettha sattāti janā, gatiyo, tā puthū etesanti **puthujjanā**. Ito pare jāyanti etehīti janā, abhisāṅkhārādayo, te etesaṃ puthū vijjantīti **puthujjanā**. Abhisāṅkhārādiattho eva vā jana-saddo daṭṭhabbo. **Oghā** kāmoghādayo. Rāgaggiādayo **santāpā**. Te eva sabbepi vā kilesā **pariḷāhā**. **Puthu pañcasu kāmagaṇesu rattāti** ettha jāyatīti jano, rāgo gedhoti evamādiko, puthu jano etesanti **puthujjanā**. Puthūsu janā jātā rattāti evaṃ rāgādiattho eva vā jana-saddo daṭṭhabbo.

Rattāti vatthaṃ viya raṅgajātena cittassa vipariṇāmakarena chandarāgena rattā sārattā. **Giddhāti** abhikaṅkhanasabhāvena abhigijjhanena giddhā gedhaṃ āpannā. **Gadhitāti** ganthitā viya dummocanīyabhāvena tattha paṭibaddhā. **Mucchitāti** kilesavasena visaññibhūtā viya anaññakiccā mohamāpannā. **Ajjhopannāti** anaññasādhāraṇe viya katvā gilitvā pariniṭṭhāpetvā ṭhitā. **Laggāti** vaṅkakaṅṭake viya āsattā, mahāpalipe yāva nāsikaggā palipannapuriso viya uddharitūṃ asakkuṇeyyabhāvena nimuggā. **Laggitāti** makkaṭālepe ālaggabhāvena sammāsito viya makkaṭo pañcannaṃ indriyānaṃ vasena ālaggitā. **Palibuddhāti** sambaddhā, upaddutā vā. **Āvutāti** āvaritā. **Nivutāti** nivāritā. **Ovutāti** paliguṅṭhitā, pariyonaddhā vā. **Pihitāti** pidahitā. **Paṭicchannāti** chādītā. **Paṭikujjitāti** heṭṭhāmukhajātā.

“Assutavā”ti etena avijjandhatā vuttāti āha – “**andhaputhujjano vutto**”ti. **Cittaṭṭhiti cittapariggaho natthīti** yāya paṭipattiyā cittassa upakkilesaṃ tato vippamuttiñca yathāsabhāvato jāneyya, sā cittabhāvanā cittaṭṭhiti. Ekārammaṇe suṭṭhu samādhānavasena avaṭṭhitim pādakaṃ katvā pavattitā sampayuttadhammehi nissayārammaṇehi ca saddhim cittassa pariggahasaññitā vipassanābhāvanāpi natthi, yāya vuttamatthaṃ yathāsabhāvato jāneyya.

52. Dutiye **sutavāti** padassa attho anantarāsutte vuttoyeva. **Ariyasāvako**ti ettha catukkaṃ sambhavatīti taṃ dassetuṃ – “**atthi ariyo**”tiādi āraddhaṃ. Paccekaṃ saccāni buddhavantoti **paccekabuddhā**. Nanu sabbepi ariyā paccekameva saccāni paṭivijjhanti dhammassa paccattavedanīyabhāvato? Nayidamīdisaṃ paṭivedhaṃ sandhāya vuttaṃ. Yathā pana sāvaka aññesaṃ nissayena saccāni paṭivijjhanti paratoghosena vinā tesāṃ dassanamaggassa anuppajjanato. Yathā ca sammāsambuddhā aññesaṃ nissayabhāvena saccāni abhisambujjhanti, na evamete, ete pana aparaneyyā hutvā aparānāyakabhāvena saccāni paṭivijjhanti. Tena vuttaṃ – “paccekaṃ saccāni buddhavantoti paccekabuddhā”ti.

Atthi sāvako na ariyoti ettha pothujjanikāya saddhāya ratanattaye abhippasanno saddhopi gahito eva. **Gihī anāgataphaloti** idaṃ pana nidassanamattaṃ daṭṭhabbaṃ. Yathāvuttapuggalo hi saraṇagamanato paṭṭhāya sotāpattiphalasacchikiriyāya paṭipannoicceva vattabbataṃ labhati. Svāyamatto **dakkhiṇāvisuddhisuttena** (ma. ni. 3.376 ādayo) dīpetabbo. **Sutavāti** ettha vuttaattho nāma atthitaparāhitappaṭipatti, tassa vasena sutasampanno. Yaṃ sandhāya vuttaṃ – “so ca hoti sutena upapanno, appampi ce sahitaṃ bhāsamāno”ti ca ādi. **Ariyasāvako veditabboti** ariyassa bhagavato dhammassavanakicce yuttappayuttabhāvato vuttaṃ. Upakkilesehi vippamutti anupakkiliṭṭhatā, tassā yathāsabhāvajānaṃ daḷhatarāya eva cittabhāvanāya sati hoti, na aññathāti “**balavavipassanā kathitā**”ti vuttaṃ.

53. Tatiye **aggikkhandhopamasuttantaatṭhuppattiyanti** aggikkhandhopamasutte (a. ni. 7.72) desanāatṭhuppattiyā. Taṃdesanāhetukañhi ekaccānaṃ bhikkhūnaṃ micchāpaṭipattim nimittaṃ katvā bhagavā imaṃ suttaṃ desesi. **Avijahitameva hoti** sabbakālaṃ suppatiṭṭhitasatisampajāññattā. Yasmā buddhānaṃ rūpakāyo bāhirabbhantarehi malehi anupakkiliṭṭho sudhotajātimaṇisadiso, tasmā vuttaṃ – “**upaṭṭhākānuggahatthaṃ sarīraphāsukatthañcā**”ti. **Vītināmetvāti** phalasaṃpattīhi vītināmetvā. Kālaparicchedavasena vivittāsane vītināmanaṃ vivekaninnatāya ceva pasesaṃ diṭṭhānugatiāpajjanatthañca. **Nivāsetvāti** vihāranivāsanaparivattanavasena nivāsetvā. Kadāci ekakassa, kadāci bhikkhusaṅghaparivutassa, kadāci pakatiyā, kadāci pāṭihāriyehi vattamānehi ca gāmapaveso tathā tathā vinetabbapuggalavasena. **Upasaṃharitvāti** himavantādīsu pupphitarukkhādito ānetvā. Oṇatuṇṇatāya

bhūmiyā satthu padanikkhepasamaye samabhāvāpatti,
sukhasamphassavikasitapadumasampañicchanāñca suppatiṭṭhitapādātāya nissandaphalaṃ, na
iddhinimmānaṃ. Nidassanamattañcetamaṃ sakkharākāṭhalakāṇṭakasaṅkukalalādiapagama sucibhāvāpattīti
evamādīnampi tadā labbhanato.

Indakhīlassa anto ṭhapitamatteti idamaṃ yāvadeva veneyyajanavinayattāya satthu pāṭihāriyaṃ
pavattanti katvā vuttaṃ. **Dakkhiṇapādeti** idamaṃ buddhānaṃ sabbapadakkhiṇātāya.
“**Chabbaṇṇarasmiyo**”ti vatvāpi “**suvanṇarasapiṇjarāni viyā**”ti idamaṃ buddhānaṃ sarīre pītābhāya
yebhuyyatāya vuttaṃ. **Madhurenākārena saddamaṃ karonti** daṭṭhabbasārassa diṭṭhatāya. Bheriādīnaṃ pana
saddāyanaṃ dhammatāva. **Paṭimānentīti** “sudullabhaṃ idamaṃ ajja amhehi labbhati, ye mayaṃ īdisena
paṇītena āhārena bhagavantaṃ upaṭṭhahāmā”ti paṭitamānasā mānenti pūjenti. **Tesamaṃ santānāni oloketvāti**
tesamaṃ tathā upaṭṭhākānaṃ puggalānaṃ atīte etarahi ca pavattacittasantānāni oloketvā. Arahatte
paṭiṭṭhahantīti sambandho. **Tatthāti** vihāre. **Gandhamaṇḍalamāleti** catujjātiyagandhena kataparibhaṇḍe
maṇḍalamāle.

Dullabhā khaṇasampattīti satipi manussattappaṭilābhe
patirūpadesavāsaindriyāvekkasaddhāpaṭilābhādayo guṇā dullabhāti attho. **Cātumahārājika...pe...
vasavattibhavanaṃ gacchantīti** idamaṃ tattha suññavimānāni sandhāya vuttaṃ. Bhagavā gandhakuṭiṃ
pavisitvā pacchābhataṃ tayo bhāge katvā paṭhamabhāge sace ākaṅkhati, dakkhiṇena passena sīhaseyyaṃ
kappeti. Sace ākaṅkhati, buddhāciṇṇaphalasaṃpattītiṃ samāpajjati. Atha yathākālaparicchedamaṃ tato
vuttahitvā dutiyabhāge pacchimayāme tatiyakoṭṭhāse viya lokamaṃ voloketi veneyyānaṃ ṇāṇaparipākamaṃ
passitumaṃ. Tenāha – “**sace ākaṅkhati**”tiādi.

Kālayuttanti pattakallaṃ, “imissā velāya imassa evamaṃ vattabba”nti taṃkālanurūpaṃ.
Samayayuttanti tasseva vevacanaṃ, aṭṭhuppattianurūpaṃ vā. **Samayayuttanti** vā ariyasamayasaṃyuttaṃ.
Desakālānurūpameva hi buddhā bhagavanto dhammaṃ desenti, desentā ca ariyasammataṃ
paṭiccasamuppādanayaṃ dīpentāva desenti. Atha vā **samayayuttanti** hetudāharaṇasahitaṃ. Kālena
sāpadesaṇhi bhagavā dhammaṃ deseti, **kālaṃ viditvā parisamaṃ uyyojeti, na** yāva samandhakārā
dhammaṃ deseti.

Utumaṃ gaṇhāpeti, na pana malaṃ pakkhāletīti adhippāyo. Na hi bhagavato kāye rajojallaṃ
upalimpatīti. **Tato tatoti** attano attano divāṭṭhānādito. **Okāsaṃ labhamānāti**
purebhattapacchābhattapurimayāmesu okāsaṃ alabhitvā idāni majjhimayāme okāsaṃ labhamānā,
bhagavatā vā katokāsātāya okāsaṃ labhamānā. Pacchābhattassa tīsu bhāgesu paṭhamabhāge
sīhaseyyakappanaṃ ekantikaṃ na hotīti āha – “**purebhattato paṭṭhāya nisajjāpīlitaṃ sarīrassa**”ti.
Teneva hi tattha “sace ākaṅkhati”ti tadā sīhaseyyakappanassa anibaddhatā vibhāvitā. **Kilāsubhāvo**
parissamo. Sīhaseyyaṃ kappeti sarīrassa kilāsubhāvamocanathanti yojetabbaṃ. **Buddhacakkhunā lokamaṃ
voloketīti** idamaṃ pacchimayāme bhagavato bahulaṃ āciṇṇavasena vuttaṃ. Appekadā avasiṭṭhabalañāṇehi
sabbaññutaññāṇeneva ca bhagavā tamatthaṃ sādhetīti.

Imasmiṃyeva kicceti pacchimayāmakicce. Balavatā paccanutāpena saṃvaḍḍhamānena karajakāye
mahāpariḷāho uppajjatīti āha – “**nāmakāye santatte karajakāyo santatto**”ti. **Nidhānagatanti**
sannicalohitaṃ sandhāya vuttaṃ. **Uṇhaṃ lohitaṃ mukhato uggañchīti** lohitaṃ uṇhaṃ hutvā mukhato
uggañchi. **Ṭhānanti** bhikkhupaṭiññaṃ. **Tamaṃ pāpamaṃ vaḍḍhamānanti** bhikkhupaṭiññāya avijahitattā tathā
pavaḍḍhamānapāpaṃ. Antimavattuajjhāpanānampi upāyena pavattiyamāno yonisomanasikāro sātthako
hotiyevāti dassento “**jātasamaṃvegā**”tiādimāha. **Aho sallekhitanti** aho ativiya sallekhena itamaṃ pavattaṃ.
Kāsāvapajjototi bhikkhūnaṃ bahubhāvato ito cito ca vicarantānaṃ tesamaṃ kāsāvajutiyā pajjotito.
Isivātaparivātoti silakkhandhādīnaṃ nibbānassa ca esanato isīnaṃ bhikkhūnaṃ guṇagandhena ceva
guṇagandhavāsītena sarīragandhena ca parito samantato vāyito.

Dhammasamaṃvego uppajji anāvajjanena pubbe tassa atthassa asaṃviditattā. **Dhammasamaṃvegoti** ca
tādise atthe dhammatāvasena uppajjanakamaṃ sahottappaññaṃ. **Assāsaṭṭhānanti** cittassāsakāraṇaṃ

kammaṭṭhānaṃ. Sabbesaṃ kiccānaṃ pubbabhāgo **sabbapubbabhāgo**. “Sabbe sattā averā hontū”tiādīnā hi cittassa paṭṭhānaṃ upaṭṭhānaṃ **hitapharaṇaṃ**. Itaraṃ ito thokaṃ mahantanti katvā idaṃ “**cūlaccharāsaṅghātasutta**”nti vuttaṃ. Accharāsaṅghāto vuccati aṅguliphotaṇakkhaṇo akkhinimisakālo, yo ekassa akkharassa uccāraṇakkhaṇo. Tenāha – “**dve aṅguliyo paharivā saddakaraṇamatta**”nti. **Sabbasattānaṃ hitapharaṇacittanti** sabbesampi sattānaṃ sammadeva hitesitavasena pavattacittāṃ. **Āvajjento āsevatīti** hitesitavasena āvajjento. Āvajjana ābhujantopi āsevatī nāma ñānavippayuttena. **Jānantoti** tathā ñānaṃmattaṃ uppādentopi. **Passantoti** tathā ñānacakkhunā paccakkhato viya vipassantopi. **Paccavekkhantoti** tamattaṃ pati pati avekkhantopi. **Saddhāya adhimuccantoti**ādi pañcannaṃ indriyānaṃ vasena vuttaṃ. **Abhiññeyyanti**ādi catusaccavasena vuttaṃ. Sabbameva cetāṃ vitthārato, sāmāññena āsevanadassanamevāti idhādhippetameva āsevanatthaṃ dassetuṃ – “**idha panā**”tiādi vuttaṃ.

Arittajjhānoti avirahitajjhāno. **Atucchajjhānoti** jhānena atuccho. Cāgo vā vevacananti āha – “**apariccattajjhāno**”ti. **Viharatīti** padassa **vibhaṅge** (vibha. 540) āgatanayena atthaṃ dassento “**viharatīti iriyatī**”tiādīmāha. Ayaṃ panettha saddattho – **viharatīti** ettha **vi-saddo** vicchedatthajotano. **Haratīti** neti, pavattetīti attho, vicchinditvā haratī viharatīti vuttaṃ hoti. So hi ekaṃ iriyāpathabādhanāṃ aññena iriyāpathena vicchinditvā aparipatantaṃ attabhāvaṃ haratī pavatteti, tasmā “viharatī”ti vuccati. **Iriyatīti** ṭhānanisajjādikiriyāṃ karonto pavattati. **Pavattatīti** ṭhānādisamaṅgī hutvā pavattati. **Pāletīti** ekaṃ iriyāpathabādhanāṃ iriyāpathantarehi rakkhanto pāleti. **Yapeti yāpetīti** tasseva vevacanaṃ. Ekañhi iriyāpathabādhanāṃ aññena iriyāpathena vicchinditvā aparipatantaṃ attabhāvaṃ pāleno yapeti yāpetīti vuccati. **Caratīti** ṭhānanisajjādīsu aññatarasamaṅgī hutvā pavattati. **Iminā padenāti** “viharatī”ti iminā padena.

Iriyāpathavihāroti ettha iriyānaṃ pavattanaṃ iriyā, kāyappayogo kāyikakiriyā. Tassā pavattanūpāyabhāvato iriyāya patho iriyāpatho, ṭhānanisajjādi. Na hi ṭhānanisajjādīhi avatthāhi vinā kiñci kāyikakiriyāṃ pavattetuṃ sakkā. ṭhānasamaṅgī vā hi kāyena kiñci kareyya, gamanādīsu aññatarasamaṅgī vā. Viharaṇaṃ, viharatī etenāti vā vihāro, iriyāpathova vihāro **iriyāpathavihāro**, so ca atthato ṭhānanisajjādiākārapavatto catusantatirūpappabandho eva. Ovādānūsāsanīnaṃ ekānekavārādivisittḥoyeva bhedo, na pana paramatthato tesāṃ nānākaraṇanti dassetuṃ – “**paramatthato panā**”tiādīmāha. Tattha **ese eke ekatṭheti**ādīsu eso eko ekatṭhotiādīnā attho veditabbo.

Raṭṭhassa, raṭṭhato vā laddho piṇḍo raṭṭhapiṇḍo. Tenāha – “**ñātiparivaṭṭaṃ pahāyā**”tiādi. Tattha “amhākamete”ti viññāyantīti ñātī, pitāmahapituputtādivasena parivaṭṭanaṭṭhena parivaṭṭo, ñātiyeva parivaṭṭo **ñātiparivaṭṭo**. **Theyyaparibhogo nāma** anarahassa paribhogo. Bhagavatā hi attano sāsane sīlavato paccayā anuññātā, na dussīlassa. Dāyakānampi sīlavato eva pariccāgo, na dussīlassa attano kārānaṃ mahapphalabhāvassa paccāsīsanato. Iti satthārā ananuññātattā dāyakehi ca apariccattattā saṅghamajjhepi nisīditvā paribhuñjantassa dussīlassa paribhogo theyyāya paribhogo theyyaparibhogo. Iṇavasena paribhogo **iṇaparibhogo** paṭiggāhakato dakkhiṇāvisuddhiyā abhāvato iṇaṃ gahetvā paribhogo viyāti attho.

Dātabbatṭhena dāyaṃ, taṃ ādiyantīti dāyādā, puttānametaṃ adhivacanaṃ, tesāṃ bhāvo dāyajjaṃ, dāyajjavasena paribhogo **dāyajjaparibhogo**, puttabhāvena paribhogotī vuttaṃ hoti. Sekkhā hi bhikkhū bhagavato orasaputtā, te pitu santakānaṃ dāyādā hutvā te paccaye paribhuñjanti. Kiṃ pana te bhagavato paccaye paribhuñjanti, udāhu gihīnanti? Gihīhi dinnāpi bhagavatā anuññātattā bhagavato santakā ananuññātesu sabbena sabbāṃ paribhogābhāvato, anuññātesuyeva ca paribhogasambhavato. **Dhammadāyādasutta**ñcettha sādhaṃ.

Vītarāgā eva taṇhāya dāsabyaṃ atītattā sāmīno hutvā paribhuñjantīti āha – “**khīṇāsavassa paribhogo sāmiparibhogo nāmā**”ti. Avītarāgānañhi taṇhāparavasatāya paccayaparibhoge sāmibhāvo natthi, tadabhāvena vītarāgānaṃ tattha sāmibhāvo yathāruciparibhogasambhavato. Tathā hi te paṭikūlampi appaṭikūlakārena, appaṭikūlampi paṭikūlakārena, tadubhayampi vajjetvā ajjupekkhanākārena paccaye paribhuñjanti, dāyakānañca manorathaṃ pūrenti. Yo panāyaṃ sīlavato paccavekkhitaparibhogo, so iṇaparibhogassa paccanīkattā āṇaṇyaparibhogo nāma hoti. Yathā hi iṇāyiko attano ruciyā icchitaṃ desāṃ

gantum na labhati, evam inaparibhogayutto lokato nissaritum na labhatī tappaṭipakkhattā sīlavato paccavekkhitaparibhogo “āṇaṇyaparibhogo”ti vuccati, tasmā nippariyāyato catuparibhogavinimutto visumyevāyaṃ paribhogoti veditabbo. So idha visum na vutto, dāyajjaparibhogeveva vā saṅghaṃ gacchati. Sīlavāpi hi imāya sikkhāya samannāgatattā “sekho”tveva vuccati. Imesu paribhogesu sāmiparibhogo dāyajjaparibhogo ca ariyānaṃ puthujjanānaṃ vaṭṭati, inaparibhogo na vaṭṭati. Theyyaparibhoge kathāveva natthi. Kathaṃ panettha sāmiparibhogo dāyajjaparibhogo ca puthujjanānaṃ sambhavati? Upacārasena. Yo hi puthujjanassapi sallekhpappaṭipattiyāṃ tṭhassa paccayagedhaṃ pahāya tattha anupalittena cittena paribhogo, so sāmiparibhogo viya hoti. Sīlavato pana paccavekkhitaparibhogo dāyajjaparibhogo viya hoti dāyakānaṃ manorathassa avirādhanato. Kalyāṇaputhujjanassa paribhoge vattabbameva natthi tassa sekkhasaṅghato. **Sekkhassuttaṃ** (saṃ. ni. 5.13) hetassa atthassa sādhaṃ.

Imassa bhikkhuno accharāsaṅghātamattampi kālaṃ mettacittaṃ āsevantassa bhikkhuno. **Amogho raṭṭhapiṇḍaparibhogoti** “ayaṃ pabbajito samaṇo bhikkhūti āmiṣaṃ dentānaṃ tāya mettāsevanāya attano santāne dosamalassa vā tadekaṭṭhānaṃ pāpadhammānaṃ pabbājanato vūpasamanato saṃsāre ca bhayassa sammāva ikkhaṇato ajjhāsayaṃsa avisamvādanenassa amogho raṭṭhapiṇḍaparibhogo. **Mahaṭṭhiyanti** mahatthikaṃ mahāpayoṇaṃ. **Mahapphalanti** vipulapphalaṃ. **Mahānisamsanti** mahānissandapphalaṃ. **Mahājutikanti** mahānubhāvaṃ. **Mahāvippahānti** mahāvittāraṃ. Ettha ca paṭhamaṃ kāraṇaṃ mettāsevanāya tassa bhikkhuno sāmīdibhāvena raṭṭhapiṇḍaparibhogārahata, dutiyaṃ parehi dinnassa dānassa mahaṭṭhiyabhāvakaṇaṃ. **Ko pana vādoti** mettāya āsevanamattampi evaṃmahānubhāvaṃ, ko pana vādo bahulīkāre, ettha vattabbameva natthī”ti attho.

54. Catutthe **uppādeti vaḍḍhetī**ti ettha bhāvanāsaddassa uppādanavaḍḍhanatthāta pubbe vuttā eva.

55. Pañcame **imesu dvīsūti** catutthapañcomesu. “Tatiye vuttanayeneva veditabba”nti vatvā tathā veditabbaṃ dassetuṃ – “**yo hi āsevati**”tiādi vuttaṃ. Tena āsevanābhāvanāmanasikārānaṃ atthavisesābhāvamāha. Yadi evaṃ suttantassa desanā kathanti āha – “**sammāsambuddho panā**”tiādi. **Yāya dhammadhātuyāti** sabbaññutaññānaṃ māha. Tena hi dhammānaṃ ākārabhedhaṃ ñatvā tadanurūpaṃ ekampi dhammaṃ tathā vibhajivā bhagavā dasseti. **Tīhi koṭṭhāsehi**ti āsevanābhāvanāmanasikārabhāgehi. Mettā hi sabbavatthuno mettāyanavasena ānītā sevanā āsevanā, tassā vaḍḍhanā bhāvanā, avissajjetvā manasi tṭhapanāṃ manasikāro.

56. Chaṭṭhe **aniyamitavacaṇaṃ** “ime nāmā”ti niyametvā avuttattā. **Niyamitavacaṇaṃ** “akusalā”ti sarūpeneva vuttattā. **Asesato pariyādinnā honti** appakassapi akusalabhāgassa aggahitassa abhāvato. Akusalaṃ bhajantīti **akusalabhāgiyā**. Akusalapakkhe bhavāti **akusalapakkhikā**. Tenāha – “**akusalāyevā**”tiādi. **Paṭhamataraṃ gacchati**ti paṭhamataraṃ pavattati, paṭhamo padhāno hutvā vattatīti attho. Ekuppādādivasena hi ekajjhaṃ pavattamānesu catūsu arūpakkhandhesu ayameva paṭhamaṃ uppajjati idam natthi, lokuttaramaggesu viya pana paññindriyassa, lokiyadhammesu manindriyassa puretarassa bhāvo sātisayoti “**sabbete manopubbaṅgamā**”ti vuttaṃ. Tathā hi **abhidhammepi** (dha. sa. 1) “yasmim samaye kāmāvacaraṃ kusalaṃ cittaṃ uppannaṃ hotī”ti cittaṃ pubbaṅgamaṃ jeṭṭhaṃ katvā desanā pavattā. Suttasuppi vuttaṃ – “manopubbaṅgamā dhammā (dha. pa. 1, 2), chadvārādhīpati rājā”ti (dha. pa. aṭṭha. 2.buddhavaggo, erakapattanāgarājavatthu). Tenāha – “**ete hī**”tiādi. **Tesaṃ mano uppādakoti** ca yadaggena mano sampayuttadhammānaṃ jeṭṭhako hutvā pavattati, tadaggena te attānaṃ anuvattāpento te tathā uppādentō nāma hotīti katvā vuttaṃ. Aṭṭhakathāyaṃ pana cittaṃ jeṭṭhakabhāvameva sandhāya rājagamanaññāyena sahuppattipi paṭhamuppatti viya katvā vuttatīti ayamattho dassito. **Anvadevāti** eteneva cittaṃ khaṇavasena paṭhamuppattiyā abhāvo dīpitoti daṭṭhabbo. Tenevāha – “**ekatoyevāti attho**”ti.

57. Sattame **catubhūmakāpi kusalā dhammā kathitāti** “ye keci kusalā dhammā”ti anavasesapariyādānato vuttaṃ.

58. Aṭṭhame **idanti** līngavipallāsena niddeso, nipātapadaṃ vā etaṃ “yadida”ntiādisu viyāti āha – “**ayaṃ pamādoti attho**”ti. **Pamajjanākāro**ti pamādāpatti. **Cittassa vossaggoti** imesu ettakesu tṭhānesu

satiyā aniggaṇhitvā cittassa vossajjanam sativiraho. **Vossaggānuppadānanti** vossaggassa anu anu padānam punappunam vissajjanam. **Asakkaccakiriyatāti** etesam dānādīnam kusaladhammānam pavattane puggalassa vā deyyadhammassa vā asakkaccakiriyā. Satatabhāvo sātaccam, sātaccena kiriyā sātaccakiriyā, sāyeva sātaccakiriyatā, na sātaccakiriyatā **asātaccakiriyatā**. **Anaṭṭhitakiriyatāti** aniṭṭhitakiriyatā niranaram na anuṭṭhitakiriyatā ca. **Olīnavuttitāti** niranarakaraṇasaṅkhātassa vipphārassa abhāvena olīnavuttitā. **Nikkhattachandatāti** kusalakiriyāya vīriyachandassa nikkhattabhāvo. **Nikkhattadhuratāti** vīriyadhurassa oropanam, osakkitamānasatāti attho. **Anadhīṭṭhānanti** kusalakaraṇe appatiṭṭhitabhāvo. **Ananuyogoti** ananuyuñjanam. Kusaladhammesu āsevanādīnam abhāvo **anāsevanādayo**. **Pamādoti** sarūpaniddeso. **Pamajjanāti** ākāraniddeso. **Pamajjitattanti** bhāvaniddeso. **Parihāyantīti** iminā pamādassa sāvajjatanam dasseti. Tayidaṃ lokiyānam vasena, na lokuttarānanti āha – “**uppannā...pe... ida**”ntiādi.

59. Navame na pamajjati etenāti **appamādo**, pamādassa paṭipakkho satiyā avippavāso. Atthato niccam upaṭṭhitāya satiyā etaṃ nāmam. Pamādo pana satiyā satisampajaññassa vā paṭipakkhabhūto akusalacittuppādo daṭṭhabbo. Tenāha – “**pamādassa paṭipakkhavasena vitthārato veditabbo**”ti.

60. Dasame kucchitam sīdatīti kusīto da-kārassa ta-kāram katvā, tassa bhāvo **kosajjam**, ālasiyanti attho.

Accharāsaṅghātavaggavaṇṇanā niṭṭhitā.

7. Vīriyārambhādivaggavaṇṇanā

61. Sattamassa paṭhame vīrānam kammanti vīriyam, vidhinā vā īrayitabbam pavattetabbanti vīriyam, tadeva kusalakiriyāya padhānaṭṭhena ārambho **vīriyārambho**. Āradhāvīriyatā paggahitavīriyatā paripuṇṇavīriyatāti paccekam vīriyatāsaddo yojetabbo.

62. Dutiye mahatī icchā etassāti mahiccho, tassa bhāvo **mahicchatā**. Mahāvisayo lobho **mahālobho** mahantānam vatthūnam bahūnañca abhigijjanato. **Itarītarāti**ādīnā pabbajitānam uppajjanamahicchatā vuttā. **Pañcahi kāmaguṇehīti**ādi gahaṭṭhānam vasena vuttam. **Ichhāti** sabhāvaniddeso. **Ichhāgatāti** icchāpavattā. **Mahicchatāti** mahāicchatā. Atthato panāyam rāgo evāti vuttam – “**rāgo sārāgo**”tiādi.

63. Tatiye **appicchassāti** ettha **appa**-saddo abhāvatto “appābādho hoti appātaṅko”tiādīsu (ma. ni. 2.304) viyāti āha – “**anicchassā**”ti. Loke pākaṭassa hi akkhirogakucchirogādibhedassa ābādhassa abhāvam sandhāya “appābādho”ti vuttam. Idāni vuttamevattham pākaṭatanam kātuṃ “**ettha hī**”tiādi vuttam. Byañjanam sāvasesam viya parittakepi appasaddassa dissamānattā. Attho pana niravaseso sabbaso paccayicchāya abhāvassa adhippetattā. Tenāha – “**na hī**”tiādi.

Ichhāya abhāveneva appiccho nāma hotīti imamattam pakārantarena dīpetum – “**apicā**”tiādi vuttam. **Atricchatā** nāma atra atra icchā. Asantaguṇasambhāvanatāya pāpā lāmikā nihīnā icchā **pāpicchatā**. Yāya paccayuppādanattham attani vijjamānaguṇe sambhāveti, paccayānam paṭiggahaṇe ca na mattam jānāti, ayam **mahicchatā**. **Asantaguṇasambhāvanatāti** attani avijjamānānam guṇānam vijjamānānam viya paresam pakāsanā. **Santaguṇasambhāvanatāti** icchācāre ṭhatvā attani vijjamānasīladhutadhammādiguṇavibhāvanā. Tādisassapi paṭiggahaṇe amattaññutāpi hoti, sāpi abhidhamme āgatāyevāti sambandho. **Dussantappayoti** duttappayo.

Atilūkhabhāvanti pattacīvaravasena ativiya lūkhabhāvam. Tadassa disvā manussā “ayam amaṅgaladivaso, sumbhakasiniddhapattacīvaro ayyo pubbaṅgamo kātabbo”ti cintevā, “bhante, thokam bahi hothā”ti āhaṃsu. **Ummujjīti** manussānam ajānantānamyeva pathaviyam nimujjivā gaṇhantoyeva ummujji. Yadi thero “khīṇāsavabhāvam jānantū”ti iccheyya, na nam manussā “bahi hothā”ti vadeyyum, khīṇāsavānam pana tathācittameva na uppajjeyya.

Appicchatāpadhānam puggalādhiṭṭhānam catubbidhaicchāpabhedam dassetvā punapi

puggalādhiṭṭhānena catubbidhaṃ icchābhedaṃ dassento “**aparopi catubbidho appiccho**”tiādimāha. **Paccayaappiccho**ti paccayesu icchārahito. **Dhutaṅgaappiccho**ti dhutaguṇasambhāvanāya icchārahito. **Pariyattiappiccho**ti bahussutasambhāvanāya icchārahito. **Adhigamaappiccho**ti “ariyo”ti sambhāvanāya icchārahito. **Dāyakassa vasanti** appaṃ vā yaṃ dātukāmo bahuṃ vāti dāyakassa cittassa vasaṃ, ajjhāsayanti attho. **Deyyadhammassa vasanti** deyyadhammassa abahubhāvaṃ. **Attano thāmani** attano pamāṇaṃ. Yattakena attā yāpeti, tattakasseva gahaṇaṃ. **Yadi hīti**ādi saṅkhepato vuttassa atthassa vivaraṇaṃ. **Pamāṇenevāti** yāpanappamāṇeneva.

Ekabhikkhupi nāññāsīti sosānikavatte sammadeva vattitattā ekopi bhikkhu na aññāsī. **Abbokiṇṇanti** avicchedaṃ. **Dutiyo maṃ jāneyyāti** dutiyo sahāyabhūtopi yathā maṃ jānituṃ na sakkuṇeyya, tathā saṭṭhi vassāni nīrantaraṃ susāne vasāmi, tasmā **ahaṃ aho sosānikuttamo**. **Upakāro hutvāti** uggahaparipucchādīhi pariyattidhammasena upakāro hutvā. **Dhammakathāya janapadaṃ khobhetvāti** lomahaṃsanāsādhukārādānacelukkhepādivasena sannipatitaṃ itaraṇca “kathaṃ nu kho appaṃ ayyassa santike dhammaṃ sossāmā”ti kolāhalavasena mahājanaṃ khobhetvā? Yadi therō bahussutabhāvaṃ jānāpetuṃ iccheyya, pubbeva janapadaṃ khobhento dhammaṃ katheyya. **Gatoti** “ayaṃ so, yena rattiyaṃ dhammakathā katā”ti jānanabhāvena pariyattiappicchatāya purāruṇāva gato.

Tayo kulaputtā viyāti pācīnavaṃsadāye sāmaggivāsaṃvutṭhā anuruddho, nandiyo, kimiloti ime tayo kulaputtā viya. Etesupi hi anuruddhattherena bhagavatā “atthi pana vo anuruddhā evaṃ appamattānaṃ ātāpīnaṃ pahitattānaṃ viharantānaṃ uttarimanussadhammo alamariyaññadassanaviseso adhigato phāsuvihāro”ti (ma. ni. 1.328) puṭṭhena “idha pana mayaṃ, bhante, yāvadeva ākaṅkhāma, vivicceva kāmehi vivicca akusalehi dhammehi savitakkaṃ savicāraṃ vivekajaṃ pītisukhaṃ paṭhamāṃ jhānaṃ upasampajja viharāmā”tiādinā (ma. ni. 1.328) anupubbavīhārasamāpattīsu ārocitāsu itare therā na icchiṃsu. Tathā hi te pakkante bhagavati āyasmantaṃ anuruddhaṃ etadavocuṃ – “kinnu mayaṃ āyasmato anuruddhassa evamārocimha ‘imāsaṇca imāsaṇca vihārasamāpattīnaṃ mayaṃ lābhino’ti? Yaṃ no āyasmā anuruddho bhagavato sammukhāpi āsavānaṃ khayaṃ pakāseti”ti? Ghaṭṭikāropi attano ariyabhāve kikkissa rañño bhagavatā ārocite na attamano ahoṣi? Tenāha – “**ghaṭṭikārakumbhakāro viyā**”ti. **Imasmiṃ panattheti** “yathayidaṃ, bhikkhave, appicchatā”ti vutte appicchatāsāṅkhāte atthe. **Balavaalobhenāti** dalhatarappavattikena alobhena.

64. Catutthe natthi etassa santuṭṭhīti asantuṭṭhi, tassa bhāvo **asantuṭṭhitā**. Taṃ pana sarūpato dassento “**asantuṭṭhe puggale...pe... lobho**”ti āha. **Sevantassāti**ādinī aññamaññavevacanāni.

65-67. Pañcame tussanaṃ tuṭṭhi, samaṃ, sakena, santena vā tuṭṭhi etassāti santuṭṭhi, tassa bhāvo **santuṭṭhitā**. Yassa santosassa atthitāya bhikkhu “santuṭṭho”ti vuccati, taṃ dassento “**itaritarapaccayasantoseṇa samannāgatassā**”ti āha – cīvarādiḷe yattha katthaci kappiye paccaye santussanena samaṅgībhūtassāti attho. Atha vā itaraṃ vuccati hīnaṃ paṇītato aññattā, tathā paṇītampi itaraṃ hīnato aññattā. Apekkhāsiddhā hi itaratā. Iti yena dhammena hīnena vā paṇītena vā cīvarādiḷpaccayena santussati, so tathā pavatto alobho **itaritarapaccayasantoso**, tena samannāgatassa. Yathālābhaṃ attano lābhānurūpaṃ santoso **yathālābhasantoso**. Sesapadadvayepi eseva nayo. Labbhātīti vā lābho, yo yo lābho yathālābho, tena santoso **yathālābhasantoso**. **Balanti** kāyabalaṃ. **Sāruppanti** bhikkhuno anucchavikatā.

Yathāladdhato aññassa apatthanā nāma siyā appicchatāpi pavattiākāroti tato vinivecitameva santosassa sarūpaṃ dassento “**labhantopi na gaṇhāti**”ti āha. Taṃ parivattetvā pakatidubbālādīnaṃ garucīvaraṃ aphāsuhāvāvahaṃ sarīrakhedāvahaṇca hotīti payojanavasena na atricchatādivasena taṃ parivattetvā lahukacīvaraparibhogo santosavirodhi na hotīti āha – “**lahukena yāpentopi santuṭṭhova hoti**”ti. Mahagghacīvaraṃ bahūni vā cīvarāni labhitvā tāni vissajjetvā tadanñassa gahaṇaṃ yathāsāruppanaye ṭhitattā na santosavirodhīti āha – “**tesaṃ...pe... dhārentopi santuṭṭhova hoti**”ti. Evaṃ sesapaccayesu yathāsāruppaniddese api-saddaggaḷe adhippāyo veditabbo. **Muttaharītakanti** gomuttaparibhāvitaṃ, pūtibhāvena vā chaḍḍitaṃ harītakam. **Buddhādīhi vaṇṇitanti** appicchatāsantuṭṭhīsu bhikkhū niyojetuṃ “pūtimuttahesajjaṃ nissāya pabbajjā”tiādinā (mahāva. 73, 128) buddhādīhi pasatthaṃ.

Paramasantuṭṭhova hoti paramena ukkaṃsagatena santosena samannāgatattā.
Yathāsāruppasantosova aggoti tattha tattha bhikkhu sārūppaṃyeva nissāya santussanavasena pavattanato aggo. Chaṭṭhasattamesu natthi vattabbaṃ.

68-69. Aṭṭhamanavamesu na sampajānātīti asampajāno, tassa bhāvo **asampajāññaṃ**.
 Vuttappaṭipakkhena **sampajāññaṃ** veditabbaṃ.

70. Dasame **pāpamittā** devadattasadisā. Te hi hīnācāratāya, dukkhassa vā sampāpakatāya “pāpā”ti vuccanti. **Tenākārena pavattānanti** yo pāpamittassa khanti ruci adhimutti tanninnatātaṃsarpavaṅkatādiākāro, tenākārena pavattānaṃ. **Catunnaṃ khandhānamevettaṃ nānanti** catunnaṃ arūpakkhandhānaṃ “pāpamittatā”ti etaṃ nāmaṃ. Yasmā assaddhiyādīpāpadhammasamannāgatā puggalā visesato pāpā puññadhammavimokkhatāya, te yassa mittā sahāyā, so pāpamitto, tassa bhāvo **pāpamittatā**. Tenāha – “**ye te puggalā assaddhā**”tiādi.

Vīriyārambhādivaggavaṇṇanā niṭṭhitā.

8. Kalyāṇamittādivaggavaṇṇanā

71. Aṭṭhamassa paṭhame buddhā, sārīputtādayo vā **kalyāṇamittā**. **Vuttappaṭipakkhanayenā**ti “pāpamittatā”ti pade vuttassa paṭipakkhanayena.

72-73. Dutiye **yogoti** samaṅgībhāvo. **Payogoti** payuñjanaṃ paṭipatti. **Ayogoti** asamaṅgībhāvo. **Appayogoti** appayuñjanaṃ appaṭipatti. **Anuyogenā**ti anuyogahetu.

74. Catutthe **bujjhanakasattasā**ti catunnaṃ ariyasaccānaṃ paṭivijjhanakapuggalassa. **Āṅgabhūtā**ti tasseva paṭivedhassa kāraṇabhūtā. Ettha ca cattāri ariyasaccāni bujjhati, aññānaniddāya vāpi bujjhatīti bodhīti laddhanāmo ariyasāvako bujjhanakasatto, tassa bujjhanakasattassa. **Bodhiyā**ti tassā dhammasāmaggaṃsāṅghatāya bodhiyā. Bujjhanatṭhena bodhiyo, bodhiyo eva saccasampaṭibodhassa āṅgāti vuttaṃ. “**Bujjhanatīti bojjaṅgā**”ti. Vipassanādīnaṃ kāraṇānaṃ bujjhitabbānaṃ saccānaṃ anurūpaṃ bujjhanato **anubujjhanatīti bojjaṅgā**, paṭimukhaṃ paccakkhabhāvena abhimukhaṃ bujjhanato **paṭibujjhanatīti bojjaṅgā**, sammā aviparītato bujjhanato **sambujjhanatīti bojjaṅgā**ti evaṃ atthavisesadīpakehi upasaggehi **anubujjhanatī**tiādi vuttaṃ. Bodhisaddo sabbavisesayuttaṃ bujjhanasāmaññena saṅgaṇhātī. **Bodhāya saṃvattantī**ti iminā tassā dhammasāmaggiyā bujjhanassa ekantakāraṇataṃ dasseti. **Evaṃ panetaṃ padaṃ vibhattamevā**ti vuttappakārena etaṃ “bojjaṅgā”ti (paṭi. ma. 2.17) padaṃ niddese **paṭisambhidāmagge** vibhattameva.

75. Pañcame **yāthāvasarasabhū**mīti yāthāvato sakicckaraṇabhūmi. **Sā**ti yāthāvasarasabhūmi. **Vipassanā**ti balavavipassanā. Keci “bhaṅgañānato paṭṭhāyā”ti vadanti. Vipassanāya pādakajjhāne ca satīādayo bojjaṅgapakkhikā eva pariyāyabodhipakkhiyabhāvato. **Tatthā**tiādi catubbidhānaṃ bojjaṅgānaṃ bhūmivibhāgadassanaṃ.

76. Chaṭṭhe **tesaṃ antare**ti tesaṃ bhikkhūnaṃ antare. Kāmaṃ saṅgītiāruḷhavasena appakamidaṃ suttapadaṃ, bhagavā panettha sannipatitaparīsāya ajjhāsayaṅurūpaṃ vitthārikaṃ karotīti katvā idaṃ vuttaṃ – “**mahatī desanā bhavissati**”ti. **Gāmanigamādīkathā natthī**ti tassā kathāya atiracchānakathābhāvamāhu. Tathā hi sā pubbe bahuñātikaṃ ahosi bahupakkhaṃ, idāni appañātikaṃ appapakkhanti aniccatāmukhena niyyānikapakkhikā jāta. **Etāyā**ti yathāvuttāya parihāniyā. **Patikiṭṭhanti** nihīnaṃ. **Mama sāsā**neti idaṃ kammassakatajjhānapaññānampi visesanameva. Tadubhayampi hi bāhirakānaṃ tappaññādvayato sātīsāyameva sabbaññubuddhānaṃ desanāya laddhavisesato vivaṭṭūpanissayato ca.

77. Sattame **tesaṃ cittācāraṃ** nītvāti tathā kathentānaṃ tesaṃ bhikkhūnaṃ tattha upagamanena attano desanāya bhājanabhūtaṃ cittappavattiṃ nītvā. **Kammassakatādī**ti ādisaddena jhānapaññādināṃ

catunnampi paññānaṃ gahaṇaṃ.

78-80. Aṭṭhamādīsu **heṭṭhā vuttanayenevā**ti “yā esa mama sāsane”tiādinā heṭṭhā vuttanayeneva. Sesamettha uttānatthameva.

Kalyānamittādivaggaṇṇanā niṭṭhitā.

81-82. Navame vagge natthi vattabbaṃ.

10. Dutiyapamādādivaggaṇṇanā

98-115. Dasame vagge ajjhattasantāne bhavaṃ **ajjhattikaṃ**. Ajjhattasantānato bahiddhā bhavaṃ **bāhiraṃ. Vuttapaṭipakkhanayenā**ti “avināsāyā”ti evamādinā attho gahetabbo. **Catukkoṭiketi** “anuyogo akusalānaṃ, ananuyogo kusalānaṃ, anuyogo kusalānaṃ, ananuyogo akusalāna”nti (a. ni. 1.96) evaṃ pariyosānasutte āgatanayaṃ gahetvā “nāhaṃ, bhikkhave, aññaṃ ekadhammampi samanupassāmī”tiādinā (a. ni. 1.11) āgatasuttānaṃ samaññā jātā.

130. Suttantanaye yathācodanā saṃkilesadhammānaṃ vipariyesanaṃ, taṃtaṃdhammakotṭhāsānañca ūnato adhikato ca pavedanaṃ **adhammaṃ dhammoti dīpanaṃ**. Tesamyeva pana aviparītato anūnādhikato ca pavedanaṃ **dhammaṃ dhammoti dīpanaṃ**. Evaṃ vinayappaṭipattiyā ayathāvidhippavedanaṃ **adhammaṃ dhammoti dīpanaṃ**. Yathāvidhippavedanaṃ **dhammaṃ dhammoti dīpanaṃ**. Suttantanayena pañcavidho saṃvaravinayo pahānavinayo ca **vinayo**, tappaṭipakkhena **avinayo**. Vinayanayena vatthusampadādinā yathāvidhippaṭipatti eva vinayo, tabbipariyāyena avinayo veditabbo. **Ṭiṃsa nissaggiyā pācittiyā**ti ettha **iti-saddo** ādyattho. Tena dvenavuti pācittiyā, cattāro pāṭidesaniyā, satta adhikarāṇasamathāti imesaṃ saṅgaho. **Ekaṭiṃsa nissaggiyā**ti ettha “tenavuti pācittiyā”tiādinā vattabbaṃ. Sesamettha suviññeyyameva.

Adhigantabbato **adhigamo**, maggaphalāni. Nibbānaṃ pana antaradhānābhāvato idha na gayhati. Paṭipajjanaṃ **paṭipatti**, sikkhattayasamāyogo. Paṭipajjitabbato vā **paṭipatti**. Pariyāpuṇitabbato **pariyatti**, piṭakattayaṃ. Maggaggahaṇena gahitāpi tatiyavijjāchaṭṭhābhiññā vijjābhiññāsāmaññaṃ “**tiṣso vijjā cha abhiññā**”ti punapī gahitā. **Tato paraṃ cha abhiññā**ti vassasahassato paraṃ cha abhiññā nibbattetuṃ sakkonti, na paṭisambhidāti adhippāyo. **Tatoti** abhiññākālato pacchā. **Tāti** abhiññāyo. Pubbabhāge jhānasinehābhāvena kevalāya vipassanāya ṭhatvā aggaphalappattā **sukkhavipassakā** nāma, maggakkhaṇe pana “jhānasineho natthī”ti na vattabbo “samathavipassanaṃ yuganaddhaṃ bhāvetī”ti (a. ni. 4.170) vacanato. **Pacchimakassā**ti sabbapacchimassa. Kiñcāpi ariyo aparihānadhammo, sotāpannassa pana uddhaṃ jīvitapariyādānā adhigatadhammo uppanno nāma natthi, paccayasāmaggiyā asati yāva uparivisesaṃ nibbattetuṃ na sakkonti, tāva adhigamassa asambhavo evāti āha – “**sotāpannassa...pe... nāma hotī**”ti. Tassidaṃ manussalokavasena vuttanti daṭṭhabbaṃ.

Na codentīti aññaamaññasmiṃ vijjamānaṃ dosaṃ jānantāpi na codenti na sārenti. **Akukkuccakā hontī**ti kukkuccaṃ na uppādentī. “Asakkaccakārino hontī”ti ca paṭhanti, sāthalikatāya sikkhāsu asakkaccakārino hontīti attho. **Bhikkhūnaṃ satepi sahassepi dharamāneti** idamaṃ bāhullavasena vuttaṃ. Antimavatthuanajjhāpannesu katipayamattesupi bhikkhūsu dharantesu, ekasmiṃ vā dharante paṭipatti anantarhitā eva nāma hoti. Tenevāha – “**pacchimakassa...pe... antarahitā hotī**”ti.

Antevāsike gahetunti antevāsike saṅgahetuṃ. **Atthavasenā**ti aṭṭhakathāvasena. **Matthakato paṭṭhāyā**ti uparito paṭṭhāya. **Uposathakkhandhakamattanti** vinayamātikāpāḷimāha. Ālavakapañhādīnaṃ viya devesu pariyaṭṭiyā pavatti appamāṇanti āha – “**manussesū**”ti.

Oṭṭhaṭṭhivaṇṇanti oṭṭhānaṃ aṭṭhivaṇṇaṃ, dantakasāvaṃ ekaṃ vā dve vā vāre rajitvā dantavaṇṇaṃ katvā dhārentīti vuttaṃ hoti. **Kesesu vā alliyāpentī**ti tena kāsāvakaṇḍena kese bandhantā alliyāpentī. Bhikkhugottassa abhibhavanato vināsanato **gotrabhuno**. Atha vā gottamaṃ vuccati sādharmaṇaṃ nāmaṃ,

mattasaddo luttaniddiṭṭho, tasmā “samaṇā”ti gottamattaṃ anubhavanti dhārentīti **gotrabhuno**, nāmamattasamaṇāti attho. Kāsāvagatakaṇṭhatāya, kāsāvaggahaṇahetuuppajjanakasokatāya vā **kāsāvakaṇṭhā**. Saṅghagatanti saṅghaṃ uddissa dinnattā saṅghagataṃ. **Taṃ sarīranti** taṃ dhātusarīraṃ.

Tenevāti pariyattiantaradhānamūlakattā eva itaraantaradhānassa. Sakko devarājā chātakabhaye paratīragamanāya bhikkhū ussukkamakāsīti adhippāyo. **Neti** ubhayepi paṃsukūlikatthere dhammakathikatthere ca. **Therāti** tattha ṭhitā sakkhibhūtā therā. Dhammakathikattherā “**yāva tiṭṭhanti suttantā...pe... yogakkhemā na dhaṃsatī**”ti idaṃ suttaṃ āharitvā “**suttante rakkhite sante, paṭipatti hoti rakkhitā**”ti iminā vacanena paṃsukūlikatthere appaṭibhāne akaṃsu. Idāni pariyattiyā anantaradhānameva itaresaṃ anantaradhānahetūti imamatthaṃ byatirekato anvayato ca upamāhi vibhāvetuṃ “**yathā hī**”tiādi vuttaṃ. Taṃ suviññeyyameva.

Dutiyapamādādivaggavaṇṇanā niṭṭhitā.

140-150. Ekādasamadvādasamavaggā suviññeyyā eva.

13. Ekapuggalavaggavaṇṇanā

170. **Ekapuggalassāti** ekapuggalavaggassa. Tenāha – “**paṭhame**”ti. **Ekoti** gaṇanaparicchedo, tato eva **dutiyādipaṭikkhepattho**. Padhānāsahāyatthopi ekasaddo hotīti tannivattanattaṃ “**gaṇanaparicchedo**”ti āha. Sammutiyā desanā **sammutidesanā**. Paramatthassa desanā **paramatthadesanā**. **Tatthāti** sammutiparamatthadesanāsu, na sammutiparamatthesu. Tenāha – “**evarūpā sammutidesanā, evarūpā paramatthadesanā**”ti. Tatrīdaṃ sammutiparamatthānaṃ lakkhaṇaṃ – yasmiṃ bhinne, buddhiyā vā avayavavinibbhoge kate na taṃsamaññā, sā ghaṭapaṭādippabhedā sammuti, tabbipariyāyena paramatthā. Na hi kakkhaḷaphusanādisabhāve so nayo labbhati. Tattha rūpādidhammasamūhaṃ santānavasena pavattamaṇaṃ upādāya puggalavohāroti **puggaloti sammutidesanā**. Sesapadesupi eseva nayo. Uppādavayavanto sabhāvadhammā na niccāti aniccāti āha – “**aniccanti paramatthadesanā**”ti. Esa nayo sesapadesupi. Nanu khandhadesanāpi sammutidesanāva. Rāsaṭṭho vā hi khandhaṭṭho koṭṭhāsaṭṭho vāti? Saccametaṃ, ayaṃ pana khandhasamaññā phassādīsu pavattatajjāpaññatti viya paramatthasannissayā tassa āsannatārā, puggalasamaññādayo viya na dūreti paramatthasaṅgahā vuttā. Khandhasīsenā vā tadupādānasabhāvadhammā eva gahitā. Nanu ca sabhāvadhammā sabbepi sammutimukheneva desanaṃ ārohanti, na samukhenāti sabbāpi desanā sammutidesanāva siyāti? Nayidamevaṃ, desetabbadhammavibhāgena desanāvibhāgassa adhippetattā. Na hi saddo kenaci pavattinimittena vinā atthaṃ pakāsetīti.

Sammutivasena desanaṃ sutvāti “idhekacco puggalo attantapo hoti attaparitāpānuyogamanuyutto”tiādinā (pu. pa. 174) sammutimukhena pavattitadesanaṃ sutamayaññāsuppādavasena sutvā. **Atthaṃ paṭivijjhivāti** tadanusārena catusaccasaṅkhātāṃ atthaṃ saha vipassanāya maggapaññāya paṭivijjhivā. **Mohaṃ pahāyāti** tadekaṭṭhakilesehi saddhiṃ anavasesaṃ mohaṃ pajahivā. **Visesanti** aggaphalanibbānasaṅkhātāṃ viasesaṃ. **Tesanti** tādisānaṃ veneyyānaṃ. **Paramatthavasenaṃ** “pañcimāni, bhikkhave, indriyāni”tiādinā (saṃ. ni. 5.471-476 ādayo) paramatthadhammavasena. Sesāṃ anantaranaye vuttasadisameva.

Tatrāti tassaṃ sammutivasena paramatthavasena ca desanāyaṃ. **Desabhāsākusaloti** nānādesabhāsāsu kusalo. **Tiṇṇaṃ vedānanti** nidassanamattaṃ, tiṇṇaṃ vedānaṃ sippuggahaṇaṭṭhānānampīti adhippāyo. Teneva sippuggahaṇaṃ parato vakkhati. Sippāni vā vijjāṭṭhānabhāvena vedantogadhāni katvā “**tiṇṇaṃ vedāna**”nti vuttaṃ. **Kathetabbabhāvena ṭhitāni**, na katthaci sannicitabhāvenāti vedānampi kathetabbabhāvene vā ṭhānaṃ dīpento “**guhā tiṇi nihitā na gayhanti**”tiādimicchāvādaṃ paṭikkhipati. Nānāvīdhā desabhāsā etesanti **nānādesabhāsā**.

Paramo uttamo attho **paramattho**, dhammānaṃ yathābhūtasabhāvo. Lokasaṅketamattasiddhā **sammuti**. Yadi evaṃ kathaṃ sammutikathāya saccatāti āha – “**lokasammutikāraṇā**”ti, lokasamaññaṃ

nissāya pavattanatoti attho. Lokasamañña hi abhinivesena viññeyyā, nāññāpanā ekaccassa sutassa sāvanā viya na musā anati dhāvatabbato tassā. Tenāha bhagavā – “janapadaniruttiṃ nābhiniveseyya, samaññaṃ nātidhāvaye”ti. **Dhammānanti** sabhāvadhammānaṃ. **Bhūtakāraṇā**ti yathābhūtakāraṇā yathābhūtaṃ nissāya pavattanato. **Sammutiṃ voharantassā**ti “puggalo, satto”tiādinā lokasamaññaṃ kathentassa.

Hirottappadīpanatthanti lokapālanakicce hirottappadhamme kiccatto pakāsetuṃ. Tesañhi kiccaṃ sattasantāne eva pākaṭaṃ hotīti puggalādhiṭṭhānāya kathāya taṃ vattabbaṃ. Esa nayo sesesupi. Yasmiñhi cittuppāde kammaṃ uppannaṃ, taṃsantāne eva tassa phalassa uppatti **kammassakatā**. Evañhi kata viññānaṃso akatāgamo ca natthīti sā puggalādhiṭṭhānāya eva desanāya dīpetabbā. Tehi sattehi kātabbapuññakiriya **paccattapurisakāro**. Sopi santānavasena niṭṭhapetabbato puggalādhiṭṭhānāya eva kathāya dīpetabbo. **Anantariyadīpanatthanti** cutianantaraṃ phalaṃ anantaraṃ nāma, tasmīṃ anantare niyuttāni taṃnibbattanena anantarakaraṇasīlāni, anantarakaraṇapayojanāni vāti **anantariyāni**, mātughātādīni, tesaṃ dīpanatthaṃ. Tānipi hi santānavasena niṭṭhapetabbato “mātaraṃ jīvitā voropeti”tiādinā (paṭṭhā. 1.1.423) puggalādhiṭṭhānāya eva kathāya dīpetabbāni, tathā “so mettāsahagatena cetasa ekaṃ disaṃ pharivā viharati”tiādinā (dī. ni. 1.556; 3.308; ma. ni. 1.77; 2.309; 3.230; vibha. 642-643) “so anekavihiṭṭhaṃ pubbenivāsaṃ anussarati ekampi jāti”ntiādinā (dī. ni. 1.244-245; ma. ni. 1.148, 384, 431; pārā. 12), “atthi dakkhiṇā dāyakato visujjhati, no paṭiggāhakato”tiādinā (ma. ni. 3.381) ca pavattā **brahmavihārapubbenivāsadakkhiṇāvisuddhikathā** puggalādhiṭṭhānā eva katvā dīpetabbā sattasantānavisayattā. “Attha purisapuggalā (saṃ. ni. 1.249) na samayavimutto puggalo”tiādinā (pu. pa. 2) ca paramatthakathaṃ kathentopi lokasammutiya appahānatthaṃ puggalakathaṃ katheti. Etena vuttāvesāya kathāya puggalādhiṭṭhānabhāve payojanaṃ sāmāñnavasena saṅgahitanti daṭṭhabbaṃ. Kāmañcetaṃ sabbaṃ apariññātavatthukānaṃ vasena vuttaṃ, pariññātavatthukānampi pana evaṃ desanā sukhāvahā hoti.

Ekapuggaloti viṭṭhasamācārāpassayavirahito ekapuggalo. Buddhānañhi sīlādiguṇena sadevake loke viṭṭho nāma koci natthi, tathā sadisopi samānakāle. Tenāha – “na imasmīṃ loke parasmīṃ vā pana buddhena seṭṭho sadiso ca vijjati”ti (vi. va. 1047; kathā. 799), tasmā sadisopi koci natthi. Hīnopi apassayabhūto nattheva. Tena vuttaṃ – “viṭṭhasamācārāpassayavirahito ekapuggalo”ti. Ye ca sīlādiguṇehi natthi etesaṃ samāti asamā, purimakā sammāsambuddhā. Tehi samo majjhe bhinnasuvaṇṇanekkaṃ viya nibbisiṭṭhoti asamasatṭhenapi ekapuggalo aññaṃsā tādisassa abhāvā. Tena vuttaṃ – “**asadisaṭṭhenā**”tiādi.

Sattaloko adhippeto sattanikāye uppajjanato. **Manussaloke eva uppajjati** devabrahmalokānaṃ buddhānaṃ uppattiyā anokāsbhāvato. Kāmadevaloke tāva nuppajjati brahmacariyavāsassa aṭṭhānabhāvato tathā anacchariyabhāvato. Acchariyadhammā hi buddhā bhagavanto. Tesaṃ sā acchariyadhammatā devattabhāve ṭhitānaṃ loke na pākaṭā hoti yathā manussabhūtānaṃ. Devabhūte hi sammāsambuddhe dissamānaṃ buddhānubhāvaṃ devānubhāvato loke dahati, na buddhānubhāvato. Tathā sati “ayaṃ sammāsambuddho”ti nādhimuccati na sampasīdati, issarakuttaggāhaṃ na vissajjeti, devattabhāvassa ca cirakālāvaṭṭhānato ekaccasassatavādato na parimuccati. **Brahmaloke nuppajjati**ti etthāpi eseva nayo. Sattānaṃ tādisaggāhavinimocanattañhi buddhā bhagavanto manussasugatiyaṃyeva uppajjanti, na devasugatiyaṃ. Yasmā imaṃ cakkavālaṃ majjhe katvā iminā saddhiṃ cakkavālānaṃ dasasahassasseva jātikkhettabhāvo dīpito ito aññaṃsā buddhānaṃ uppattiṭṭhānassa teṭṭake buddhavadāne āgataṭṭhānassa abhāvato. Tasmā vuttaṃ – “**imasmīyeva cakkavāle uppajjati**”ti.

Idha uppajjantopi kasmā jambudīpe eva uppajjati, na sesadīpesūti? Keci tāva āhu – “yasmā pathaviyā nābhībūtā buddhabhāvasahā acalaṭṭhānabhūtā bodhimaṇḍabhūmi jambudīpe eva, tasmā jambudīpe eva uppajjati”ti. Eteneva “tatha majjhimadese eva uppajjati”ti etampi saṃvaṇṇitanti daṭṭhabbaṃ tathā itaresampi avijahitaṭṭhānānaṃ tattheva labbhanato. Yasmā purimabuddhānaṃ mahābodhisattānaṃ paccakabuddhānaṃ nibbattiyā sāvaka bodhisattānaṃ sāvaka bodhiyā abhinīhāro sāvaka pāramiyā sambharaṇaparipācanaṃ buddhakkhettabhūte imasmīyeva cakkavāle jambudīpe eva ijjhanti, na aññattha. Veneyyanavinayanattho ca buddhuppādo, tasmā aggasāvaka mahāsāvaka diveneyyavisesāpekkhāya imasmīṃ jambudīpe eva buddhā nibbattanti, na sesadīpesu. Ayañca nayo sabbabuddhānaṃ

āciññasamāciñṇoti tesam uttamapurisānaṃ tattheva uppatti sampatticakkānaṃ viya aññamaññūpanissayatāya daṭṭhabbā. Tena vuttaṃ – **aṭṭhakathāyaṃ** “tīsu dīpesu buddhā na nibbattanti, jambudīpe eva nibbattantīti dīpaṃ passī”ti (dī. ni. aṭṭha. 2.17; bu. vaṃ. aṭṭha. 27 avidūrenidānakathā).

Ubhayampidaṃ vipakatavacanameva uppādakiriyāya vattamānakālikattā. **Uppajjamānoti** vā uppajjituṃ samattho. Sattiattho cāyaṃ **māna**-saddo. Yāvata hi sāmattiyaena mahābodhisattānaṃ carimabhava uppatti icchitabbā, tathakena bodhisambhārasambhūtena pariṇaṇṇena samannāgatoti attho. **Bhedoti** viseso. Tameva hi tividhaṃ visesaṃ dassetuṃ – “**esa hi**”tiādi vuttaṃ. Aṭṭhaṅgasamannāgatassa mahābhinhārassa siddhakālato paṭṭhāya mahābodhisatto buddhabhāvāya niyatabhāvappattatāya bodhisambhārapaṭipadaṃ paṭipajjamāno yathāvuttasāmattiyaयोगena uppajjamāno nāmāti attho uppādassa ekantikattā. **Pariyesantoti** vicinanto. **Paripakkagate** **ñāṇeti** iminā tato pubbe ñāṇassa aparipakkatāya eva laddhāvasarāya kammaṇṇiyā vasena bodhisatto tathā mahāpadhānaṃ padahīti dasseti. **Arahattaphalakkhaṇe uppanno nāma** “uppanno hotī”ti vattabbattā. **Āgatova nāma** hetusampadāya sammadeva nipphannattā.

Hitatthāyāti lokiyalokuttarassa hitassa siddhiyā. **Sukhatthāyāti** etthāpi eseva nayo. **Tassāti** tassa sattalokassa. So paṇāyaṃ sattaloko yena anukkamena dhammābhisamayaṃ pāpuṇi, taṃ teneva anukkamena dassento “**mahābodhimaṇḍe**”tiādimāha. **Yāvajjadivasāti** ettha **ajja**-saddena sāsanassa avatṭhānakālaṃ vadati. **Devamanussānanti** ukkaṭṭhaniddesoti dassetuṃ – “**na kevala**”ntiādi vuttaṃ. **Etesampīti** nāgasupaṇṇādānampi.

Ayaṃ pucchāti iminā “katamo”ti padassa sāmāññato pucchābhāvo dassito, na visesatoti tassa pucchāvisesabhāvañāpanatthaṃ **mahāniddese** (mahāni. 150) āgatā sabbāpi pucchā atthuddhāranayena dasseti “**pucchā ca nāmesā**”tiādinā. Adiṭṭhaṃ jotiyati etāyāti **adiṭṭhajotanā**. Diṭṭhaṃ saṃsandiyati etāyāti **diṭṭhasaṃsandana**. Saṃsandanañca sākacchāvasena vinicchayakaraṇaṃ. Vimatiṃ chindati etāyāti **vimaticchedanā**. Anumatiyā pucchā **anumatipucchā**. “Taṃ kiṃ maññatha, bhikkhave”tiādi pucchāya “kā tumhākaṃ anumati”ti anumati pucchitā hoti. **Kathetukamyatāpucchāti** kathetukamyatāya pucchā. **Lakkaṇanti** ñātuṃ icchito yo koci sabhāvo. **Aññātanti** yena kenaci ñāṇena aññātabhāvamāha. **Adiṭṭhanti** dassanabhūtena ñāṇena paccakkhaṃ viya adiṭṭhatam. **Atulitanti** “ettakaṃ eta”nti tulābhūtena atulitamaṃ. **Atīritanti** tīraṇabhūtena akataññakiriyāsamāpanatam. **Avibhūtanti** ñāṇassa apākaṭabhāvaṃ. **Avibhāvitanti** ñāṇena apākaṭakatabhāvaṃ.

Yehi guṇavisesehi nimittabhūtehi bhagavati “tathāgato”ti ayaṃ samaññā pavattā, taṃdassanatthaṃ “**aṭṭhahi kāraṇehi bhagavā tathāgato**”tiādi vuttaṃ. Guṇavisesanemittikāneva hi bhagavato sabbāni nāmāni. Yathāha –

“Asaṅkhyeyyāni nāmāni, sakuṇena mahesino;
Guṇena nāmamuddheyyaṃ, api nāmasahassato”ti. (dha. sa. aṭṭha. 1313; udā. aṭṭha. 53; paṭi. ma. aṭṭha. 1.1.76);

Tathā āgatoti ettha ākāranīyamanavasena opammasampanāpādanattho **tathā**-saddo. Sāmāññajotanāpi hi visese avatiṭṭhātīti. Paṭipadāgamanattho **āgata**-saddo, na ñāṇagamanattho “tathalakkhaṇaṃ āgato”tiādisu (dī. ni. aṭṭha. 1.7; ma. ni. aṭṭha. 1.12; saṃ. ni. aṭṭha. 2.3.78; a. ni. aṭṭha. 1.1.170; udā. aṭṭha. 18) viya, nāpi kāyagamanattho “āgato kho mahāsamaṇo, magadhānaṃ giribbaja”ntiādisu (mahāva. 63) viya. Tattha yadākāranīyamanavasena opammasampanāpādanattho tathā-saddo, taṃkaruṇāpadhānattā mahākāruṇāmukhena purimabuddhānaṃ āgamanappaṭipadaṃ udāharaṇavasena sāmāññato dassento yaṃ-taṃ-saddānaṃ ekantasambandhabhāvato “**yathā sabbaloka...pe... āgatā**”ti sādharmaṇato vatvā puna taṃ paṭipadaṃ **mahāpadhānasuttādisu** (dī. ni. 2.1 ādayo) sambahulaniddesena supākaṭānaṃ āsannānañca vipassīdānaṃ channaṃ sammāsambuddhānaṃ vasena nidassento “**yathā vipassī bhagavā**”tiādimāha. Tattha **yena abhinīhārenāti** manussatthāṅgasampattihetusatthudassanapabbajjābhiññādiguṇasampattiadhikāracchandānaṃ vasena aṭṭhaṅgasamannāgatena mahāpaṇidhānena. Sabbesañhi buddhānaṃ kāyappaṇidhānaṃ imināva

abhinīhārena samijjhatīti. Evaṃ mahābhīnīhāravisesena “tathāgato”ti padassa atthaṃ dassetvā idāni pāramipūraṇavasena dassetuṃ – “**yathā vipassī bhagavā...pe... kassapo bhagavā dānapāramiṃ pūretvā**”tiādīmāha.

Ettha ca suttantikānaṃ mahābodhippaṭipadāya kosallajananatthaṃ kā panetā pāramiyo, kenatṭhena pāramiyo, katividhā cetā, ko tāsamaṃ kamo, kāni lakkhaṇarasapaccupaṭṭhānapadaṭṭhānāni, ko paccayo, ko saṃkilesa, kiṃ vodānaṃ, ko paṭipakkho, kā paṭipatti, ko vibhāgo, ko saṅgaho, ko sampādanūpāyo, kittakena kālena sampādanaṃ, ko ānisaṃso, kiñcetāsaṃ phalanti pāramīsu ayaṃ vitthārakathā veditabbā. Sā panesā icchantena **dīghāgamaṭīkāyaṃ** (dī. ni. 1.7) vuttanayeneva veditabbā, na idha dassitā. Yathāvuttāya paṭipadāya yathāvuttavibhāgānaṃ pāramīnaṃ pūritabhāvaṃ sandhāyāha – “**samatīmsa pāramiyo pūretvā**”ti.

Satipi mahāpariccāgānaṃ dānapāramibhāve pariccāgavisesabhāvadassanatthañceva sudukkarabhāvadassanatthañca mahāpariccāgehi visuṃ gahaṇaṃ. Tatoyeva ca āngapariccāgato visuṃ nayanapariccāgaggahaṇaṃ, pariccāgabhāvasāmaññepi dhanarajjapariccāgato puttadārapariccāgaggahaṇaṃ kataṃ. Gatapaccāgatikavattasaṅkhātāya pubbabhāgappaṭipadāya saddhiṃ abhiññāsamāpattinipphādanaṃ **pubbayogo**. Dānādīsuyeva sātīsayappaṭipattinipphādanaṃ **pubbacariyā**, yā vā cariyāpiṭakasaṅgahitā. “Abhinīhāro pubbayogo, dānādippaṭipatti vā kāyavivekavasena ekacariyā vā pubbacariyā”ti keci. Dānādīnañceva appicchatādīnañca saṃsāranibbānesu ādīnavānisamsānañca vibhāvanavasena sattānaṃ bodhittaye paṭiṭṭhānaparipācanavasena ca pavattā kathā **dhammakkhānaṃ**. Nātīnaṃ atthacariyā **nātatthacariyā**. Sāpi karuṇāyanavaseneva. **Ādi**-saddena lokatthacariyādayo saṅgaṇhāti. Kammassakataññāvasena anavajjakammāyatanasippāyatanavijjāṭṭhānaparicayavasena khandhāyatanādīparicayavasena lakkhaṇattayātīraṇavasena ca ñāṇacāro **buddhacariyā**. Sā pana atthato paññāpāramīyeva, ñāṇasambhāradassanatthaṃ visuṃ gahaṇaṃ. **Koṭṭi** pariyanto, ukkaṃsoti attho. Cattāro satipaṭṭhāne bhāvetvāti sambandho. Tattha **bhāvetvāti** uppādetvā. **Brūhetvāti** vaḍḍhetvā. Satipaṭṭhānādiggahaṇena āgamanappaṭipadaṃ matthakaṃ pāpetvā dasseti. Vipassanāsahagatā eva vā satipaṭṭhānādayo daṭṭhabbā. Ettha ca “yena abhinīhārenā”tiādīnā āgamanappaṭipadāya ādiṃ dasseti, “dānapārami”ntiādīnā majjhaṃ, “cattāro satipaṭṭhāne”tiādīnā pariyosānanti veditabbaṃ.

Sampatijātoti muhuttajāto nikkhantamatto. Nikkhantamattañhi mahāsattaṃ paṭhamaṃ brahmāno suvaṇṇajālena paṭiggaṇhīmsu, tesamaṃ hatthato cattāro mahārājāno ajinappaveṇiyā, tesamaṃ hatthato manussā dukūlacumbaṭakena paṭiggaṇhīmsu, manussānaṃ hatthato muccitvā pathaviyaṃ paṭiṭṭhito. **Yathāhātī**ādīnā mahāpadānadesanāya vuttavacanaṃ nidasseti. **Setamhi chatteti** dibbasetacchatte. **Anudhāriyamāneti** dhāriyamāne. Ettha ca chattaḡgahaṇeneva khaggādīni pañca kakudhabhaṇḍāni vuttānevāti daṭṭhabbaṃ. Khaggatālavaṇṭamoraḡhathakavālabījanīuṇhīsapaṭṭāpi hi chattaena saha tadā upaṭṭhitā ahesuṃ. Chattādīniyeva ca tadā paññāyīmsu, na chattādiggāhakā. **Sabbā ca disāti** dasa disā, nayidaṃ sabbadisāvīlokanaṃ sattapadavītiḡruttarakālaṃ. Mahāsatto hi manussānaṃ hatthato muccitvā puratthimaṃ disamaṃ olokesi, tattha devamanussā gandhamālādīhi pūjayamānā, “mahāpurisa, idha tumhehi sadisopi natthi, kuto uttaritaro”ti āhaṃsu. Evaṃ catasso disā catasso anudisā heṭṭhā uparīti sabbā disā anuvīloketvā sabbattha attanā sadisamaṃ adisvā “ayaṃ uttarā disā”ti sattapadavītiḡhārena āgamāsī. **Āsabhinti** uttamaṃ. **Aggoti** sabbapaṭhamaṃ. **Jeṭṭhoti seṭṭhoti** ca tasseva vevacanaṃ. **Ayamantimā jāti, natthi dāni punabbhavoti** imasmiṃ attabhāve pattabbaṃ arahattaṃ byākāsī. “**Anekesamaṃ visesādhighamānaṃ pubbanimittabhāvenā**”ti saṃkhittena vuttamatthaṃ “**yañhī**”tiādīnā vitthārato dasseti. Tattha **etthāti** –

“Anekasākhañca saḡassamaṇḡdalaṃ,
Chattaṃ marū dhārayumantalikkhe;
Suvaṇṇadaṇḡā vītipatanti cāmarā,
Na dissare cāmarachattaḡāhakā”ti. (su. ni. 693) –

Imissā gāthāya. Sabbaññūtaññānameva sabbattha appaṭihatacārātāya anāvaraṇaññānanti āha – “**sabbaññūtānāvaraṇaññāpaṭilābhassā**”ti. **Tathā ayaṃ bhagavāpi gato...pe... pubbanimittabhāvenā**ti etena abhijātiyaṃ dhammatāvasena uppajjanakavisesā sabbabodhisattānaṃ sādḡhāraṇāti dasseti. Pāramitānissandā hi teti.

Vikkamīti agamāsi. **Marūti** devā. **Samāti** vilokanasamatāya samā sadisiyo. Mahāpuriso hi yathā ekaṃ disaṃ vilokesi, evaṃ sesadisāpi, na katthaci vilokane vibandho tassa ahoṣīti. **Samāti** vā viloketuṃ yuttāti attho. Na hi tadā bodhisattassa virūpabībhacchavisamarūpāni viloketuṃ ayuttāni disāsu upaṭṭhahantīti.

“Evaṃ tathā gato”ti kāyagamaṇaṭṭhena gatasaddena tathāgatasaddaṃ niddisitvā idāni nīṇagamaṇaṭṭhena taṃ dassetuṃ – “**atha vā**”tiādimāha. Tattha **nekkhammenāti** alobhappadhānena kusalacittuppādena. Kusalaṃ hi dhammā idha nekkhammaṃ, na pabbajjādayo. “Paṭhamajjhānenā”ti ca vadanti. **Pahāyāti** pajahitvā. **Gato** adhigato, paṭipanno uttarivisesanti attho. **Pahāyāti** vā pahānāhetu, pahānalakkhaṇaṃ vā. Hetulakkhaṇattho hi ayaṃ pahāyasaddo. Kāmacchandādippahānāhetukaṇhi “gato”ti ettha vuttaṃ gamaṇaṃ avabodho, paṭipatti eva vā kāmacchandādippahānena ca lakkhīyati. Esa nayo **padāletvāti**tiādīsupi. **Abyāpādenāti** mettāya. **Ālokasaññāyāti** vibhūtaṃ katvā manasikaraṇena upaṭṭhitaālokasaññānena. **Avikkhepenāti** samādhinā. **Dhammavavatthānenāti** kusalādidhammānaṃ yāthāvanicchayena. “Sappaccayanāmarūpavavatthānenā”ti pi vadanti. Evaṃ kāmacchandādinīvaraṇappahānena “abhijjhaṃ loke pahāyā”tiādinā (vibha. 508) vuttāya paṭhamajjhānassa pubbhāgappaṭipadāya bhagavato tathāgatabhāvaṃ dassetvā idāni saha upāyena aṭṭhahi samāpattīhi aṭṭhārasahi ca mahāvīpassanāhi taṃ dassetuṃ – “**ñāṇena**”tiādimāha. Nāmarūpapariggahakaṇkhāvīvaraṇānaṃhi vibandhabhūtaṃ mohassa dūrīkaraṇena nītapariññāyaṃ ṭhitassa aniccaaññādayo sijjhanti, tathā jhānasamāpattīsu abhīratinimittena pāmojjena tattha anabhiratiyā vinoditāya jhānādīnaṃ samadhigamoti samāpattivīpassanānaṃ arativinodanaavijjāpadālanādiupāyo, uppaṭipāṭiniddeṣo pana nīvaraṇasabhāvāya avijjāya heṭṭhā nīvaraṇesupi saṅghadassanattanti daṭṭhabbo. Samāpattivīhārappavesavibandhanena nīvaraṇāni kavātasadisāntī āha – “**nīvaraṇakavāṭaṃ ughāṭetvā**”ti.

“Rattīṃ vitakketvā vicāretvā divā kammante payojetī”ti (ma. ni. 1.251) vuttaṭṭhāne vitakkavicārā dhūmāyanā adhippetāti āha – “**vitakkavicāradhūma**”nti. Kiñcāpi paṭhamajjhānūpacāreyeva dukkhaṃ, catutthajjhānūpacāreyeva ca sukhaṃ pahīyati, atisaṃyappahānaṃ pana sandhāyāha – “**catutthajjhānena sukhadukkhaṃ pahāyā**”ti. **Rūpasaññāti** saññāsīsenā rūpāvacarajjhānāni ceva tadārammaṇāni ca vuttāni. Rūpāvacarajjhānampi hi “rūpa”nti vuccati uttarapadalopena “rūpī rūpāni passatī”tiādīsū (ma. ni. 2.248; 3.312; dha. sa. 248; paṭi. ma. 1.209). Tassa ārammaṇampi kasiṇarūpaṃ “rūpa”nti vuccati purimapadalopena “bahiddhā rūpāni passati suvaṇṇadubbaṇṇāni”tiādīsū (dī. ni. 2.173-174; ma. ni. 2.249; dha. sa. 244-245). Tasmā idha rūpe rūpajjhāne taṃsahagatasaññā rūpasaññāti evaṃ saññāsīsenā rūpāvacarajjhānāni vuttāni. Rūpaṃ saññā assāti rūpasaññāṃ, rūpassa nāmantī vuttaṃ hoti. Evaṃ pathavīkasiṇādībhedaṃsā tadārammaṇassa cetāṃ adhivacānanti vedītabbaṃ. **Paṭighasaññāti** cakkhādīnaṃ vatthūnaṃ rūpādīnaṃ ārammaṇānaṃ paṭighātena paṭihanānena visayavisayasamodhāne samuppannā dvipaṇcaviññāṇasahagatā saññā paṭighasaññā. **Nānattasaññāyoti** nānatte gocare pavattā saññā, nānattā vā saññā nānattasaññā, aṭṭha kāmāvacarakusalasaññā, dvādasa akusalasaññā, ekādasa kāmāvacarakusalavīpākasaññā, dve akusalavīpākasaññā, ekādasa kāmāvacarakiriyasaññāti etāsaṃ catucattālīsasaññānametaṃ adhivacānaṃ. Etā hi yasmā rūpasaññādībhede nānatte nānāsabhāve gocare pavattanti, yasmā ca nānattā nānāsabhāvā aññamaññaṃ asadisā, tasmā “**nānattasaññā**”ti vuccanti.

Aniccassa, aniccanti vā anupassanā **aniccānupassanā**, tebhūmakadhammānaṃ aniccatāṃ gahetvā pavattāya anupassanāyetaṃ nāmaṃ. **Niccasaññanti** saṅkhatadhamme “niccā sassatā”ti pavattaṃ micchāsaññaṃ. Saññāsīsenā dīṭṭhicittānampi gahaṇaṃ daṭṭhabbaṃ. Esa nayo ito paresupi. **Nibbidānupassanāyāti** saṅkhāresu nibbijjanākārena pavattāya anupassanāya. **Nandinti** sappītikataṇhaṃ. **Virāgānupassanāyāti** saṅkhāresu virajjanākārena pavattāya anupassanāya. **Nirodhānupassanāyāti** saṅkhārānaṃ nirodhassa anupassanāya. “Te saṅkhārā nirujjhantiyeva, āyatīṃ samudayavasena na uppajjantī”ti evaṃ vā anupassanā nirodhānupassanā. Tenevāha – “nirodhānupassanāya nirodheti, no samudeṭī”ti. Muccitukamyatā hi ayaṃ balappattāti. Paṭinissajjanākārena pavattā anupassanā **paṭinissaggānupassanā**. Paṭisaṅkhā santiṭṭhānā hi ayaṃ. **Ādānanti** niccādivasena gahaṇaṃ. Santatisamūhakkiccārammaṇānaṃ vasena ekattaṅgahaṇaṃ **ghanasaññā**. **Āyūhanaṃ** abhisāṅkharānaṃ. Avatthāvisesāpatti **vipariṇāmo**. **Dhuvasaññanti** thirabhāvaggahaṇaṃ. **Nimittanti** samūhādighanavasena sakiccaparicchedatāya ca saṅkhārānaṃ saviggahaggahaṇaṃ. **Paṇidhinti** rāgādipaṇidhiṃ. Sā panatthato taṇhāvasena saṅkhāresu nanditā. **Abhinivesanti** attānudiṭṭhiṃ.

Aniccadukkhādivasena sabbadhammatīraṇaṃ **adhipaññādharmavipassanā**. **Sārādānābhinivesanti** asāre sāraggahaṇavipallāsaṃ. Issarakuttādivasena loko samuppannoti abhiniveso **sammohābhiniveso**. Keci pana “ahosiṃ nu kho ahamatītamaddhānantiādīnā pavattasaṃsayāpatti sammohābhiniveso”ti vadanti. Saṅkhāresu leṇatāṇabhāvaggahaṇaṃ **ālayābhiniveso**. “Ālayaratā ālayasammuditā”ti (dī. ni. 2.64; ma. ni. 1.281; 2.337; saṃ. ni. 1.172; mahāva. 7) vacanato ālayo taṇhā, sāyeva cakkhādīsu rūpādīsu ca abhinivesavasena pavattiyā ālayābhinivesoti keci. “Evaṃvidhā saṅkhārā paṇinissajjīyanti”ti pavattaṃ ṇāṇaṃ **paṭisaṅkhānupassanā**. Vaṭṭato vigatattā vivaṭṭaṃ, nibbānaṃ. Tatha ārammaṇakaraṇasaṅkhātena anupassanena pavattiyā **vivaṭṭānupassanā**, gotrabhū. **Samyogābhinivesanti** saṃyujjanavasena saṅkhāresu abhinivisaṇaṃ. **Diṭṭhekaṭṭheti** diṭṭhiyā sahaṇātekaṭṭhe pahānekaṭṭhe ca. **Oḷāriketi** uparimaggavajjhe kilese apekkhitvā vuttaṃ, aññathā dassanapahātabbāpi dutiyamaggavajjhehi oḷārikāti. **Aṇusahagateti** aṇubhūte. Idaṃ heṭṭhimamaggavajjhe apekkhitvā vuttaṃ. **Sabbakileseti** avasiṭṭhasabbakilese. Na hi paṭhamādimaggehi pahīnā kilesā **puna** pahīyanti.

Kakkhaḷattaṃ kathinabhāvo. **Paggharaṇaṃ** dravabhāvo. Lokiyavāyunaṃ bhasṭāya viya yena taṃtaṃkalāpessa uddhumāyanaṃ, thaddhabhāvo vā, taṃ **vitthambhanaṃ**. Vijjamānepi kalāpantarabhūtaṇaṃ kalāpantarabhūtehi phuṭṭhabhāve taṃtaṃbhūtavivittatā rūpapariyanto ākāsoti yesaṃ yo paricchedo, tehi so asamphuṭṭhova, aññathā bhūtaṇaṃ paricchedabhāvo na siyā byāpitaḥāvāpattito. Yasmaṃ kalāpe bhūtaṇaṃ paricchedo, tehi asamphuṭṭhabhāvo **asamphuṭṭhalakkaṇaṃ**. Tenāha – bhagavā **ākāsadhātuniddese** (dha. sa. 637) “asamphuṭṭho catūhi mahābhūtehi”ti.

Virodhipaccayasannipāte visadisuppatti **ruppanaṃ**. Cetanāpadhānattā saṅkhārakkhandhadhammānaṃ cetanāvasenetāṃ vuttaṃ – “**saṅkhārānaṃ abhisāṅkharaṇalakkhaṇa**”nti. Tathā hi suttantabhājanīye **saṅkhārakkhandhavibhaṅge** (vibha. 92) “cakkhusamphassaṃ cetanā”tiādīnā cetanāva vibhattā. Abhisāṅkharalakkhaṇā ca cetanā. Yathāha – “tatha katamo puññābhisaṅkhāro, kusalā cetanā kāmāvacarā”tiādī. **Pharaṇaṃ** savipphārikatā. **Assaddhiyeti** assaddhiyāhetu. Nimittatthe bhumaṃ. Esa nayo **kosajjeti**ādīsu. **Vūpasamalakkhaṇanti** kāyacittapariḷāhūpasamalakkhaṇaṃ. Līnuddhaccarahite adhicitte pavattamāne paggahaniggahasampahaṃsanesu abyāvaṭṭatāya ajjuhekkhanaṃ **paṭisaṅkhānaṃ** pakkhapātupacchedato.

Musāvādādīnaṃ viṣaṃvādanādikkicatāya lūkhānaṃ apariggāhakānaṃ paṭipakkhabhāvato pariggāhakasabhāvā **sammāvācā**, siniddhabhāvato sampayuttadhamme sammāvācāpaccayasubhāsītānaṃ sotāraṇa puggalaṃ pariggaṇhātīti sā **pariggahalakkhaṇā**. Kāyikakiriyaṃ kiñci kattabbaṃ samuṭṭhāpeti, sayaṇca samuṭṭhānaṃ ghaṭanaṃ hotīti sammākammantasāṅkhātā viratīpi **samuṭṭhānalakkhaṇā** daṭṭhabbā, sampayuttadhammānaṃ vā ukkhipanaṃ samuṭṭhāpanaṃ kāyikakiriyaṃ bhārukkhipanaṃ viya. Jīvamānassa sattassa, sampayuttadhammānaṃ vā jīvitindriyapavattiyā, ājīvasseva vā suddhi **vodānaṃ**. “Saṅkhārā”ti idha cetanā adhippetāti vuttaṃ – “**saṅkhārānaṃ cetanālakkaṇa**”nti. **Namaṇaṃ** ārammaṇābhimukhabhāvo. **Āyatanāṃ** pavattanaṃ. Āyatanavasena hi āyasaṅkhātānaṃ cittacetāsikānaṃ pavattī. **Taṇhāya hetulakkhaṇanti** vaṭṭassa janakahetubhāvo, maggassa pana nibbānasampāpakattanti ayametesāṃ viṣeso.

Tathalakkhaṇaṃ aviparītasabhāvo. **Ekaraso** aññamaññānātivattanaṃ anūnādhikabhāvo. **Yuganaddhā** samathavipassanāva. “Saddhāpaññā paggaḥāvikkhepā”tipi vadanti. **Khayoti** kilesakkhayo maggo. Anuppādapariyosānatāya **anuppādo** phalaṃ. **Passaddhi** kilesavūpasamo. **Chandassāti** kattukāmatāchandassa. **Mūlalakkhaṇaṃ** paṭiṭṭhābhāvo. **Samuṭṭhānalakkhaṇaṃ** ārammaṇappaṭipādakatāya sampayuttadhammānaṃ uppattihetutā. **Samodhānaṃ** viṣayādisannipātena gahetabbākāro, yā saṅgatīti vuccati. Samaṃ, saha odahanti anena sampayuttadhammāti vā **samodhānaṃ**, phasso. Samosaranti sannipatanti etthāti **samosaraṇaṃ**. Vedanāya vinā appavattamānā sampayuttadhammā vedanānubhavananimittaṃ samosaṭṭā viya hontīti evaṃ vuttaṃ. Gopānasīnaṃ kūṭaṃ viya sampayuttānaṃ pāmokkhabhāvo **pamukhalakkhaṇaṃ**. Tato, tesāṃ vā sampayuttadhammānaṃ uttari padhānanti **tatuttari**. Paññuttarā hi kusalā dhammā. **Vimuttiyāti** phalassa. Tañhi sīlādiguṇasārassa paramukkaṃsabhāvena **sāraṃ**. Ayaṇca lakkhaṇavibhāgo chadhātupañcajhānaṅgādivasena taṃtaṃsuttapadānusārena porāṇaṭṭhakathāyaṃ āgatanayena ca katoti daṭṭhabbaṃ. Tathā hi pubbe vuttopi koci dhammo

pariyāyantarappakāsanattham puna dassito, tato eva ca “chandamūlakā kusalā dhammā manasikārasamutthānā phassasamodhānā vedanāsamosaraṇā”ti, “paññuttarā kusalā dhammā”ti, “vimuttisāramidaṃ brahmacariya”nti, “nibbānogadhañhi, āvuso, brahmacariyaṃ nibbānapariyosāna”nti (saṃ. ni. 5.512) ca suttapadānaṃ vasena “chandassa mūlakkhaṇa”ntiādi vuttaṃ.

Tathadhammā nāma cattāri ariyasaccāni aviparītasabhāvattā. **Tathāni** taṃsabhāvattā, **avitathāni** amusāsabhāvattā, **anaññathāni** aññākārarahitattā. **Jātipaccayasambhūtasamudāgataṭṭhoti** jātipaccayā sambhūtaṃ hutvā sahitassa attano paccayānurūpassa uddham uddham āgatabhāvo, anupavattatthoti attho. Atha vā sambhūtaṭṭho ca samudāgataṭṭho ca sambhūtasamudāgataṭṭho, na jātito jarāmarāṇaṃ na hoti, na ca jātiṃ vinā aññato hotīti **jātipaccayasambhūtaṭṭho**, itthañca jātito samudāgacchatīti **jātipaccayasamudāgataṭṭho**. Yā yā jāti yathā yathā paccayo hoti, tadanurūpaṃ pātubhāvoti attho. **Avijjāya saṅkhārānaṃ paccayaṭṭhoti** etthāpi na avijjā saṅkhārānaṃ paccayo na hoti, na ca avijjāṃ vinā saṅkhārā uppajjanti. Yā yā avijjā yesaṃ yesaṃ saṅkhārānaṃ yathā yathā paccayo hoti, ayaṃ avijjāya saṅkhārānaṃ paccayaṭṭho, paccayabhāvoti attho.

Bhagavā taṃ jānāti passatīti sambandho. **Tenāti** bhagavatā. Taṃ vibhajjamānanti yojetabbaṃ. **Tanti** rūpāyatanāṃ. **Iṭṭhāniṭṭhādīti ādi**-saddena majjhataṃ saṅgaṇhāti, tathā atītānāgatapaccuppannaparittaajjhatabahiddhātadubhayādibhedāṃ. **Labbbhamānakapadavasenāti** “rūpāyatanāṃ diṭṭhaṃ, saddāyatanāṃ sutaṃ, gandhāyatanāṃ rasāyatanāṃ phoṭṭhabbāyatanāṃ mutaṃ, sabbaṃ rūpaṃ manasā viññāta”nti (dha. sa. 966) vacanato diṭṭhapadañca viññātapadañca rūpārammaṇe labbhati. **Anekehi nāmehi**ti “rūpārammaṇaṃ iṭṭhaṃ anīṭṭhaṃ majjhataṃ parittaṃ atītaṃ anāgataṃ paccuppannaṃ ajjhataṃ bahiddhā diṭṭhaṃ viññātaṃ rūpaṃ rūpāyatanāṃ rūpadhātu vaṇṇanibhā sanidassanaṃ sappatighaṃ nīlaṃ pītaka”nti evamādīhi anekehi nāmehi. **Terasahi vārehīti** rūpakaṇḍe āgate terasa niddesavāre sandhāyāha. **Dvepaññāsāya nayehīti** ekekasmīṃ vāre catunnaṃ catunnaṃ vavattāpananayānaṃ vasena dvipaññāsāya nayehi. **Tathamevāti** aviparītadassitāya appaṭivattiyadesanatāya ca tathameva hoti. **Jānāmi abbhaññāsinti** vattamānātītakālesu ñāṇappavattidassanena anāgatepi ñāṇappavatti vuttāyevāti daṭṭhabbā. **Vidita**-saddo anāmaṭṭhakālaviseso veditabbo “diṭṭhaṃ sutaṃ muta”ntiādīsu (dī. ni. 3.188; ma. ni. 1.7-8; saṃ. ni. 3.208; a. ni. 4.23) viya. **Na upaṭṭhāsīti** attattaniyavasena na upagañchi. Yathā rūpārammaṇādayo dhammā yaṃsabhāvā yaṃpakārā ca, tathā ne passati jānāti gacchatīti **tathāgatoti** evaṃ padasambhavo veditabbo. Keci pana “niruttinayena **pisodarādipakkhepena** vā dassīsaddassa lopam, āgata-saddassa cāgamaṃ katvā tathāgato”ti vaṇṇenti.

Yaṃ rattinti yassaṃ rattiyaṃ. Accantasamyoge cetam upayogavacanāṃ. **Tiṇṇaṃ mārānanti** kilesābhisaṅkhāradevaputtasaṅkhātānaṃ tiṇṇaṃ mārānaṃ. **Anupavajjanti** niddosatāya na upavajjāṃ. **Anūnanti** pakkhipitabbābhāvena na ūnaṃ. **Anadhikanti** apānetabbābhāvena na adhikaṃ. **Sabbākāraparipuṇṇanti** atthabyañjanādisampattiyā sabbākārena paripuṇṇaṃ. **No aññathāti** “tathēvā”ti vuttamevatthaṃ byatirekena sampādeti. Tena yadatthaṃ bhāsitaṃ, tadatthanipphādanato yathā bhāsitaṃ bhagavatā, tathēvāti aviparītadesanataṃ dasseti. **Gadatthoti** etena tathaṃ gadaṭīti **tathāgatoti** da-kārassa ta-kāraṃ katvā niruttinayena vuttanti dasseti. Tathā gatamassāti tathāgato. **Gatanti** ca kāyassa vācāya vā pavattīti attho. **Tathāti** ca vutte yaṃ-taṃ-saddānaṃ abyabhicāritasambandhatāya yathāti ayamattho upaṭṭhitoyeva hoti. Kāyavācākiriyaṇaṃ aññamaññānulomena vacanicchāyaṃ kāyassa vācā, vācāya ca kāyo sambandhabhāvena upatiṭṭhatīti imamattaṃ dassento āha – “**bhagavato hi**”tiādi. Imasmīṃ pana atthe tathāvādītāya tathāgatoti ayampi attho siddho hoti. So pana pubbe pakārantarena dassitoti āha – “**evaṃ tathākāritāya tathāgato**”ti.

Tiriyāṃ aparimāṇāsu lokadhātūsūti etena yadeke “tiriyāṃ viya upari adho ca santi lokadhātuyo”ti vadanti, taṃ paṭisedheti. Desanāvīlāsoyeva **desanāvīlāsamayo** yathā “puññamayaṃ dānamaya”ntiādīsu (dī. ni. 3.305; itivu. 60; netti. 33). Nipātānaṃ vācakasaddasannidhāne tadatthajotanabhāvena pavattanato gata-saddoyeva avagatatthaṃ atītatthañca vadatīti āha – “**gatoti avagato atīto**”ti. Atha vā abhinīhārato paṭṭhāya yāva sambodhi, etthantare mahābodhiyānapaṭipattiyā hānaṭṭhānasamkilesanivattīnaṃ abhāvato yathā pañidhānaṃ, tathā gato abhinīhārānurūpaṃ paṭipannoti **tathāgato**. Atha vā mahiddhikatāya paṭisambhidānaṃ ukkaṃsādhigamena anāvarenaññātāya ca kathaṅgāpi paṭighātābhāvato yathā ruci, tathā kāyavācācittānaṃ gatāni gamanāni pavattiyo etassāti **tathāgato**. Yasmā ca loke vidhayuttatagatapakārasaddā

samānatthā dissanti, tasmā yathāvidhā vipassīdayo bhagavanto, ayampi bhagavā tathāvidhoti **tathāgato**. Yathā yuttā ca te bhagavanto, ayampi bhagavā tathā yuttoti tathāgato. Atha vā yasmā saccam tatvaṃ tacchaṃ tathanti nānassetam adhivacanam, tasmā tathena nānena āgatoti **tathāgatoti** evampi tathāgatasaddassa attho veditabbo.

“Pahāya kāmādimale yathā gatā,
Samādhiñānehi vipassīdayo;
Mahesino sakyamunī jutindharo,
Tathāgato tena tathāgato mato.

“Tathañca dhātāyatanādilakkhaṇam,
Sabhāvasāmaññavibhāgabhedato;
Sayambhuññena jinoyamāgato,
Tathāgato vuccati sakyapuṅgavo.

“Tathāni saccāni samantacakkhunā,
Tathā idappaccayatā ca sabbaso;
Anaññaneyyena yato vibhāvītā,
Yāthāvato tena jino tathāgato.

“Anekabhedāsupi lokadhātusu,
Jinassa rupāyatanādigocare;
Vicittabhede tathameva dassanam,
Tathāgato tena samantalocano.

“Yato ca dhammaṃ tathameva bhāsati,
Karoti vācāyanulomamattano;
Guṇehi lokam abhibhuyyiriyati,
Tathāgato tenapi lokanāyako.

“Yathābhinihāramato yathāruci,
Pavattavācā tanucittabhāvato;
Yathāvidhā yena purā mahesino,
Tathāvidho tena jino tathāgato”ti. (dī. ni. ṭī. 1.7) –

Saṅgahagāthā mukhamattameva, kasmā? Appamādapadaṃ viya sakalakusaladhammasampañipattiyā sabbabuddhaguṇānaṃ saṅgāhakattā. Tenevāha – “**sabbākārenā**”tiādi. Sesamettha uttānatthameva.

171. Dutiye **uppattīti** paṭhamāya jātiyā nibbattiṃ vatvā ariyāya jātiyā nibbattiṃ dassetuṃ – “**nippatti**”ti āha. Tadā hissa buddhabhāvanipphattīti. “Dullabho”tiādiṃ vatvā kāraṇassa dūrasambhārabhāvato tattha kāraṇam dassento “**ekavāra**”ntiādimāha. Idaṃ vuttaṃ hoti – tattha vāraṇānā nāma māsaṃvaccharakappagaṇanādikā, kappānaṃ ekaṃ asaṅkhyeyyaṃ dve asaṅkhyeyyāni tīṇi asaṅkhyeyyānipi pāramiyo pūretvāpi buddhena bhavituṃ na sakkā, heṭṭhimakoṭiyā pana cattāri asaṅkhyeyyāni kappasatasahassañca nirantaram dasa pāramiyo pūretvā buddhabhāvaṃ pattuṃ sakkā, na ito aññathāti iminā kāraṇena dullabho pātubhāvo buddhānantī.

172. Tatiye **niccamaṃ na hotīti** abhiñhappavattikaṃ na hoti kadācideva sambhavato. Yebhuyyena manussā acchariyaṃ disvā accharaṃ paharanti, taṃ sandhāya vuttaṃ – “**accharaṃ paharivā passitabbo**”ti. **Samannāgatattāti** etena acchariyā guṇadhammā etasmim santīti **acchariyoti** dasseti. Apica ādito pabhuti abhinīhārāvaho, tato parampi anaññāsādhāraṇe guṇadhamme āciñṇavāti **acchariyoti** āha – “**āciñṇamanussotipi acchariyamanusso**”tiādi. Mahābodhiññānameva maṇḍabhūtaṃ **mahābodhimaṇḍo**. Sabbaññutaññānapadaṭṭhānañhi maggaññānaṃ, maggaññānapadaṭṭhānañca sabbaññutaññānaṃ

“mahābodhī”ti vuccati. **Anivattakenāti** bodhiyā niyatabhāvāpattiyā mahābodhisattabhāvato anivattanasabhāvena. **Buddhakāradhammānaṃ pūraṇampi na aññassa kassaci āciṇṇanti**ādinaṃ hetuavattāya phalāvattāya sattānaṃ upakārāvattāya cāti tīsupi avattāsu lokanātho anaññasādhāraṇānaṃ guṇadhammānaṃ āciṇṇatāya acchariyamanusso vuttoti dasseti.

173. Catutthe kāle kiriyāti **kālakiriyā**. Katarasmiṃ kāle kīdisī kiriyā. Sāmaññajotanā hi visese avatiṭṭhati, visesatthinā ca viseso anuppayojitabboti āha – “**ekasmiṃ kāle pākaṭā kiriyā**”ti. Katarasmiṃ pana ekasmiṃ kāle, kathaṅca pākaṭāti? Kappānaṃ satasahassādhikāni anekāni asankhyeyyāni abhikkamitvā yathādhippetamanorathapāripūrivāsena samupaladdhe ekasmiṃ kāle, sadevaloke ativiya acchariyamanussassa parinibbānanti accantapākaṭā. **Anutāpakarāti** cetodukkhāvahā. **Dasasahassacakkavālesūti** vuttaṃ tassa buddhakkhettabhāvena paricchinnatā, tadaññesaṅca avisayattā.

174. Pañcame **dutiya**ssa **buddhassāti** dutiyaṃ sabbaññubuddhassa abhāvā. **Sutabuddho** nāma sutamayena ñāṇena bujjhitabbassa buddhattā. **Catusaccabuddho** nāma catunnaṃ ariyasaccānaṃ anavasesato buddhattā. **Paccekabuddho** nāma paccekaṃ attanoyeva yathā catusaccasambodho hoti, evaṃ buddhattā. Sammāsambuddho eva hi yathā sadevakassa lokassa catusaccasambodho hoti, evaṃ saccāni abhisambujjhati. **Cattāri vā aṭṭha vā soḷasa vāti** idaṃ katamahābhinihārānaṃ mahābodhisattānaṃ paññādhikasaddhādhikavīriyādhikavibhāgavasena vuttaṃ. “Paññādhikānañhi saddhā mandā hoti, paññā tikkhā. Saddhādhikānaṃ paññā majjhimā hoti. Vīriyādhikānaṃ paññā mandā, paññānubhāvena ca sammāsambodhi adhigantabbā”ti **aṭṭhakathāyaṃ** vuttaṃ. Avisesena pana vimuttiṃ paripācānīyadhammānaṃ tikkhamajjhimamudubhāvena tayopete bhedā yuttāti vadanti. Tividhā hi bodhisattā abhinīhārakkhaṇe bhavanti ugghāṭitaññuvipañcitanīyānūneyyabhedenā. Tesu ugghāṭitaññū sammāsambuddhassa sammukhā cātuppadikaṃ gāthaṃ suṇanto tatiyapade aparīyosīteyeva chahi abhiññāhi saha paṭisambhidāhi arahattaṃ pattuṃ samattūpanissayo hoti. Dutiyo satthu sammukhā ekaṃ gāthaṃ suṇanto aparīyosīteyeva catutthapade chahi abhiññāhi arahattaṃ pattuṃ samattūpanissayo hoti. Itaro bhagavato sammukhā cātuppadikagāthaṃ sutvā parīyosītāya gāthāya chahi abhiññāhi arahattaṃ pattuṃ samattūpanissayo hoti. Tayopete vinā kālabhedena katābhinihārā laddhabyākaraṇā pāramiyo pūrento yathākkamaṃ yathāvuttabhedenā kālena sammāsambodhiṃ pāpuṇanti, tesu tesu pana kālabhedesu aparipuṇṇesu te te mahāsattā divase divase vessantarādānasadisāṃ dānaṃ dentāpi tadanurūpaṃ sīlādīgesapāramidhamme ācinantāpi antarā buddhā bhavissantīti akāraṇametaṃ. Kasmā? Nāṇassa aparipaccanato. Paricchinnakālanipphāditaṃ viya hi sassaṃ paricchinnakāle nipphādītā sammāsambodhi tadantarā sabbussāhena vāyamantenapi na sakkā pāpuṇitunti pāramipūrī yathāvuttakālavisesena sampajjātīti veditabbāṃ. **Saddhinti** samānakāle.

Asahāyoti nippariyāyato vuttaṃ. Sahaayanaṭṭho hi sahāyaṭṭho. Paṭipattivasena bhagavatā saha samaṇaṃ ayaṇaṃ nāma kassacipi nattheva. Hatthādiavayavato paṭi paṭi minitabbato **paṭimā** vuccati attabhāvo. **Samatto nāma natthīti** devo vā māro vā brahmā vā koci natthi. **Paṭisamoti** paṭinidhibhāvena samo. **Paṭibhāgaṃ dātunti** “cattāro satipaṭṭhānā”tiādinaṃ vuttassa dhammabhāgassa dhammakotṭhāsassa paṭipakkhabhūtaṃ katvā bhāgaṃ koṭṭhāsaṃ paṭivacanaṃ dātuṃ samatto nāma natthi. Natthi etassa sīlādīguṇehi paṭibimbabhūto puggaloti **appaṭipuggalo**. Tenāha – “**añño koci**”tiādi. Tisahassimahāsahassānaṃ vibhāgo parato āvi bhavissati. Sesamettha suviññeyyameva.

175. Chatthādīsū **tasmiṃ puggaleti** sammāsambuddhe. Tanti paññācakkhu. **Pātubhūtameva hoti** tassa sahassa uppajjanato. **Uppattīti** uppajjanaṃ. **Nipphattīti** parivuddhi. **Kīvarūpassāti** kīdisassa. Sāvakaṃ visayaeva hatthagataṃ paññācakkhu nāma dvinnāṃ aggasāvakaṇāmyevāti āha – “**sāriputtattherassa**”tiādi. **Samādhipaññāti** samādhisahagatā paññā. “Samādhisaṃvattanikā khippanisantiādivisesāvahā paññā”ti keci. **Ālokoti** paññāloko eva. Tathā **obhāso**. **Tīṇipīti** tīṇipi suttāni. **Lokiyalokuttaramissakānīti** pubbhāgapaññāya adhippetattā vuttaṃ.

Uttamadhammānanti attano uttaritarassa abhāvena seṭṭhadhammānaṃ. Daṭṭhabbato dassanaṃ, bhagavato rūpakāyo. Tatthapi visesato rūpāyatanaṃ. Tenāha – “**cakkhuviññāṇena daṭṭhuṃ labhati**”ti. Natthi ito uttaranti anuttaraṃ, tadeva anuttariyaṃ, dassanaṅca taṃ anuttariyañcāti **dassanānuttariyaṃ**. Sesapadesupi eseva nayo. Ayaṃ pana padaviseso – suyyatīti **savanaṃ**, bhagavato vacanaṃ. Labbhatīti

lābho, bhagavati saddhā. Sikkhitabbato **sikkhā**. Sīlasamādhipaññāparicaraanam **pāricariyā**, upaṭṭhānam. Anussaraanam **anussati**, satthu guṇānussaraanam. **Imesanti** yathāvuttānam channam anuttariyānam. **Pātubhāvo hotīti** tathāgatassa pātubhāvā tappaṭibaddhattā tabbisayattā ca pātubhāvo hoti. “Dassanānuttariya”nti ca sadevake loke uttaritarassa bhagavato rūpassa na dassanamattam adhippetam, atha kho tassa rūpadassanamukhena aveccappasādena buddhaguṇe okappetvā oḡāhetvā dassanam daṭṭhabbam. Tenāha – “**āyasmā hī**”tiādi. **Idampi dassanānuttariyantī** pubbe vuttato nibbisesattā vuttam. **Dasabalam dassanāya labhītvāti** ānandatthero viya pasādabhattimettāpubbakam dasabalam dassanāya labhītvā. **Dassanam vaḍḍhetvāti** dassanamukhena pavattam vipassanācāram vaḍḍhetvā. Dassanamukhena yāva anulomañānam vipassanācāram vaḍḍhetvā tadanantaram aṭṭhamakamahābhūmiṃ okkamanto dassanam sotāpattimaggaṃ pāpeti nāma. Idha parato pavattam dassanam **dassanameva nāma, mūladassanam pana** saccadassanassapi kāraṇabhāvato **dassanānuttariyam nāma**. Esa nayo sesānuttariyesupī.

Dasabale saddham paṭilabhatīti sammāsambuddhe bhagavati saddham paṭilabhati. **Tisso sikkhā sikkhitvāti** tisso pubbabhāgasikkhā sikkhitvā. **Paricaratīti** upaṭṭhānam karoti. “Itipi so bhagavā”tiādinā buddhānussativasena anussatijjhānam uppādetvā tam padaṭṭhānam katvā vipassanam vaḍḍhento “**anussatiṃ vaḍḍhetvā**”ti vutto.

Sacchikiriya hotīti paccakkhakaranam hoti. Maggakkhaṇe hi labbhamānā paṭisambhidā phalakkhaṇe sacchikatā nāma hoti tato param atthādīsu yathicchitam viniyogakkhamabhāvato. **Catassoti** gaṇanapariccheto. **Paṭisambhidāti** pabhedā. Kassa pana pabhedāti? “Atthe ñānam atthapaṭisambhidā”tiādivacanato (vibha. 718-721) ñānassetā pabhedā. Tasmā **catasso paṭisambhidāti** cattāro ñānappabhedāti attho. **Atthapaṭisambhidāti** atthe paṭisambhidā, atthapabhedassa salakkhaṇavibhāvanavavattānākaraṇasamattham atthe pabhedagatam ñānanti attho. Tathā dhammapabhedassa salakkhaṇavibhāvanavavattānākaraṇasamattham dhamme pabhedagatam ñānam **dhammapaṭisambhidā**. Niruttipabhedassa salakkhaṇavibhāvanavavattānākaraṇasamattham niruttābhilāpe pabhedagatam ñānam **niruttipaṭisambhidā**. Paṭibhānapabhedassa salakkhaṇavibhāvanavavattānākaraṇasamattham paṭibhāne pabhedagatam ñānam **paṭibhānapaṭisambhidā**.

Atthesu ñānantiādīsu atthoti saṅkhepato hetuphalam. Tañhi hetuvasena araṇīyam gantabbam pattabbam, tasmā “attho”ti vuccati. Pabhedato pana yam kiñci paccayuppannam, nibbānam, bhāsitattho, vipāko, kiriyāti ime pañca dhammā “attho”ti veditabbā. Tam attham paccavekkhantassa tasmim pabhedagatam ñānam **atthapaṭisambhidā**. **Dhammoti** saṅkhepato paccayo. So hi yasmā tanti dahati vidahati pavatteti ceva pāpeti ca ṭhapeti ca, tasmā “dhammo”ti vuccati. Pabhedato pana yo koci phalanibbattako hetu ariyamaggo bhāsitam kusalam akusalanti pañcavidhoti veditabbo, tam dhammam paccavekkhantassa tasmim dhamme pabhedagatam ñānam **dhammapaṭisambhidā**.

Atthadhammaniruttābhilāpe ñānanti tasmim atthe ca dhamme ca sabhāvaniruttisaddam ārammaṇam katvā paccavekkhantassa tasmim sabhāvaniruttiābhilāpe pabhedagatam ñānam. Evamayam niruttipaṭisambhidā saddārammaṇā nāma jātā, na paññattiārammaṇā. Kasmā? Yasmā saddam sutvā “ayam sabhāvanirutti, ayam na sabhāvanirutti”ti pajānāti. Paṭisambhidāpatto hi “phasso”ti vutte “ayam sabhāvanirutti”ti jānāti, “phassa”ti vā “phassa”nti vā vutte “ayam na sabhāvanirutti”ti jānāti. Vedanādīsupi eseva nayo. Ayam panesa nāmākhyātopasaggābyayapadampi jānātiyeva sabhāvaniruttiyā yāthāvato jānanato. **Ñānesu ñānanti** sabbatthakañānam ārammaṇam katvā paccavekkhantassa pabhedagatam ñānam.

Imā pana catasso paṭisambhidā sekkhabhūmiyam asekkhabhūmiyanti dvīsu thānesu pabhedam gacchanti. Adhigamo pariyatti savanam paripucchā pubbayogoti imehi pañcahi kāraṇehi visadā honti. **Adhigamo** nāma saccappaṭivedho. **Pariyatti** nāma buddhavacanam. Tañhi gaṇhantassa paṭisambhidā visadā honti. **Savanam** nāma dhammassavanam. Sakkaccaṃ dhammam suṇantassapi hi paṭisambhidā visadā honti. **Paripucchā** nāma aṭṭhakathā. Uggahitapāliya attham kathentassapi hi paṭisambhidā visadā

honti. **Pubbayogo** nāma pubbayogāvacaratā. Haraṇapaccāharaṇanayena paṭipākatakkammaṭṭhānassapi paṭisambhidā visadā hontīti. **Lokiyalokuttarā** vāti ettha tisso paṭisambhidā lokiyā, atthapaṭisambhidā siyā lokiyā, siyā lokuttarāti evaṃ vibhajivā attho veditabbo.

Buddhuppādeyevāti avadhāraṇena buddhuppāde eva labbhanato, abuddhuppāde alabbhanato anaññasādhāraṇo paṭivedho adhippeto. Evañca katvā “mahato cakkhussā”tiādīsu paññamahattādikampi anaññasādhāraṇameva adhippetanti daṭṭhabbaṃ. Tathā vijjāvimuttiphalasacchikiriyādayopi paresaṃ tabbhāvāvahā daṭṭhabbā. Yā kāci dhātuyo lokiyā lokuttarā vā, sabbā tā imāheva saṅgahitā, ettheva antogadhāti vuttaṃ – “**imāva aṭṭhārasa dhātuyo nānāsabhāvato nānādhātuyo**”ti. Svāyamatto anekadhātunānādhātuñānavibhaṅgena (vibha. 751) dīpetabbo. “Sacchikiriyā”ti vuttattā “**vijjāti phale ñāṇa**”nti vuttaṃ.

187. Yasmā cakkati aparāparaṃ parivattatīti **cakkaṃ**, tasmā iriyāpathāpi aparāparaṃ parivattanaṭṭhena cakkasadiṣṭā **cakkanti** vuttā, tathā patirūpadesavāsādisampattiyo. **Tato paṭṭhāya dhammacakkaṃ abhinīharati nāmāti** ettha tadā mahāsatto attānaṃ abhinīhārayogaṃ karonto “dhammacakkaṃ abhinīharati nāmā”ti vutto tato paṭṭhāya dhammacakkābhinīhāravibandhakaradhammānuppajjanato. **Abhinīhaṭṭaṃ nāmāti** etthapi ayameva nayo. **Arahattamaggaṃ paṭivijjhantopi dhammacakkaṃ uppādetiyeva nāma** tadatthaṃ ñāṇaṃ paripācētīti katvā. **Arahattaphalakkhaṇe dhammacakkaṃ uppāditaṃ nāma** tasmīṃ khaṇe dhammacakkassa uppādanāya kātabbakiccassa kassaci abhāvā. Paṭivedhañāṇaṇhi idha “dhammacakka”nti adhippetam. Idāni desanāññāvasena dhammacakkaṃ dassetuṃ – “**kadā pavatteti nāmā**”tiādīmāha. Na kevalaṃ therasseva, atha kho sabbesampi sāsānikānaṃ dhammakathā bhagavato dhammadesanā catunnaṃ ariyasaccānaṃ catunnañca ekattādinayānaṃ avirādhanatoti dassetuṃ – “**yo hi koci bhikkhu vā**”tiādi āradhamaṃ. Sesaṃ suviññeyyameva.

Ekapuggalavaggaṇṇanā niṭṭhitā.

14. Etadaggavaggo

(14) 1. Paṭhamaetadaggavaggo

Etadaggapadavaṇṇanā

188. Etadaggesu paṭhamavaggaṃ paṭhame **ādimhi diṣṭatīti** ettha aggasaddoti ānetvā yojetabbaṃ. **Ajjaṭṭaggeti** ajjadivasamaṃ ādiṃ katvāti attho. **Aṅgulaggenāti** aṅgulikoṭiyā. **Ambilagganti** ambulakoṭṭhāso. **Koṭibhūtāti** paramakoṭibhūtā tasmīṃ ṭhāne tādisānaṃ aññesaṃ abhāvato. Tato eva **seṭṭhabhūtātipi aggā**. **Etadaggasannikkhepoti** etdagge ṭhapanamaṃ aṭṭhuppattiādīhi catūhipi kāraṇehi. Mahāpaññatāya therena etadaggaṭṭhānassa laddhabhāvaṃ vitthārato dassetuṃ – “**katha**”ntiādīmāha. **Dve padantarānīti** kaṇḍambamūle yugandharapabbateti dvīsu ṭhānesu dve padāni dassetvā. **Muṇḍapīṭhakanti** yaṃ sattaṅgaṃ pañcaṅgaṃ vā na hoti, kevalaṃ muṇḍakapīṭhaṃ, taṃ sandhāyetaṃ vuttaṃ. **Avattharivā nisīdīti** buddhānubhāvena ajjhottharivā nisīdi. Tenāha – “**evaṃ nisīdanto**”tiādi. **Kāyasakkaṃ katvāti** nāmakāyena desanāya sampaṭicchanavasena sakkhibhūtaṃ katvā. **Kusalā dhammā akusalā dhammā abyākatā dhammāti iti**-saddo ādyattho, tena sabbaṃ abhidhammadesanaṃ saṅgaṇhāti.

Pāṭihāriyaṭṭhāneti yamakapāṭihāriyassa kataṭṭhāne. **Passathāti** tesamaṃ bahubhāvaṃ sandhāya vuttaṃ. **Assāti** manussasamūhassa ekabhāvaṃ. **Ākappanti** ākāraṃ. **Mahājanoti** sadevake loke sabbo mahājano. Yathā nirayadassanaṃ saṃvegajananatthaṃ, evaṃ devalokadassanaṃ saṃvegajananatthameva “anupubbikathāyaṃ saggakathā viya evaṃ sabbasampattisamupetopi saggo anicco addhuvo cavanadhammo”ti. **Sajjetvāti** samapaṇṇāsāya mucchanāhi yathā kāmena nivādetuṃ sakkā, evaṃ sajjetvā.

Puthujjanapañcakaṃ pañhanti puthujjanapañhaṃ ādiṃ katvā pavattitaṃ khīṇāsavapañhāpariyantaṃ pañhapañcakaṃ. **Paṭhamaṃ...pe... pucchīti** puthujjanavisaye pañhaṃ pucchi. Paṭisambhidā yathābhinīhāraṃ yathāsakaṃ vipassanābhinīhārena paṭhamabhūmiyādayo viya pavattitavisayāti vuttaṃ –

“**te attano attano paṭisambhidāvisaye ṭhatvā kathayiṃsū**”ti. **Buddhavisaye pañhaṃ pucchīti** –

“Ye ca saṅkhātadhammāse, ye ca sekhā puthū idha;
Tesaṃ me nipako iriyaṃ, puṭṭho pabrūhi mārisā”ti. (su. ni. 1044) –

Idaṃ pañhaṃ pucchi. Tattha **saṅkhātadhammāti** saṅkhātā ñātā catusaccadhammā, ye ca saṅkhātadhammā catūhi maggehi paṭividdhacatusaccadhammāti attho. Iminā asekkhā kathitā. Puthu-saddo ubhayatthapi yojetabbo “ye puthū saṅkhātadhammā, ye ca puthū sekhā”ti. **Tesanti** tesaṃ dvinnaṃ sekkhāsekkhapuggalānaṃ me puṭṭhoti yojetabbaṃ, mayā puṭṭhoti attho. **Iriyanti** sekkhāsekkhabhūmiyā āgamanappaṭipadaṃ. Iriyati gacchati sekkhabhūmiṃ asekkhabhūmiṃca etāyāti iriyā, taṃ tesaṃ iriyaṃ āgamanappaṭipadaṃ mayā puṭṭho pabrūhi kathehīti attho. Evaṃ bhagavā buddhavisaye pañhaṃ pucchitvā “imassa nu kho, sārīputta, saṃkhittena bhāsītassa kathaṃ vitthārena attho daṭṭhabbo”ti āha. Thero pañhaṃ oloketvā “sathā maṃ sekkhāsekkhānaṃ bhikkhūnaṃ āgamanappaṭipadaṃ pucchati”ti pañhe nikkakho hutvā “āgamanappaṭipadā nāma khandhādivasena bahūhipi mukhehi sakkā kathetuṃ, katarākārena nu kho kathento satthu ajjhāsayaṃ gaṇhituṃ sakkhissāmi”ti ajjhāsayaṃ kaṅkhi, taṃ sandhāyetaṃ vuttaṃ – “**dhammasenāpati...pe... na sakkoti**”ti. Pucchitapañhaṃ vissajjētuṃ paṭibhāne asati disāvīlokanāṃ sattānaṃ sabhāvoti dassento, “**puratthima...pe... nāsakkhi**”ti āha. Tattha **pañhuppattiṭṭhānanti** pañhuppattikāraṇaṃ.

Therassa kilamanabhāvaṃ jānitvāti “sārīputto pañhe nikkakho, ajjhāsayaṃ me kaṅkhamāno kilamati”ti therassa kilamanabhāvaṃ ñatvā. **Catumahābhūtikakāyapariggahanti** etena khandhamukhena nāmarūpariggaho vutto. “**Bhūtamidanti, sārīputta, samanupassasi**”ti hi vadantena bhagavatā khandhavasena nāmarūpariggaho dassito. Evaṃ kirassa bhagavato ahosi “sārīputto mayā naye adinne kathetuṃ na sakkhissati, dinne pana naye mama ajjhāsayaṃ gahetvā khandhavasena kathessati”ti. Therassa saha nayadānena so pañho nayasatena nayasahassena upaṭṭhāsi. Tenāha – “**aññātaṃ bhagavā, aññātaṃ sugatā**”ti.

Arūpāvacare paṭisandhi nāma na hotīti bodhisambhārasambharaṇassa anokāsabhāvato vuttaṃ. Tenāha – “**abhabbaṭṭhānattā**”ti, laddhabyākaraṇānaṃ bodhisattānaṃ uppattiyā abhabbadesattāti attho. **Rūpāvacare nibbatīti** kammavāsītāsambhavato arūpāvacare anibbattitvā rūpāvacare nibbati.

Parosahassantiādinā parosahassajātaṃ dasseti. Tattha **parosahassampīti** atirekasahassampi. **Samāgatānanti** sannipatitānaṃ bhāsītassa atthaṃ jānitūṃ asakkontānaṃ bālānaṃ. **Kandeyyūṃ te vassasataṃ apaññāti** te evaṃ samāgatā apaññā ime bālattā sasā viya vassasatampi vassasahassampi rodeyyūṃ parideveyyūṃ. Rodamānāpi pana atthaṃ vā kāraṇaṃ vā neva jāneyyunti dīpeti. **Ekova seyyo puriso sapaññoti** evarūpānaṃ bālānaṃ parosahassatopi eko paṇḍitapurisova seyyo varataroti attho. Kīdiso sapaññoti āha – “**yo bhāsītassa vijānāti attha**”nti, ayaṃ jeṭṭhantevāsiko viya yo bhāsītassa atthaṃ jānāti, so tādiso sapañño varataroti attho. Dutiye parosatajātake **jhāyeyyunti** yāthāvato atthaṃ jānitūṃ samāhitā hutvā cinteyyūṃ. Sesamettha vuttanayameva.

Tatiyajātake **ye saññīnoti** ṭhapetvā nevasaññānāsaññāyatanalābhino avasesacittakasatte dasseti. **Tepi duggatāti** tassā nevasaññānāsaññāyatanasamāpattiyā alābhato tepi duggatā dukkhaṃ upagatā saññībhave. “Saññā rogo saññā gaṇḍo saññā salla”nti (ma. ni. 3.24) hi te saññāya ādīnavadassino. **Yepi asaññīnoti** asaññībhave nibbatte acittakasatte dasseti. Tepi imissāyeva samāpattiyā alābhato duggatāyeva. Jhānasukhaṃ **anaṅgaṇaṃ** niddosaṃ yathāvuttadosābhāvato. Balavacittekkaggatāsabhāvenapi taṃ anaṅgaṇaṃ nāma jātaṃ. **Nevasaññī nāsaññīti āhāti** atīte kira bārāṇasiyaṃ brahmadatte rajjaṃ kārente bodhisatto araññāyatane kālaṃ karonto antevāsikehi puṭṭho “nevasaññī nāsaññī”ti āha. Purimajātake vuttanayeneva tāpasā jeṭṭhantevāsikassa kathaṃ na gaṇhiṃsu. Bodhisatto ābhassarato āgantvā ākāse ṭhatvā imaṃ gāthamāha. Tena vuttaṃ – “**sesaṃ vuttanayeneva veditabba**”nti.

Catutthajātake (jā. 1.1.135) candassa viya ābhā etassāti **candābhaṃ**, odātakasiṇaṃ. **Sūriyābhanti** sūriyassa viya ābhā etassāti sūriyābhaṃ, pītakasiṇaṃ. **Yodha paññāya gādhātīti** yo puggalo idha sattaloke

idam kasiṇadvayaṃ paññāya gādhati, ārammaṇaṃ katvā anuppavisati, tattha vā patiṭṭhahati. **Avitakkena dutiyajjhānena ābhassarūpago hotīti** so puggalo tathā katvā paṭiladdhena dutiyena jhānena ābhassarabrahmalokūpago hoti. **Sesaṃ purimanayeneva veditabbanti** iminā imaṃ dasseti (jā. aṭṭha. 1.1.135 candābhajātakavaṇṇanā) – atīte bārāṇasiyaṃ brahmadatte rajjaṃ kārente bodhisatto araññāyatane kālaṃ karonto antevāsikehi pucchito “candābhaṃ sūriyābha”nti vatvā ābhassare nibbato. Tāpasā jeṭṭhantevāsikassa na saddahiṃsu. Bodhisatto āgantvā ākāse ṭhito imaṃ gāthaṃ abhāsi.

Pañcamajātake **āsīsethevāti** āsācchedaṃ akatvā attano kammesu āsaṃ kareyyeva. **Na nibbindeyyāti** na nibbedāṃ uppādeyya, na ukkaṇṭheyyāti attho. **Voti** nipātamattaṃ. **Yathā icchinti** ahañhi saṭṭhihatthā narakā uṭṭhānaṃ icchiṃ, somhi tatheva jāto, tato uṭṭhitoyevāti dīpeti.

Atīte (jā. aṭṭha. 4.13.sarabhamigajātakavaṇṇanā) kira bārāṇasiyaṃ brahmadatte rajjaṃ kārente bodhisatto sarabhamigayoniyaṃ nibbattitvā araññe paṭivasati. Rājā migavittako ahosi thāmasampanno. Ekadivasāṃ gantvā amacce āha – “yassa passena migo palāyati, teneva so dātabbo”ti. Athekadivasāṃ sarabhamigo uṭṭhāya rañño ṭhitaṭṭhānena palāyi. Atha naṃ amaccā uppaṇḍesuṃ. Rājā cintesi – “ime maṃ parihāsanti, mama pamāṇaṃ na jānanti”ti gālhaṃ nivāsetvā pattikova khaggaṃ ādāya “sarabhaṃ gaṇhissāmi”ti vegena pakkhandi. Atha naṃ disvā tīṇi yojanāni anubandhi. Sarabho araññaṃ pāvīsi. Rājāpi pāvīsiyeva. Tattha sarabhamigassa gamanamagge saṭṭhihatthamatto mahāpūtipātanaṃ āvāto atthi, so tiṃsahatthamattaṃ udakena puṇṇo tiṇehi ca paṭicchanno. Sarabho udakagandhaṃ ghāyitvā āvāṭabhāvaṃ ṇatvā thokaṃ osakkivā gato. Rājā pana ujukameva āgacchanto tasmīṃ pati.

Sarabho tassa padasaddaṃ asuṇanto nivattitvā taṃ apassanto “naraṅkāvāṭe patito bhavissati”ti ṇatvā āgantvā olokeno taṃ gambhīre udake appatiṭṭhe kilamantaṃ disvā tena katāparādhaṃ hadaye akatvā sañjātakāruñño “mā mayi passante varāko nassatu, imahā taṃ dukkhā mocessāmi”ti āvāṭatīre ṭhito “mā bhāyi, mahārāja, ahaṃ taṃ dukkhā mocessāmi”ti vatvā attano piyaputtaṃ uddharitum ussāhaṃ karonto viya tassuddharaṇatthāya silāya yoggaṃ katvā “vijjhissāmi”ti āgataṃ rājānaṃ saṭṭhihatthā narakā uddharitvā assāsetvā piṭṭhiṃ āropetvā araññaṃ nīharitvā senāya avidūre otāretvā ovādamassa datvā pañcasu sīlesu patiṭṭhāpesi. Rājā senaṅgaparivuto nagaraṃ gantvā “ito paṭṭhāya sakalapaṭṭhāvāsino pañca sīlāni rakkhantū”ti dhammabheriṃ carāpesi. Mahāsattena pana attano kataggaṃ kassaci akathetvā sāyaṃ nānaggarasabhojanaṃ bhuñjītvā alaṅkatasayane sayitvā paccūsakāle mahāsattassa guṇaṃ saritvā uṭṭhāya sayanapiṭṭhe pallānkena nisīditvā pītipuṇṇena hadayena udānaṃ udānento “āsīsetheva puriso”tiādīnā imā cha gāthā abhāsi.

Tattha **ahitā hitā cāti** dukkhaphassā sukhaphassā ca, maraṇaphassā, jīvitaphassātipi attho. Sattānañhi maraṇaphasso ahito, jīvitaphasso hito. Tesāṃ acintito maraṇaphasso āgacchatīti dasseti. **Acintitampīti** mayā “āvāṭe patissāmi”ti na cintitaṃ, “sarabhaṃ māressāmi”ti **cintitaṃ**. Idāni pana me cintitaṃ naṭṭhaṃ, acintitameva jātanti udānavasena vadati. **Bhogāti** yasaparivārā, ete cintāmayā na honti. Tasmā ṇāṇavatā vīriyameva kātabbanti vadati. Vīriyavato hi acintitampi hotiyeva.

Tassetāṃ udānaṃ udānentasseva aruṇaṃ uṭṭhahi. Purohito pātova sukhasēyapucchanaṭṭhaṃ āgantvā dvāre ṭhito tassa udānagītasaddaṃ sutvā cintesi – “rājā hiyyo migavaṃ agamāsi, tattha sarabhamigaṃ viddho bhavissati, tena maññe udānaṃ udāneti”ti. Evaṃ brāhmaṇassa rañño paripuṇṇabyañjanaṃ udānaṃ sutvā sumajjite ādāse mukhaṃ oloketassa chāyā viya raññaṃ ca sarabhena ca katakāraṇaṃ pākāṭaṃ ahosi, so nakhaggena dvāraṃ ākoṭesi. Rājā “ko eso”ti pucchi. Ahaṃ, deva, purohitoti. Athassa dvāraṃ vivaritvā “ito ehācariyā”ti āha. So pavisitvā rājānaṃ jayāpetvā ekamantaṃ ṭhito “ahaṃ, mahārāja, tayā araññe katakāraṇaṃ jānāmi, tvaṃ ekaṃ sarabhamigaṃ anubandhanto narake patito, atha naṃ so sarabho silāya yoggaṃ katvā narakato uddhari, so tvaṃ tassa guṇaṃ saritvā udānaṃ udānesi”ti vatvā “**sarabhaṃ giriduggasmi**”ntiādīnā dve gāthā abhāsi.

Tattha **anusarīti** anubandhi. **Vikkantanti** uddharaṇatthāya kataparakkamaṃ. **Anujīvasīti** upajīvasi, tassānubhāvena tayā jīvitaṃ laddhanti attho. **Samuddharīti** uddharaṇaṃ akāsi. **Silāya yoggaṃ sarabho karitvāti** silāya sopānasadisāya narakato uddharaṇayoggaṃ karitvā. **Alīnacittanti** saṅkocaṃ appattacittaṃ. **Ta miggaṃ vadesīti** suvaṇṇasarabhamigaṃ idha sirisayane nipanno vaṇṇesi. Taṃ sutvā rājā,

“ayaṃ mayā saddhiṃ na migavaṃ āgato, sabbañca pavattiṃ jānāti, kathaṃ nu kho jānāti, pucchissāmi na”nti cintetvā – “**kiṃ tvaṃ nu tatthevā**”ti navamaḡāthamāha. Tattha **bhimsarūpanti** kiṃ nu te ñāṇaṃ balavajātikaṃ, tenetaṃ jānāsīti vadati. Brāhmaṇo “nāhaṃ sabbaññubuddho, byañjanaṃ amakkhetvā tayā kathitagāthāya pana mayhaṃ attho upaṭṭhātī”ti dīpento “**na cevaha**”nti dasamaḡāthamāha. Tattha **subhāsītānanti** byañjanaṃ amakkhetvā suṭṭhu bhāsītānaṃ. **Atthaṃ tadānentīti** yo tesāṃ attho, taṃ ānenti upadhārentīti attho. Tadā purohito dhammasenāpati ahoṣi. Tenevāha – “**atītepi**”tiādi. Sesāṃ uttānatthameva.

Aññāsikoṇḍaññattheravatthu

Aññāsikoṇḍaññattherādayotiādīsu pana **yāthāvasarasaguṇavasena**ti yathāsabhāvaguṇavasena. Pabbajjāvasena paṭivedhavasena suciraṃ sunipuṇaṃ rattindīvaparicchedajānānavasena ca rattaññutā veditabbāti taṃ dassento “**ṭhapetvā hi sammāsambuddha**”ntiādimāha. **Pākaṭova hotīti** satipaññāvepullappattiko pākaṭo vibhūto hoti. **Aññāsikoṇḍaññoti** sāvakesu sabbapaṭhamaṃ cattāri ariyasaccāni ñātakoṇḍañño. **Sabbesupi etadaggesūti** sabbesupi etadaggasuttesu, sabbesu vā etadaggaṭṭhapanesu.

Dhurapattānīti pattānaṃ pamukhabhūtāni bāhirapattāni. **Navutihatthānīti** majjhimapurisassa hatthena navutiratanāni. Padumeneva taṃ taṃ padesaṃ uttarati atikkamatīti **padumuttaro**, bhagavā. **Gandhadāmamālādāmādīhīti** ādisaddena pattadāmādiṃ saṅgaṇhāti. Tattha gandhadāmehi katamālā **gandhadāmaṃ**. Lavaṅgatakkolajātipupphādīhi katamālā **mālādāmaṃ**. Tamālapattādīhi katamālā **pattadāmaṃ**. **Vaṅgapaṭṭeti** vaṅgadese uppannaghanasukhumavatthe. **Uttamasukhumavatthanti** kāsikavatthamāha.

Teparivaṭṭadhammacakkappavattanasuttantapariyosāneti ettha “idaṃ dukkhaṃ ariyasacca”ntiādinā saccavasena, “dukkhaṃ ariyasaccaṃ pariññeyya”ntiādinā kiccavasena, “dukkhaṃ ariyasaccaṃ pariññāta”ntiādinā katavasena ca tīhi ākārehi parivaṭṭetvā catunnaṃ saccānaṃ desitattā tayo parivaṭṭā etassa atthīti tiparivaṭṭaṃ, tiparivaṭṭameva te parivaṭṭaṃ, te parivaṭṭaṃca taṃ dhammacakkappavattanañcāti **teparivaṭṭadhammacakkappavattanaṃ**, tadeva suttantaṃ, tassa pariyosāneti attho.

Sāligabbhaṃ phāletvā ādāyāti sāligabbhaṃ phāletvā tattha labbhamānaṃ sālikhīraraṣaṃ ādāya. **Anucchavikanti** buddhānaṃ anucchavikaṃ khīrapāyasaṃ pacāpema. Veṇiyo purisabhāvavasena bandhitvā kalāpakaraṇe **kalāpaggamaṃ**. Khale kalāpānaṃ ṭhapanadivase **khalaggamaṃ**. Madditvā vīhīnaṃ rāsikaraṇadivase **khalabhaṅḍaggamaṃ**. Koṭṭhesu hi dhaññassa pakkhipanadivase **koṭṭhaggamaṃ**.

Dve gatiyoti dve eva nipphattiyo, dve niṭṭhāti attho. **Tasmiṃ kumāre sabbaññutaṃ patteti** koṇḍaññamānavasaveva laddhiyaṃ ṭhatvā itarepi cha janā putte anusāsimsu. Bodhirukkhamūle pācīnapassaṃ **acalaṭṭhānaṃ** nāma, yaṃ “vajirāsana”ntipi vuccati. Mahataṃ mahatiyo vahatīti “pācīnamukho”ti avatvā “**pācīnalokadhātuabhimukho**”ti vuttaṃ. Maṃsacakkhupi lokanāthassa appaṭighātaṃ mahāvisayañcāti. **Caturaṅgasamannāgatanti** “kāmaṃ taco ca nhāru ca, aṭṭhi ca avasissatū”tiādinā (ma. ni. 2.184; saṃ. ni. 2.22, 237; a. ni. 2.5; mahāni. 196) vuttacaturaṅgasamannāgataṃ.

Idaṃ pana sabbamevāti “kassa nu kho ahaṃ paṭhamaṃ dhammaṃ desessāmi”tiādinayappavattaṃ (ma. ni. 1.284; 2.341; mahāva. 10) sabbameva. **Parivitakkamattameva** tathā atthasiddhiyā abhāvato. **Pupphitaphalitaṃ katvāti** abhiññāpaṭisambhidāhi sabbapāliphullaṃ, maggaphalehi sabbaso phalabhārabharitaṃca karonto pupphitaṃ phalitaṃ katvā. **Apakkamitukāmo hutvāti** dvepi aggasāvake attano nipaccakāraṃ karonte disvā tesāṃ guṇātirekataṃ bahu maññanto buddhānaṃ santikā apakkamitukāmo hutvā. **Tatthevāti** chaddantadahaṭṭireyeva.

Sāriputta-moggallānattheravatthu

189-190. Dutiyatatiyesu **iddhimantānanti** ettha **manta**-saddo atisayatthavisayoti therassa atisayikaiddhitam dassetuṃ – “**iddhiyā sampannāna**”nti vuttaṃ. Saha paṃsūhi kīlīmsūti **sahapaṃsukūlitā**. **Idhalokattabhāvamevāti** diṭṭhadhammikaattabhāvameva. **Soḷasa paññā paṭivijjhivā ʃhitoti** majjhimānikāye **anupadasuttantadesanāya** “mahāpañño, bhikkhave, sāriputto, puthupañño, bhikkhave, sāriputto, hāsapañño, bhikkhave, sāriputto, javanapañño, bhikkhave, sāriputto, tikkhapañño, bhikkhave, sāriputto, nibbedhikapañño, bhikkhave, sāriputto”ti (ma. ni. 3.93) evamāgatā mahāpaññādikā cha, tasmimyeva sutte āgatā navānupubbavīhārasamāpattipaññā, arahattamaggapaññāti imā soḷasavidhā paññā paṭivijjhivā sacchikatvā ʃhito.

Pañhasākacchanti pañhassa pucchanavasena vissajjanavasena ca sākacchaṃ karoti. **Atthikehi upaññātaṃ magganti** etaṃ anubandhanassa kāraṇavacanaṃ. Idañhi vuttaṃ hoti – yaṃnūnāhaṃ imaṃ bhikkhuṃ piṭṭhito piṭṭhito anubandheyyaṃ. Kasmā? Yasmā idaṃ piṭṭhito piṭṭhito anubandhanaṃ nāma atthikehi upaññātaṃ maggaṃ, ñāto ceva upagato ca maggoti attho. Atha vā atthikehi amhehi maraṇe sati amatenapi bhavitabbanti evaṃ kevalaṃ atthīti upaññātaṃ, anumānaññaṇena upagantvā ñātaṃ nibbānaṃ nāma atthi, taṃ magganto pariyesantoti evampettha attho daṭṭhabbo.

Nesaṃ parisāyāti dvinnāṃ aggasāvakaṇaṃ parivārabhūtaparisāya. **Dve aggasāvake**ti sāriputtamoggallāne dve mahānubhāve sāvake. **Ṭhānantare**ti aggasāvakattasaññite ṭhānantare ʃhapesi. Kasmā panettha “aggasāvake”ti avatvā “mahāsāvake”ti vuttaṃ. Yadi aññepi mahātherā abhiññātādiguṇavisesayogena “mahāsāvaka”ti vattabbaṃ labhanti, imeyeva pana sāvakesu anaññasādhāraṇabhūtā visesato “mahāsāvaka”ti vattabāti dassanattaṃ “**dvepi mahāsāvake**”ti vuttaṃ.

Mahākassapattheravatthu

191. Catutthe yasmā dhutavādadhutadhammadhutaṅgāni dhutamūlakāni, tasmā “**dhuto veditabbo**”ti āradhaṃ, tattha kilese dhuni dhutavāti **dhuto**, dhutakileso puggalo, kilesadhunano vā dhammo, **kilesadhunano dhammoti** ca sapubbabhāgo ariyamaggo daṭṭhabbo. Taṃ dhutasaññitaṃ kilesadhunanadhammaṃ vadati, pare tattha paṭiṭṭhāpetīti **dhutavādo**. Catukkañcetta sambhavatīti taṃ dassetuṃ – “**ettha panā**”tiādi āradhaṃ. **Tayidanti** nipāto, tassa so ayanti attho. Dhutabhūtassa dhutabhūtā dhammā **dhutadhammā**. **Appicchatā santuṭṭhitā** heṭṭhā vuttā eva. Kilese sammā likhati tacchatīti sallekho, kilesajegucchī, tassa bhāvo **sallekhatā**. Dvīhipi kāmehi viviccatīti paviveko, yonisomanasikārabahulo puggalo, tassa bhāvo **pavivekatā**. Iminā sarīraṭṭhapanamattena atthīti idamaṭṭhi ttha-kārassa tṭha-kāraṃ katvā, tassa bhāvo **idamaṭṭhitā**, imehi vā kusaladhammehi atthi idamaṭṭhi, yena ñāṇena “pabbajitena nāma paṃsukūlikaṅgādīsu paṭiṭṭhitena bhavitabba”nti yathānusiṭṭhaṃ dhutaguṇe samādiyati ceva pariharati ca, taṃ ñāṇaṃ **idamaṭṭhitā**. Tenāha – “**idamaṭṭhitā ñāṇamevā**”ti. **Dhutadhammā nāmāti** dhutaṅgasevanāya paṭipakkhabhūtānaṃ pāpadhammānaṃ dhunanavasena pavattiyā dhutoti laddhanāmāya dhutaṅgacetanāya upakārakā dhammāti katvā dhutadhammā nāma. **Anupatantīti** tadantogadhā tappariyāpanā honti tadubhayasseva pavattivisesabhāvato. **Paṭikkhepavatthūsūti** dhutaṅgasevanāya paṭikkhipitabbavatthūsu pahātabbavatthūsu.

Paṃsukūlikaṅgaṃ...pe... nesajjikaṅganti uddesopi peyyālanayena dassito. Yadettha vattabbaṃ, taṃ sabbaṃ **visuddhimagge** (visuddhi. 1.22 ādayo) vitthārato vuttaṃ. Dhutavādaggahaṇeneva therassa dhutabhāvopī gahito hotīti “**dhutavādāna**”nteva vuttaṃ. **Ayaṃ mahāti** abhinīhārādimaṇṭatāyapi sāsanaṃ upakāritāyapi ayaṃ thero mahā, guṇamahantatāya pasapaṃsāvacaṇameva vā etaṃ therassa yadidaṃ mahākassapoti yathā “mahāmogallāno”ti.

Satthu dhammadesanāya vatthuttaye sañjātappasādatāya upāsakabhāve ʃhitattā vuttaṃ – “**uposathaṅgāni adhiṭṭhāyā**”tiādi. Etassa aggabhāvassatīti yojetabbaṃ. **Saccakāroti** saccabhāvāvaho kāro, avisaṃvādanavasena vā tadatthasāadhanoti attho. **Kolāhalanti** kutūhalavipphāro. Sathā sattame sattame saṃvacchare dhammaṃ kathento sattānaṃ savanayoggaṃ kālaṃ sallakkhento divā sāyanhasamayāṃ katheti, rattiyaṃ sakalayāmaṃ. Tenāha – “**brāhmaṇo brāhmaṇe āha** – **‘bhoti kiṃ rattim dhammaṃ suṇissasi divā**”ti. **Vissāsikoti** vissāsikabhāvo. “Tato paṭṭhāya so”ti vā pāṭho.

Dve asaṅkhyeyyāni pūritapāramissāti idaṃ sā paramparāya sotapatitaṃ atthaṃ gahetvā āha. **Adinnavipākassāti** avipakkavipākassa. **Bhaddake kāleti** yutte kāle. **Nakkhattanti** nakkhattena lakkhitaṃ chaṇaṃ. Tasmaṃ tasmañhi nakkhatte anubhavitabbachaṇāni nakkhattāni nāma, itarāni pana chaṇāni nāma. Sammāpatitadukkhato vimocanena tato niyyānāvahatāya icchitattassa labhāpanato ca **niyyānikaṃ**. **Tesanti** suvaṇṇapadumānaṃ. **Olambakāti** suvaṇṇaratanavicittā ratanadāmā. **Puññāniyāmenāti** puññānubhāvasiddhena niyāmena. Svassa bārāṇasirajjaṃ dātuṃ katokāso. **Phussarathanti** maṅgalarathaṃ. Setacchattaṃhīsavālabījanikhaggamaṇipādukāni **pañcavidhaṃ rājakakudhabhaṇḍanti** vadanti. Idha pana setacchattaṃ visuṃ gahitanti sīhāsaṃ pañcamāṃ katvā vadanti. **Pārupanakaṇṇanti** pārupanavatthassa dasantaṃ. Dibbavatthadāyipuññānubhāvacodito “**nanu tātā thūla**”nti āha. **Aho tapassīti** aho kapaṇo ahaṃ rājāti attho. **Buddhānaṃ saddahitvāti** buddhānaṃ sāsanaṃ saddahitvā. **Caṅkamanasātānti iti-saddo** ādyattho. Tena hi aggisālādīni pabbajitasāruppāni ṭhānāni saṅgaṇhāti.

Sādhukīlīnti ariyānaṃ parinibbutaṭṭhāne kātabbasakkāraṃ vadati. **Nappamaḍḍi, nirogā ayyāti** pucchitākāradassanaṃ. **Parinibbutā devāti** devī paṭivacanaṃ adāsī. **Paṭiyādetvāti** niyyātetvā. **Samaṇakapabbajanti** samitapāpehi ariyehi anuṭṭhātabbapabbajjaṃ. So hi rājā paccekabuddhānaṃ vesassa diṭṭhattā “**idameva bhaddaka**”nti tādisaṃyeva liṅgaṃ gaṇhi. **Tatthevāti** brahmaloke eva. Vīsati vasse sampatteti āharitvā sambandho. Brahmalo kato cavitvā nibbattatā, brahmacariyādhikāraṃ ca cirakālasambhūtattā “**evarūpaṃ kathaṃ mā kathethā**”ti āha. Vīsati dharaṇāni **nikkhanti** vadanti, pañcapalaṃ **nikkhanti** apare. **Itthākaroti** itthiratanassa uppattiṭṭhānaṃ. **Ayyadhītāti** amhākaṃ ayyassa dhītā, bhaddakāpilānti attho. **Samānapaṇṇanti** sadisapaṇṇaṃ sadisalekhaṃ kumārassa kumārikāya ca yuttaṃ paṇṇalekhaṃ. Te purisā samāgataṭṭhānato magadharaṭṭhe mahātitthagāmaṃ maddaraṭṭhe sāgalanagaraṇca uddissa apakkamantā aññamaññaṃ vissajjantā nāma hontīti “**ito ca etto ca pesesu**”nti vuttā.

Pupphadāmanti hatthihattappamānaṃ pupphadāmaṃ. **Tānti** tāni ubho ganthāpitāni dve pupphadāmāni. **Teti** ubho bhaddā ceva pippalikumāro ca. **Lokāmisenāti** kāmassādena. **Asaṃsaṭṭhāti** na saṃyuttā ghaṭe jalantena viya padīpena ajjhāsāya samujjalantena vimokkhabījena samussāhitacittattā. **Yantabaddhānti** sassasampādanatthaṃ tattha tattha dvārakavāṭayojanavasena baddhāni nikkhamaṇatumbāni. **Kammantoti** kasikammakaraṇaṭṭhānaṃ. **Dāsikagāmāti** dāsānaṃ vasanaḅgāmā. **Osāretvāti** pakkhipitvā. **Ākappakuttavasenaṇti** ākāravasena kiriyāvasena. **Ananucchavikanti** pabbajitabhāvassa ananurūpaṃ. **Tassa matthaketi** dvedhāpathassa dvidhābhūtaṭṭhāne. Etesaṃ saṅgahaṃ kātuṃ vaṭṭatīti nisīdatīti sambandho. Sā pana tattha satthu nisajjā edisīti dassetuṃ – “**nisīdanto panā**”tiādi vuttaṃ. Tattha yā buddhānaṃ aparimitakālasambhūtācinteyyāpariññeyyapuññasambhārūpacayanibbattā rūpappabhāvabuddhaguṇavijjotitā dvattiṃsamahāpurisalakkhaṇaasīti anubyañjanasamujjalitā byāmappabhāketumālālaṅkatā sabhāvasiddhitāya akittimā rūpakāyasirī, taṃyeva mahākassapassa adiṭṭhapubbappasādasamaṃvaddhanatthaṃ aniggūhitvā nisīno bhagavā “**buddhavesaṃ gahetvā...pe... nisīdi**”ti vutto. Asīti hatthappadesaṃ byāpetvā pavattiyā **asīti hatthāti** vuttā. **Satasākhoti** bahusākho anekasākho. **Suvaṇṇavaṇṇova ahoṇi** nirantaraṃ buddharasmīhi samantato samokiṇṇabhāvato.

Tīsu ṭhānesūti dūrato nātidūre āsanneti tīsu ṭhānesu. **Tīhi ovādehīti** “tasmātiha te, kassapa, evaṃ sikkhitabbaṃ ‘tibbaṃ me hirottappaṃ paccupaṭṭhitaṃ bhavissati theresu navesu majjhimesū’ti. Evañhi te, kassapa, sikkhitabbaṃ. Tasmātiha te, kassapa, evaṃ sikkhitabbaṃ ‘yaṃ kiñci dhammaṃ suñissāmi kusalūpasamhitāṃ, sabbaṃ taṃ aṭṭhiṃ katvā manasi karitvā sabbaṃ cetasā samannāharitvā ohitasoto dhammaṃ suñissāmi’ti, evañhi te, kassapa, sikkhitabbaṃ. Tasmātiha te, kassapa, evaṃ sikkhitabbaṃ ‘sātasahagatā ca me kāyagatāsati na vijahissatī’ti, evañhi te, kassapa, sikkhitabba’nti (saṃ. ni. 2.154) imehi tīhi ovādehi. Ettha hi bhagavā paṭhamaṃ ovādaṃ therassa brāhmaṇajātikattā jātimānappahānatthamabhāsi, dutiyaṃ bāhusaccaṃ nissāya uppajjanakaahaṃkārapahānattham, tatiyaṃ upadhisampattiṃ nissāya uppajjanakaattasinehappahānattham. **Mudukā kho tyāyanti** mudukā kho te ayaṃ. Kasmā pana bhagavā evamāha? Therena saha cīvaraṃ parivattetukāmatāya. Kasmā parivattetukāmo jātoti? Theram attano ṭhāne ṭhapetukāmatāya. Kiṃ sārīputtamoggallānā natthīti? Atthi, evaṃ panassa ahoṇi “**imena ciram ṭhassanti**, kassapo pana vīsativassasatāyuko, so mayi parinibbute sattapaṇṇiguhāyaṃ vasitvā dhammavinayasaṅgahaṃ katvā mama sāsanaṃ pañcavassasahassaparimāṇakālappavattanakaṃ karissatīti attano ṭhāne ṭhapesi. Evaṃ bhikkhū kassapassa sussūsitabbaṃ maññissanti”ti. Tasmā evamāha.

Candūpamoti candasadiso hutvā. Kiṃ parimaṇḍalatāya? No, apica kho yathā cando gaganatalaṃ pakkhandamāno na kenaci saddhiṃ santhavaṃ vā sinehaṃ vā ālayaṃ vā karoti, na ca na hoti mahājanassa piyo manāpo, ayampi evaṃ kenaci saddhiṃ santhavādīnaṃ akaraṇena bahujaṇassa piyo manāpo candūpamo hutvā khattiyakulādīni cattāri kulāni upasaṅkamatīti attho. **Apakasseva kāyaṃ apakassa cittanti** teneva santhavādīnaṃ akaraṇena kāyaṅca cittaṅca apakaḍḍhitvā, apanetvāti attho. **Niccaṃ navoti** niccanavakova, āgantukasadiso hutvāti attho. Āgantuko hi paṭipāṭiyā sampattagehaṃ pavisitvā sace naṃ gharasāmikā disvā “amhākampi puttabhātarō vippavāsaṃ gantvā evaṃ vicariṃsū”ti anukampamānā nisīdāpetvā bhojenti, bhuttamattoyeva “tumhākaṃ bhājanaṃ gaṇhathā”ti uttāya pakkamati, na tehi saddhiṃ santhavaṃ vā karoti, kiccakaraṇīyāni vā saṃvidahati, evamayampi paṭipāṭiyā sampattaṃ gharaṃ pavisitvā yaṃ iriyāpathe pasannā manussā denti, taṃ gahetvā chinnaśanthavo tesāṃ kiccakaraṇīye abyāvaṭo hutvā nikkhamatīti dīpeti.

Appagabbhoti nappagabbho, aṭṭhaṭṭhānena kāyapāgabbhiyena, catuṭṭhānena vacīpāgabbhiyena, anekāṭṭhānena manopāgabbhiyena ca virahitoti attho. Aṭṭhaṭṭhānaṃ kāyapāgabbhiyaṃ nāma saṅghagaṇapuggalabhojanasālaṅkāraṇaṃ aṭṭhaṭṭhānaṃ kāyapāgabbhiyaṃ nāma saṅghagaṇapuggalaantaragharesu appatirūpakaraṇaṃ. Catuṭṭhānaṃ vacīpāgabbhiyaṃ nāma saṅghagaṇapuggalaantaragharesu appatirūpavācānicchāraṇaṃ. Anekāṭṭhānaṃ manopāgabbhiyaṃ nāma tesu tesu ṭhānesu kāyavācāhi aṭṭhaṭṭhānaṃ anāpajjitvāpi manasā kāmavitakkādīnaṃ vitakkaṇaṃ. Sabbesampi imesaṃ pāgabbhiyānaṃ abhāvena appagabbho hutvā kulāni upasaṅkamatīti attho. Kassapasāmyuttēna ca candūpamappaṭipadāditherassa dhutavādesu aggabhāvassa bodhitattā vuttaṃ “**etadeva kassapasāmyuttaṃ aṭṭhuppattiṃ katvā**”ti.

Anuruddhattheravatthu

192. Pañcame **bhojanapapañcamattanti** gocaragāme piṇḍāya caraṇāhāraparibhogasaññītaṃ bhojanapapañcamattaṃ. **Dīparukkhānanti** lohadantakaṭṭhamayānaṃ mahantānaṃ dīparukkhānaṃ. Lohamayesupi hi tesu dīpādhāresu dīparukkhakāti ruḥhiresā daṭṭhabbā. Olambakadīpamaṇḍaladīpasaṅkaraṇadīpādikā **sesadīpā**.

Anupariyāyi padakkhiṇakaraṇavasena. **Ahaṃ tenāti** yena tuyhaṃ attho, ahaṃ tena pavāremi, tasmā taṃ āharāpetvā gaṇhāti attho. **Suvaṇṇapāṭiyāmyevassa bhattaṃ uppajjīti** devatānubhāvena uppajjīti, na kiñci pacanakkiccaṃ atthi. **Satta mahāpurisavitakke vitakkesīti** “appicchassāyaṃ dhammo, nāyaṃ dhammo mahicchassā”tiādike satta mahāpurisavitakke vitakkesi. **Aṭṭhameti** “nippapañcārāmassāyaṃ dhammo, nāyaṃ dhammo papañcārāmassā”ti etasmiṃ purisavitakke.

Mama saṅkappamaññāyāti “appicchassāyaṃ dhammo, nāyaṃ dhammo mahicchassā”tiādinā (dī. ni. 3.358; a. ni. 8.30) mahāpurisavitakkavasena āradhamattaṃ matthakaṃ pāpetuṃ asamatthabhāvena ṭhitāṃ mama saṅkappaṃ jānitvā. **Manomayenāti** manomayena viya manasā nimmitasadisena, pariṇāmitenāti attho. **Iddhiyāti** “ayaṃ kāyo idaṃ cittaṃ viya hotū”ti evaṃ pavattāya adhiṭṭhānidhiyā.

Yadā me ahu saṅkappoti yasmiṃ kāle mayhaṃ “kīdiso nu kho aṭṭhamo mahāpurisavitakko”ti parivittakko ahosi, yadā me ahu saṅkappo, tato mama saṅkappamaññāya iddhiyā upasaṅkami, uttari desayīti yojanā. **Uttari desayīti** “nippapañcārāmassāyaṃ dhammo nippapañcaratino, nāyaṃ dhammo papañcārāmassa papañcaratino”ti (dī. ni. 3.358; a. ni. 8.30) imaṃ aṭṭhamaṃ mahāpurisavitakkaṃ pūrento upari desayīti. Taṃ pana desitaṃ dassento āha – “**nippapañcarato buddho, nippapañcamadesayī**”ti, papañcā nāma rāgādayo kilesā, tesāṃ vūpasamanatāya tadabhāvato ca lokuttaradhammā nippapañcā nāma. Yathā taṃ pāpuṇāti, tathā dhammaṃ desesi, sāmukkaṃsikaṃ catusaccadesanaṃ adesayīti attho.

Tassāhaṃ dhammamaññāyāti tassa satthu desanādhammaṃ jānitvā. **Vihāsinti** yathānusiṭṭhaṃ paṭipajjanto vihariṃ. **Sāsane ratoti** sikkhattayasaṅgahe sāsane abhirato. **Tisso vijjā anuppattāti** pubbenivāsaññaṃ, dibbacakkhuññaṃ, āsavakkhayaññaṃ imā tisso vijjā mayā anuppattā sacchikatā. Tato eva **katamā buddhassa sāsanaṃ**, anusīṭṭhi ovādo anuṭṭhitoti attho.

Bhaddiyattheravatthu

193. Chaṭṭhe ucca-saddena samānattho uccā-saddoti āha – “**uccākulikānanti ucce kule jātāna**”nti. **Kālī sā devīti** kāḷavaṇṇatāya kālī sā devī. Kulānukkamena rajjānuppatti mahākulinassevāti vuttaṃ – “soyeva cā”tiādi.

Lakuṇḍakabhaddiyattheravatthu

194. Sattame **rittakoti** deyyavatthurahito. **Guṇe āvajjetvāti** bhagavato rūpaguṇe ceva ākappasampadādiguṇe ca attano adhippāyaṃ ñatvā ambapakkassa paṭiggahaṇaṃ paribhuñjananti evamādike yathāupaṭṭhite guṇe āvajjetvā.

Piṇḍolabhāradvājattheravatthu

195. Aṭṭhame abhītanādabhāvena sīhassa viya nādo sīhanādo, so etesaṃ atthīti sīhanādikā, tesam **sīhanādikānaṃ**. Garahitabbapasamṣitabbadhamme yāthāvato jānantasseva garahā pasamṣā ca yuttarūpāti āha – “**buddhā ca nāmā**”tiādi. **Khīṇā jāti**tiādihi paccavekkhaṇañāssa bhūmiṃ dasseti. Tena hi ñāṇena ariyasāvako paccavekkhanto “khīṇā jāti”tiādiṃ pajānāti. Katamā panassa jāti khīṇā, kathaṅca pajānāti? Na tāvassa atītā khīṇā pubbeva khīṇattā, na anāgatā anāgate vāyāmābhāvato, na paccuppannā vijjāmānattā. Yā pana maggassa bhāvitattā uppajjeyya ekacatupañcavokārabhavesu ekacatupañcakkhandhappabhedā jāti, sā maggassa bhāvitattā anuppādadhmatamā āpajjanena khīṇā. Taṃ so maggabhāvanāya pahīnakilese paccavekkhitvā “kilesābhāve vijjāmānampi kammaṃ āyatimā appaṭisandhikaṃ hoti”ti jānanto pajānāti.

Vusitanti vuṭṭhaṃ parivuṭṭhaṃ, kataṃ caritaṃ niṭṭhitanti attho. **Brahmacariyanti** maggabrahmacariyaṃ. Puthujjanakalyāṇakena hi saddhiṃ satta sekkhā maggabrahmacariyaṃ vasanti nāma, khīṇāsavo vuṭṭhavāso. Tasmā ariyasāvako attano brahmacariyavāsaṃ paccavekkhanto “vusitaṃ brahmacariya”nti pajānāti. **Kataṃ karaṇīyanti** catūsu saccesu catūhi maggehi pariññāpahānasacchikiriyābhāvanābhīsamayasena soḷasavidhaṃ kiccaṃ niṭṭhāpitanti attho. Puthujjanakalyāṇakādayo hi taṃ kiccaṃ karonti, khīṇāsavo katakaraṇīyo. Tasmā ariyasāvako attano karaṇīyaṃ paccavekkhanto “kataṃ karaṇīya”nti pajānāti. **Nāparaṃ itthattāyāti** idāni puna itthabhāvāya evaṃ soḷasavidhakiccabhāvāya, kilesakkhayāya vā maggabhāvanāya kiccaṃ me natthīti pajānāti. Atha vā **itthattāyāti** itthabhāvato imasmā evaṃpakārā idāni vattamānakkhandhasantānā aparāṃ khandhasantānaṃ mayhaṃ natthi, ime pana pañcakkhandhā pariññātā tiṭṭhanti chinnamūlakā rukkhā viya, te carimakaviññāṇanirodhena anupādāno viya jātavedo nibbāyissantīti pajānāti.

Mantāṇiputtapuṇṇattheravatthu

196. Navame aṭṭhārasasupi vijjāṭṭhānesu nipphattiṃ gatattā “**sabbasippesu kovido hutvā**”ti vuttaṃ. Abhidayāabbhaññāvahasava dhammassa tattha upalabbhanato “**mokkhadhammaṃ adisvā**”ti vuttaṃ. Tenāha – “**idaṃ vedattayaṃ nāmā**”tiādi. Tathā hi anena duggatiparimuccanampi dullabhaṃ, abhiññāparivārānaṃ aṭṭhannaṃ samāpattīnaṃ lābhītāya sayam ekadesena upasanto paramukkamsagataṃ uttamadamathasamathaṃ anaññasādhāraṇaṃ bhagavantaṃ sambhāvento “**ayaṃ puriso**”tiādimāha. **Piṭakāni gahetvā āgacchantīti** phalabhājanāni gahetvā assāmikāya āgacchanti. **Buddhānanti** gāravavasena bahuvacananiddeso kato. **Paribhuñjīti** devatāhi pakkhittadibbojaṃ vanamūlaphalāphalaṃ paribhuñjīti. Patte patiṭṭhāpitasamanantameva hi devatā tattha dibbojaṃ pakkhipiṃsu. **Sammāsivāti** paccavekkhitvā, parivattetvāti ca vadanti. **Arahattaṃ pāpuṇiṃsūti** mahādevattherassa anumodanakathāya anupubbikathāsakkhikāya suvisodhitacittasantānā arahattaṃ pāpuṇiṃsu.

Dasahi kathāvatthūhīti appicchakathā santuṭṭhikathā pavivekakathā asaṃsaggakathā vīriyārambhakathā sīlasampadākathā samādhisampadākathā paññāsampadākathā vimuttisampadākathā vimuttiñāṇadassanasampadākathāti imehi dasahi kathāvatthūhi. **Jātibhūmiratṭhavāsinoti** jātibhūmivantadesavāsino, satthu jātadesavāsino attho. **Sīsānulokikoti** purato gacchantassa sīsaṃ anu anu

passanto. **Okāsaṃ sallakkhetvāti** sākacchāya avasaraṃ sallakkhetvā. **Sattavisuddhikkamaṃ pucchīti** ‘‘kiṃ nu kho, āvuso, sīlavisuddhatthaṃ bhagavati brahmacariyaṃ vussatī’’tiādinā (ma. ni. 1.257) satta visuddhiyo pucchi. **Dhammakathikānaṃ aggaṭṭhāne ṭhapesi** savisesena dasakathāvattulābhitāya.

Mahākaccānattheravattu

197. Dasame **saṃkhittena kathitadhammassāti** madhupiṇḍikasuttantadesanāsu viya saṅkhepena desitadhammassa. **Taṃ desanaṃ vitthāretvāti** taṃ saṅkhepadesanaṃ āyatanādivasena vitthāretvā. **Atthaṃ vibhajamānānanti** tassā saṅkhepadesanāya atthaṃ vibhajitvā kathentānaṃ. **Atthavasena vāti** ‘‘ettakā etassa atthā’’ti atthavasena vā desanaṃ pūretuṃ sakkonti. **Byañjanavasena vāti** ‘‘ettakāni ettha byañjanāni desanāvasena vattabbānī’’ti byañjanavasena vā pūretuṃ sakkonti. **Ayaṃ pana mahākaccānatthero ubhayavasenapi sakkoti** tassa saṅkhepena uddiṭṭhassa vitthārena satthu ajjhāsayanurūpaṃ desanato, tasmā tattha aggoti vutto. **Vuttanayenevāti** ‘‘pātova subhojanaṃ bhuñjitvā uposathaṅgāni adhiṭṭhāyā’’tiādinā heṭṭhā vuttanayeneva. **Aññehīti** aññāsaṃ itthīnaṃ kesehi ativiya dīghā. Na kevalaṅca dīghā eva, atha kho siniddhanīlamudukañcikā ca. **Nikkesīti** appakesī yathā ‘‘anudarā kaññā’’ti.

Paṇiyanti vikketabbabhaṇḍaṃ. **Āvajjetvāti** upanissayaṃ kesānaṃ pakatibhāvāpattiṅca āvajjetvā. **Gāravenāti** muṇḍasīsāpi there gāravena ekavacaneneva āgantvā. **Nimantetvāti** svātanāya nimantetvā. **Imissā itthiyāti** yathāvuttasetṭhīdhītarāmāha. **Diṭṭhadhammikovāti** avadhāraṇaṃ aṭṭhānapayuttaṃ, diṭṭhadhammiko yasapaṭilābhova ahoṣīti attho. **Yasapaṭilābhoti** ca bhavasampattipaṭilābho. Sattasu hi javanacetanāsu paṭhamā diṭṭhadhammavedanīyaphalā, pacchimā upapajjedanīyaphalā, majjhe pañca aparāpariyavedanīyaphalā, tasmā paṭhamaṃ ekaṃ cetanaṃ ṭhapetvā sesā yathāsakaṃ paripuṇṇaphaladāyino hontī, paṭhamacetanāya pana diṭṭhadhammiko yasapaṭilābhova ahoṣī.

Paṭhamaetadaggavaggaṇṇanā niṭṭhitā.

14. Etadaggavaggo

(14) 2. Dutiyaetadaggavaggaṇṇanā

Cūlapanthakattheravattu

198-200. Dutiyassa paṭhame **manena nibbattitanti** abhiññāmanena uppāditaṃ. **Manena katakāyoti** abhiññācittena desantaraṃ pattakāyo. **Manena nibbattitakāyoti** abhiññāmanasā nimmitakāyo ‘‘aññaṃ kāyaṃ abhinimminātī’’tiādīsu (dī. ni. 1.236-237; paṭi. ma. 3.14) viya. **Ekasadiseyevāti** attasadiseyeva. **Ekavidhamevāti** attanā katappakārameva. Etapparamo hi yebhuyyena sāvakanāṃ iddhinimmanavidhi. **Aggo nāma jāto** ekadesena satthu iddhinimmanānuvidhānato.

Lābhitāyāti ettha lābhīti ikāro atisayattho. Tena therassa catunnaṃ rūpāvacarajjhānānaṃ atisayena savisesalābhitāṃ dasseti. **Arūpāvacarajjhānānaṃ lābhitāyāti** etthāpi eseva nayo. Na kevalaṅcetā cetosaññāvivaṭṭakusalatā rūpārūpajjhānalābhitāya eva, atha kho imehipi kāraṇehīti dassetuṃ – ‘‘cūlapanthako cā’’tiādi vuttaṃ. **Cetoti** cettha cittaśīsenā samādhī vutto, tasmā cetaso samādhissa vivaṭṭanaṃ cetovivaṭṭo, ekasmiṃyevārammaṇe samādhicittaṃ vivaṭṭetvā heṭṭhimassa heṭṭhimassa uparūpari hāpanato rūpāvacarajjhānalābhī **cetovivaṭṭakusalo nāma**. ‘‘Sabbaso rūpasaññāna’’ntiādinā (dha. sa. 265) vuttasaññā atikkamītvā ‘‘ākāsānañcāyatanasaññāsahagataṃ...pe... nevasaññānāsaññāyatanasaññāsahagata’’nti (dha. sa. 265-268) saññāśīsenā vuttajjhānānaṃ vivaṭṭakusalo, tathā itthipurisādīsaññā niccasaññādito cittaṃ vivaṭṭetvā kevale rūpārūpadhammatte asaṅkhate nibbāne ca visesato vaṭṭanato ca suññatānupassanābahulo **saññāvivaṭṭakusalo**. **Samādhikusalatāya** cetovivaṭṭakusalatā tabbahulavīhāritāya. Tathā **vipassanākusalatāya** saññāvivaṭṭakusalatā. **Ekoti** cūlapanthakattheraṃ vadati. **Samādhilakkhaṇeti** savitakkasavicārādīsamādhīsabhāve. Puna **ekoti** mahāpanthakattheramāha. **Vipassanālakkhaṇeti** sattaanupassanā

atthārasamahāvīpassanādivīpassanāsabhāve. **Samādhigāḷhoti** samādhismiṃ ogāḷhacitto subhāvītabhāvanatā. **Āngasaṃkhitteti** caturaṅgikativāṅgikādivasena jhānaṅgānaṃ saṅkhipane. **Ārammaṇasaṃkhitteti** kasiṇugghāṭimākāsādinibbattanena kasiṇādiārammaṇānaṃ saṃkhipane. **Āṅgavavattthāpaneti** vitakkādīnaṃ jhānaṅgānaṃ vavattthāpane. **Ārammaṇavavattthāpaneti** pathavīkasiṇādiṃjjhānārammaṇānaṃ vavattthāpane.

Jhānaṅgehīti rūpāvacaṛajjhānaṅgehi, jhānaṅgāneva jhānaṃ. Puna **jhānaṅgehīti** arūpāvacaṛajjhānaṅgehi. **Bhātāti** jeṭṭhabhātā. **Assāti** kuṭumbiyassa. **Suvaṇṇapūjanti** sovaṇṇamayam pupphapūjam katvā. **Devapureti** tāvatimsabhavane sudassanamahānagare. **Aggadvārenāti** tasmim divase aggaṃ sabbapaṭṭhamam vivaṭena nagaradvārena nikkhamitvā.

Kokanadanti padumavisesanaṃ yathā “kokāsaka”nti. Tam kira bahupattam vaṇṇasampannam atisugandhañca hoti. “Kokanadam nāma setapaduma”ntipi vadanti. **Pātoti** pageva. Ayañhettha attho – yathā kokanadasaṅkhātam padumam pāto sūriyuggamanavelāyam phullam vikasitam avītagandham siyā virocamaṇam, evam sarīragandhena guṇagandhena ca sugandham saradakāle antalikkhe ādiccamiva attano tejasā tapantaṃ aṅgehi niccharaṇakajutiyā aṅgīrasam sammāsambuddham passāti.

Cūḷapanthako kira kassapasammāsambuddhakāle pabbajitvā paññavā hutvā aññatarassa dandabhikkhuno uddesagahaṇakāle pariḥāsakeḷim akāsi. So bhikkhu tena pariḥāsena lajjito neva uddesam gaṇhi, na sajjhāyamakāsi. Tena kammenāyam pabbajitvāva dandho jāto, tasmā gahitagahitapadam upariuparipadam gaṇhantassa nassati. **Iddhiyā abhisāṅkharitvā suddham coḷakhaṇḍam adāsīti** tassa pubbatum disvā tadanurūpe kammaṭṭhāne niyojento suddham coḷakhaṇḍam adāsi. So kira pubbe rājā hutvā nagaram padakkhiṇam karonto nalāṭato sede muccante parisuddhena sāṭakena nalāṭam puñchi, sāṭako kiliṭṭho ahoṣi. So “imaṃ sarīram nissāya evarūpo parisuddhasāṭako pakatiṃ jahitvā kiliṭṭho jāto, aniccā vata saṅkhārā”ti aniccasaññaṃ paṭilabhi. Tena kāraṇenassa rajoharaṇameva paccayo jāto.

Lomānīti coḷakhaṇḍatantagataamsuke vadati. “**Kiliṭṭhadhātukānī**”ti kiliṭṭhasabhāvāni. **Evamgatikamevāti** idaṃ cittampi bhavaṅgavasena pakatiyā paṇḍaram parisuddham rāgādisampayuttadhammavasena saṃkiliṭṭham jātanti dasseti. **Nakkhattam samānetvāti** nakkhattam samannāharitvā, āvajjetvāti attho. **Biḷārassatthāyāti** biḷārassa gocaratthāya. **Jalapathakammikenāti** samuddakammikena. **Cārīnti** khādītabbatiṇam. **Saccakāranti** saccabhāvāvahaṃ kāram, “attanā gahite bhaṇḍe aññesaṃ na dātabba”nti vatvā dātabbalañjanti vuttam hoti. **Tatiyena paṭihārenāti** tatiyena sāsanena. **Pattikā hutvāti** sāmīno hutvā.

Appakenapīti thokenapi parittenapi. **Medhāvīti** paññavā. **Pābhatenāti** bhaṇḍamūlena. **Vicakkaṇoti** vohārakusalo. **Samuṭṭhāpeti attānanti** mahantaṃ dhanam yasañca uppādetvā tattha attānaṃ saṅṭhapeti patiṭṭhāpeti. Yathā kiṃ? **Aṇum aggimva sandhamam**, yathā paṇḍito puriso parittakam aggim anukkamena gomayacūṇḍāni pakkhipitvā mukhavātena dhamento samuṭṭhāpeti vaḍḍheti, mahantaṃ aggikkhandham karoti, evameva paṇḍito thokampi pābhatam labhitvā nānāupāyehi payojetvā dhanañca yasañca vaḍḍheti, vaḍḍhetvā puna tattha attānaṃ patiṭṭhāpeti. Tāya eva vā pana dhanassa mahantatāya attānaṃ samuṭṭhāpeti, abhiññātam pākātam karotīti attho.

Subhūtītheravatthu

201-202. Tatiye **raṇāti hi rāgādayo kilesā vuccantīti** “saraṇā dhammā”tiādīsu (dha. sa. 100 dukamātikā) rāgādayo kilesā “raṇā”ti vuccanti. Raṇanti etehīti **raṇā**. Yehi abhibhūtā sattā nānappakārena kandanti paridevanti, tasmā te rāgādayo “raṇā”ti vuttā. **Desitaniyāmato anokkamitvāti** desitānokkamanato anupagantvā deseti, satthārā desitaniyāmeneva anodissakam katvā dhammam desetīti vuttam hoti. **Evanti** evam mettājhānato vuṭṭhāya bhikkhāgahaṇe sati. **Bhikkhādāyakānaṃ mahapphalam bhavissatīti** idaṃ **cūlaccharāsaṅghātasuttana** (a. ni. 1.51 ādayo) dīpetabbaṃ. Accharāsaṅghātamattampi hi kālam mettacittam āsevantaṃ bhikkhuno dinnadānaṃ mahapphalam hoti mahānisaṃsam, tena ca so amogham raṭṭhapīṇam bhuñjatīti ayamattho tattha āgatoyeva. **Nimittam gaṇhitvāti** ākāram sallakkhetvā.

Khadiravaniyarevatattheravatthu

203. Pañcame **vanasabhāganti** sabhāgaṃ vanaṃ, **sabhāganti** ca sappāyanti attho. Yañhi pakativiruddhaṃ byādhiviruddhañca na hoti, taṃ “sabhāga”nti vuccati. **Udakasabhāganti**ādīsipi imināva nayena attho vedītabbo. **Kalyāṇakammāyūhanakkhaṇoti** kalyāṇakammūpacayassa okāso. **Tiṇṇaṃ bhātikānanti** upatisso, cundo, upasenoti imesaṃ tiṇṇaṃ jeṭṭhabhātikānaṃ. **Tissannañca bhaginīnanti** cālā, upacālā, sīsupacālāti imesaṃ tissannaṃ jeṭṭhabhaginīnaṃ. Ettha ca sārīputtatthero sayamaṃ pabbajitvā cālā, upacālā, sīsupacālāti tisso bhaginiyo, cundo upasenoti ime bhātaro pabbājesi, revatakumāro ekova gehe avasissati. Tena vuttaṃ – “**amhākaṃ...pe... pabbājenti**”ti. **Mahallakatarāti** vuddhatarā. Idañca kumārīkāya cirajīvitaṃ abhikaṅkhamānā āhaṃsu. Sā kira tassa ayyikā vīsativassasatikā khaṇḍadantā palitakesā valittacā tilakāhatagattā gopānasivaṅkā ahoṣi. **Vidhāvanikanti** vidhāvanakīḷikaṃ. **Tissannaṃ sampattinanti** anussavavasena manussadevamokkhasampattiyo sandhāya vadati, manussadevabrahmasampattiyo vā. **Sīvalissa puññaṃ vīmaṃsissāmāti** “sīvalinā katapuññaṃ vipākadānaṭṭhānamida”nti ñatvā evamāha. **Sabhāgaṭṭhānanti** samaṃ desaṃ.

Taṃ bhūmirāmaṇeyyakanti kiñcāpi arahanto gāmaṃte kāyavivekaṃ na labhanti, cittavivekaṃ pana labhanteva. Tesañhi dibbappaṭibhāgānīpi ārammaṇāni cittaṃ cāletuṃ na sakkonti, tasmā gāmo vā hotu araṇṇādīnaṃ vā aññataraṃ, ‘yattha arahanto viharanti, taṃ bhūmirāmaṇeyyakaṃ’, so bhūmippadeso ramaṇīyo evāti attho.

Kaṅkhārevatattheravatthu

204. Chaṭṭhe **akappiyo, āvuso, guḷoti** ekadivasaṃ thero antarāmagge guḷakaraṇaṃ okkamitvā guḷe piṭṭhampi chārikampi pakkhitte disvāna “akappiyo guḷo, sāmiso na kappati guḷo vikāle paribhuñjitu”nti kukkucāyanto evamāha. **Akappiyā muggāti** ekadivasaṃ antarāmagge vacce muggaṃ jātaṃ disvā “akappiyā muggā, pakkāpi muggā jāyanti”ti kukkucāyanto evamāha. Sesamettha sabbaṃ uttānameva.

Soṅakoḷivisattheravatthu

205. Sattame **hāpetabbameva ahoṣi** accāraddhavīriyattā. **Udakena samupabyūḷheti** udakena thalaṃ ussāretvā tattha tattha rāsikate. **Haritūpalittāyāti** gomayaparibhaṇḍakatāya. **Tividhena udakena posentīti** khīrodakaṃ gandhodakaṃ kevalodakanti evaṃ tividhena udakena posenti paripālenīti. **Parissāvetvāti** parisodhetvā gahite taṇḍuleti yojetabbaṃ. **Devo maññeti** devo viya. **Vīṇovādenāti** “taṃ kiṃ maññasi, soṇa, yadā te vīṇāya tantiyo accāyatā hontī, api nu te vīṇā tasmīṃ samaye saravatī vā hoti kammaññā vāti? No hetamaṃ, bhanteti. Evameva kho, soṇa, accāraddhavīriyaṃ uddhaccāya saṃvattati, atisithilavīriyaṃ kosajjāya saṃvattati. Tasmātiha tvaṃ, soṇa, vīriyasamataṃ adhiṭṭhaha, indriyānañca samataṃ paṭivijjhā”ti (mahāva. 243) evaṃ vīṇaṃ upamaṃ katvā pavattitena vīṇopamovādena. **Vīriyasamathayojanattāyāti** vīriyassa samathena yojanattāyā.

Soṅakuṭikaṇṇattheravatthu

206. Aṭṭhame **kuṭikaṇṇoti vuccatīti** “koṭikaṇṇo”ti vattabbe “kuṭikaṇṇo”ti voharīyati. Kulaghare bhavā **kulagharikā**. Sā kira avantiraṭṭhe kulaghare mahāvibhavassa seṭṭhissa bhariyā. **Dasabalassa dhammakathaṃ sutvā sotāpattiphale paṭiṭṭhāya cintesīti** idamaṃ aṅguttarabhāṇakānaṃ matena vuttaṃ. **Suttanipātaṭṭhakathāyaṃ** pana “sapariso bhagavantaṃ upasaṅkamma dhammadesanaṃ assosi, na ca kañci visesaṃ adhigañchi. Kasmā? So hi dhammaṃ suṇanto hemavataṃ anussaritvā “āgato nu kho me sahāyako, no”ti disādisaṃ oloketvā taṃ apassanto ‘vañcīto me sahāyo, yo evaṃ vicittappaṭibhānaṃ bhagavato desanaṃ na suṇātī”ti vikkhittacitto ahoṣī”ti vuttaṃ.

Yasmā paṭisandhijātiabhinikkhamaṇābodhiparinibbānesveva dvattiṃsa pubbanimittāni hutvāva paṭivigacchanti, na ciratṭhitikāni hontī, **dhammacakkappavattane** (saṃ. ni. 5.1081; paṭi. ma. 2.30) pana tāni savisesāni hutvā cirataraṃ ṭhatvā nirujjhanti, tasmā vuttaṃ – “**tiyojanasahassaṃ himavantaṃ**

akālapupphitaṃ disvā”tiādi. **Aggabalakāyāti** sabbapurato gacchantā balakāyā. **Kena pupphitabhāvaṃ jānāsīti** kena kāraṇena himavantassa pupphitabhāvaṃ jānāsīti, yena kāraṇena imaṃ akālapupphapāṭihāriyaṃ jātaṃ, taṃ jānāsīti vuttaṃ hoti. **Tassa pavattitabhāvanti** tassa dhammacakkassa bhagavatā pavattitabhāvaṃ. **Sadde nimittaṃ gaṇhīti** sadde ākāraṃ sallakkhesi. **Tatoti** “ahaṃ ‘etaṃ amatadhammaṃ tampi jānāpessāmi’ ti tava santikaṃ āgatosmi” ti yaṃ vuttaṃ, tadanantaranti attho.

Sātāgiro hemavatassa buddhuppādaṃ kathetvā taṃ bhagavato santikaṃ ānetukāmo “**ajja pannaraso**”tiādigāthamāha. Tattha (su. ni. atṭha. 1.153) **ajjāti** ayaṃ rattindivo pakkhagaṇanato **pannaraso**, upavasitabbato **uposatho**. Tīsu vā uposathesu ajja pannaraso uposatho, na cātuddasiuposatho, na sāmaggīuposatho. Divi bhavāni dibbāni, dibbāni ettha atthīti **dibbāni**. Kāni tāni? Rūpāni. Tañhi rattim devānaṃ dasasahassilokadhātuto sannipatitānaṃ sarīravatthābharaṇavimānappabhāhi abbhādiupakkilesavirahitāya candappabhāya ca sakalajambudīpo alaṅkato ahoṣīti ativiya alaṅkato ca parivissuddhidevassa bhagavato sarīrappabhāya. Tenāha – “**dibbā ratti upatthitā**”ti.

Evaṃ rattiguṇavaṇṇanāpadesenapi sahāyassa cittaṃ pasādaṃ janento buddhuppādaṃ kathetvā āha – “**anomanāmaṃ satthāraṃ, handa passāma gotama**”nti. Tattha anomehi alāmakehi sabbākāraparipūrehi guṇehi nāmaṃ assāti anomanāmo. Tathā hissa “bujjhitaṃ saccānīti buddho, bodhetā pajāyāti buddho”tiādinā (mahāni. 192; cūḷani. pārāyanatthutigāthāniddeṣo 97; paṭi. ma. 1.162) nayena buddhoti anomehi guṇehi nāmaṃ. “Bhaggarāgoti bhagavā, bhaggadosoti bhagavā”tiādinā (mahāni. 84) nayena bhagavāti anomehi guṇehi nāmaṃ. Esa nayo “arahaṃ sammāsambuddho vijjācaraṇasampanno”tiādisu. **Diṭṭhadhammikādiatthehi** devamanusse anusāsati “imaṃ pajahatha, imaṃ samādāya vattathā”ti satthā. Taṃ **anomanāmaṃ satthāraṃ. Handāti** vacasāyatthe nipāto. **Passāmāti** tena attānaṃ saha saṅgahetvā paccuppannabahuvacanaṃ. **Gotamanti** gotamagottaṃ. Idaṃ vuttaṃ hoti – “satthā, na satthā”ti mā vimatiṃ akāsi, ekantabyavasito hutvāva ehi passāma gotamanti.

Evaṃ vutte hemavato “ayaṃ sātāgiro ‘anomanāmaṃ satthāra’nti bhaṇanto tassa sabbaññutaṃ pakāseti, sabbaññuno ca dullabhā loke, sabbaññupaṭiññehi pūraṇādisadiseheva loko upadduto. So pana yadi sabbaññū, addhā tādilakkhaṇaṃ patto bhavissati, tena evaṃ gahessāmi”ti cintetvā tādilakkhaṇaṃ pucchanto āha – “**kacci mano**”tiādi. Tattha **kaccīti** pucchā. **Manoti** cittaṃ. **Supaṇihitoti** sutṭhu ṭhapito acalo asampavedhī. Sabbesu bhūtesu **sabbabhūtesu. Tādinoti** tādilakkhaṇaṃ pattasseva sato. Pucchā eva vā ayaṃ “so tava satthā sabbabhūtesu tādi, udāhu no”ti. **Iṭṭhe aniṭṭhecāti** evarūpe ārammaṇe. **Saṅkappāti** vitakkā. **Vasikatāti** vasaṃ gamitā. Idaṃ vuttaṃ hoti – yaṃ taṃ satthāraṃ vadasī, tassa te satthuno kacci tādilakkhaṇaṃ sampattassa sato sabbabhūtesu mano supaṇihito, udāhu yāva paccayaṃ na labhati, tāva supaṇihito viya khāyati. So vā te satthā kacci sabbabhūtesu sattesu tādi, udāhu no, ye ca iṭṭhāniṭṭhesu ārammaṇesu rāgadosavasena saṅkappā uppajjeyyūṃ, tyāssa kacci vasikatā, udāhu kadāci tesampi vasena vattatīti.

Tīni vassānīti soṇassa pabbajitadivasato paṭṭhāya tīni vassāni. Tadā kira bhikkhū yebhuyyena majjhimadeseyeva vasiṃsu, tasmā tattha katipayā eva ahesuṃ. Te ca ekasmiṃ nigame eko dveti evaṃ visuṃ visuṃ vasiṃsu, therānañca katipaye bhikkhū ānetvā aññesu ānīyamānesu pubbaṃ ānītā kenacideva karaṇīyena pakkamiṃsu, kañci kālaṃ āgametvā puna tesu ānīyamānesu itare pakkamiṃsu, evaṃ punappunaṃ ānayanena sannipāto cireneva ahoṣi, thero ca tadā ekavīhārī ahoṣi. Tena vuttaṃ – “**tīni vassāni gaṇaṃ pariyesitvā**”ti. **Tīni vassānīti** ca accantasamyoge upayogavacanaṃ. **Satthu adhippāyaṃ ñatvāti** attano āṇāpaneneva “iminā saddhiṃ ekagandhakuṭiyaṃ vasitukāmo bhagavā”ti satthu adhippāyaṃ jānitvā. Bhagavā kira yena saddhiṃ ekagandhakuṭiyaṃ vasitukāmo, tassa senāsanapaññattiyaṃ ānandattheraṃ āṇāpeti.

Ajjhokāse vītināmetvāti ajjhokāse nisajjāya vītināmetvā. Yasmā bhagavā āyasmato soṇassa samāpattisamāpajjanena paṭisanthāraṃ karonto sāvakasādhāraṇā sabbā samāpattiyā anulomappaṭilomaṃ samāpajjanto bahudeva rattim ajjhokāse nisajjāya vītināmetvā pāde pakkhāletvā vihāraṃ pāvisi, tasmā āyasmāpi soṇo bhagavato adhippāyaṃ ñatvā tadanurūpaṃ sabbā tā samāpattiyā samāpajjanto bahudeva rattim ajjhokāse nisajjāya vītināmetvā pāde pakkhāletvā vihāraṃ pāvisīti vadanti. Pavisitvā ca bhagavatā anuññāto cīvaratirokaraṇiyaṃ katvā bhagavato pādapasse nisajjāya vītināmesī. **Ajjhesīti** āṇāpesi.

Paṭibhātu taṃ bhikkhu dhammo bhāsītunti bhikkhu tuyhaṃ dhammo bhāsītum upaṭṭhātu, ñānamukhaṃ āgacchatu, yathāsutaṃ yathāpariyattaṃ dhammaṃ bhaṇāhīti attho. **Aṭṭhakavaggiyānīti** aṭṭhakavaggabhūtāni **kāmasuttādisoḷasasuttāni** (mahāni. 1). **Suggahitoti sammā uggahito**. **Sabbe vare yācīti** vinayadharapañcamena gaṇena upasampadā dhuvanhānaṃ cammattharaṇaṃ gaṇaṅgaṇūpāhanaṃ cīvaravippavāsoti ime pañca vare yāci. **Sutte āgatamevāti** udānapāḷiyāṃ āgatasuttaṃ sandhāya vadati.

Sīvalittheravatthu

207. Navame **sācacchitvā sācacchitvāti** raññā saddhiṃ paṭivirujjhanavasena punappunaṃ sācacchaṃ katvā. **Guḷadadhinti** patthinnaṃ guḷasadiṣaṃ kaṭṭhinadadhiṃ. **Atiāñchitunti** ativiya ākaḍḍhitum. **Kaṇḍhiyaṃ vāhetvāti** dadhimatthum pavāhetvā, parissāvetvāti attho. “Dadhito kaṇḍhiyaṃ gahetvā”tipi pātho. Nanti suppvāsaṃ. Bījapacchiṃ phusāpentīti iminā sambandho. **Yāva na ukkaḍḍhantīti** yāva dāne na ukkaḍḍhanti, dātukāmāva hontīti adhippāyo **mahādukkhaṃ anubhosīti** pasavanibandhanaṃ mahantaṃ dukkhaṃ anubhosi. **Sāmikaṃ āmantetvāti** sattāhaṃ mūḷhagabbhā tibbāhi kharāhi dukkhavedanāhi phutṭhā “sammāsambuddho vata so bhagavā, yo imassa evarūpassa dukkhassa pahānāya dhammaṃ deseti. Suppaṭipanno vata tassa bhagavato sāvakasaṅgho, yo imassa evarūpassa dukkhassa pahānāya paṭipanno. Susukhaṃ vata nibbānaṃ, yatthidaṃ evarūpaṃ dukkhaṃ na saṃvijjati”ti (udā. 18) imehi tīhi vitakkehi taṃ dukkhaṃ adhvāsenti satthu santikaṃ pesetukāmatāya sāmikaṃ āmantetvā. **Pure maraṇāti** maraṇato puretameva. **Ingīti** ākāraṃ. **Jīvitabhānti** jīvitasamsaye dātābhānti. **Sabbakammakkhamo ahosīti** sattavassikehi dārakehi kātabbaṃ yaṃ kiñci kammaṃ kātuṃ samatthātāya sabbassa kammaṃ khamo ahosi. Teneva so sattāhaṃ mahādāne dīyamāne jātaḍḍhasato paṭṭhāya dhammakaraṇaṃ ādāya saṅghassa udakaṃ parissāvetvā adāsi.

Yomantiādigāthāya “yo bhikkhu imaṃ rāgapalipathañceva kilesaduggaṇḍhaṃ saṃsāravatṭaṇḍhaṃ catunnaṃ saccānaṃ appaṭivijjhanakamoḥaṇḍhaṃ atīto cattāro oghe tiṇṇo hutvā pāraṃ anupatto, duvidhena jhānena **jhāyī**, taṇhāya abhāvena **anejo**, kathaṃkathāya abhāvena **akathaṃkathī**, upādānānaṃ abhāvena **anupādiyivā** kilesanibbānena nibbuto, tamaḥaṃ brāhmaṇaṃ vadāmī”ti attho.

Sabbesaṃyeva pana kesānaṃ oropanaṇḍhaṃ arahattasacchikiriyā ca apacchāapurimā ahosīti iminā therassa khuraggeyeva arahattupatti dīpitā. Ekacce pana ācariyā evaṃ vadanti “heṭṭhā vuttanayena dhammasenāpatinā ovāde dinne ‘yaṃ mayā kātuṃ sakkā, tamaḥaṃ jānissāmī’ti pabbajitvā vipassanākammatṭhānaṃ gahetvā taṃ divasaṃyeva aññataraṃ vicittaṃ kuṭikaṃ disvā pavisitvā mātukucchiyaṃ satta vassāni attanā anubhūtaḍḍhaṃ anussarivā tadanūsārena atītānāgate ñānaṃ nentassa ādittā viya tayo bhavā upaṭṭhahimsu. Nāṇassa paripākaṃ gatattā vipassanāvīthiṃ otaritvā tāvadeva maggappaṭipāṭiyā sabbepi āsave khepento arahattaṃ pāpuṇī”ti. Ubhayathāpi therassa arahattupattiyeva pakāsītā, thero pana pabhinnappaṭisambhido chaḷabhiñño ahosi.

Vakkalittheravatthu

208. Dasame **āhārakaraṇavelanti** bhojanakiccavelaṃ. **Adhigacche padaṃ santanti** saṅkhārūpasamaṃ sukhanti laddhanāmaṃ santaṃ padaṃ nibbānaṃ adhigaccheyya. **Paṭhamapādena pabbate ṭhitoyevāti** paṭhamena pādena giṃjhakūṭe pabbate ṭhitoyeva. Sesamettha suviññeyyameva.

Dutiyaetadaggavaggavaṇṇanā niṭṭhitā.

14. Etadaggavaggo

(14) 3. Tatiyaetadaggavaggavaṇṇanā

Rāhula-raṭṭhapālattheravatthu

209-210. Tatiyassa paṭhamadutiyesu **tisso sikkhāti** adhisīlaadhicittaadhīpaññāsāṅkhātā tisso sikkhā.

Cuddasa bhattachede katvāti sattāhaṃ nirāhāratāya ekekasmim divase dvinnam bhattachedānam vasena cuddasa bhattachede katvā.

Tesanti tesam tāpasānam. **Lābubhājanādiparikkhāram saṃvidhāyāti** lābubhājanādītāpasaparikkhāram saṃvidahitvā. **Sapariḷāhakāyadhātukoti** ussannapittatāya sapariḷāhakāyasabhāvo. **Satasahassāti** satasahassaparimāṇā. Satasahassam parimāṇam etesanti satasahassā uttarapadalopena yathā “rūpabhavo rūpa”nti, atthiatthe vā akārapaccayo daṭṭhabbo. Pāṇātipātādiakusaladhammasamudācārasaṅkhāto āmagandho kuṇapagandho natthi etesanti **nirāmagandhā**, yathāvuttakilesasamudācārarahitāti attho. Kilesasamudācāro hettha “āmagandho”ti vutto. Kimkāraṇā? Amanuññatā, kilesaasucimissatā, sabbhi jigucchitattā, paramaduggandhabhāvavahattā ca. Tathā hi ye ye ussannakilesā sattā, te te atiduggandhā honti. Teneva nikkilesānam matasarīrampi duggandham na hoti. **Dānagaparivahanaketi** dānaggadhuravahanake. **Māpakoti** divase divase parimitaparibbayadānavasena dhaññamāpako.

Pāliyanti vinayapāliyam. **Migajātakam āharitvā kathesīti** atīte kira bodhisatto migayoniyam nibbattivā migagaṇaparivuto araññe vasati. Athassa bhaginī attano puttakam upanetvā “bhātika imaṃ bhāgineyyam migamāyam sikkhāpehī”ti āha. Bodhisatto “sādhū”ti paṭissuṇitvā “gaccha tāta, asukavelāyam nāma āgantvā sikkheyyāsī”ti āha. So mātulena vuttavelam anatikkamitvā tam upasaṅkamitvā migamāyam sikkhi. So ekadivasam vane vicaranto pāsena baddho baddharavam viravi. Migagaṇo palāyitvā “putto te pāsena baddho”ti tassa mātuyā ārocesi. Sā bhātu santikam gantvā “bhātika bhāgineyyo te migamāyam sikkhāpito”ti pucchi. Bodhisatto “mā tvam puttassa kiñci pāpakam āsaṅki, suggahitā tena migamāyā, idāni tam hāsayaṃāno āgacchissatī”ti vatvā “**migam tipallattha**”ntiādīmāha.

Tattha **miganti** bhāgineyyamigam. Tipallattham vuccati sayanam, ubho hi passehi ujukameva ca nipannakavasena tīhākārehi pallattham assa, tīṇi vā pallatthāni assāti tipallattho, tam **tipallattham**. **Anekamāyanti** bahumāyam bahuvañcanam. **Aṭṭhakkhuranti** ekekasmim pāde dvinnam dvinnam vasena aṭṭhahi khurehi samannāgataṃ. **Aḍḍharattāpapāyinti** purimayāmaṃ atikkamitvā majjhimayāme araññato āgamma pānīyassa pivanato aḍḍharatte āpam pivatīti aḍḍharattāpapāyī. “Aḍḍharatte āpapāyī”ntipi pāṭho. Mama bhāgineyyam migam aham sādhukam migamāyam uggaṇhāpesim. Katham? Yathā ekena sotena chamāyam assasanto chahi kalāhi atibhoti bhāgineyyo. Idam vuttam hoti – ayañhi tava puttam tathā uggaṇhāpesim, yathā ekasmim uparimanāsikāsote vātam sannirumbhitvā pathaviyam allīnena ekena heṭṭhimanāsikāsotena tatheva chamāyam assasanto chahi kalāhi luddakam atibhoti, chahi koṭṭhāsehi ajjhottharati vañcetīti attho. Katamehi chahi? Cattāro pāde pasāretvā ekena passena seyyāya, khurehi tiṇapaṃsukhaṇanena, jivhāninnāmanena, udarassa uddhumātabhāvakarāṇena, uccārapassāvavissajjanena, vātassa nirumbhanenāti. Atha vā tathā nam uggaṇhāpesim, yathā ekena sotena chamāyam assasanto. **Chahīti** heṭṭhā vuttehi chahi kāraṇehi. **Kalāhīti** kalāyissati, luddakam vañcessatīti attho. **Bhotīti** bhaginim ālapati. **Bhāgineyyoti** evam chahi kāraṇehi vañcakaṃ bhāgineyyam niddisati.

Evam bodhisatto bhāgineyyassa migamāyam sādhukam uggaṇhitabhāvam vadanto bhaginim samassāsesi. Sopi migapotako pāse baddho anibandhitvāyeva bhūmiyam mahāphāsukapassena pāde pasāretvā nipanno pādānam āsannaṭṭhāne khurehi eva paharitvā paṃsuṅca tiṇāni ca uppāṭetvā uccārapassāvam vissajjetvā sīsam pātetvā jivham ninnāmetvā sarīram kheḷakilinnam katvā vāttaggaṇanena udaram uddhumātakam katvā akkhīni parivattetvā heṭṭhānāsikāsotena vātam sañcarāpentō uparimanāsikāsotena vātam sannirumbhitvā sakalasarīram thaddhabhāvam gāhāpetvā matakākāram dassesi, nilamakkhikāpi nam samparivāresum, tasmim tasmim ṭhāne kākā nilīyimsu. Luddo āgantvā udare hatthena paharitvā “pātova baddho bhavissati, pūtiko jāto”ti tassa bandhanarajjum mocetvā “ettheva dāni nam ukkantivā maṃsam ādāya gamissāmī”ti nirāsaṅko hutvā sākhāpalāsam gahetum āradhō. Migapotakopi utṭhāya catūhi pādehi ṭhatvā kāyam vidhunitvā gīvam pasāretvā mahāvātena chinnavalāhako viya vegena mātu santikam agamāsi. Satthā “na, bhikkhave, rāhulo idāneva sikkhākāmo, pubbepi sikkhākāmoyevā”ti evam migajātakam āharitvā kathesi.

Ambalaṭṭhiyarāhulovādam desesīti “passasi no tvam, rāhula, imaṃ parittam udakāvasesam udakādāne ṭhapitanti? Evam, bhante. Evam parittakam kho, rāhula, tesam sāmāñnam, yesam natthi

sampajānamusāvāde lajjā”ti evamādinā **ambalaṭṭhiyarāhulovādaṃ** (ma. ni. 2.107 ādayo) kathesi. **Gehasitaṃ vitakkaṃ vitakkentassāti** āyasmā kira rāhulo bhagavato piṭṭhito piṭṭhito gacchantova pādatalato yāva upari kesantā tathāgataṃ olokesi, so bhagavato buddhavesavilāsaṃ disvā “sobhati bhagavā dvattiṃsamahāpurisalakkhaṇavicittasarīro byāmapabhāparikkhattāya vipākīṇṇasuvanṇacuṇṇamajjhagato viya vijjulātāparikkhito kanakapabbato viya yantasamākaḍḍhitaratanavicittasuvanṇaagghikaṃ viya paṃsukūlacīvarappaṭicchannopi rattakambalaparikkhittakanakapabbato viya pavālatāpaṭiṃmaṇḍitasuvanṇaghaṭikaṃ viya cīnapiṭṭhacuṇṇapūjitasuvanṇacetiyaṃ viya lākhārasānulitto kanakathūpo viya rattavalāhakantaragato taṅkhaṇamuggatapunṇacando viya aho samatiṃsapāramitānubhāvena sajjitassa attabhāvassa sirisampattī”ti cintesi. Tato attānampi oloketvā “ahampi sobhāmi, sace bhagavā catūsu mahādīpesu cakkavattirajjaṃ akarissa, mayhaṃ pariṇāyakaṭṭhānantaramadassa, evaṃ sante ativiya jambudīpatalaṃ atisobhissā”ti attabhāvaṃ nissāya gehasitaṃ chandarāgaṃ uppādesi. Taṃ sandhāyetaṃ vuttaṃ – **“satthu ceva attano ca rūpasampattīṃ disvā gehasitaṃ vitakkaṃ vitakkentassā”**ti.

Bhagavāpi purato gacchantova cintesi – “paripuṇṇacchavimaṃsalohito dāni rāhulassa attabhāvo, rajanīyesu rūpārammaṇādīsu cittassa pakkhandanakālo jāto, nipphalātāya nu kho rāhulo vītināmetī”ti. Atha sahāvajjaneneva pasanne udake macchaṃ viya parisuddhe ādāsamaṇḍale mukhanimittaṃ viya ca tassa taṃ cittuppādaṃ addasa, disvā ca “ayaṃ rāhulo mayhaṃ atrajo hutvā mama pacchato āgacchanto ‘ahaṃ sobhāmi, mayhaṃ vaṇṇāyatanāṃ pasanna’nti attabhāvaṃ nissāya gehasitaṃ chandarāgaṃ uppādeti, atitthe pakkhando, uppathaṃ paṭipanno, agocare carati, disāmūlhaaddhiko viya agantabbaṃ disaṃ gacchati, ayaṃ kho panassa kilesa abbhantare vaḍḍhanto attatthampi yathābhūtaṃ passitūṃ na dassissati paratthampi ubhayatthampi, tato nirayepi paṭisandhiṃ gaṇhāpessati, tiracchānāyoniyampi pettivisayepi asurakāyepi sambādhepi mātukucchisminti anamatagge saṃsāravatṭe paripātesati. Yathā kho pana anekaratanapūrā mahānāvā bhinnaphalakantarena udakaṃ ādiyamānā muhuttampi na ajjupekkhitabbā hoti, vegena vegenassā vivaraṃ pidahitūṃ vaṭṭati, evameva ayampi na ajjupekkhitabbo. Yāvassa ayaṃ kilesa abbhantare sīlaratanādīni na vināseti, tāvadeva naṃ niggaṇhissāmi”ti ajjhāsayaṃ akāsi. Tato rāhulaṃ āmantetvā “yaṃ kiñci, rāhula, rūpaṃ atītānāgatapaccuppannaṃ ajjhattaṃ vā bahiddhā vā oḷārikaṃ vā sukhumāṃ vā hīnaṃ vā paṇitaṃ vā yaṃ dūre santike vā, sabbaṃ rūpaṃ ‘netāṃ mama, nesohamasmi, na meso attā’ti evametāṃ yathābhūtaṃ sammappaññāya daṭṭhabbanti. Rūpameva nu kho bhagavā rūpameva nu kho sugatāti. Rūpampi rāhula, vedanāpi rāhula, saññāpi rāhula, saṅkhārāpi rāhula, viññānampi rāhulā”ti **mahārāhulovādasuttaṃ** (ma. ni. 2.113 ādayo) abhāsi. Taṃ dassetaṃ – **“yaṃ kiñci rāhula...pe... kathesī”**ti vuttaṃ.

Samyuttake pana rāhulovādoti rāhulasamyutte vuttarāhulovādaṃ sandhāya vadanti. Tattha “sādhu me, bhante, bhagavā saṃkhittena dhammaṃ desetu, yamaṃ, bhante, bhagavato dhammaṃ sutvā eko vūpakaṭṭho appamatto ātāpī pahitto vihareyya”nti therena yācīto “taṃ kiṃ maññasi, rāhula, cakkhu niccaṃ vā aniccaṃ vāti? Aniccaṃ, bhante. Yaṃ panāniccaṃ, dukkhaṃ vā taṃ sukhaṃ vāti? Dukkhaṃ, bhante. Yaṃ panāniccaṃ dukkhaṃ vipariṇāmadhammaṃ, kallaṃ nu taṃ samanupassitūṃ ‘etaṃ mama, esohamasmi, eso me attā’”tiādinā **rāhulovādaṃ** (saṃ. ni. 2.188 ādayo) ārabhi. **Therassa vipassanācāroyeva**, na pana mahārāhulovādo viya vitakkūpacchedāya vuttoti adhippāyo.

Athassa satthā ñāṇaparipākāṃ ñatvātiādīsu bhagavato kira rahogatassa paṭisallīnassa evaṃ cetaso parivitakko udapādi “paripakkā kho rāhulassa vimuttiparipācānīyā dhammā, yannūnāhaṃ rāhulaṃ uttari āsavānaṃ khaye vineyya”nti? Athassa bhagavā pubbaṇhasamayaṃ nivāsetvā pattaṭṭhānamādaya sāvattiyāṃ piṇḍāya caritvā pacchābhattaṃ piṇḍapātaṭṭhikānto āyasmantaṃ rāhulaṃ āmantesi – “gaṇhāhi, rāhula, nisīdanaṃ, yena andhavanaṃ tenupasaṅkamissāma divāvihārāyā”ti. “Evaṃ, bhante”ti kho āyasmā rāhulo bhagavato paṭissutvā nisīdanaṃ ādāya bhagavato piṭṭhito piṭṭhito anubandhi. Tena kho pana samayena anekāni devatāsahassāni bhagavantaṃ abhivandītvā anubandhitā honti “ajja bhagavā āyasmantaṃ rāhulaṃ uttari āsavānaṃ khaye vinessati”ti. Atha kho bhagavā andhavanaṃ ajjhogāhetvā aññatarasmiṃ rukkhamūle paññatte āsane nisīdi. Āyasmāpi rāhulo bhagavantaṃ abhivādetvā ekamantaṃ nisīdi. Atha āyasmantaṃ rāhulaṃ āmantetvā “taṃ kiṃ maññasi, rāhula, cakkhu niccaṃ vā aniccaṃ vāti? Aniccaṃ, bhante. Yaṃ panāniccaṃ, dukkhaṃ vā taṃ sukhaṃ vāti? Dukkhaṃ, bhante. Yaṃ panāniccaṃ dukkhaṃ vipariṇāmadhammaṃ, kallaṃ nu taṃ samanupassitūṃ ‘etaṃ mama, esohamasmi, eso me

attā’’tiādinā rāhulovādaṃ (saṃ. ni. 4.121) adāsi. Taṃ sandhāyetaṃ vuttaṃ – “**andhavane nisinno cūlarāhulovādaṃ kathesi**’’ti.

Koṭisatasahassadevatāhīti āyasmatā rāhulena padumuttarassa bhagavato pādamūle pathavindhararājakāle patthanam ṭhapentena saddhiṃ patthanam ṭhapitadevatāyevetā. Tāsu pana kāci bhūmaṭṭhadevatā, kāci antalikkhaṭṭhakā, kāci cātumahārājikādidevaloke, kāci brahmaloke nibbattā, imasmiṃ pana divase sabbā ekaṭṭhāne andhavanasmimyeva sannipatitā.

Ābhidosikanti pārivāsikaṃ ekarattātikkantaṃ pūtibhūtaṃ. Ekarattātikkantasessa hi nāmasaññā esā, yadidaṃ ābhidosikoti. Ayaṃ panettha vacanatto – pūtibhāvadosena abhibhūtoti abhidoso, abhidoso yeva **ābhidosiko**. **Kummāsanti** yavakummāsaṃ. **Adhivāsetvāti** “tena hi, tāta raṭṭhapāla, adhivāsehi svātanāya bhatta’’nti pitarā nimantito svātanāya bhikkhaṃ adhivāsetvā. Ettha ca thero pakatiyā ukkaṭṭhasapadānacāriko svātanāya bhikkhaṃ nāma nādhivāseti, mātu anuggahena pana adhivāseti. Mātu kirassa theram anussarivā anussarivā mahāsoko uppajjati, rodaneneva dukkhī viya jātā, tasmā thero “sacāhaṃ taṃ apassivā gamissāmi, hadayampissā phaleyyā’’ti anuggahena adhivāsesi. Paṇḍitā hi bhikkhū mātipitūnaṃ ācariyupajjhāyānaṃ vā kātappaṃ anuggahaṃ ajjuhekkhitvā dhutaṅgasuddhikā na bhavanti.

Alaṅkatapaṭiyatte itthijaneti pitarā uyyojite itthijane. Pitā kirassa dutiyadvise sakanivesane mahantaṃ hiraññasuvannaṃ puñjaṃ kārapetvā kilañjehi paṭicchādāpetvā āyasmato raṭṭhapālassa purāṇadutiyaikāyo “etha tumhe vadhū, yena alaṅkārena alaṅkatā pubbe raṭṭhapālassa kulaputtassa piyā hotha manāpā, tena alaṅkārena alaṅkarothā’’ti āṇāpetvā paṇītaṃ khādanīyaṃ bhojanīyaṃ paṭiyādāpetvā kāle ārocite āgantvā paññatte āsane nisinnaṃ “idaṃ te, raṭṭhapāla, mattikaṃ dhanam, aññaṃ pettikaṃ, aññaṃ pitāmaṃ; sakkā, tāta raṭṭhapāla, bhoge ca bhujjituṃ, puññāni ca kātuṃ? Ehi tvaṃ, tāta raṭṭhapāla, sikkhaṃ paccakkhāya hīnāyāvattitvā bhoge ca bhujjassu, puññāni ca karohī’’ti yācitvā tena paṭikkhipitvā dhamme desite “ahaṃ imaṃ uppabbājessāmī’’ti ānayaṃ, so “dāni me dhammakathaṃ kātuṃ āraddho, alaṃ me vacanaṃ na karissatī’’ti uṭṭhāya gantvā tassa orodhānaṃ dvāraṃ vivarāpetvā “ayaṃ vo sāmiko, gacchatha, yaṃ kiñci katvāna gaṇhituṃ vāyamathā’’ti uyyojesi. Tīsu vāyesu ṭhitā nāṭakitthiyo theram parivārayiṃsu. Tāsu ayaṃ asubhasaññaṃ uppādesi. Tena vuttaṃ – “**alaṅkatapaṭiyatte itthijane asubhasaññaṃ uppādetvā**’’ti.

Ṭhitakova dhammaṃ desetvāti –

“Passa cittakataṃ bimbaṃ, arukāyaṃ samussitaṃ;
Āturaṃ bahusaṅkappaṃ, yassa natthi dhavaṃ ṭhiti.

“Passa cittakataṃ rūpaṃ, mañinā kuṇḍalena ca;
Aṭṭhiṃ tacena onaddhaṃ, saha vatthehi sobhati.

“Alattakakatā pādā, mukhaṃ cuṇṇakamakkhitaṃ;
Alaṃ bālassa mohāya, no ca pāragavesino.

“Aṭṭhāpadakatā kesā, nettā añjanamakkhitaṃ;
Alaṃ bālassa mohāya, no ca pāragavesino.

“Añjanīvaṇṇavā cittā, pūtikāyo alaṅkato;
Alaṃ bālassa mohāya, no ca pāragavesino.

“Odahi migavo pāsaṃ, nāsadā vāguraṃ migo;
Bhuvā nivāpaṃ gacchāmi, kandante migabandhake’’ti. (ma. ni. 2.302; theragā. 769-774) –

Imāhi gāthāhi dhammaṃ desetvā.

Ākāsaṃ uppattivāti ākāsaṃ pakkhanditvā. Kasmā pana thero ākāsenā gato? Pitā kirassa seṭṭhi sattu dvārakoṭṭhakesu aggaḷāni dāpetvā malle āṇāpesi “sace nikkhamitvā gacchati, hatthapādesu naṃ gahetvā kāsāyāni haritvā gihivesaṃ gaṇhāpethā”ti. Tasmā thero “ete mādisaṃ mahākhīṇāsavaṃ hatthe vā pāde vā gahetvā apuññaṃ pasaveyyuṃ, taṃ nesaṃ mā ahoṣi”ti cintetvā ākāsenā agamāsi. **Migacīranti** evaṃnāmakāṃ uyyānaṃ. **Catupārijuññaṃ paṭimaṇḍitanti** jarāpārijuññaṃ, byādhipārijuññaṃ, bhogapārijuññaṃ, nātipārijuññanti imehi catūhi pārijuññehi paṭimaṇḍitaṃ. **Pārijuññanti** ca parihānīti attho. Sesamettha suviññeyyameva.

Kuṇḍadhānattheravatthu

211. Tatiye salākaṃ gaṇhantīti **salākagāhaka**. Sunāparantajanapadaṃ gacchantepi paṭhamameva salākaṃ gaṇhīti sambandho. **Chabbassantareti** channaṃ vassānaṃ abbhantare. **Mettīti** mittabhāvo. **Bhedake satīti** bhedakaraṇe satī. **Gumbasabhāgatoti** gumbasamīpato, ayameva vā pāṭho. **Itthī hutvāti** itthī viya hutvā, manussitthivaṇṇaṃ māpetvāti attho. **Dīgharattānugatoti** dīghakālaṃ anubandho. **Ettakaṃ addhānanti** ettakaṃ kālaṃ. **Handāvusoti** gaṇhāvuso. **Atthaṃ gahetvāti** bhūtattaṃ gahetvā, ayameva vā pāṭho. **Koṇḍo jātoti** dhutto jāto.

Māvoca pharusaṃ kañcīti kañci ekapuggalaṃ pharusaṃ mā avoca. **Vuttā paṭivadeyyu tanti** tayā pare dussīlāti vuttā tampi tatheva paṭivadeyyuṃ. **Dukkha hi sārāmbhakathāti** esā kāraṇuttarā yugaggāhakathā nāma dukkhā. **Paṭidaṇḍā phuseyyu tanti** kāyadaṇḍādīhi paraṃ paharantassa tādisāva paṭidaṇḍā tava matthake pateyyuṃ.

Sace neresi attānanti sace attānaṃ niccalaṃ kātuṃ sakkhissasi. **Kaṃso upahato yathāti** mukhavaṭṭiyaṃ chinditvā talamattaṃ katvā ṭhapitaṃ kaṃsatālaṃ viya. Tādīsañhi hatthehi pādehi daṇḍena vā pahatampi saddaṃ na karoti. **Esā pattosi nibbānanti** sace evarūpo bhavituṃ sakkhissasi, imaṃ paṭipadaṃ pūrayamāno eso tvaṃ idāni appattopi nibbānaṃ pattosi nāma. **Sārāmbho te na vijjati** “evañca satī tvaṃ dussīlo, ahaṃ susīlo”ti evamādiko uttarikaraṇavācālakkhaṇo sārāmbho te na vijjati, na bhavissatiyevāti attho. **Parikkilesenāti** saṃkilesahetunā.

Vaṅḍisattheravatthu

212. Catutthe **sampannapaṭibhānānanti** paripuṇṇapaṭibhānānaṃ. **Cutiṃ yo vedi...pe... sabbasoti** yo sattānaṃ cutiñca paṭisandhiñca sabbākārena pākaṭaṃ katvā jānāti, taṃ ahaṃ alagganaṭāya **asattaṃ**, paṭipattiyā suṭṭhu gatattā **sugataṃ**, catunnaṃ saccānaṃ sambuddhattā **buddhaṃ** brāhmaṇaṃ vadāmīti attho. **Yassa gatinti** yassete devādayo gatiṃ na jānanti, tamahaṃ āsavānaṃ khīṇatāya **khīṇāsavaṃ**, kilesehi ārakattā **arahantaṃ** brāhmaṇaṃ vadāmīti attho.

Upasenaṅgantaputtattheravatthu

213. Pañcame **sabbapāsādikānanti** sabbaso pasādaṃ janentānaṃ. **Kintāyanti** kiṃ te ayaṃ. **Atilahunti** atisīghaṃ. Yassa tasmīṃ attabhāve uppajjanārahānaṃ maggaphalānaṃ upanissayo natthi, taṃ buddhā “moghapuriso”ti vadanti ariṭṭhalāludāyīdike viya. Upanissaye satipi tasmīṃ khaṇe magge vā phale vā asati “moghapurīsā”ti vadantiyeva dhaniyattherādike viya. Imassapi tasmīṃ khaṇe maggaphalānaṃ abhāvato “moghapurīsā”ti āha, tucchamanussāti attho. **Bāhullāyāti** parisabāhullāya. **Anekapariyāyenāti** anekakāraṇena.

Icehāmahaṃ, bhikkhavi bhagavā kira taṃ addhamāsaṃ na kañci bodhaneyyasattaṃ addasa, tasmā evamāha, evaṃ santepi tantivasena dhammadesanā kattabbā siyā. Yasmā panassa etadahosi – “mayi okāsaṃ kāretvā paṭisallīne bhikkhū adhammikaṃ katikavattaṃ karissanti, taṃ upaseno bhindissati, ahaṃ tassa pasīditvā bhikkhūnaṃ dassanaṃ anujānissāmi. Tato maṃ passitukāmā bahū bhikkhū dhutaṅgāni samādiyissanti, ahañca tehi ujjhitasanthatapaccayā sikkhāpadaṃ paññāpessāmi”ti, tasmā evamāha. **Therassāti** upasenaṭtherassa. **Manāpāni te bhikkhu paṃsukulānīti** “bhikkhu tava imāni paṃsukulāni

manāpāni attano ruciyā khantiyā gahitānī”ti pucchati. **Na kho me, bhante, manāpāni paṃsukūlānīti**, bhante, na mayā attano ruciyā khantiyā gahitāni, galaggāhena viya matthakatālanena viya ca gāhito mayāti dasseti. **Pāliyaṃ āgatamevāti** vinayapāliṃ sandhāya vadati.

Dabbattheravatthu

214. Chatṭhe **aṭṭhārasasu mahāvihāresūti** rājagahassa samantato ṭhitesu aṭṭhārasasu mahāvihāresu. **Upavijaññāti** āsannapasūtikalā. **Rahogatoti** rahasi gato. **Saṅghassa veyyāvaccakaraṇe kāyaṃ yojetukāmo cintesūti** thero kira attano katakiccabhāvaṃ disvā “ahaṃ imaṃ sarīraṃ dhāremi, tañca kho vātamukhe ṭhitapadīpo viya aniccatāmukhe ṭhitaṃ nacirasseva nibbāyanadhammaṃ yāva na nibbāyati, tāva kiṃ nu kho ahaṃ saṅghassa veyyāvaccamaṃ kareyya”nti cinto iti paṭisañcikkhati “tīroratṭhesu bahū kulaputtā bhagavantaṃ adisvāva pabbajanti, te ‘bhagavantaṃ passissāma ceva vandissāmā’ti ca dūratopi āgacchanti, tatra yesaṃ senāsanamaṃ nappahoti, te silāpattakepi seyyamaṃ kappenti. Pahomi kho panāhamaṃ attano ānubhāvena tesamaṃ tesamaṃ kulaputtānaṃ icchāvasena pāsādavihāraaḍḍhayogādāni mañcapīṭhattharaṇāni nimminivā dātuṃ? Punadivase cettha ekacce ativiya kilantarūpā honti, te gāravena bhikkhūnaṃ purato ṭhatvā bhattānīpi na uddisāpenti, ahaṃ kho pana tesamaṃ bhattānīpi uddisituṃ pahomī”ti. Iti paṭisañcikkhanto “yaṃnūnāhamaṃ saṅghassa senāsanāñca paññapeyyamaṃ, bhattāni ca uddiseyya”nti cintesi. **Sabhāgasabhāgānanti** suttantikādiguṇavasena sabhāgānaṃ, na mittasanthavavasena. Thero hi yāvaticā suttantikā honti, te uccinivā uccinivā ekato tesamaṃ anurūpameva senāsanamaṃ paññapeti. Venayikābhiddhammikakammaṭṭhānikakāyadaḥhibahulesupi eseva nayo. Teneva **pāliyaṃ** (pārā. 380) vuttaṃ – “yete bhikkhū suttantikā, tesamaṃ ekajjhaṃ senāsanamaṃ paññapetī”tiādi.

Āṅguliyaṃ jalamānāyāti tejokasiṇacatutthajjhānaṃ samāpajjitvā vuṭṭhāya abhiññāñāṇena āṅgulijalanaṃ adhiṭṭhahitvā teneva tejodhātusamāpattijanitena aggijālena āṅguliyaṃ jalamānāya. **Ayaṃ mañcotiādisu** pana there “ayaṃ mañco”tiādiṃ vadante nimmitāpi attano attano gataṭṭhāne “ayaṃ mañco”tiādiṃ vadanti. Ayañhi nimmitānaṃ dhammatā.

“Ekasmiṃ bhāsamānasmīṃ, sabbe bhāsanti nimmitā;
Ekasmiṃ tuṇhimāsine, sabbe tuṇhī bhavanti te”ti. (dī. ni. 2.286);

Yasmiṃ pana vihāre mañcapīṭhādāni na paripūrenti, tattha attano ānubhāvena pūrenti, tena nimmitānaṃ avatthukaṃ vacanaṃ na hoti sabbattha mañcapīṭhādānaṃ sabbhāvato. Sabbavihāresu ca gamanamagge samappamāṇe katvā adhiṭṭhāti. Katikasaṅṭhānādānaṃ pana nānappakāratā tasmiṃ tasmiṃ vihāre katikavattāni visuṃ visuṃ kathāpetīti vedītabbamaṃ. Aniyamtvā nimmitānañhi “ekasmiṃ bhāsamānasmī”ntiādidhammatā vuttā. Tathā hi ye vaṇṇavayasārīrāvayavaparikkhāriyāvīsesādīhi niyamaṃ akatvā nimmitā honti, te aniyamtvā nimmitatā iddhitatā sadisāva honti. Ṭhānanisajjādīsu bhāsītatūṇhībhāvādīsu vā yaṃ yaṃ iddhitatā karoti, taṃ tadeva karonti. Sace pana nānappakāre kātukāmo hoti, keci paṭhamavaye, keci majjhimavaye, keci pacchimavaye, tathā dīghakese upaḍḍhamuṇḍe missakakese upaḍḍharattacīvare paṇḍukacīvare, padabhāṇadhammakathāsaraḥhaññapañhapucchanapañhavissajjanarajanapacanacīvarasibbanadhovanādāni karonte, aparepi vā nānappakāre kātukāmo hoti, tena pādakajjhānato vuṭṭhāya “ettakā bhikkhū paṭhamavayā hontū”tiādinā nayena parikammaṃ katvā puna samāpajjitvā vuṭṭhāya adhiṭṭhite adhiṭṭhānacittena saddhiṃ icchīticchītapakārayeva honti. **Puna attano vasanaṭṭhānameva āgacchatīti** tehi saddhiṃ janapadakathaṃ kathento anisīditvā attano vasanaṭṭhānaṃ veḷuvanameva paccāgacchati. **Pāliyanti** vinayapāliyaṃ.

Pilindavacchattheravatthu

215. Sattame **piyānanti** piyāyitabbānaṃ. **Manāpānanti** manavaḍḍhanakānaṃ. **Pilindoti panassa gottamaṃ, vacchoti nāmaṃ** ettha vuttavipariyāyenapi vadanti “pilindoti nāmaṃ, vacchoti gotta”nti. Teneva ācariyadhammapālattherena **theragāthāsamaṇṇanāya** (theragā. aṭṭha. 1.8 pilindavacchattheragāthāvaṇṇanā) vuttaṃ – “pilindotissa nāmaṃ akaṃsu, vacchoti pana gottamaṃ. Tena so

aparabhāge pilindavacchoti paññāyitthā”ti. **Saṃsandetvāti** ekato katvā.

Satthu dhammadesanaṃ sutvā paṭiladdhasaddho pabbajitvāti idaṃ aṅguttarabhāṇakānaṃ kathāmaggena vuttaṃ. Apare pana bhaṇanti – anuppanneyeva amhākaṃ bhagavati sāvatthiyaṃ brāhmaṇagehe nibbattitvā pilindavacchoti paññāto saṃsāre saṃvegabahulatāya paribbājakapabbajjaṃ pabbajitvā cūlagandhāraṃ nāma vijjaṃ sādhetvā ākāsaṅgāri paracittavidū ca hutvā rājagahe lābhaggayasaggappatto paṭivasati. Atha yadā amhākaṃ bhagavā abhisambuddho hutvā anukkamena rājagahaṃ upagato, tato paṭṭhāya buddhānubhāvena tassa sā vijjā na sampajjati, atthakiccaṃ na sādheti. So cintesi – “sutaṃ kho pana metaṃ ‘ācariyapācariyānaṃ bhāsamānānaṃ yattha mahāgandhāravijjā dharati, tattha cūlagandhāravijjā na sampajjati”ti. Samaṇassa pana gotamassa āgatakālato paṭṭhāya nāyaṃ mama vijjā sampajjati, nissaṃsayāṃ samaṇo gotamo mahāgandhāravijjaṃ jānāti, yannūnāhaṃ taṃ payirupāsivā tassa santike vijjaṃ pariyāpuṇeyya”nti. So bhagavantaṃ upasaṅkamtivā etadavoca – “ahaṃ, mahāsamaṇa, tava santike ekaṃ vijjaṃ pariyāpuṇitukāmo, okāsaṃ me karohī”ti. Bhagavā “tena hi pabbajā”ti āha. So “vijjāya parikkammaṃ pabbajjā”ti maññamāno pabbajīti. **Paravambhanavasena**ti paresaṃ garahanavasena.

Akakkasanti aphaṇusaṃ. **Viññāpaninti** atthaviññāpaniṃ. **Saccanti** bhūtatthaṃ. **Nābhisajeti** yāya girāya aññaṃ kujjhāpanavasena na lagāpeyya, khīṇāsavo nāma evarūpameva giraṃ na bhāseyya, tasmā tamahaṃ brūmi brāhmaṇaṃ vadāmīti attho.

Anuvicinitvāti anuvicāretvā. **Caṇḍikataṃ gacchantanti** sīghagatiyā gacchantāṃ.

Bāhiyadārucīriyattheravatthu

216. Aṭṭhame **ekarattivāse**na gantvāti devatānubhāvena gantvā. “Buddhānubhāvenā”tipi vadanti. Evaṃ gato ca vihāraṃ pavisitvā sambahule bhikkhū bhuttapātarāse kāyālasiyavimocanattāya abbhokāse caṅkamante disvā “kahaṃ etarahi satthā”ti pucchi. Bhikkhū “sāvatthiyaṃ piṇḍāya pavitṭho”ti vatvā taṃ pucchimsu – “tvaṃ pana kuto āgato”ti? Suppārakā āgatomhīti. Kadā nikkhantosīti? Hiyyo sāyaṃ nikkhantomhīti. Dūrato āgato, tava pāde dhovitvā telena makkhetvā thokaṃ vissamāhi, āgatakāle satthāraṃ dakkhissatīti. Ahaṃ, bhante, satthu vā attano vā jīvitantarāyaṃ na jānāmi, ekarattenevamhi katthaci aṭṭhatvā anisīditvā vīsayojanasatikaṃ maggaṃ āgato, satthāraṃ passitvāva vissamissāmīti. So evaṃ vatvā taramānarūpo sāvattim pavisitvā bhagavantaṃ anopamāya buddhasiriyā piṇḍāya carantaṃ disvā “cirassaṃ vata me diṭṭho sammāsambuddho”ti diṭṭhatṭhānato paṭṭhāya oṇatasarīro gantvā antaravīthiyameva pañcapatitṭhitena vanditvā gopphakesu daḷhaṃ gahetvā evamāha – “desetu me, bhante, bhagavā dhammaṃ, desetu me sugato dhammaṃ, yaṃ mamassa dīgharattaṃ hitāya sukhāyā”ti.

Atha naṃ satthā “akālo kho tāva, bāhiya, antaragharaṃ pavitṭhomhi piṇḍāyā”ti paṭikkhipi. Taṃ sutvā bāhiyo, “bhante, saṃsāre saṃsarantena kabalīkārahāro na no laddhapubbo, tumhākaṃ vā mayhaṃ vā jīvitantarāyaṃ na jānāmi, desetha me dhamma”nti. Satthā dutiyampi paṭikkhipiyeva. Evaṃ kirassa ahoṣi “imassa maṃ diṭṭhakālato paṭṭhāya sakalasarīraṃ pītiyā niraṇṭaraṃ ajjhotthaṃ hoti, balavapītiyavegena dhammaṃ sutvāpi na sakkhissati paṭivijjhitaṃ, majjhattupekkaṃ tāva tiṭṭhatu, ekaratteneva vīsayojanasataṃ maggaṃ āgatattā darathopissa balavā, sopi tāva paṭippassambhatū”ti. Tasmā dvikkhattuṃ paṭikkhipitvā tatiyaṃ yācito antaravīthiyaṃ tithova “tasmātiha te, bāhiya, evaṃ sikkhitabbaṃ diṭṭhe diṭṭhamattaṃ bhavissatī”tiādinaṃ (udā. 10) nayena dhammaṃ deseti. Imamatthaṃ saṃkhipitvā dassento “**satthāraṃ piṇḍāya pavitṭha**”ntiādimāha. Tattha **antaraghareti** antaravīthiyaṃ.

Aparipuṇṇapattacīvaratāya pattacīvaraṃ pariyesantoti so kira vīsativassasahassāni samaṇadhammaṃ karonto “bhikkhunā nāma attano paccaye labhitvā aññaṃ anoloketvā sayameva bhujjitaṃ vaṭṭati”ti ekabhikkhussaṃ pātana vā cīvarena vā saṅghaṃ nākaṣi. Tenassa “iddhimayapattacīvaraṃ na uppajjissatī”ti nītvā ehibhikkhubhāvena pabbajjaṃ na adāsi. Tāvadeva ca pabbajjaṃ yācito “paripuṇṇaṃ te pattacīvara”nti pucchitvā “aparipuṇṇa”nti vutte “tena hi pattacīvaraṃ pariyesāhī”ti vatvā pakkāmi. Tasmā so pattacīvaraṃ pariyesanto saṅkārattṭhānato colakhaṇḍāni saṃkaḍḍhati.

Sahassamapīti paricchedavacanam. Ekasahassam dvesahassānīti evaṃ sahasena ce paricchinnā gāthā honti, tā ca **anattapadasaṃhitā** ākāsaṃvaṇṇapabbatavaṇṇādīni pakāsakehi anibbānadīpakehi anattakehi padehi saṃhitā yāva bahukā honti, tāva pāpikā evāti attho. **Ekam gāthapadam seyyoti** “appamādo amatapadam...pe... yathā matā”ti (dha. pa. 21) evarūpā ekagāthāpi seyyoti attho.

Kumārakassapattheravatthu

217. Navame **ekam buddhantaram sampattiṃ anubhavamānoti** sāvaka bodhiyā niyatatāya puññasambhāraṃ ca sātisayattā vinipātaṃ agantvā ekam buddhantaram deveṣu ca manussesu ca sampattiṃ anubhavamāno. “**Ekissā kuladārikāya kucchimhi uppanno**”ti vatvā tamevassa uppannabhāvaṃ mūlato paṭṭhāya dassetuṃ – “**sā cā**”tiādi vuttaṃ. Tattha **sāti kuladārikā. Ca-saddo** byatirekattho. Tena vuccamānaṃ viṣesaṃ jotayati. **Kulagharanti** patikulagehaṃ. **Gabbhanimittanti** gabbhassa saṅghitabhāvaviggahaṃ. Satipi visākhāya sāvathivāsikulapariyāpannatte tassā tattha padhānabhāvadassanattamaṃ “**visākhañcā**”tiādi vuttaṃ yathā “brāhmaṇā āgatā, vāsītthopi āgato”ti. Bhagavatā evaṃ gahitanāmattāti yojanā. Yasmā rājaputtā loke “kumārā”ti voharīyanti, ayañca rañño kittimaputto, tasmā āha – “**rañño...pe... sañjānimsū**”ti.

Pañcadasa pañhe abhisāṅkharitvāti “bhikkhu, bhikkhu, ayaṃ vammiko rattim dhūpāyati, divā pajjalatī”tiādinā **vammikasutte** (ma. ni. 1.249) āgatanayena pañcadasa pañhe abhisāṅkharitvā. **Pāyāsiraññoti** “natthi paraloko, natthi sattā opapātikā, natthi sukata dukkaṭānaṃ kammānaṃ phalaṃ vipāko”ti (dī. ni. 2.410, 412) evaṃladdhikassa pāyāsiraññassa. Rājā hi tadā anabhisitto hutvā pasenadinā kosalena dinnasetabyanagaraṃ ajjhāvasanto imaṃ dīṭṭhiṃ gaṇhi. **Pañcadasahi pañhehi paṭimaṇḍetvāti** “taṃ kiṃ maññasi, rājāñña, ime candimasūriyā imasmim vā loke parasmim vā devā vā te manussā”ti evamādīhi (dī. ni. 2.411) pañcadasahi pañhehi paṭimaṇḍitaṃ katvā. **Suttanteti** pāyāsīsuttante (dī. ni. 2.406 ādayo).

Mahākoṭṭhikattheravatthu

218. Dasamaṃ uttānatthameva.

Tatiyaetadaggavaggavaṇṇanā niṭṭhitā.

14. Etadaggavaggo

(14) 4. Catutthaetadaggavaggavaṇṇanā

Ānandattheravatthu

219-223. Catutthavaggassa paṭhame **heṭṭhā vuttappamāṇanti** heṭṭhā koṇḍaññattherassa vatthumhi “tassa dhurapattāni navutihatthāni honti, kesaraṃ tiṃsahattham, kaṇṇikā dvādasahatthā, pādena patitṭhitatṭhānaṃ ekādasahatthā”nti evaṃ vuttappamāṇaṃ. **Rañño pesesīti** paccantassa kupitabhāvaṃ ārocetvā pesesi. **Theragāthāsaṃvaṇṇanāyaṃ** (theragā. aṭṭha. 2.1016 ānandattheragāthāvaṇṇanā) pana “paccantassa kupitabhāvaṃ rañño anārocetvā sayameva taṃ vūpasamesi, taṃ sutvā rājā tuṭṭhamānaso puttaṃ pakkosāpetvā “varaṃ te, sumana, dammi, gaṇhāhī”ti āhā”ti vuttaṃ. **Na metaṃ cittaṃ atthīti** mama evarūpaṃ cittaṃ natthi. **Avañjhanti** atucchaṃ. **Aññaṃ varehīti** aññaṃ patthehi, aññaṃ gaṇhāhīti vuttaṃ hoti. **Udakaṃ adhiṭṭhāyāti** “udakaṃ hotū”ti adhiṭṭhahitvā. **Gatenāti** gamanena. **Na āmisacakkhukāti** cīvarādīpaccayasāṅkhātaṃ āmisam na olokenti.

Vasanaṭṭhānasabhāgeyevāti vasanaṭṭhānasamīpeyeva. **Ekantavallabhoti** upaṭṭhākatṭhāne ekantena vallabho. **Etassevāti** etasseva bhikkhussa. **Dvejjhakathā na hontīti** dvidhābhūtakathā na honti, anekantikakathā na hontīti vuttaṃ hoti. **Anibaddhāti** aniyatā. **Lohitena galantenāti** itthambhūtakkhāne karaṇavacanāṃ, galantena lohiteṇa yuttoti attho. **Anvāsattoti** anugato. **Uṭṭhehi, āvuso ānanda, uṭṭhehi,**

āvuso ānandāti turite idamāmeḍitavacaṇaṃ. **Duvidhena udakenā**ti sītudakena uṇhudakena ca. **Tividhena dantakatṭhena**ti khuddakaṃ mahantaṃ majjhimanti evaṃ tippakārena dantakatṭhena. **Nava vāre anupariyāyati**ti satthari pakkosante paṭivacanaḍānāya thinamiddhavinodanattaṃ navakkhattuṃ anupariyāyati. Tenevāha – “**evaṇhissa aho**si”tiādi. Sesamettha suviññeyyameva.

Uruvelakassapattheravatthu

224. Dutiye yaṃ vattabbaṃ, taṃ vitthārato vinayapāḷiyaṃ āgatameva.

Kāḷudāyittheravatthu

225. Tatiye **gamaṇākappanti** gamaṇākāraṃ. Sesamettha uttānameva.

Bākulattheravatthu

226. Catutthe **nirābādhānanti** ābādharahitānaṃ. Yathā “dvāvīsati dvattiṃsā”tiādimhi vattabbe “bāvīsati bāttiṃsā”tiādīni vuccanti, evamevaṃ dve kulāni assāti dvikulo, dvekuloti vā vattabbe bākuloti vuttanti āha – “**bākuloti dvīsu kulesu vaḍḍhitattā evaṃladdhanāmo**”ti. **Upayogenā**ti ānubhāvena. **Phāsukakāleti** arogakāle. **Gadduhanamattampī**ti goduhanamattampi kālaṃ. Idha pana na sakalo goduhanakkhaṇo adhippeto, atha kho gāviṃ thane gahetvā ekakhīrabinduduhanakālamattaṃ adhippettaṃ. **Ārogyasālanti** āturānaṃ arogabhāvakarāṇatthāya katasālaṃ.

Nimujjanummuḷjanavasenati jāṇuppaṃāṇe uḍake thokaṃyeva nimujjanummuḷjanavasena. **Chaḍḍetvā palāyī**ti macchassa mukhasamīpeyeva chaḍḍetvā palāyī. **Dārakassa tejenā**ti dārakassa puññatejena. **Māriyamānāva maranti**ti daṇḍādīhi pothetvā māriyamānāva maranti, na jālena baddhatāmattena amāriyamānā. **Nīhaṭamattova matoti** nīhaṭakkhaṇeyeva mato. Tenassa māraṇattaṃ upakkamo na kato, yena upakkamena dārakassa ābādhō siyā. **Tanti** macchaṃ. **Sakalamevā**ti avikalameva paripuṇṇāvayavameva. **Na keḷāyati**ti na nandati, kismiñci na maññati. **Piṭṭhito phālentī**ti dārakassa puññatejena piṭṭhito phālentī. **Bheriṃ carāpetvā**ti “puttaṃ labhi”nti ugghosanaḍasena bheriṃ carāpetvā. **Pakatiṃ ācikkhī**ti attano puttabhāvaṃ kathesi. **Kucchiyā dhāritattā amātā kātuṃ na sakkā**ti janaṇībhāvato amātā kātuṃ na sakkā. **Macchaṃ gaṇhantāpī**ti macchaṃ vikkīṇitvā gaṇhantāpī. Tathā gaṇhantā ca tappariyāpannaṃ sabbaṃ gaṇhanti nāmāti āha – “**vakkayakanādīni bahi katvā gaṇhantā nāma natthī**”ti. **Ayampi amātā kātuṃ na sakkā**ti dinnaputtabhāvato na sakkā.

Sobhitattheravatthu

227. Pañcamaṃ uttānatthameva.

Upāliththeravatthu

228. Chaṭṭhe **bhārukacchakavatthunti** aññataro kira bhārukacchadesavāsī bhikkhu supinante purāṇadutiyaikāya methunaṃ dhammaṃ paṭisevitvā “assamaṇo ahaṃ vibbhamissāmī”ti bhārukacchaṃ gacchanta antarāmagge āyasmantaṃ upāliṃ passitvā etamattaṃ ārocesi. Āyasmā upāli, evamāha – “anāpatti, āvuso, supinanteṇā”ti. Yasmā supinante avisayattā evaṃ hoti. Tasmā upāliththero bhagavatā avinicchitapubbampi imaṃ vatthuṃ nayaggāhena evaṃ vinicchini. Gahapatino dve dārakā honti putto ca bhāgineyyo ca. Atha so gahapati gilāno hutvā āyasmantaṃ ajjukaṃ etadavoca – “imaṃ, bhante, okāsaṃ yo imesaṃ dārakānaṃ saddho hoti pasanno, tassa ācikkheyyāsī”ti. Tena ca samayena tassa ca gahapatino bhāgineyyo saddho hoti pasanno. Athāyasmā ajjuko taṃ okāsaṃ tassa dārakassa ācikkhī. So tena sāpateyyena kuṭumbaṇca saṇṭhapesi, dānaṇca paṭṭhapesi. Atha tassa gahapatino putto āyasmantaṃ ānandaṃ etadavoca – “ko nu kho, bhante ānanda, pituno dāyajjo putto vā bhāgineyyo vā”ti. Putto kho, āvuso, pituno dāyajjoti. Āyasmā, bhante, ayyo ajjuko amhākaṃ sāpateyyaṃ amhākaṃ methunakassa ācikkhīti. Assamaṇo, āvuso, so ajjukoti. Athāyasmā ajjuko āyasmantaṃ ānandaṃ etadavoca – “dehi me, āvuso

ānanda, vinicchaya’’nti. Te ubhopi upālittherassa santikaṃ agamaṃsu. Athāyasmā upāli, āyasmantaṃ ānandaṃ etadavoca – ‘‘yo nu kho, āvuso ānanda, sāmikena ‘imaṃ okāsaṃ itthannāmassa ācikkhā’’ti vutto, tassa ācikkhati, kiṃ so āpajjati’’ti? Na, bhante, kiñci āpajjati antamaso dukkaṭamatthampīti. Ayaṃ, āvuso, āyasmā ajjuko sāmikena ‘‘imaṃ okāsaṃ itthannāmassa ācikkhā’’ti vutto tassa ācikkhati, anāpatti, āvuso, āyasmato ajjukassāti. Bhagavā taṃ sutvā ‘‘sukathitaṃ, bhikkhave, upālinā’’ti vatvā sādhuḥkāramadāsi, taṃ sandhāyetaṃ vuttaṃ. **Kumārakassapavatthu** (a. ni. aṭṭha. 1.1.217) pana heṭṭhā āgatameva.

Channaṃ khattiyānanti bhaddiyo sakyaṛājā anuruddho ānando bhagu kimilo devadattoti imesaṃ channaṃ khattiyānaṃ. **Pasādhakoti** maṇḍayitā. **Pāḷiyanti** saṅghabhedakkhandhakapāḷiyanti (cūḷava. 330 ādayo).

Nandakattheravatthu

229. Sattame **ekasamodhāneti** ekasmiṃ samodhāne, ekasmiṃ sannipāteteti attho. Sesam suviññeyyameva.

Nandattheravatthu

230. Aṭṭhame **na taṃ catusampajaññavasena aparicchinditvā oloketi** sātthakasappāyagocaraasammohasampajaññasankhātānaṃ catunnaṃ sampajaññānaṃ vasena aparicchinditvā taṃ disaṃ na oloketi. So hi āyasmā ‘‘yamevāhaṃ indriyesu aguttadvārataṃ nissāya sāsane anabhiratiādivippakārapatto, tameva suṭṭhu niggahessāmī’’ti ussāhajāto balavahirottappo, tattha ca katādhikārattā indriyasamvaro ukkaṃsapāramippatto catusampajaññaṃ amuñcivāva sabbadisam āloketi. Vuttañcetaṃ bhagavatā –

‘‘Sace, bhikkhave, nandassa puratthimā disā āloketabbā hoti, sabbaṃ cetaso samannāharitvā nando puratthimaṃ disaṃ āloketi ‘evaṃ me puratthimaṃ disaṃ ālokeyato nābhijjhādomanassā pāpakā akusalā dhammā anvāsavissanti’’ti. Itiha tattha sampajāno hoti. Sace, bhikkhave, nandassa pacchimā disā, uttarā disā, dakkhiṇā disā, uddhaṃ, adho, anudisā anuviloketabbā hoti, sabbaṃ cetaso samannāharitvā nando anudisaṃ anuviloketi ‘evaṃ me anudisaṃ anuvilokayato...pe... sampajāno hoti’’ti (a. ni. 8.9).

Abhisekagehapavesanaāvāhamaṅgalesu vattamānesūti idha tīṇi maṅgalāni vuttāni, vinayaṭṭhakathāyaṃ pana ‘‘taṃ divasameva nandakumārassa kesavissajjanaṃ, paṭṭabandho, ghamaṅgalaṃ, chattamaṅgalaṃ, āvāhamaṅgalanti pañca maṅgalāni hontī’’ti vuttaṃ. Tattha kulamariyādasena kesoropanaṃ **kesavissajjanaṃ**. Yuvarājapaṭṭabandhanaṃ **paṭṭabandho**. Abhinavagharappavesanamaho **ghamaṅgalaṃ**. Vivāhakarāṇamaho **āvāhamaṅgalaṃ**. Yuvarājachattamaṃ **chattamaṅgalaṃ**.

Nandakumāraṃ abhisekamaṅgalaṃ na tathā pīlesi, yathā janapadakalyāṇiyā vuttavacananti ajjhāharitabbaṃ. Tadeva pana vacanaṃ sarūpato dassetuṃ – ‘‘**pattaṃ ādāya gamanakāle**’’tiādi vuttaṃ. **Janapadakalyāṇi** janapadamhi kalyāṇī uttamā cha sarīradosarahitā pañca kalyāṇasamannāgatā. Sā hi yasmā nātidīghā nātirassā nātikisā nātitūlā nātikālī nāccodātāti atikkantā mānusavaṇṇaṃ, asampattā dibbavaṇṇaṃ, tasmā **cha sarīradosarahitā**. Chavikalyāṇaṃ maṃsakalyāṇaṃ nhārukalyāṇaṃ aṭṭhikalyāṇaṃ vayakalyāṇanti imehi pana kalyāṇehi samannāgatattā **pañca kalyāṇasamannāgatā** nāma. Tassā hi āgantukobhāsakiccaṃ natthi, attano sarīrobhāseneva dvādasahatthe ṭhāne ālokaṃ karoti, piyaṅgusāmā vā hoti suvaṇṇasāmā vā, ayamassā **chavikalyāṇatā**. Cattāro panassā hatthapādā mukhapariyosānañca lākhārasaparikkamaṃ viya rattapavāḷarattakambalasadisaṃ hoti, ayamassā **maṃsakalyāṇatā**. Vīsati pana nakhapattāni maṃsato amuttaṭṭhāne lākhārasapūritāni viya, muttaṭṭhāne khīradhārāsadisāni hontī, ayamassā **nhārukalyāṇatā**. Dvattiṃsa dantā suphusitā sudhotavajirapanti viya khāyanti, ayamassā **aṭṭhikalyāṇatā**. Vīsaṃvassasatikāpi samānā soḷasavassuddesikā viya hoti nippalītena, ayamassā **vayakalyāṇatā**. Iti imehi pañcahi kalyāṇehi samannāgatattā ‘‘janapadakalyāṇī’’ti vuccati.

Tuvaṭanti sīghaṃ.

Imasmiṃ ṭhāne nivattessati, imasmiṃ ṭhāne nivattessatīti cintentamevāti so kira tathāgate gāravavasena “pattaṃ vo, bhante, gaṇhathā”ti vattuṃ avisahanto evaṃ cintesi – “sopānasise pattaṃ gaṇhissatī”ti. Sathā tasmimpī ṭhāne na gaṇhi. Itaro “sopānapādamūle gaṇhissatī”ti cintesi. Sathā tatthāpi na gaṇhi. Itaro “rājaṅgaṇe gaṇhissatī”ti cintesi. Sathā tatthāpi na gaṇhi. Evaṃ “idha gaṇhissati, ettha gaṇhissatī”ti cintentameva sathā vihāraṃ netvā pabbājesi.

Mahākappinattheravatthu

231. Navame **sutavittakoti** dhammassavanapiyo. **Paṭihāarakassāti** dovārikassa. **Saccakārenāti** saccakiriya. **Sathā “uppalavaṇṇā āgacchatū”ti cintesi. Therī āgantvā sabbā pabbājetvā bhikkhunūpassayaṃ gatāti** idaṃ aṅguttarabhāṇakānaṃ kathāmaggaṃ dassentena vuttaṃ. Teneva **dhammapadaṭṭhakathāyaṃ** (dha. pa. aṭṭha. 1.mahākappinattheravatthu) vuttaṃ –

“Tā sathhāraṃ vanditvā ekamantaṃ ṭhitā pabbajjaṃ yāciṃsu. Evaṃ kira vutte sathhā uppalavaṇṇāya āgamaṇaṃ cintesīti ekacce vadanti. Sathhā pana tā upāsikāyo āha – ‘sāvattiṃ gantvā bhikkhunūpassaye pabbājethā’ti. Tā anupubbena janapadacārikaṃ caramānā antarāmagge mahājanena abhihaṭṭasakkārasammānā padasāva vīsayojanasatikaṃ maggaṃ gantvā bhikkhunūpassaye pabbajitvā arahattaṃ pāpuṇiṃsū”ti.

Dhammapīṭiti dhammapāyako, dhammaṃ pivantoti attho. Dhammo ca nāmesa na sakkā bhājanena yāguādīni viya pātuṃ, navavidhaṃ pana lokuttaradhammaṃ nāmakāyena phusanto ārammaṇato sacchikaronto pariññābhīsamayādīhi dukkhādīni ariyasaccāni paṭivijjhanto dhammaṃ pivati nāma. **Sukhaṃ setīti** desanāmetamaṃ, catūhipi iriyāpathehi sukhaṃ viharatīti attho. **Vippasannenāti** anāvilena nirupakkilesena. **Ariyappavediteti** buddhādīhi ariyehi pavedite satipaṭṭhānādibhede bodhipakkhiyadhamme. **Sadā ramatīti** evarūpo dhammapīti vippasannena cetasā viharanto paṇḍiccena samannāgato sadā ramati abhīramati. Bāhitapāpattā “**brāhmaṇā**”ti therāṃ ālapati.

Sāgatattheravatthu

232. Dasame **chabbaggiyānaṃ vacanenāti** kosambikā kira upāsakā āyasmantaṃ sāgataṃ upasaṅkamtivā abhivādetvā ekamantaṃ ṭhitā evamāhaṃsu – “kiṃ, bhante, ayyānaṃ dullabhaṅca manāpaṅca, kiṃ paṭiyādemā”ti? Evaṃ vutte chabbaggiyā bhikkhū kosambike upāsake etadavocuṃ – “atthāvuso kāpotikā, nāma pasannā bhikkhūnaṃ dullabhā ca manāpā ca, taṃ paṭiyādetthā”ti. Atha kosambikā upāsakā ghare ghare kāpotikaṃ pasannaṃ paṭiyādetvā āyasmantaṃ sāgataṃ piṇḍāya carantaṃ disvā etadavocuṃ – “pivatu, bhante, ayyo sāgato kāpotikaṃ pasannaṃ, pivatu, bhante, ayyo sāgato kāpotikaṃ pasanna”nti. Athāyasmā sāgato ghare ghare kāpotikaṃ pasannaṃ pivitvā nagaramhā nikkhamanto nagaradvāre pati. Tena vuttaṃ – “**chabbaggiyānaṃ vacanena sabbagehesu kāpotikaṃ pasannaṃ paṭiyādetvā**”tiādi. Tattha **kāpotikā** nāma kapotapādasamānavāṇṇā rattobhāsā. **Pasannāti** surāmaṇḍassetāṃ adhivacanaṃ. **Vinaye samuṭṭhitanti** surāpānasikkhāpade (pāci. 326 ādayo) āgataṃ.

Rādhatttheravatthu

233. Ekādasame **sathhā sārīputtattherassa saññaṃ adāsīti** brāhmaṇaṃ pabbājetuṃ saññaṃ adāsī, āṇāpesīti vuttaṃ hoti. Bhagavā kira taṃ brāhmaṇaṃ pabbajjaṃ alabhitvā kisaṃ lūkhaṃ dubbaṇṇaṃ uppaṇḍuppaṇḍukajātaṃ disvā bhikkhū āmantesi – “ko, bhikkhave, tassa brāhmaṇassa adhikāraṃ saratī”ti. Evaṃ vutte āyasmā sārīputto bhagavantaṃ etadavoca – “ahaṃ kho, bhante, tassa brāhmaṇassa adhikāraṃ sarāmī”ti. Kiṃ pana tvaṃ, sārīputta, brāhmaṇassa adhikāraṃ sarasīti. Idha me, bhante, so brāhmaṇo rājagahe piṇḍāya carantassa kaṭacchubbhikkhaṃ dāpesi, imaṃ kho ahaṃ, bhante, tassa brāhmaṇassa adhikāraṃ sarāmī”ti. Sādhu sādhu, sārīputta. Kataññuno hi, sārīputta, sappurisā katavedino, tena hi tvaṃ, sārīputta, taṃ brāhmaṇaṃ pabbājehi upasampādehīti. **Aṭṭhuppattiyāṃ āgatoti** alīnacittajātakassa (jā.

1.2.11-12) aṭṭhuppattiyam (jā. aṭṭha. 2.2.alīnacittajātakavaṇṇanā) āgato.

Nidhīnanti tattha tattha nidahitvā ṭhapitānaṃ hiraññasuvaṇṇādīpūrānaṃ nidhikumbhīnaṃ. **Pavattāranti** kicchajīvike duggatamanusse anukampaṃ katvā “ehi, te sukkena jīvanupāyaṃ dassessāmī”ti nidhiṭṭhānaṃ netvā hatthaṃ pasāretvā “imaṃ gahetvā sukhaṃ jīvā”ti ācikkhitāraṃ viya. **Vajjadassinanti** dve vajjadassino “iminā naṃ asāruppena vā khalitena vā saṅghamajjhe niggaṇhissāmī”ti randhagavesako ca, anaññātaṃ nīpanatthāya nītaṃ anuggaṇhanatthāya silādīnamassa vuddhikāmatāya taṃ taṃ vajjaṃ olokanena ullumpanasabhāvasaṅghito ca. Ayaṃ idha adhippeto. Yathā hi duggatamanusso “imaṃ gaṇhāhī”ti tajjetvāpi pothetvāpi nidhiṃ dassente kopam na karoti, pamuditova hoti, evamevaṃ evarūpe puggale asāruppaṃ vā khalitaṃ vā disvā ācikkhante kopo na kātabbo, tuṭṭheneva bhavitabbaṃ. “Bhante, mahantaṃ vo kammaṃ kataṃ mayhaṃ ācariyupajjhāyaṭṭhāne ṭhatvā ovađantehi, punapi maṃ vadeyyāthā”ti pavāretabbameva.

Niggayhavādinti ekacco hi saddhivihārikādīnaṃ asāruppaṃ vā khalitaṃ vā disvā “ayaṃ me mukhodakadānādīhi sakkaccaṃ upaṭṭhahati, sace naṃ vakkhāmi, na maṃ upaṭṭhahissati, evaṃ me parihāni bhavissatī”ti taṃ vattuṃ avisahanto na niggayhavādī nāma hoti, so imasmiṃ sāsane kacavaraṃ ākirati. Yo pana tathārūpaṃ vajjaṃ disvā vajjānurūpaṃ tajjento paṇāmento daṇḍakammaṃ karonto vihāra nīharanto sikkhāpeti, ayaṃ niggayhavādī nāma seyyathāpi, sammāsambuddho. Vuttañhetam – “niggayha niggayhāhaṃ, ānanda, vakkhāmi, pavayha pavayha, ānanda, vakkhāmi, yo sāro, so ṭhassatī”ti (ma. ni. 3.196). **Medhāvinti** dhammojapaññāya samannāgataṃ. **Tādisanti** evarūpaṃ **paṇḍitaṃ bhajeyya** payirupāseyya. Tādisaṅhi ācariyaṃ **bhajamānassa** antevāsikassa **seyyo hoti na pāpiyo**, vaḍḍhiyeva hoti, no parihānīti.

Mogharājattheravatthu

234. Dvādasame **kaṭṭhavāhananagareti** kaṭṭhavāhanena gahitattā evaṃladdhanāmake nagare. Atīte kira bārāṇasivāsī eko rukkhavevaḍḍhakī sake ācariyake adutiyo. Tassa soḷasa sissā ekamekassa sahasaṃ antevāsikā. Evaṃ te sattarasādhikā soḷasa sahasā ācariyantevāsikā sabbepe bārāṇasiṃ upanissāya jīvikam kappentā pabbatasamīpaṃ gantvā rukkhe gahetvā tattheva nānāpāsādavikatiyo niṭṭhāpetvā kullaṃ bandhitvā gaṅgāya bārāṇasiṃ ānetvā sace rājā atthiko hoti, rañño ekabhūmakam vā sattabhūmakam vā pāsādam yojetvā denti. No ce, aññesampi vikkiṇitvā puttadāraṃ posenti. Atha nesam ekadivasam ācariyo “na sakkā vaḍḍhakikammaena niccam jīvitum, dukkaraṅhi jarākāle etaṃ kamma”nti cintetvā antevāsike āmantesi – “tātā, udumbarādayo appasārarukkhe ānethā”ti. Te “sādhū”ti paṭissuṇitvā ānayimsu. So tehi kaṭṭhasakuṇam katvā tassabbhantaram pavisitvā vātena yantaṃ pūresi. Kaṭṭhasakuṇo suvaṇṇahamsarājā viya ākāse laṅghitvā vanassa upari caritvā antevāsīnaṃ purato oruhi.

Athācariyo sisse āha – “tātā īdisāni kaṭṭhavāhanāni katvā sakkā sakalajambudīpe rajje gahetum, tumhepi tātā etāni karotha, rajjam gahetvā jīvissāma, dukkaram vaḍḍhakisippena jīvitu”nti. Te tathā katvā ācariyassa paṭivedesum. Tato ne ācariyo āha – “katamaṃ tātā rajjam gaṇhāmā”ti? Bārāṇasirajjam ācariyāti. Alaṃ tātā, mā etaṃ rucittha, mayaṅhi taṃ gahetvāpi “vaḍḍhakirājā, vaḍḍhakiyuvarājā”ti vaḍḍhakivādā na muccissāma, mahanto jambudīpo, aññattha gacchāmāti. Tato saputtadārakā kaṭṭhavāhanāni abhiruhitvā sajjāvudhā hutvā himavantābhimukhā gantvā himavati aññataram nagaram pavisitvā rañño nivesaneyeva paccuṭṭhamsu. Te tattha rajjam gahetvā ācariyaṃ rajje abhisīcimsu. So “kaṭṭhavāhano rājā”ti pākāto ahoṣi, taṃ nagaram tena gahitattā “kaṭṭhavāhananagara”nteva nāmaṃ labhi.

Tapacāranti tapacaraṇam. **Pāsāṇacetiye piṭṭhipāsāṇe nisīdīti** pāsāṇakacetiyaṃ laddhavohāre piṭṭhipāsāṇe sakkena māpīte mahāmaṇḍape nisīdi. Tattha kira mahato pāsāṇassa upari pubbe devaṭṭhānaṃ ahoṣi, uppanne pana bhagavati vihāro jāto, so teneva purimavohārena “**pāsāṇacetiya**”nti vuccati.

Tena pucchite dutiyo hutvā satthāraṃ pañham pucchīti –

“Muddham muddhādhipātañca, bāvarī paripucchati;

Taṃ byākarohi bhagavā, kaṅkhaṃ vinaya no ise’’ti. (su. ni. 1031) –

Evaṃ tena pañhe pucchite bhagavatā ca –

‘‘Avijjā muddhāti jānāhi, vijjā muddhādhipātini;
Saddhāsatisamādhīhi, chandavīriyena saṃyutā’’ti. (su. ni. 1032) –

Pañhe vissajjite dutiyo hutvā pañhaṃ pucchi.

Athassa...pe... pañhaṃ kathesīti –

‘‘Kathaṃ lokam avekkhantaṃ, maccurājā na passatī’’ti. (su. ni. 1124) –

Tena pañhe pucchite –

‘‘Suññato lokam avekkhassu, mogharāja sadā sato;
Attānudiṭṭhiṃ ūhacca, evaṃ maccutaro siyā;
Evaṃ lokam avekkhantaṃ, maccurājā na passatī’’ti. (su. ni. 1125) –

Pañhaṃ vissajjesi.

Sesajanāti tasmiṃ samāgame sannipatitā sesajanā. **Na kathīyantīti** ‘‘ettakā sotāpannā’’tiādinā na vuccanti. **Evaṃ pārāyane vatthu samuṭṭhanti** pārāyanavagge idaṃ vatthu samuṭṭhitaṃ.

Catutthaetadaggavaggavaṇṇanā niṭṭhitā.

Therapālisamvaṇṇanā niṭṭhitā.

14. Etadaggavaggo

(14) 5. Pañcamaetadaggavaggavaṇṇanā

Mahāpajāpatigotamītherīvatthu

235. Theripālisamvaṇṇanāya paṭhame **yadidaṃ mahāgotamīti** ettha ‘‘yadidaṃ mahāpajāpati gotamī’’ti ca paṭhanti. Tattha **gotamīti** gottaṃ. Nāmakaraṇadivase panassā laddhasakkārā brāhmaṇā lakkhaṇasampattiṃ disvā ‘‘sace ayaṃ dhītaṃ labhissati, cakkavattirañño mahesī bhavissati. Sace puttaṃ labhissati, cakkavattirājā bhavissati’’ti ubhayathāpi ‘‘mahatīyevassā pajā bhavissati’’ti byākariṃsu, tasmā puttapajāya ceva dhītupajāya ca mahantatāya ‘‘mahāpajāpatī’’ti vohariṃsu. Tadubhayaṃ pana saṃsandetvā ‘‘**mahāpajāpatigotamī**’’ti vuttaṃ. **Vārabhikkhanti** varena dātabbaṃ bhikkhaṃ. **Nāmaṃ akaṃsūti** gottaṃyeva nāmaṃ akaṃsu. **Mātucchanti** cūḷamātaraṃ. Mātubhaginī hi mātucchāti vuccati. **Kalahavivādasuttapariyosāneti** ‘‘kutopahūtā kalahā vivādā’’tiādinā suttanipāte āgatassa **kalahavivādasuttassa** (su. ni. 868 ādayo) pariyosāne. Idañca aṅguttarabhāṇakānaṃ kathāmaggānusārena vuttaṃ. Apare pana ‘‘tasmiṃyeva suttanipāte ‘attadaṇḍābhayaṃ jāta’ntiādinā āgatassa **attadaṇḍasuttassa** (su. ni. 941 ādayo) pariyosāne’’ti vadanti. **Nikkhamitvā pabbajitānanti** ettha ehibhikkhupabbajjāya ete pabbajitāti vadanti. Teneva suttanipāte **attadaṇḍasuttasamvaṇṇanāya** (su. ni. aṭṭha. 2.942 ādayo) vuttaṃ – ‘‘desanāpariyosāne pañcasatā sākiyakumārā koḷiyakumārā ca ehibhikkhupabbajjāya pabbajitā. Te gahetvā bhagavā mahāvanaṃ pāvisī’’ti. Sesamettha suviññeyyameva.

Khemātherīvatthu

236. Dutīye **parapariyāpannā hutvāti** paresaṃ dāsī hutvā. **Suvaṇṇarasapiñjaro ahoṣīti**

suvaṇṇarasapiṅjaro viya ahosi.

Makkaṭakova jālanti yathā nāma makkaṭako suttajālaṃ katvā majjhaṭṭhāne nābhimaṇḍale nipanno pariyaṇṭe patitaṃ paṭaṅgaṃ vā makkhikaṃ vā vegena gantvā vijjhivā tassa rasaṃ pivitvā punāgantvā tasmimyeva thāne nipajjati, evameva ye sattā rāgarattā dosapaduṭṭhā mohamūlā sayamkataṃ taṇhāsoṭaṃ anupatanti, te taṃ samatikkamituṃ na sakkonti, evaṃ duratikkamaṃ. **Etampi chetvāna vajanti dhīrāti** paṇḍitā etaṃ bandhanaṃ chinditvā **anapekkhino** nirālayā hutvā arahattamaggena sabbaṃ dukkhaṃ pahāya vajanti gacchantīti attho.

Uppalavaṇṇātherīvatthu

237. Tatiyaṃ uttānatthameva.

Paṭācārātherīvatthu

238. Catutthe **paṭihārasatenapīti** dvārasatenapi. **Paṭihārasaddo hi dvāre dovārike ca dissati.** **Kulasabhāganti** attano gehasamīpaṃ.

Tāṇāyāti tāṇabhāvāya patiṭṭhānatthāya. **Bandhavāti** putte ca pitaro ca ṭhapetvā avasesā ñātisuhajjā. **Antakenādhīpanassāti** maraṇena abhībūtassa. Pavattiyāñhi puttādayo annapānādīdānena ceva uppannakiccanittharaṇena ca tāṇā hutvāpi maraṇakāle kenaci upāyena maraṇaṃ paṭibāhituṃ asamatthātāya tāṇatthāya leṇatthāya na santi nāma. Teneva vuttaṃ – “**natthi ñātisu tāṇatā**”ti.

Etamatthavasanti etaṃ tesam aññamaññassa tāṇaṃ bhavituṃ asamatthabhāvasaṅkhātāṃ kāraṇaṃ jānitvā **paṇḍito** catupārisuddhisīlena saṃvuto rakkhitagopito hutvā **nibbānagamaṇaṃ** aṭṭhaṅgikaṃ **maggam** sīghaṃ sodheyyāti attho.

Dhammadinnātherīvatthu

239. Pañcame **parāyattaṭṭhāneti** paresaṃ dāsīṭṭhāne. **Sujātattherassa adhikārakammaṃ katvāti** sā kira attano kese vikkiṇitvā sujātattherassa nāma aggasāvakaṃ dānaṃ datvā patthanaṃ akāsi. Taṃ sandhāyetaṃ vuttaṃ. **Hatthe pasāriteti** tassa hatthāvalambanattaṃ pubbāciṇṇavasena hatthe pasārite. So kira anāgāmī hutvā gehaṃ āgacchanta yathā aññesu divasesu ito cito ca olokento sitaṃ kurumāno hasamāno āgacchati, evaṃ anāgantvā santindriyo santamānaso hutvā agamāsi. Dhammadinnā sīhapañjaraṃ ugghātetvā vīthiṃ olokayamānā tassa āgamanākāraṃ disvā “kiṃ nu kho eta”nti cintetvā tassa paccuggamaṃ kurumānā sopānasīse ṭhatvā olambanattaṃ hatthaṃ pasāresi. Upāsako attano hatthaṃ samiñjesi. Sā “pātārasabhojanakāle jānissāmi”ti cintesi. Upāsako pubbe tāya saddhiṃ ekato bhuñjati. Taṃ divasaṃ pana taṃ anapaloketvā yogāvacarabhikkhu viya ekakova bhuñji. Tenāha – “**bhuñjamānopi imaṃ detha, imaṃ harathāti na byāharī**”ti. Tattha **imaṃ dethāti** imaṃ khādanīyaṃ vā bhojanīyaṃ vā detha. **Imaṃ harathāti** imaṃ khādanīyaṃ vā bhojanīyaṃ vā apaharatha. **Santhavavasenāti** kilesasanthavavaseṇa. Cirakālaparibhāvitāya ghaṭadīpajālāya viya abhantare dibbamānāya hetusampattiyā codiyamānā āha – “**evaṃ sante...pe... mayhaṃ pabbajjaṃ anujānāthā**”ti.

Ayaṃ tāva seṭṭhi gharamajjhe ṭhitova dukkhassantaṃ akāsīti sā kira “dhammadinne tuyhaṃ doso natthi, ahaṃ pana ajja paṭṭhāya santhavavaseṇa...pe... kulagharaṃ gacchā”ti vutte evaṃ cintesi – “pakatipuriso evaṃ vattā nāma natthi, addhā etena lokuttaradhammo nāma paṭividdho”ti. Tenassā ayaṃ saṅkappo ahosi “ayaṃ tāva seṭṭhi gharamajjhe ṭhitova dukkhassantaṃ akāsī”ti. **Majjhimanikāyatṭhakathāyaṃ** (ma. ni. aṭṭha. 1.460) pana “atha kasmā mayā saddhiṃ yathāpakatiyā ālāpasallāpamattampi na karoṭhāti so cintesi – “ayaṃ lokuttaradhammo nāma garu bhāriyo na pakāsetabbo; sace kho panāhaṃ na kathessāmi, ayaṃ hadayaṃ phāletvā ettheva kālaṃ kareyyā”ti tassā anuggahatthāya kathesi – “dhammadinne ahaṃ satthu dhammadesanaṃ sutvā lokuttaradhammaṃ nāma adhigato, taṃ adhigatassa evarūpā lokiyakiriyā na vaṭṭatī”ti vuttaṃ.

Pañcakkhandhādivasena pañhe pucchīti “sakkāyo sakkāyoti ayye vuccati, katamo nu kho ayye sakkāyo vutto bhagavatā”tiādina cūḷavedallasutte (ma. ni. 1.460 ādayo) āgatanayena pucchi. **Pucchitaṃ pucchitaṃ vissajjesīti** “pañca kho ime, āvuso visākha, upādānakkhandhā sakkāyo vutto bhagavatā”tiādina (ma. ni. 1.460 ādayo) tattheva āgatanayena vissajjesi. **Sūrabhāvanti** tikkhabhāvaṃ. Anadhigataarahattamaggassa uggahena vinā tattha pañho na upaṭṭhātīti āha – “**uggahavasena arahattamaggepi pucchīti**”ti. **Taṃ nivattentīti** “vimuttiyā panāyye kiṃ paṭibhāgo”ti pucchite “vimuttiyā kho, āvuso visākha, nibbānaṃ paṭibhāgo”ti (ma. ni. 1.466) vutte “nibbānassa, panāyye, kiṃ paṭibhāgo”ti puna pucchite taṃ nivattentīti “**accasarāvuso visākhā**”tiādimāha. Tattha **accasarāti** apucchitabbaṃ pucchanto pañhaṃ atikkāmitā ahosīti attho. **Nāsakkhi pañhānaṃ pariyantaṃ gahetunti** pañhānaṃ paricchedappamaṇaṃ gahetuṃ nāsakkhi. Pañhānañhi paricchedaṃ gahetuṃ yuttaṭṭhāne aṭṭhatvā tato paraṃ pucchanto nāsakkhi pañhānaṃ pariyantaṃ gahetuṃ. Appaṭibhāgadhammassa ca paṭibhāgaṃ pucchi. Nibbānaṃ nāmetaṃ appaṭibhāgaṃ, na sakkā nīlaṃ vā pītakaṃ vāti kenaci dhammena saddhiṃ paṭibhāgaṃ katvā dassetuṃ, tañca tvaṃ iminā adhippāyena pucchāsīti attho. **Nibbānogaadhanti** nibbānaṃ ogāhetvā ṭhitāṃ, nibbānantogaadhaṃ nibbānaṃ anuppaviṭṭhanti attho. **Nibbānaparāyaṇanti** nibbānaṃ paraṃ ayanamassa parāgati, na tato paraṃ gacchatīti attho. Nibbānaṃ pariyosānaṃ avasānaṃ assāti **nibbānapariyosānaṃ**.

Pureti atītesu khandhesu. **Pacchāti** anāgatesu khandhesu. **Majjheti** paccuppannesu khandhesu. **Akiñcananti** yassa etesu tīsu tañhāgāhasaṅkhātāṃ kiñcanaṃ natthi, tamahaṃ rāgakiñcanādīhi akiñcanaṃ kassaci gahaṇassa abhāvena **anādānaṃ** brāhmaṇaṃ vadāmīti attho.

Paṇḍitāti dhātuāyatanādikusalatāsāṅkhātena paṇḍiccena samannāgatā. Vuttañhetāṃ –

“Kittāvatā nu kho, bhante, paṇḍito hoti? Yato kho, ānanda, bhikkhu dhātukusalo ca hoti āyatanakusalo ca paṭiccasamuppādakusalo ca ṭhānāṭṭhānakusalo ca, ettāvatā kho, ānanda, bhikkhu paṇḍito hoti”ti.

Mahāpaññāti mahante atthe mahante dhamme mahantā niruttiyo mahantāni paṭibhānāni pariggahaṇe samatthāya paññāya samannāgatā. Imissā hi theriyā asekkhappaṭisambhidāppattatāya paṭisambhidāyo pūretvā ṭhitatāya paññāmahattaṃ. **Yathā taṃ dhammadinnāyāti** yathā dhammadinnāya bhikkhuniyā byākatāṃ, ahaṃ evameva byākareyyanti attho. **Tanti** nipātamattaṃ.

Nandātherivattu

240. Chaṭṭhe **aññaṃ maggaṃ apassantīti** aññaṃ upāyaṃ apassantī. **Vissatthāti** nirāsāṅkā. **Itthinimittanti** itthiyā subhanimittaṃ, subhākāranti vuttaṃ hoti. **Dhammapade gāthaṃ vatvāti** –

“Aṭṭhīnaṃ nagaraṃ kataṃ, maṃsalohitalepanaṃ;
Yattha jarā ca maccu ca, māno makkho ca ohito”ti. (dha. pa. 150) –

Imaṃ gāthaṃ vatvā. Tatrāyamadhippāyo – yatheva hi pubbaṇṇāparaṇṇādīnaṃ odahanatthāya kaṭṭhāni ussāpetvā vallīhi bandhitvā mattikāya vilimpitvā nagarasaṅkhātāṃ bahiddhā gehaṃ karonti, evamidam ajjhattikampi tīni aṭṭhisatāni ussāpetvā nhāruvinaddhaṃ maṃsalohitalepanaṃ tacapaṭicchannaṃ jīraṇalakkhaṇāya jarāya maraṇalakkhaṇassa maccuno ārogyasampadādīni paṭicca uppajjanalakkhaṇassa mānassa sukatakāraṇavināsanalakkhaṇassa makkhassa ca odahanatthāya nagaraṃ kataṃ. Evarūpo eva hi ettha kāyikacetāsiko ābādho ohito, ito uddhaṃ kiñci gayhūpagaṃ natthīti.

Suttaṃ abhāsīti –

“Camaṃ vā yadi vā tiṭṭhaṃ, nisinna uda vā sayamaṃ;
Samiñjeti pasāreti, eṣā kāyassa iñjanā.

“Aṭṭhinahārusaṃyutto, tacamaṃsāvalepano;
Chaviyā kāyo paṭicchanno, yathābhūtaṃ na dissatī”ti. (su. ni. 195-196) –

Ādinā suttamabhāsi.

Soṇātherīvatthu

241. Sattame **sabbepi visuṃ visuṃ gharāvāse paṭiṭṭhāpesīti** ettha sabbepi visuṃ visuṃ gharāvāse paṭiṭṭhāpetvā “puttāva maṃ paṭijaggissanti, kiṃ me visuṃ kuṭumbenā”ti sabbam sāpateyyampi vibhajitvā adāsīti veditabbaṃ. Teneva hi tato paṭṭhāya “ayaṃ amhākaṃ kiṃ karissatī”ti attano santikaṃ āgataṃ “mātā”ti saññampi na kariṃsu. Tathā hi naṃ katipāhaccayena jeṭṭhaputtassa bhariyā “aho amhākaṃ ayaṃ jeṭṭheputto meti dve koṭṭhāse datvā viya imameva gehaṃ āgacchatī”ti āha. Sesaputtānaṃ bhariyāyopi evamevaṃ vadīṃsu. Jeṭṭhadhītaṃ ādiṃ katvā tāsam gehaṃ gatakāle tāpi naṃ evameva vadīṃsu. Sā avamānappattā hutvā “kiṃ me imesaṃ santike vutthena, bhikkhunī hutvā jīvissāmī”ti bhikkhunīupassayaṃ gantvā pabbajjaṃ yāci, tā naṃ pabbājesuṃ. Imameva vatthuṃ dassento “**bahuputtikasoṇā tesam attani agāravabhāvaṃ nātva ‘gharāvāseṇa kiṃ karissāmī’ti nikkhamitvā pabbajī**”ti āha.

Vihāraṃ gacchantiyoti bhikkhuvihāraṃ gacchantiyo. **Dhammamuttamanti** navavidhalokuttaradhammaṃ. So hi uttamadhammo nāma yo hi taṃ na passati, tassa vassasatampi jīvanato taṃ dhammaṃ passantassa paṭivijjhantassa **ekāhampi** ekakkhaṇampi jīvitaṃ seyyo. **Āgantukajanoti** vihāragataṃ bhikkhunījanaṃ sandhāya vadati. **Anupadhāretvāti** asallakkhetvā.

Bakulātherīvatthu

242. Aṭṭhamaṃ uttānatthameva.

Kuṇḍalakesātherīvatthu

243. Navame **catukketi** vīthicatukke. Catunnaṃ samāhāro catukkaṃ. **Cārakatoti** bandhanāgārato. **Ubbatṭetvāti** uddharitvā.

Muhuttamapi cintayeti muhuttaṃ taṅkhaṇampi ṭhānuppattikapaññāya taṅkhaṇānurūpaṃ atthaṃ cintituṃ sakkuṇeyya. **Sahassamapi ce gāthā, anatthapadasaṃhitāti** ayaṃ gāthā dārucīriyattherassa bhagavatā bhāsītā, idhāpi ca sāyeva gāthā dassītā. **Therigāthāsaṃvaṇṇanāyaṃ** ācariyadhammapālatherenapi kuṇḍalakesittheriyā vatthumhi ayameva gāthā vuttā. **Dhammapadaṭṭhakathāyaṃ** pana kuṇḍalakesittheriyā vatthumhi –

“Yo ca gāthāsataṃ bhāse, anatthapadasaṃhitā;
Ekaṃ dhammapadaṃ seyyo, yaṃ sutvā upasammatī”ti. (dha. pa. aṭṭha. 1.102) –

Ayaṃ gāthā āgatā. Taṃtaṃbhāṇakānaṃ kathāmaggānusāreṇa tattha tattha tathā vuttanti na idha ācariyassa pubbāparavirodho saṅkitabbo.

Bhaddākāpilānītherī-bhaddākaccānātherīvatthu

244-245. Dasamaṃ ekādasamañca uttānatthameva.

Kisāgotamītherīvatthu

246. Dvādasame **tīhi lūkhehīti** vatthalūkhasuttalūkharajanalūkhasaṅkhātehi tīhi lūkhehi. **Siddhatthakanti** sāsapabījaṃ.

Taṃ puttapasusammattanti taṃ rūpabalādisampanne putte ca pasū ca labhitvā “mama puttā abhirūpā balasampannā paṇḍitā sabbakiccasamatthā, mama goṇo arogo abhirūpo mahābhāravaho, mama gāvī bahukhīrā”ti evaṃ puttehi ca pasūhi ca sammattaṃ naraṃ. **Byāsattamanasanti** cakkhuvīññeyyādīsu ārammaṇesu hiraññasuvaṇṇādīsu pattacīvarādīsu vā yaṃ yaṃ laddhaṃ hoti, tattha tattheva lagganāya sattamānaṃ. **Suttaṃ gāmaṃti** niddaṃ upagataṃ satta kāyaṃ. **Mahoghovāti** yathā evarūpaṃ gāmaṃ gambhīrato vitthārato ca mahanto mahānadiogho antamaso sunakhampi asesetvā sabbam ādāya gacchati, evaṃ vuttappakāraṃ naraṃ maccu ādāya gacchatīti attho. **Amataṃ padanti** maraṇarahitaṃ koṭṭhāsaṃ, amataṃ mahānibbānanti attho. Sesamettha uttānameva.

Singālakamātātherivatthu

247. Terasamaṃ uttānatthameva.

(Pañcamaetadaggavaggaṇṇanā niṭṭhitā.)

Theripāḷisaṃvaṇṇanā niṭṭhitā.

14. Etadaggavaggo

(14) 6. Chaṭṭhaetadaggavaggaṇṇanā

Tapussa-bhallikavatthu

248. Upāsakaṃpāḷisaṃvaṇṇanāya paṭhame **sabbapaṭhamaṃ saraṇaṃ gacchantānanti** sabbesaṃ paṭhamaṃ hutvā saraṇaṃ gacchantānaṃ. **Ito paranti** sattasattāhato paraṃ. **Gamanūpacchedaṃ akāsīti** gamanavicchedaṃ akāsi. Yathā te goṇā dhuraṃ chaḍḍetvā pothiyamānāpi na gacchanti, tathā akāsīti attho. **Tesanti** tapussabhallikānaṃ. **Adhimuccitvāti** āvisitvā. Yakkhassa āvaṭṭo **yakkhāvaṭṭo**. Evaṃ sesesupi. **Atītabuddhānaṃ āciṇṇaṃ olokesīti** atītabuddhā kena bhājanena paṭiggaṇhiṃsūti buddhāciṇṇaṃ olokesi. **Dvevācike saraṇe paṭiṭṭhāyāti** saṅghassa anuppannattā buddhadhammasena dvevācike saraṇe paṭiṭṭhahitvā. **Cetiyaṃti** pūjanīyavatthum. **Jīvakesadhātuyāti** jīvamānassa bhagavato kesadhātuyā.

Anāthapiṇḍikasetṭhivatthu

249. Dutiye **teneva guṇenāti** teneva dāyakabhāvasaṅkhātena guṇena. So hi sabbakāmasamiddhatāya vigatamaccheratāya karuṇādiguṇasamaṅgitāya ca niccakālaṃ anāthānaṃ piṇḍamadāsi. Tena sabbakālaṃ upaṭṭhito anāthānaṃ piṇḍo etassa atthīti anāthapiṇḍikoti saṅkhaṃ gato. **Yojanikavihāre kāretvāti** yojane yojane ekamekaṃ vihāraṃ kāretvā. “**Evarūpaṃ dānaṃ pavattesi**”ti vatvā tameva dānaṃ vibhajitvā dassento “**devasikaṃ pañca salākabhattāni honti**”tiādīmāha. Tattha salākāya gāhetabbaṃ bhattaṃ **salākabhattaṃ**. Ekasmiṃ pakkhe ekadivasaṃ dātabbaṃ bhattaṃ **pakkhikabhattaṃ**. Dhuragehe ṭhapetvā dātabbaṃ bhattaṃ **dhurabhattaṃ**. Āgantukānaṃ dātabbaṃ bhattaṃ **āgantukabhattaṃ**. Evaṃ sesesupi. **Pañca āsanatāni gehe niccapaññattāneva hontīti** gehe nisīdāpetvā bhuñjantānaṃ pañcannaṃ bhikkhusatānaṃ pañca āsanatāni niccapaññattāni honti.

Cittagahapativatthu

250. Tatiye migā eva **migarūpāni**. **Bhikkhaṃ samādāpetvāti**, “bhante, mayhaṃ anuggahaṃ karotha, idha nisīditvā bhikkhaṃ gaṇhathā”ti bhikkhāgahaṇatthaṃ samādāpetvā. Vivaṭṭaṃ uddissa upacitaṃ nibbedhabhāgiyakusalaṃ **upanissayo**. **Salāyatanavibhattimeva desesīti** salāyatanavibhāgappaṭisaṃyuttameva dhammakathaṃ kathesi. **Therenāti** tattha sannihitānaṃ sabbesaṃ jeṭṭhena mahātherena. **Pañhaṃ vissajjetum asakkontenāti** cittena gahapatinā “yā imā, bhante thera, anekavihitā diṭṭhiyo loke uppajjanti, ‘sassato loko’ti vā, ‘asassato loko’ti vā, ‘antavā loko’ti vā, ‘anantavā loko’ti vā, ‘taṃ jīvaṃ taṃ sarīra’nti vā, ‘aññaṃ jīvaṃ aññaṃ sarīra’nti vā, ‘hoti tathāgato paraṃ maraṇā’ti

vā, ‘na hoti tathāgato paraṃ maraṇā’ti vā, ‘hoti ca na hoti ca tathāgato paraṃ maraṇā’ti vā, ‘neva hoti na na hoti tathāgato paraṃ maraṇā’ti vā yāni cimāni dvāsaṭṭhi diṭṭhigatāni brahmajāle gaṇitāni, imā nu kho, bhante, diṭṭhiyo kismiṃ sati honti, kismiṃ asati na honti’”ti evamādinā (saṃ. ni. 4.345) pañhe puṭṭhe taṃ pañhaṃ vissajjetuṃ asakkontena. Imaṃ kira pañhaṃ yāvattiyam puṭṭho mahāthero tuṇhī ahoṣi. Atha isidattathero cintesi – “ayaṃ thero neva attanā byākaroti, na aññaṃ ajjhesati, upāsako ca bhikkhusaṅghaṃ vihesati, ahameṭaṃ byākaritvā phāsuvihāraṃ katvā dassāmī”ti. Evaṃ cintetvā ca āsanato vuṭṭhāya therassa santikaṃ gantvā “byākaromahaṃ, bhante, cittassa gahapatino etaṃ pañha”nti (saṃ. ni. 4.345) āha. Evaṃ vutte thero “byākarohi tvaṃ, āvuso isidatta, cittassa gahapatino etaṃ pañha”nti isidattaṃ ajjhesi. Tena vuttaṃ – **“pañhaṃ vissajjetuṃ asakkontena ajjhiṭṭho”**ti.

Pañhaṃ vissajjetvāti “yā imā, gahapati, anekavihitā diṭṭhiyo loke uppajjanti ‘sassato loko’ti vā, ‘asassato loko’ti vā...pe... yāni cimāni dvāsaṭṭhi diṭṭhigatāni brahmajāle gaṇitāni, imā kho, gahapati, diṭṭhiyo sakkāyadiṭṭhiyā sati honti, sakkāyadiṭṭhiyā asati na honti”tiādinā nayena pañhaṃ vissajjetvā. **Gihisahāyakabhāve nāte**ti therassa gihisahāyakabhāve cittaṃ gahapatinā nāte. Citto kira, gahapati, tassa pañhaveyyākaṇe tuṭṭho “kuto, bhante, ayyo isidatto āgacchati”ti vatvā “avantiyā kho ahaṃ, gahapati, āgacchāmī”ti vutto “atthi, bhante, avantiyā isidatto nāma kulaputto amhākaṃ adiṭṭhasahāyo pabbajito, diṭṭho so āyasmā”ti pucchi. Thero ca “evaṃ, gahapati”ti vatvā “kahaṃ nu kho, bhante, so āyasmā etarahi viharati”ti puna puṭṭho tuṇhī ahoṣi. Atha citto gahapati “ayyo no, bhante, isidatto”ti pucchitvā “evaṃ, gahapati”ti vutte attano gihisahāyabhāvaṃ aññāsi.

Tejosamāpattipāṭihāriyaṃ dassetvāti ekasmiṃ kira divase citto gahapati “sādhu me, bhante, ayyo uttarimanussadhammā iddhipāṭihāriyaṃ dassetū”ti mahātheraṃ yāci. Thero “tena hi tvaṃ, gahapati, ālīde uttarāsaṅgaṃ paññāpetvā tatha tiṇakalāpaṃ okirā”ti vatvā tena ca tathā kate sayam vihāraṃ pavisitvā ca ghaṭikaṃ datvā tathārūpaṃ iddhābhisankhāraṃ abhisankhāresi, yathā tālacchiggaḷena ca aggaḷantarikāya ca acci nikkhamitvā tiṇāni jhāpeti, uttarāsaṅgaṃ na jhāpeti. Atha citto gahapati uttarāsaṅgaṃ papphoṭetvā saṃviggo lomahaṭṭhajāto ekamantaṃ ṭhito theram bahi nikkhamantaṃ disvā “abhiramatu, bhante, ayyo macchikāsaṇḍe, ramaṇiyaṃ ambātakavanaṃ, ahaṃ ayyassa ussukkaṃ karissāmi cīvarapiṇḍapātasenāsanagilānapaccayabhesajjaparikkhārāna”nti āha. Tato thero “na dāni idha vasitum sakkā”ti tamhā vihārā pakkāmi. Taṃ sandhāyetaṃ vuttaṃ – **“tejosamāpatti pāṭihāriyaṃ dassetvā ‘idāni idha vasitum na yutta’nti yathāsukhaṃ pakkāmi”**ti. **Dve aggasāvakāti**ādisu yaṃ vattabbaṃ, taṃ vitthārato **vinayapāliyaṃ** āgatameva.

Saddhoti lokiyalokuttarāya saddhāya samannāgato. **Silenāti** agāriyasīlaṃ anagāriyasīlanti duvidhaṃ sīlaṃ, tesu idha agāriyaṃ sīlaṃ adhippetam, tena samannāgatoti attho. **Yasobhogasamappitoti** yādiso anāthapiṇḍikādīnaṃ pañcaupāsakasataparivārasankhāto agāriyo yaso, tādiseneva yasena, yo ca dhanadhaññādiko ceva sattavidhaariyadhanasankhāto cāti duvidho bhogo, tena ca samannāgatoti attho. **Yaṃ yaṃ padesanti** puratthimādīsu disāsu evarūpo kulaputto yaṃ yaṃ padesaṃ bhajati, tatha tatha evarūpena lābhasakkārena pūjitova hotīti attho.

Hatthakaāḷavakavattu

251. Catutthe **catubbidhena saṅghavatthunā**ti dānapiyavacanaatthacariyāsamānattatāsankhātena catubbidhena saṅghavatthunā. **“Sve bhattacāriyā saddhiṃ āḷavakassa pesetabbo ahoṣi”**ti vuttamatthaṃ pākaṭaṃ katvā dassetuṃ – **“tatrāyaṃ anupubbikathā”**tiādimāha. **Migavatthāya araṇñaṃ gantvāti** āḷavako rājā vividhanāṭakūpabhogaṃ chaḍḍetvā corappaṭibāhanatthañca paṭirājanisedhanatthañca byāyāmakaraṇatthañca sattame sattame divase migavaṃ gacchanto ekadivasaṃ balakāyena saddhiṃ “yassa passena migo palāyati, tasseva so bhāro”ti katakatikavatto migavatthāya araṇñaṃ gantvā. **Ekam miganti** attano ṭhitatṭhānena palātaṃ eṇimigaṃ. **Anubandhitvāti** tiyojanamaggaṃ ekakova anubandhitvā. Javasampanno hi rājā dhanuṃ gahetvā pattikova tiyojanaṃ taṃ migamanubandhi. **Ghātetvāti** yasmā eṇimigā tiyojanavegā eva honti, tasmā parikkhiṇajavaṃ taṃ migam udakaṃ pavisitvā ṭhitaṃ ghātetvā. **Dvidhā chetvā dhanukoṭiyaṃ lagetvā nivattetvā āgacchantoti** anattikopi maṃsena “nāsakki migam gahetu”nti apavādamocanathaṃ dvidhā chinnaṃ dhanukoṭiyaṃ lagetvā āgacchanto. **Sandacchāyanti** ghanacchāyaṃ bahalapattapalāsaṃ.

Rukkhe adhiyatthā devatāti ālavakaṃ yakkhaṃ sandhāya vadati. So hi mahārājūnaṃ santikā varam labhivā majjhanhikasamaye tassa rukkhasa chāyāya phuṭṭhokāsaṃ pavitṭhe pāṇino khādanto tattha paṭivasati. **Ālavakassa nisīdanapallaṅke nisīdī**ti yattha abhilakkhitesu maṅgaladivasādīsu ālavako nisīditvā siriṃ anubhoti, tasmīmyeva dibbaratanapallaṅke nisīdi. **Attano gamane asampajjamāne “kiṃ nu kho kāraṇa”nti āvajjentā**ti tadā kira sātāgīrahemavatā bhagavantaṃ jetavaneyeva vanditvā “yakkhasamāgamam gamissāmā”ti saporivārā nānāyānehi ākāseṇa gacchanti, ākāse ca yakkhānaṃ na sabbattha maggo atthi, ākāsaṭṭhāni vimānāni pariharitvā maggaṭṭhānēva maggo hoti, ālavakassa pana vimānaṃ bhūmaṭṭhaṃ suguttaṃ pākāraparikkhittaṃ susaṃvihitadvāraṭṭālakagopuraṃ upari kaṃsajālasaṅchannamañjūsāsadisam tiyojanaṃ ubbedhena, tassa upari maggo hoti, te taṃ padesamāgamma gantumasamattā ahesuṃ. Buddhānañhi nisinnokāsassa uparibhāgena yāva bhavaggā koci gantumasamatto, tasmā attano gamane asampajjamāne “kiṃ nu kho kāraṇa”nti āvajjesuṃ. **Tesaṃ katham sutvā cintesī**ti yasmā assaddhassa saddhākathā dukkathā hoti dussīlādīnaṃ sīlakathādayo viya, tasmā tesaṃ yakkhānaṃ santikā bhagavato pasaṃsaṃ sutvā eva aggimhi pakkhittaloṇasakkharā viya abhantare uppanakopena paṭapaṭāyamaṇahadāyo hutvā cintesī. **Pabbatakūṭanti** kelāsapabbatakūṭaṃ.

Ito paṭṭhāya ālavakayuddham vitthāretabbanti so kira manosilātale vāmapādena ṭhatvā “passatha dāni tumhākaṃ vā sathā mahānubhāvo, ahaṃ vā”ti dakkhiṇapādena saṭṭhiyojanamattaṃ kelāsakūṭapabbataṃ akkami, taṃ ayokūṭappahato viya niddhantaayapiṇḍo papaṭikāyo muñci. So tatra ṭhatvā “ahaṃ ālavako”ti ugghosesi, sakalajambudīpaṃ saddo phari. Tiyojanasahassavitthatahimavāpi sampakampi yakkhasānubhāvena. So **vātamaṇḍalam** samuṭṭhāpesi “eteneva samaṇaṃ palāpessāmī”ti. Te puratthimādibhedā vātā samuṭṭhahitvā aḍḍhayanayanoyanadvīyojanatiyojanappamāṇāni pabbatakūṭāni padāletvā vanagaccharukkhādīni ummūletvā ālavinaḡaram pakkhandā jīṇṇahatthisīlādīni cuṇṇentā chadaniṭṭhakā ākāse bhamentā. Bhagavā “mā kassaci uparodho hotū”ti adhiṭṭhāsi. Te vātā dasabalaṃ patvā cīvarakaṇṇamattampi cāletuṃ nāsakkhiṃsu. Tato **mahāvassam** samuṭṭhāpesi “udakena ajjhottharivā samaṇaṃ māressāmī”ti. Tassānubhāvena uparūpari satapaṭalasaḡasapaṭalādibhedā valāhakā utṭhahitvā pavassīṃsu. Vuṭṭhidhārāvegena pathavī chiddā ahoṣi. Vanarukkhādīnaṃ upari mahogho āgantvā dasabalassa cīvare ussāvabindumattampi temetuṃ nāsakkhi. Tato **pāsāṇavassam** samuṭṭhāpesi. Mahantāni mahantāni pabbatakūṭāni dhūmayantāni pajjalantāni ākāsenāgantvā dasabalaṃ patvā dibbamālāguḷāni sampajjīṃsu. Tato **paharaṇavassam** samuṭṭhāpesi. Ekatoḍḍhārā ubhatodhārā asisattikhurappādayo dhūmayantā pajjalantā ākāsenāgantvā dasabalassa pādāmūle dibbapupphāni ahesuṃ.

Tato **āṅgāravassam** samuṭṭhāpesi. Kiṃsukavaṇṇā āṅgārā ākāsenāgantvā dasabalassa pādāmūle dibbapupphāni hutvā vikiriṃsu. Tato **kukkuḷavassam** samuṭṭhāpesi. Accuṇḡo kukkuḷo ākāsenāgantvā dasabalassa pādāmūle candanacuṇṇaṃ hutvā nipati. Tato **vālikavassam** samuṭṭhāpesi. Atisukhumā vālikā dhūmayantā pajjalantā ākāsenāgantvā dasabalassa pādāmūle dibbapupphāni hutvā nipatiṃsu. Tato **kalalavassam** samuṭṭhāpesi. Taṃ dhūmayantaṃ pajjalantaṃ ākāsenāgantvā dasabalassa pādāmūle dibbagandhaṃ hutvā nipati. Tato **andhakāram** samuṭṭhāpesi “bhīṃsetvā samaṇaṃ palāpessāmī”ti. Caturaṅgasamannāgataṃ andhakārasadisam hutvā dasabalaṃ patvā sūriyappabhāvīhatamivandhakāram antaradhāyi. Evaṃ yakkho imāhi navahi vātavassapāsāṇapaharaṇāṅgārakukkuḷavālikakalalandhakāravuṭṭhīhi bhagavantaṃ palāpetumasakkonto nānāvīdhappaharaṇahatthaanekappakārarūpabhūtagaṇasamākulāya caturaṅginiyā senāya sayameva bhagavantaṃ abhigato. Te bhūtagaṇā anekappakāravikāre katvā “gaṇhatha hanathā”ti bhagavato upari āgacchantā viya ca hontī. Apica kho niddhantalohapiṇḍaṃ viya makkhikā bhagavantaṃ allīyitumasamattā eva ahesuṃ.

Evaṃ sabbarattīṃ anekappakāravibhīṃsākāradassanenapi bhagavantaṃ cāletumasakkonto ālavako cintesī – “yaṃnūnaḡam kenaci ajeyyaṃ dussāvudhaṃ muñceyya”ntī. Sace hi so duṭṭho ākāse taṃ dussāvudhaṃ muñceyya, dvādasā vassāni devo na vasseyya. Sace pathaviyaṃ muñceyya, sabbarukkhataṇḡādīni sussitvā dvādasavassantaraṃ na puna ruheyyuṃ. Sace samudde muñceyya, tattakapāle udakabindu viya sabbaṃ susseyya. Sace sinerupabbate muñceyya, khaṇḡākhaṇḡaṃ hutvā vikireyya. So evaṃmahānubhāvaṃ dussāvudhaṃ uttarisāṭakaṃ muñcitvā aggahesi. Yebhuyyena dasasahasilokadhātudevātā vegena sannipatiṃsu “ajja bhagavā ālavakaṃ damessati, tattha dhammaṃ sossāmā”ti. Yuddhadassanakāmāpi devatā sannipatiṃsu. Evaṃ sakalampi ākāsaṃ devatāhi paripuṇṇaṃ

ahosi. Athālavako bhagavato samīpe uparūpari vicarivā vatthāvudhaṃ muñci. Taṃ asanicakkaṃ viya ākāse bheravasaddaṃ karontaṃ dhūmāyantaṃ pajjalantaṃ bhagavantaṃ patvā yakkhassa mānamaddanatthaṃ pādapuñchanacoḷaṃ hutvā pādāmūle nipati. Ālavako taṃ disvā chinnavisāṇo viya usabho, uddhaṭadāṭho viya sappo nittejo nimmado nipātitaṃānaddhajo ahosi. Evamidaṃ ālavakayuddhaṃ vitthāretabbaṃ.

Aṭṭha pañhe pucchīti –

“Kiṃ sūda vittaṃ purisassa seṭṭhaṃ,
Kiṃ su suciṇṇaṃ sukhamāvahāti;
Kiṃ su have sādutaraṃ rasānaṃ,
Kathaṃ jīviṃ jīvitamāhu seṭṭha’nti. (saṃ. ni. 1.246; su. ni. 183) –

Ādinā aṭṭha pañhe pucchi. **Satthā vissajjesīti –**

“Saddhīdha vittaṃ purisassa seṭṭhaṃ,
Dhammo suciṇṇo sukhamāvahāti;
Saccaṃ have sādutaraṃ rasānaṃ,
Paññajīviṃ jīvitamāhu seṭṭha’nti. (saṃ. ni. 1.246; su. ni. 184) –

Ādinā vissajjesi. **Vikkandamānāyāti** accantaṃ paridevamānāya.

Mahānāmasakkavatthu

252. Pañcame **satthā tato paraṃ paṭiññaṃ nādāsīti** saṃvaccharato paraṃ sikkhāpadapaññattiyā paccayappavāraṇāsādiyanassa vāritattā “paṭiññaṃ nādāsī”ti vuttaṃ. Tathā hi bhagavā tatiyavārepi mahānāmena sakkena “icchāmaṃ, bhante, saṅghaṃ yāvajīvaṃ bhesajjena pavāretu”nti (pāci. 304-305) vutte “sādhu sādhu, mahānāma, tena hi tvaṃ, mahānāma, saṅghaṃ yāvajīvaṃ bhesajjena pavārehī”ti paṭiññaṃ adāsiyeva. Evaṃ paṭiññaṃ datvā pacchā chabbaggiyehi bhikkhūhi mahānāmassa sakkassa viheṭṭhitabhāvaṃ sutvā chabbaggiye bhikkhū vīgarahitvā sikkhāpadaṃ paññapesi “agilānena bhikkhunā cātumāsappaccayapavāraṇā sādītabbā aññatra punappavāraṇāya aññatra niccappavāraṇāya. Tato ce uttari sādīyeyya, pācittiya”nti. Tasmā paṭhamaṃ anujānitvāpi pacchā sikkhāpadabandhanena vāritattā “paṭiññaṃ nādāsī”ti vuttaṃ.

Uggagahapatyādivatthu

253-256. Chaṭṭhasattamaaṭṭhamanavamāni suviññeyyāneva.

Nakulapitugahapativatthu

257. Dasame **susumāragirinagareti** evaṃnāmake nagare. Tassa kira nagarassa vatthupariggahadivase avidūre udakarahade susumāro saddamakāsi, giraṃ nicchāresi. Atha nagare anantarāyena māpīte tameva susumāragirakaraṇaṃ subhanimittaṃ katvā “susumāragiri”tvevassa nāmaṃ akaṃsu. Keci pana “susumārasaṅghānattā susumāro nāma eko giri, so tassa nagarassa samīpe, tasmā taṃ susumāragiri etassa atthīti susumāragirīti vuccatī”ti vadanti. **Bhesakalāvaneti** bhesakalānāmake vane. “Bhesakalāvane”tipi pāṭho. Kathaṃ pana bhagavati nesam puttasaññaṃ paṭiṭṭhāsīti āha – “**ayaṃ kirā**”tiādi. **Daharasseva daharā ānītāti** me daharasseva sato daharā ānītāti attho. **Aticaritāti** atikkamitvā caranto.

(Chaṭṭhaetadaggavaggaṇṇanā niṭṭhitā.)

Upāsakapāḷisaṃvaṇṇanā niṭṭhitā.

14. Etadaggavaggo

(14) 7. Sattamaetadaggavaggaṇṇanā

Sujātāvatthu

258. Upāsikāpāḷisaṃvaṇṇanāya paṭhamam suviññeyyameva.

Visākhāvatthu

259. Dutiye **mahālatāpasādhanassāti** mahālatāpiḷandhanassa. Tasmīṅca piḷandhane catasso vajiranāliyo upayogaṃ agamaṃsu. Muttānaṃ ekādasa nāliyo, pavāḷassa dvāvīsati nāliyo, padumarāgamaṇīnaṃ tettiṃsa nāliyo. Iti etehi ca aññehi ca indanīlādīhi nīlapītalohitodātamañjīṭṭhasāmakabaravaṇṇavasena sattavaṇṇehi vararatanehi niṭṭhānaṃ agamāsi, taṃ sīse paṭimukkaṃ yāva pādapiṭṭhiyā bhassati, pañcannaṃ hatthīnaṃ balaṃ dhārayamānāva naṃ itthī dhāretuṃ sakkoti. **Antoaggi bahi na nīharitabboti**ādīnaṃ attho upari āvi bhavissati. Sesamettha suviññeyyameva.

Khujjuttarā-sāmāvatīvattu

260-261. Tatiyacatutthesu **pāyāsassāti** bahalatarassa pāyāsassa. **Taṃ pāyāsaṃ bhuñjantesūti** taṃ bahalatarāṃ garusiniddhaṃ pāyāsaṃ bhuñjantesu. **Jīrāpetuṃ asakkontoti** antarāmagge appāhāratāya mandagahaṇikattā jīrāpetuṃ asakkonto. **Vālamigaṭṭhāneti** vālamigeḥi adhiṭṭhitatṭhāne. **Anuvijjantoti** vicārento. **Sālāti** naḷakārasālā. **Mudhā na karissatīti** mūlyaṃ vinā na karissati. **Ālimpesīti** aggiṃ adāsi, aggiṃ jālesīti attho. **Pekkhāti** āgamehi. **Upadhisampadāti** sarīrasampatti. **Vaṭarukkhaṃ patvāti** nigrodharukkhaṃ patvā. **Suvaṇṇakaṭakeṭi** suvaṇṇavalaye. **Abbhūṃ meti** me avaḍḍhīti attho. **Anto asodhetvāti** paṇṇasālāya anto kassaci atthibhāvaṃ vā natthibhāvaṃ vā anupadhāretvā. Sesam suviññeyyameva.

Uttarānandamātāvattu

262. Pañcame **upanissayaṃ disvāti** iminā yathā visesādhigamassa satipi paccuppannapaccayasamavāye avassaṃ upanissayasampadā icchitabbā, evaṃ diṭṭhadhammavedanīyabhāvena vipaccanakassa kammassapi paccuppannasamavāyo viya upanissayasampadāpi savisesā icchitabbāti dasseti. Tathā hi ukkaṃsagatasappurisūpanissayayonisomanasikāresu labbhamānesupi upanissayarahitassa visesādhigamo na sampajjatevāti. **Kappiyaṃ katvāti** yathā kappiyaṃ hoti, tathā katvā. **Patte patitṭhapeyyāti** āhāraṃ dānamukhe vissajjeyya. **Tīhi cetanāhīti** pubbabhāgamuñcaanumodanācetanāhi. Vuttañhetam –

“Pubbeva dānā sumano, dadaṃ cittaṃ pasādaye;

Datvā attamano hoti, esā puññassa sampadā”ti. (a. ni. 6.37; pe. va. 305);

Tava manam sandhārehīti “ajja bhataṃ cirāyita”nti kodhato tava cittaṃ sandhārehi, mā kujjhīti attho. **Olokitolokitattṭhānaṃ...pe... samparikiṇṇam viya ahoṣīti** tena kasitattṭhānaṃ sabbaṃ suvaṇṇabhāvāpattiyā mahākosātakipupphehi sañchannaṃ viya ahoṣi. **Tādiseti** tayā sadise. **Na kopemīti** na vināsemi, jātiyā na hīlemi. **Pūjam karotīti** sammāsambuddhassa pūjam karoti. **Antaravatthunti** gehaṇaṇaṃ. **Bhoti** sambodhane nipāto. **Jeti** avaññālapanaṃ. Sayam ariyasāvīkābhāvato satthuvasena “**sapitikā dhītā**”ti vatvā satthu sammukhā dhammassavanena tassā visesādhigamaṃ paccāsīsantī “**dasabale khamanteyeva khamissāmi**”ti āha. **Kadariyanti** thaddhamacchariṃ.

Suppavāsāvatthu

263. Chaṭṭhe **paṇītaḍāyikānanti** paṇītarasavatthūnaṃ dāyikānaṃ. Āyuno ṭhitihetuṃ bhojanaṃ dentī

āyūṃ deti nāma. Esa nayo **vaṇṇaṃ deti**tiādīsu. Tenāha – “**pañca ṭhānānī**”ti. Kammasarikkhakañcetaṃ phalanti dassento “**āyūṃ kho pana datvā**”tiādīmāha. Tattha **datvāti** dānāhetu. **Bhāginīti** bhāgavatī laddhuṃ bhabbā.

Suppiyāvattu

264. Sattame **ūrumaṃsaṃ chinditvā dāsiyā adāsīti** āgataphalā viññātasāsānā ariyasāvīkā attano sarīradukkhāṃ acintetvā tassa bhikkhuno rogavūpasamameva paccāsīsanāti attano ūrumaṃsaṃ chinditvā dāsiyā adāsī. Satthāpi tassā tathāpavattaṃ ajjhāsayasampattiṃ disvā “mama sammukhībhāvūpagamanenevassā vaṇo ruhitvā sañchavi jāyati, phāsubhāvo hotī”ti ca disvā “**pakkosathana**”nti āha. **Sā cintesīti** “sabbalokassa hitānukampako satthā na maṃ dukkhāpetuṃ pakkosati, atthettha kāraṇa”nti cintesī. **Attanā katakāraṇaṃ sabbāṃ kathesīti** buddhānubhāvavibhāvanatthaṃ kathesi, na attano daḷhajjhāsayatāya vibhāvanatthaṃ. **Gilānupaṭṭhākīnaṃ aggaṭṭhāne ṭhapesīti** agaṇitattadukkhā gilānānaṃ bhikkhūnaṃ gelaññavūpasamane yuttappayuttāti gilānupaṭṭhākīnaṃ aggaṭṭhāne ṭhapesīti.

Kātiyānīvatthu

265. Aṭṭhame **aveccappasannānanti** ratanattayaguṇe yāthāvato ñatvā pasannānaṃ, so panassa pasādo maggenāgatattā kenaci akampanīyo. **Adhigatenāti** maggādhigameneva adhigatena. “Avigatenā”ti vā pāṭho, tassattho “kadāci avigacchantenā”ti. So appadhamāsiyo ca hoti, tasmā vuttaṃ – “**adhigatena acalappasādenā**”ti. Tattha **kāyasakkiṃ katvāti** pamukhaṃ katvā, vacanathato pana nāmakāyena desanāya sampaṭicchānavasena sakkhibhūtaṃ katvāti attho. **Ummaggaṃ khanitvāti** gharasandhicchedanena antopavisanamaggaṃ khanitvā. **Dullabhassavananti** dullabhasaddhammassavanaṃ. **Mahāpathavī pavisitabbā bhaveyyāti** avīcippavesanaṃ vadati.

Nakulamātāvattu

266. Navame **vissāsakathaneneva nakulamātā nakulapitā** ca satthuvissāsīkā nāma jātāti vuttaṃ – “**vissāsīkānanti vissāsakathaṃ kathentīnaṃ upāsīkāna**”nti. **Gahapatānīti** gehasāminī. **Vuttamevāti** upāsīkāpālīyaṃ nakulapitukathāyaṃ vuttanayameva.

Kāḷīkuraragharikāvattu

267. Dasame **anussavenevāti** paccakkhato rūpadassanena satthu sammukhā dhammassavanena ca vinā kevalaṃ anussavaneneva parassa vacanaṃ anugatassavaneneva uppannena pasādena. **Anussavikkappasādanti** anussavato āgatappasādaṃ.

(Sattamaetadaggavaggavaṇṇanā niṭṭhitā.)

Upāsīkāpālīsaṃvaṇṇanā samattā.

Niṭṭhitā ca manorathapūraṇiyā

Āṅguttaranikāya-aṭṭhakathāya

Etadaggavaggavaṇṇanāya anuttānatthadīpanā.

15. Aṭṭhānapāḷi (paṭhamavagga)

(15) 1. Aṭṭhānapāḷi-paṭhamavaggavaṇṇanā

268. Aṭṭhānapālivannaṇāyaṃ avijjamānaṃ ṭhānaṃ **aṭṭhānaṃ**, natthi ṭhānanti vā **aṭṭhānaṃ**. **Anavakāso**ti etthāpi eseva nayo. Tadatthanigamanameva hi “netam ṭhānaṃ vijjati”ti vacananti. Tenāha – “**ubhayenapi**”tiādi. **Yanti** kāraṇatthe paccattavacanaṃ. Hetuattho cettha kāraṇatthoti āha – “**yanti yena kāraṇena**”ti. Ukkatṭhaniddesenettha diṭṭhisampatti veditabbāti vuttaṃ – “**maggadiṭṭhiyā sampanno**”ti. Kuto panāyamattho labbhati? Liṅgato, liṅgaṃ cetassa niccato upagamanappaṭikkhepo. **Catubhūmakasūti** idaṃ catutthabhūmakasaṅkhārānaṃ ariyasāvakaṃ visayabhāvūpagamanato vuttaṃ, na pana te ārabha niccato upagamanasabbhāvato. Vakkhati hi “tadabhāve catutthabhūmakasaṅkhārānaṃ panā”tiādinā. Abhisāṅkhatasaṅkhārānaṃ abhisāṅkharānakasaṅkhārānaṃ sappadesattā nippadesasaṅkhārāgahaṇattham **“saṅkhatasaṅkhāresū”**ti vuttaṃ, lokuttarasaṅkhārānaṃ pana nivattane kāraṇaṃ sayameva vakkhati. **Etam kāraṇaṃ natthīti** tathā upagamane setughāto natthī. **Tejussadattāti** saṃkilesavidhamanatejassa adhikabhāvato. Tathā hi te gambhīrabhāvena duddasā akusalānaṃ ārammaṇaṃ na hontīti. Idaṃ pana pakaraṇavasena vuttaṃ. Appahīnavipallāsānaṃhi santānesu kusaladhammānampi te ārammaṇaṃ na honti.

269. Asukhe sukhanti vipallāso ca idha sukhato upagamanassa ṭhānanti dassento “**ekanta...pe... attadiṭṭhivasenā**”ti padhānadiṭṭhimāha. **Gūthanti** gūthaṭṭhānaṃ, diṭṭhiyā nibbānassa avisayabhāvo heṭṭhā vutto evāti kasiṇādiṭṭhivattisaṅgahatthanti vuttaṃ.

270. **Paricchedoti** paricchindanaṃ paricchijja tassa gahaṇaṃ. Svāyaṃ yesu niccādito upagamaṃ sambhavati, tesam vasenayeva kātabboti dassento “**sabbavāresu vā**”tiādimāha. **Sabbavāresūti** “niccato upagaccheyyā”tiādinā āgatesu sabbesu suttapadesu. **Puthujjano hīti hi**-saddo hetuattho. Yasmā yaṃ yaṃ saṅkhāraṃ puthujjano niccādivasena gaṇhāti, taṃ taṃ ariyasāvako aniccādivasena gaṇhanto yāthāvato jānanto taṃ gāhaṃ taṃ diṭṭhiṃ vissajjeti, tasmā yattha gāho, tattha vissajjanāti catubhūmakasaṅkhārā idha saṅkhārāgahaṇena na gayhantīti attho.

271. Puttasambandhena mātupitusamaññā dattakittimādivasenapi puttavohāro loke dissati, so ca kho pariyāyenāti nippiyāyena siddham taṃ dassetuṃ – “**janikāva mātā, janakova pitā**”ti vuttaṃ. Tathā ānantariyakammaṃ adhippetattā “**manussabhūtova khīṇāsavo arahāti adhippeto**”ti vuttaṃ. “Aṭṭhānameta”ntiādinā “mātuādīnaṃyeva jīvitā voropane ariyasāvakaṃ abhabbhāvadassanato tadaññaṃ ariyasāvako jīvitā voropetīti idaṃ atthato āpannamevā”ti maññamāno vadati – “**kim pana ariyasāvako aññaṃ jīvitā voropeyyā**”ti? “Aṭṭhānametaṃ anavakāso, yaṃ diṭṭhisampanno puggalo sañcicca paṇaṃ jīvitā voropeyya, netam ṭhānaṃ vijjati”ti vacanato “**etampi aṭṭhāna**”nti vuttaṃ. Tenevāha – “**sace hī**”tiādi. Evaṃ sante kasmā “mātara”ntiādinā viśesetvā vuttanti āha – “**puthujjanabhāvassa panā**”tiādi. Tattha **baladīpanatthanti** saddhādībalasamannāgamadīpanattham. Ariyamaggenāgatasaddhādībalavasena hi ariyasāvako tādisaṃ sāvajjaṃ na karoti.

275. **Pañcahi kāraṇehīti** idamettha nipphādakāni tesam pubbhāgiyāni ca kāraṇāni kāraṇabhāvasāmaññena ekajjhaṃ gahetvā vuttaṃ, na pana sabbesaṃ samānāyogakkhamattā. **Ākārehīti** kāraṇehi. **Anussāvanenāti** anurūpaṃ sāvanena. Bhedassa **anurūpaṃ** yathā bhedo hoti, evaṃ bhinditabbānaṃ bhikkhūnaṃ attano vacanassa **sāvanena** viññāpanena. Tenāha – “**nanu tumhe**”tiādi. **Kaṇṇamūle vacībhedaṃ katvāti** etena pākaṭṭhaṃ katvā bhedakaravattudīpanaṃ vohāro, tattha attano nicchitamattham rahassavasena viññāpanaṃ anussāvananti dasseti.

Kammameva uddeso vā pamāṇanti tehi saṅghabhedasiddhito vuttaṃ, itare pana tesam sambhārabhūtā. Tenāha – “**vohārā**”tiādi. **Tatthāti** voharaṇe. Cutianantaraṃ phalaṃ anantaraṃ nāma, tasmim anantare niyuttāni, tannibbattanena anantarakaraṇasīlāni, anantarappayojanāni cāti ānantariyāni, tāni eva kammānīti **ānantariyakammāni**.

Kammatotī “evaṃ ānantariyakammaṃ hoti, evaṃ ānantariyakammasadisa”nti evaṃ kammavibhāgato. **Dvāratoti** kāyadvāro. **Kappaṭṭhitiyatoti** “idaṃ kappaṭṭhitiyavipākaṃ, idaṃ na kappaṭṭhitiyavipāka”nti evaṃ kappaṭṭhitiyavibhāgato. **Pākasādhāraṇādīhīti** “idamettha vipaccati, idaṃ na vipaccatī”ti vipaccanavibhāgato, gahaṭṭhapabbajitānaṃ sādāraṇāsādhāraṇato, **ādi**-saddena vedanādivibhāgato ca.

Kammato tāva vinicchayo vuccatīti sambandho. Yasmā manussattabhāve ʘhitasseva kusalahammānaṃ tikkhavisadabhāvāpatti, yathā tiṇṇaṃ bodhisattānaṃ bodhittayanibbattiyaṃ, evaṃ manussabhāve ʘhitasseva edisānaṃ akusaladhammānampi tikkhavisadabhāvāpattīti āha – “**manussabhūtassevā**”ti. Pākatikamanussānampi ca kusalahammānaṃ visesappatti vimānavatthuaṭṭhakathāyaṃ vuttanayeneva veditabbā. Yathāvutto ca attho samānajātiyassa vikopane garutaro, na tathā vijātiyassāti vuttaṃ – “**manussabhūtaṃ mātaṃ vā pitaraṃ vā**”ti. Līngaparivatte ca so eva ekakammanibbatto bhavaṅgappabandho jīvitindriyapabandho ca, na aññoti āha – “**api parivattaliṅga**”nti. Arahattaṃ pattepi eseva nayo. **Tassa vipākantiādi** kammassa ānantariyabhāvasamatthanaṃ. Catukkoṭiyañcetha sambhavati. Tattha paṭhamā koṭi dassitā, itarāsu visaṅketabhāvaṃ dassetuṃ – “**yo panā**”tiādi vuttaṃ. Yadi pi tattha visaṅketo, kammaṃ pana garutaraṃ ānantariyasadisāṃ bhāyitabbanti āha – “**bhāriyaṃ...pe... tiṭṭhati**”ti. **Ayaṃ pañhoti** ñāpanicchānibbattā kathā.

Abhisandhināti adhippāyena. **Ānantariyaṃ phusatīti** maraṇādhippāyeneva ānantariyavatthuno vikopitattā vuttaṃ. **Ānantariyaṃ na phusatīti** ānantariyavatthuabhāvato ānantariyaṃ na hoti. Sabbattha hi purimaṃ abhisandhicittaṃ appamāṇaṃ, vadhakacittaṃ pana tadārammaṇaṃ jīvitindriyañca ānantariyabhāve pamāṇanti daṭṭhabbaṃ. Saṅgāmacatukkaṃ sampattavasena yojetabbā. Yo hi parasenāya aññañca yodhaṃ pitarañca kammaṃ karonte disvā yodhassa usūṃ khipati “etaṃ vijjhivā mama pitaraṃ vijjhissatī”ti, yathādhippāyaṃ gate pitughātaṃ hoti. “Yodhe viddhe mama pitā palāyissatī”ti khipati, usūṃ ayathādhippāyaṃ gantvā pitaraṃ māreti, vohārasena pitughātakoti vuccati, ānantariyaṃ pana natthīti. Coracatukkaṃ pana yo “coraṃ māressāmī”ti coravesena gacchantaṃ pitaraṃ māreti, ānantariyaṃ phusatītiādinā yojetabbā. **Tenevāti** teneva payogena. **Arahantaghātaṃ hotiyevāti** arahato māritattā vuttaṃ, **puthujjanasseva taṃ dinnāṃ hotīti** etthāyamadhippāyo – yathā vadhakacetanā paccuppannārammaṇāpi pabandhavicchedanavasena jīvitindriyaṃ ārammaṇaṃ katvā pavattati, na evaṃ cāgacetanā. Sā hi cajitabbavatthuṃ ārammaṇaṃ katvā cajanamattameva hoti, aññasantakabhāvakaraṇaṃ tassa cajanāṃ, tasmā yassa taṃ santakaṃ kataṃ, tasseva dinnāṃ hotīti.

Lohitaṃ samosaratīti abhigātena pakuppamānaṃ sañcittaṃ hoti. **Mahantataranti** garutaraṃ. **Sarīrapaṭijaggane viyāti** sathurūpakāyappaṭijaggane viya.

Asannipatiteti idaṃ sāmaggīyadīpanaṃ. **Bhedo ca hotīti** saṅghassa bhedo ca hoti. **Vaṭṭatīti saññāyāti** “īdisaṃ karaṇaṃ saṅghabhedāya na hotī”ti saññāya. **Tathā navato ūnāparisāyāti** navato ūnāparisāya karontassa tathāti yojetabbā. **Tathāti** ca iminā “na ānantariyakamma”nti imaṃ ākaḍḍhati, na pana “bhedova hotī”ti idaṃ. Heṭṭhimantena hi navannameva vasena saṅghabhedo. **Dhammavādinā anavajjāti** yathādhammaṃ anavaṭṭhānato. Saṅghabhedassa pubbhāgo **saṅgharāji**.

Kāyadvārameva pūrenti kāyakammabhāveveva lakkhitabbato. **Saṅghahantehi kappe...pe... muccatīti** idaṃ **kappaṭṭhakathāya** (kathā. 654 ādayo) na sameti. Tattha hi **aṭṭhakathāya** (kathā. aṭṭha. 654-657) vuttaṃ – “āpāyikoti idaṃ suttaṃ yaṃ so ekaṃ kappaṃ asītibhāge katvā tato ekabhāgamattaṃ kālaṃ tiṭṭheyya, taṃ āyukappaṃ sandhāya vutta”nti. **Kappavināseyevāti** ca āyukappavināse evāti atthe sati natthi virodho. Ettha ca **saṅghahanteti** idampi “sveva vinassissatī”ti viya abhūtaparikappavasena vuttaṃ. **Ekadivasameva niraye paccati**, tato paraṃ kappaṃbhāve āyukappassapi abhāvato avirodhato atthayojanā daṭṭhabbā. **Sesānti** saṅghabhedato aññāni ānantariyakammāni.

Yadi tāni ahosikammasaṅkhaṃ gacchanti, evaṃ sati kathaṃ nesaṃ ānantariyatā cutianantaraṃ vipākadānābhāvato. Atha sati phaladāne cutianantaro eva etesaṃ phalakālo, na aññoti phalakālaniyamena niyatatā icchitā, na phaladānaniyamena. Evampi niyataphalakālānaṃ aññesampi upapajjavedanīyānaṃ diṭṭhadhammavedanīyānañca niyatatā āpajjeyya, tasmā vipākadhammadhammānaṃ paccayantaravikalatādīhi avipaccamānānampi attano sabhāvena vipākadhammatā viya balavatā ānantariyena vipāke dinne avipaccamānānampi ānantariyānaṃ phaladāne niyatasabhāvā ānantariyasabhāvā ca pavattīti attano sabhāvena phaladānaniyameneva niyatā ānantariyatā ca veditabbā. Avassañca ānantariyasabhāvā tato eva niyatasabhāvā ca tesāṃ pavattīti sampaṭicchitabbametāṃ, aññassa balavato ānantariyassa abhāve sati cutianantaraṃ ekantena phaladānato.

Nanu evaṃ aññesampi upapajjavedanīyānaṃ aññasmiṃ vipākadāyake asati cutianantameva ekantena phaladānato niyatasabhāvā ānantariyasabhāvā ca pavatti āpajjati? Nāpajjati asamānajātikena cetopaṇidhivasena upaghātakena ca nivattetabbavipākattā anantare ekantaphaladāyakkattābhāvā, na pana ānantariyānaṃ paṭhamajjhānādīnaṃ dutiyajjhānādīni viya asamānajātikaṃ phalanivattakaṃ atthi sabbānantariyānaṃ avīciphalattā, na ca heṭṭhūpapattiṃ icchato sīlavato cetopaṇidhi viya uparūpapattijjanakakammaphalaṃ ānantariyaphalaṃ nivattetuṃ samattho cetopaṇidhi atthi anicchantasseva avīcipātanato, na ca ānantariyopaghātakaṃ kiñci kammaṃ atthi, tasmā tesameva anantare ekantavipākajanakasabhāvā pavattīti. Anekāni ca ānantariyāni katāni ekantena vipāke niyatasabhāvattā uparatāvipaccanasabhāvāsāṅkattā nicchitāni sabbhāvato niyatāneva. Tesu pana samānasabhāvesu ekena vipāke dinne itarāni attanā kattabbakiccassa teneva katattā na dutiyaṃ tatiyampi ca paṭisandhiṃ karonti, na samatthātvighātattāti natthi tesam ānantariyakatānivatti, garugarutarabhāvo pana tesam labbhatevāti saṅghabhedassa siyā garutarabhāvoti “**yena...pe... vipaccati**”ti āha. Ekassa pana aññāni upatthambhakāni honṭīti daṭṭhabbāni. **Paṭisandhivasena vipaccati** vacanena itaresaṃ pavattivipākadāyitā anuññātā viya dīssati. **No vā tathā sīlavati**ti yathā pitā sīlavā, tathā sīlavatī no vā hotīti yojanā. Sace mātā sīlavatī, mātughāto paṭisandhivasena vipaccati ti yojanā.

Pakatattoti anukkhitto. **Samānasamvāsakoti** apārājiko. **Samānasīmāyanti** ekasīmāyaṃ.

276. Satthu kiccaṃ kātuṃ asamatthoti yaṃ satthārā kātabbakiccaṃ anusāsanādi, naṃ kātuṃ asamatthoti bhagavantaṃ paccakkhāya. **Aññaṃ titthakaranti** aññaṃ satthāraṃ. Vuttañhettaṃ –

“Titthaṃ jānitabbaṃ, titthakaro jānitabbo, titthiyā jānitabbā, titthiyasāvaka jānitabbā. Tattha **titthaṃ** nāma dvāsaṭṭhi dīṭṭhiyo. Ettha hi satthā taranti uplavanti ummujjanimujjaṃ karonti, tasmā titthanti vuccanti. Tādisānaṃ dīṭṭhīnaṃ uppādetā **titthakaro** nāma pūraṇakassapādiko. Tassa laddhiṃ gahetvā pabbajitā **titthiyā** nāma. Te hi titthe jātāti titthiyā. Yathāvuttaṃ vā dīṭṭhigatasāṅkhātaṃ titthaṃ etesaṃ atthīti titthikā, titthikā eva titthiyā. Tesam paccayadāyaka **titthiyasāvaka**ti veditabbā”ti (ma. ni. aṭṭha. 1.140).

277. Abhijātīdāsu pakampanadevatūpasāṅkamanādinā jātacakkavāḷena samānayogakkhamaṃ dasasahassaparimāṇaṃ cakkavāḷaṃ **jātikhettaṃ**. Saraseneva āṇāpavattanaṭṭhānaṃ **āṇākhettaṃ**. Visayabhūtaṃ ṭhānaṃ **visayakhettaṃ**. **Dasasahassī lokadhātūti** imāya lokadhātuyā saddhiṃ imaṃ lokadhātuṃ parivāretvā ṭhitā dasasahassī lokadhātu. Tattakānaṃyeva jātikhettabhāvo dhammatāvasena veditabbo. “Pariggahavasena”ti keci, “sabbesaṃyeva buddhānaṃ tattakaṃyeva jātikhettaṃ tannivāsīnaṃyeva devatānaṃ dhammābhisamayo”ti ca vadanti. Mātukucchi okkamanakālādīnaṃ channaṃ eva gahaṇaṃ nidassanamattaṃ mahābhīnīhārādīkālepi tassa pakampanassa labbhanato. **Āṇākhettaṃ nāma** yaṃ ekajjhaṃ samvaṭṭati vivaṭṭati ca, **āṇā pavattati** āṇāya tannivāsīdevatānaṃ sirasā sampaṭicchana, tañca kho kevalaṃ buddhānaṃ ānubhāveneva, na adhippāyavasena. Adhippāyavasena pana “yāvata vā pana ākaṅkheyyā”ti (a. ni. 3.81) vacanato tato parampi āṇā vatteyyeva.

Na uppajjantīti pana atthīti “na me ācariyo atthi, sadiso me na vijjati”tiādiṃ (ma. ni. 1.285; mahāva. 11; kathā. 405) imissā lokadhātuyā ṭhatvā vadantena bhagavatā “kiṃ panāvuso, sārīputta, atthetarahi aññe samaṇā vā brāhmaṇā vā bhagavatā samasamā sambodhiyanti, evaṃ puṭṭho ahaṃ, bhante, ‘no’ti vadeyya”nti (dī. ni. 3.161) vatvā tassa kāraṇaṃ dassetuṃ – “aṭṭhānametaṃ anavakāso, yaṃ ekissā lokadhātuyā dve arahanto sammāsambuddhā apubbaṃ acarimaṃ uppajjeyyu”nti imaṃ **suttaṃ** (a. ni. 1.277; vibha. 809; ma. ni. 3.129; mī. pa. 5.1.1) āharantena dhammasenāpatinā ca buddhakhettabhūtaṃ imaṃ lokadhātuṃ ṭhapetvā aññattha anuppatti vuttā hotīti adhippāyo.

Ekatoti saha, ekasmiṃ kāleti attho, so pana kālo kathaṃ paricchinnoti carimabhava paṭisandhiggahaṇato paṭṭhāya yāva dhātuparinibbānāti dassento, “**tattha**”tiādimāha. **Anacchariyattāti** dvīsūpi uppajjamānesu acchariyattābhāvatoti attho. Dvīsūpi uppajjamānesu anacchariyatā, kimaṅgaṃ pana bahūsūti dassento, “**yadi cā**”tiādimāha. Buddhā nāma majjhe bhinnasuvaṇṇaṃ viya ekasadisāti tesam desanāpi ekarasā ekadhāti āha – “**desanāya ca vīsābhāvato**”ti. Etenapi anacchariyattameva sādheti.

Vivādabhāvatoti etena vivādābhāvatthaṃ dve buddhā ekato na uppajjantīti dasseti. **Etam kāraṇanti** etaṃ anacchariyatādikāraṇaṃ. **Tatthāti** milindapañhe.

Ekaṃ eva buddhaṃ dhāretīti **ekabuddhadhāraṇī**. Etena evaṃsabhāvā ete buddhaguṇā, yena dutiyabuddhaguṇe dhāretuṃ asamatthā ayaṃ lokadhātūti dasseti. Paccayavisesanipphannānañhi guṇadhammānaṃ bhāriyo viseso mahāpathaviyāpi dussahoti sakkā viññātuṃ. Tathā hi abhisambodhisamaye upagatassa lokanāthassa guṇabhāraṃ bodhirukkhassa tīsupi disāsu mahāpathavī sandhāretuṃ nāsakkhi. Tasmā “na dhāreyyā”ti vatvā tameva adhāraṇaṃ pariyāyantarehi pakāsentō “**caleyyā**”tiādimāha. Tattha **caleyyāti** paripphandeyya. **Kampeyyāti** pavedheyya. **Nameyyāti** ekapassena nameyya. **Onameyyāti** osīdeyya. **Vinameyyāti** vividhaṃ ito cito ca nameyya. **Vikireyyāti** vātena thusamuṭṭhi viya vipakireyya. **Vidhameyyāti** vinasseyya. **Viddhamseyyāti** sabbaso viddhastā bhaveyya. Tathābhūtā ca na katthaci tiṭṭheyyāti āha – “**na ṭhānamupagaccheyyā**”ti.

Idāni tattha nidassanaṃ dassento, “**yathā, mahārājā**”tiādimāha. Tattha **eke puriseti** ekasmiṃ purise. **Samupādikāti** samaṃ uddhaṃ pajjati pavattatīti samupādikā, udakassa upari samaṃ gāminīti attho. “**Samupādikā**”tipi paṭhanti, ayamevattho. **Vaṇṇenāti** saṅṭhānena. **Pamaṇenāti** ārohena. **Kisathūlenāti** kisathūlabhāvena, pariṇāhenāti attho. **Dvinnampīti** dvepi, **dvinnampi** vā sarīrabhāraṃ.

Chādentanti rocentaṃ ruciṃ uppādentam. **Tandikatoti** tena bhojanena tandībhūto. **Anonamitadāṇḍajātoti** yāvadatthaṃ bhojanena onamituṃ asakkuṇeyyatāya anonamanadaṇḍo viya jāto. **Sakiṃ bhutto vameyyāti** ekampi ālopaṃ ajjhoharivā vameyyāti attho.

Atidhammabhārena pathavī calatīti dhammena nāma pathavī tiṭṭheyya. Sā kiṃ teneva calati vinassatīti adhippāyena pucchati. Puna thero “**ratanam nāma** loke kuṭumbaṃ sandhārentaṃ abhimatañca lokena attano garusabhāvatāya sakaṭabhaṅgassa kāraṇaṃ atibhārabhūtaṃ diṭṭhaṃ. Evaṃ dhammo ca hitasukhavisesehi taṃsamaṅgīnaṃ dhārento abhimato ca viññūnaṃ gambhīrappameyyabhāvena garusabhāvattā atibhārabhūto pathavīcalanassa kāraṇaṃ hotī”ti dassento, “**idha, mahārāja, dve sakaṭā**”tiādimāha. Eteneva tathāgatassa mātukucchiokkamanādikāle pathavīkampanakāraṇaṃ saṃvaṇṇitanti daṭṭhabbaṃ. **Ekassāti** ekasmā, **ekassa** vā sakaṭassa ratanaṃ, tasmā sakaṭā gahetvāti attho.

Osāritanti uccāritaṃ, vuttanti attho. **Aggoti** sabbasattehi aggo. **Jeṭṭhoti** vuddhataro. **Seṭṭhoti** pasatthataro. Viṣiṭṭhehi sīlādīhi guṇehi samannāgatattā **visiṭṭho**. Uggatatamoti **uttamo**. **Pavaroti** tasseva vevacanaṃ. Natthi etassa samoti **asamo**. Asamā pubbabuddhā, tehi samoti **asamasamo**. Natthi etassa paṭisamo paṭipuggaloti **appaṭisamo**. Natthi etassa paṭibhāgoti **appaṭibhāgo**. Natthi etassa paṭipuggaloti **appaṭipuggalo**.

Sabhāvapakatīkāti sabhāvabhūtā akittimā pakati. **Kāraṇamahantattāti** kāraṇānaṃ mahantatāya, mahantehi buddhakaradhammehi pāramisaṅkhātehi kāraṇehi buddhaguṇānaṃ nibbattitoti vuttaṃ hoti. Pathavīādīni mahantāni vatthūni, mahantā cakkavāḷādayo attano attano visaye ekekāva, evaṃ sammāsambuddhopi mahanto attano visaye eko eva. Ko ca tassa visayo? Buddhabhūmi, yāvatakaṃ vā ñeyyaṃ. “**Ākāso** viya anantavisayo bhagavā eko eva hotī”ti vadanto paracakkavāḷesupi dutiyassa buddhassa abhāvaṃ dasseti.

Imināva padenāti “**ekissā** lokadhātuyā”ti iminā eva padena. **Dasa cakkavāḷasahassāni gahitānīti** jātikhettāpekkhāya gahitāni. **Ekacakkavāḷenevāti** iminā eva ekacakkavāḷena, na yena kenaci. Yathā “**imasmiṃyeva** cakkavāḷe uppajjantī”ti vutte imasmimpi cakkavāḷe jambudīpe eva, tatthāpi majjhimadeso evāti paricchindituṃ vaṭṭati, evaṃ “**ekissā** lokadhātuyā”ti jātikhette adhippetepi imināva cakkavāḷena paricchindituṃ vaṭṭati.

Paṭhamavaggaṇṇanā niṭṭhitā.

15. Aṭṭhānapāli (dutiyaavagga)

(15) 2. Aṭṭhānapāli-dutiyaṅgaṇṇanā

278. **Vivādupacchedatoti** vivādupacchedakāraṇā. Dvīsu uppannesu yo vivādo bhavēyya, tassa anuppādoyevettha vivādupacchedo. **Ekasmiṃ dīpeti**ādīnā dīpantarepi ekajjhaṃ na uppajjati, pageva ekadīpeti dasseti. **Sopi parihāyethāti** cakkavālassa padese eva pavattitabbattā parihāyēyya.

279-280. **Manussattanti** manussabhāvo tasseva pabbajjādiguṇānaṃ yoggabhāvato. **Liṅgasampattīti** purisabhāvo. **Hetūti** manovacīpaṇidhānapubbikā hetusampadā. **Satthāradassananti** satthusammukhībhāvo. **Pabbajjāti** kammakiriyavādīsu tāpasesu, bhikkhūsu vā pabbajjā. **Guṇasampattīti** abhiññādiguṇasampadā. **Adhikāro**ti buddhe uddissa adhiko kāro, savisesā upakārakiriyā adhiko sakkāroti vuttaṃ hoti. Chandova **chandatā**, sammāsambodhiṃ uddissa sātisayo kattukamyatākusalacchando. **Aṭṭhadhammasamodhānāti** etesaṃ aṭṭhannaṃ dhammānaṃ samāyogena. **Abhinīhāro**ti kāyapaṇidhānaṃ. **Samijjhatīti** nipphajjati. Ayamettha saṅkhepo, vitthāro pana paramatthadīpaniyā **cariyāpiṭakavaṇṇanāya** (cariyā. aṭṭha. pakiṇṇakakathā) vuttanayena veditabbo. **Sabbākāraparipūramevāti** paripuṇṇalakkhaṇatāya sattuttamādīhi sabbākārena sampannameva. Na hi itthiyā kosohitavatthaguyhatādi sambhavati. Dutiyaapakati ca nāma paṭhamapakatito nihīnā eva. Tenevāha – anantaravāre “**yasmā**”tiādi.

281. **Idha purisassa tattha nibbattanato**ti imasmiṃ manussaloke purisabhūtassa tattha brahmaloke brahmattabhāvena nibbattanato. Tena asatīpi purisaliṅge purisākārā brahmāno hontīti dasseti. Taṃyeva ca purisākāraṃ sandhāya vuttaṃ bhagavatā “yaṃ puriso brahmattaṃ kāreyyā”ti. Tenevāha – “**samānepi**”tiādi. Yadi evaṃ itthiyo brahmaloke na uppajjeyyunti āha – “**brahmatta**”ntiādi.

290-295. “Kāyaduccaritasā”tiādi pāliya kammaniyaṃ nāma kathito. Samañjanaṃ samaṅgo, samannāgamo, so etassa atthīti samaṅgī, samannāgato, samañjanasīlo vā samaṅgī, pubbabhāge upakaraṇasamudāyato pabhuti āyūhanavasena **āyūhanasamaṅgītā**, sannīṭṭhāpakacetanāvasena **cetanāsamaṅgītā**. Cetanāsantativasena vā **āyūhanasamaṅgītā**, taṃtaṃcetanākkhaṇavasena **cetanāsamaṅgītā**. Katūpacitassa avipakkavipākassa kammaṃ vasaṃ **kammasamaṅgītā**. Kamme pana vipaccitūṃ āradde vipākappavattivasena **vipākasamaṅgītā**. Kammādīnaṃ upaṭṭhānakālavasena **upaṭṭhānasamaṅgītā**. **Kusalākusalakammāyūhanakkhaṇeti** kusalakammaṃ akusalakammaṃ ca samīhanakkhaṇe. **Tathāti** iminā kusalākusalakammaṃ padāṃ ākaḍḍhati. Yathā kataṃ kammaṃ phaladānasamatthaṃ hoti, tathā kataṃ **upacitaṃ**. **Vipākārahanti** dutiyaṃ bhavādīsu vipaccanārahaṃ. Uppajjamānānaṃ upapattinimittaṃ upaṭṭhātīti yojanā. Upapattiyā uppajjanassa nimittaṃ kāraṇanti **upapattinimittaṃ**, kammaṃ, kammanimittaṃ, gatinimittaṃ. Aṭṭhakathāyaṃ pana gatinimittavaseneva yojanā dassitā. Kammakammanimittānaṃpi upaṭṭhānaṃ yathārahaṃ daṭṭhabbaṃ. “Yānissa tāni pubbe katāni kammāni, tānissa tasmīṃ samaye olambanti ajjholambanti abhilambanti”ti (ma. ni. 3.248) vacanato sāyanhe mahantānaṃ pabbatakūṭānaṃ chāyā viya āsannamaraṇassa sattassa citte supine viya vipaccitūṃ katokāsaṃ kammaṃ, tassa nimittaṃ gatinimittaṃ upaṭṭhateva. **Calatīti** parivattati. Ekena hi kammunā tajje nimitte upaṭṭhite paccayavisesavasena tato aññena kammunā tadaññassa nimittassa upaṭṭhānaṃ parivattanaṃ. **Sesā niccalā** avasesā catubbidhāpi samaṅgītā niccalā aparivattanato.

Sunakhavājikoti sunakhehi migavājavasena vajanasīlo, sunakhaluddakoti attho. **Talasantharaṇapūjanti** bhūmitalassa pupphehi santharaṇapūjaṃ. **Āyūhanacetanā kammasamaṅgītāvasenāti** kāyaduccaritasā aparāparaṃ āyūhanena sannīṭṭhāpakacetanāya tasseva pakappane kammakkhayakaraññena akhepitattā yathūpacitakammunā ca samaṅgibhāvassa vasena.

Kammanti akusalakammaṃ. **Tasmīyeva khaṇeti** āyūhanakkhaṇeyeva. **Tassāti** kammasamaṅgino puggalassa saggo vārito, tañce kammaṃ vipākavāraṃ labheyyāti adhippāyo. **Saggo vāritoti** ca nidassanamattaṃ. Manussalokopissa vāritovāti. Apare pana purimehi vipākāvāraṇassa anuddhaṭṭatā “tasmīyeva khaṇe”ti ca avisesena vuttattā taṃ dosaṃ pariharitūṃ “**āyūhitakammaṃ nāmā**”tiādimāha. **Yadā kammaṃ vipākavāraṃ labhatīti** idaṃ katokāsaṃ appaṭibhāyattā vuttaṃ. Tathā hi bhagavā **tatiyapārājikavatthusmiṃ** (pārā. 162 ādayo) paṭisallīyi, imasmiṃ sutte “kāyaduccaritasamaṅgī”ti āgatattā vipākūpaṭṭhānasamaṅgītā na labbhanti.

(Dutiyavaggavaṇṇanā niṭṭhitā.)

Aṭṭhānapāḷivaṇṇanāyaṃ anuttānatthadīpanā niṭṭhitā.

16. Ekadhammapāḷi

(16) 1. Ekadhammapāḷi-paṭhamavaggavaṇṇanā

296. Ekadhammapāḷivaṇṇanāyaṃ idha dhamma-saddo sabhāvattho ‘kusalā dhammā’ tiādīsu viyāti āha – “**ekasabhāvo**” ti. **Ekantenā**ti ekaṃsena, avassanti attho. **Vaṭṭeti** saṃsāravaṭṭe. **Nibbindanattthāyāti** anabhiramanattthāya. **Virajjanattthāyāti** arajjanattthāya. **Virajjanāyāti** palujjanāya. Tenevāha – “**vigamāyā**” ti. **Rāgādīnaṃ nirodhāyāti** maggañāṇena rāgādīnaṃ nirodhanattthāya. Maggañāṇena nirodhanāṃ nāma accantaṃ appavattikaraṇanti āha – “**appavattikaraṇattthāyā**” ti. Yathā khādanīyassa mukhe katvā khādanaṃ nāma yāvadeva ajjhoharaṇatttham, evaṃ rāgādīnaṃ nirodhanāṃ vaṭṭanirodhanattthamevāti vuttaṃ – “**vaṭṭasseva vā nirujjanattthāyā**” ti. Yasmā kilesesu khīṇesu itaraṃ vaṭṭadvayampi khīṇameva hoti, tasmā mūlameva gaṇhanto “**upasamāyāti kilesavūpasamanattthāyā**” ti āha. Saṅkhatadhammānaṃ abhijānaṃ nāma tattha lakkhaṇattayāropanamukhenevāti āha – “**aniccādi... pe... abhijānanattthāyā**” ti. Sambujjhittabāni nāma cattāri ariyasaccāni tabbinimuttassa ñeyyassa abhāvato. “**Catunnaṃ saccānaṃ bujjhanattthāyā**” ti vatvā tayidaṃ bujjhanaṃ yassa ñāṇassa vasena ijjhati, tassa ñāṇassa vasena dassetuṃ – “**bodhi vuccati**” tiādi vuttaṃ. **Appaccayanibbānassāti** amatadhātuyā.

Ussāhajanantthanti kammatṭhāne abhiruciuppādanāya. **Visakaṇṭhakoti** guḷassa vāñjasamaññā. “Kismiñci dese desabhāsā” ti keci. Ucchuraso samapākapakko cuṇṇādīhi missetvā piṇḍīkato **guḷo**, apiṇḍīkato **phāṇitaṃ**. Pākavisesena khaṇḍakhaṇḍasedito **khaṇḍo**, malābhāvaṃ āpanno **sakkarā**.

Saratīti satī. Anu anu saratīti **anussati**, anu anurūpā satītipi **anussati**. **Duvidhaṃ hotīti** payojanavasena duvidhaṃ hoti. **Cittasampahaṃsanantthanti** pasādanīyavattthusmiṃ pasāduppādanena bhāvanācittassa paritosanatttham. **Vipassanantthanti** vipassanāsukhattham. Upacārasamādhinā hi citte samāhite vipassanāsukhena ijjhati. **Cittuppādoti** bhāvanāvasena pavatto cittuppādo. **Upahaññati** patihaññati paṭikūlattā ārammaṇassa. Tato eva **ukkaṇṭhati**, kammatṭhānaṃ riñcati, **nirassādo hoti** bhāvanassādassa alabbhanato. **Pasīdati** buddhaguṇānaṃ pasādanīyattā. Tathā ca kankhādicetokhīlābhāvena **vinīvaraṇo hoti**. **Damtvāti** nīvaraṇanirākaraṇena nibbisevanaṃ katvā. Evaṃ kammatṭhānantarānuyuyūjanena cittaparidamanassa upamaṃ dassento, “**katha**” ntiādimāha.

Ko ayaṃ...pe... anussarīti ko ayaṃ mama abbhantare ṭhatvā anussari. **Pariggaṇhantoti** bāhirakaparikkappitassa anussarakassa sabbaso abhāvadassanametam. Tenāha – “**na añño koci**” ti. **Disvāti** pariyesananayena vuttappakāraṃ cittameva anussarīti disvā **sabbampetanti** etaṃ hadayavattuādiṭṭhānaṃ sabbampi. **Idaṅca rūpaṃ purimaṅca arūpanti** idaṃ ruppanasabhāvattā rūpaṃ, purimaṃ atamaṃsabhāvattā arūpanti saṅkhepato rūpārūpaṃ vavattthapetvā. Pañcakkhandhe vavattthapetvāti yojanā. **Sambhāvīkāti** samuṭṭhāpikā. **Tassāti** samudayasaccassa. **Nirodhoti** nirodhanimittam. **Appanāvāroti** yathāraddhāya desanāya nigamanavāro.

297. **Eseva nayoti** iminā yvāyaṃ “taṃ paneta” ntiādinā atthanayo buddhānussatiyaṃ vibhāvitoti atidisati, svāyaṃ atideso payojanavasena navasupī anussatīsu sādharāṇavasena vuttopi ānāpānassatiādīsu tīsu vipassanattthāneva hotīti iminā apavādena nivattitoti tāsam ekappayojanatāva daṭṭhabbā. Dhamme anussati dhammānussatīti samāsapadavibhāgadassanampi vacanattthadassanapakkhikamevāti āha – “**ayaṃ panettha vacanatto**” ti. **Dhammaṃ ārabbhāti** hi dhammassa anussatiyā visayabhāvadassanametam. Esa nayo sesesupī. **Sīlaṃ ārabbhāti** attano pārisuddhisīlaṃ ārabbhā. **Cāgaṃ ārabbhāti** attano cāgaguṇam ārabbhā. **Devatā ārabbhāti** ettha devatāguṇasadisatāya attano saddhāsīlasutacāgapaññāsu devatāsamaññā. Bhavati hi taṃsadisepi tabbohāro yathā “tāni osadhāni, esa brahmadatto” ti ca. Tenāha – “**devatā sakkhiṭṭhāne ṭhapetvā**” tiādi. Tattha **devatā sakkhiṭṭhāne ṭhapetvāti** “yathārūpāya saddhāya

samannāgatā tā devatā ito cutā tattha upapannā, mayhampi tathārūpā saddhā saṃvijjati. Yathārūpena sīlena, yathārūpena sutena, yathārūpena cāgena, yathārūpāya paññāya samannāgatā tā devatā ito cutā tattha upapannā, mayhampi tathārūpā paññā saṃvijjati”ti evaṃ devatā sakkhiṭṭhāne ṭhapetvā. **Assāsapassāsanimittaṃ** nāma tattha laddhabbappaṭibhāganimittaṃ. **Gatāti** ārammaṇakaraṇavasena upagatā pavattā.

Upasammati ettha dukkhanti upasamo, nibbānaṃ. Accantameva ettha upasammati vaṭṭattayanti **accantūpasamo**, nibbānameva. Khiṇoti khepeti kileseti khayō, ariyamaggo. Te eva upasametīti upasamo, ariyamaggo eva. Khayo ca so upasamo cāti **khayūpasamo**. Tatracāyaṃ upasamo dhammo evāti dhammānussatiyā upasamānussati ekasaṅgahoti? Saccam ekasaṅgaho dhammabhāvasāmaññe adhippete, saṅkhatadhammato pana asaṅkhatadhammo sātisayo uḷaratamapaṇītatamabhāvato dīpetum visum nīharitvā vuttaṃ. Imameva hi vīsesaṃ sandhāya bhagavā – “dhammānussatī”ti vatvāpi upasamānussatiṃ avoca anussarantassa savīsesaṃ santapaṇītabhāvena upaṭṭhānato. Evañca katvā idha khayūpasamaggahaṇampi samatthitanti daṭṭhabbaṃ. Yatheva hi samānepi lokuttaradhammabhāve “yāvata, bhikkhave, dhammā saṅkhatā vā asaṅkhatā vā, virāgo tesam aggamakkhāyatī”tiādivacanato (itivu. 90) maggaphaladhammehi nibbānadhammo sātisayo, evaṃ phaladhammato maggadhammo kilesappahānena acchariyadhammabhāvato, tasmā accantūpasamena saddhiṃ khayūpasamopi gahitoti daṭṭhabbaṃ. **Vipassanatthāneva** hontīti kasmā vuttanti? “Ekantanibbidāyātiādivacanato”ti keci, taṃ akāraṇaṃ buddhānussatiādīsupi tathā desanāya āgatattā. Yathā pana buddhānussatiādīni kammaṭṭhānāni vipassanatthāni honti, nimittasampahaṃsanatthānīpi honti, na evametāni, etāni pana vipassanatthānevāti tathā vuttaṃ.

Paṭhamavaggavaṇṇanā niṭṭhitā.

16. Ekaḍhammapāḷi

(16) 2. Ekaḍhammapāḷi-dutiyavaggavaṇṇanā

298. Micchā passati tāya, sayam vā micchā passati, micchādassanameva vā tanti **micchādiṭṭhi**, yaṃ kiñci viparītadassanaṃ. Tenāha – “**dvāsaṭṭhividhāyā**”tiādi. Micchādiṭṭhi etassāti micchādiṭṭhiko. Tassa **micchādiṭṭhikassa**.

299. Sammā passati tāya, sayam vā sammā passati, sammādassanamattameva vā tanti **sammādiṭṭhi**. **Pañcavidhāyāti** kammassakatājhānavipassanāmaggaphalavasena pañcavidhāya. Tattha jhānacittuppādapariyāpannaṃ ñāṇaṃ **jhānasammādiṭṭhi**, vipassanāñāṇaṃ **vipassanāsammādiṭṭhi**.

302. Pañcasu khandhesu “nicca”ntiādinā pavatto **anupāyamanasikāro**.

303. “Anicca”ntiādinā pavatto **upāyamanasikāro**. **Yāva niyāmokkamanāti** yāva micchattaniyāmokkamanā. Micchattaniyāmokkamanāyō pana sāmāññaphalasuttavaṇṇanāyaṃ taṭṭikāya ca vuttanayeneva vedītabbo.

304. **Ayaṃ tividhā saggāvaraṇā ceva hotīti** kammappathappattiyā mahāsāvajjabhāvato vuttaṃ. Saggāvaraṇāya hontiyā maggavibandhakabhāve vattabbameva natthīti vuttaṃ – “**maggāvaraṇā cā**”ti. “Sassato loko”tiādikā **dasavatthukā antaggāhikā micchādiṭṭhi**. **Maggāvaraṇāya hoti** viparītadassanabhāvato, **na saggāvaraṇā** akammappathappattitoti adhippāyo. **Idaṃ pana vidhānaṃ paṭikkhipitvā**ti viparītadassanañca na maggāvaraṇāñcāti viruddhametaṃ uddhammabhāvato. Tathā hi sati appahīnāya eva sakkāyadiṭṭhiyā maggādhiḡamena bhavitabbanti adhippāyena yathāvuttavidhānaṃ paṭikkhipitvā. “Na saggāvaraṇā”ti saggūpapattiyā avibandhakattaṃ vadantehi diṭṭhiyā saggāvahatāpi nāma anuññātā hotīti taṃ vādaṃ paṭikkhipantena “**diṭṭhi nāma saggam upanetuṃ samatthā nāma natthī**”ti vuttaṃ. Kasmā? Ekantagarutarasāvajjabhāvato. Tenāha – “**ekantaṃ nirayasmimyeva nimujjāpeti**”tiādi.

305. Vaṭṭaṃ viddhaṃsetīti maggasammādiṭṭhi kilesavaṭṭaṃ kammavaṭṭaṇca viddhaṃseti. Vipākavaṭṭaṃ kā nu viddhaṃseti nāma. Evaṃ pana attano kāraṇena viddhastabhavaṃ phalasammādiṭṭhi paṭibāhatīti vuttaṃ avasaradānato. **Icceṭaṃ kusalanti** arahattaṃ pāpetuṃ sace sakkoti, evametam vipassanāya paṭisandhianākaḍḍhanaṃ kusalaṃ anavaḷḷaṃ. **Satta bhava detīti** sotāpattimaggassa paccayabhūtā vipassanāsammādiṭṭhi tassa puggalassa satta bhava deti. **Evamayanti** pañcavidhampi sammādiṭṭhiṃ sandhāya vuttaṃ. Tenāha – **“lokiyalokuttarā sammādiṭṭhi kathitā”**ti. **Imasmiṃ panattheti** “nāhaṃ, bhikkhave, aññaṃ ekadhammampi samanupassāmī”tiādinaṃ vutte gatimaggasaṅkhāte atthe. “Sugatiṃ saggaṃ lokaṃ upapajjanti”ti vuttattā **“lokikā bhavanipphādikāva veditabbā”**ti vuttaṃ.

306. Yathādiṭṭhīti atthabyāpanicchāyaṃ yathā-saddo, tena uttarapadatthappadhāno samāsoti āha – **“yā yā diṭṭhī”**ti. **Tassā tassā anurūpanti** taṃtaṃdiṭṭhianurūpanti attho. **Samattanti** anavasesaṃ. Tenāha – **“paripuṇṇa”**nti. **Samādinanti** ādimajjhapariyosānesu samaṃ ekasadisāṃ katvā ādinaṃ gahitaṃ anissaṭṭhaṃ. **Tadetanti** yadetaṃ “yañceva kāyakamma”ntiādinaṃ vuttaṃ, tadetam kāyakammaṃ. **Yathādiṭṭhiyaṃ ṭhitakāyakammanti** yā pana diṭṭhi “natthi tatonidānaṃ pāpa”ntiādinaṃ pavattā, tassam diṭṭhiyaṃ ṭhitakassa ṭhitamattassa anissaṭṭhassa taṃdiṭṭhikassa kāyakammaṃ. **Diṭṭhisahajātaṃ kāyakammanti** tassa yathādiṭṭhikassa paresaṃ hatthamuddādinā viññāpanakāle tāya diṭṭhiyā sahaḷḷataṃ kāyakammaṃ. Na cettha vacīkammāsāṅkā uppādetabbā paṇaghātādīnaṃyeva adhippetattā. **Diṭṭhānulomikaṃ kāyakammanti** yathā paresaṃ pākātaṃ hoti, evaṃ diṭṭhiyā anulomikaṃ katvā pavattitaṃ kāyakammaṃ. Tenāha – **“samādinnaṃ gahitaṃ parāmaṭṭha”**nti. **Tatthātiādi** suviññeyyameva. **Eseva nayoti** iminā yathāvuttāya diṭṭhiyā ṭhitavacīkammaṃ, diṭṭhisahajātaṃ vacīkammaṃ, diṭṭhānulomikaṃ vacīkammanti tividdhaṃ hotīti evamādi atidisati. **Micchādiṭṭhikassāti** kammaṭṭhappattāya micchādiṭṭhiyā micchādiṭṭhikassa. “Yāya kāyaci micchādiṭṭhiyā micchādiṭṭhikassa sato”ti apare.

Diṭṭhisahajātāti yathāvuttāya diṭṭhiyā sahaḷḷatā cetanā. Esa nayo sesapadesupi. **Patthanāti** “idaṃ nāma kareyya”nti taṇhāpatthanā. **Cetanāpatthanānaṃ vassenāti** yathāvuttadiṭṭhigatanissitacetāsikanikāmanānaṃ vasena. **Cittaṭṭhapanāti** cittassa paṇidahanā. **Phassādayoti** cetanādiṭṭhitanhādivinimuttā phassādidhammā. Yasmā diṭṭhi pāpikā, tasmā tassa puggalassa sabbe te dhammā aniṭṭhāya...pe... saṃvattantīti yojanā. **Purimassevāti** tittakapadasseva. Tittakaṃ kaṭukanti ca ubhayaṃ idha aniṭṭhāpariyāyaṃ daṭṭhabbaṃ “pacchā te kaṭukaṃ bhavissati”tiādīsu viya.

Amboyanti ambo ayaṃ. **Tameva pūjanti** tameva pubbe laddhāparisiñcanadānādipūjaṃ. **Nivesareti** pavisiṃsu. **Asātasannivāsenāti** amadhuranimbamūlasaṃsaggena.

Taṃ pana paṭikkhipivā...pe... vuttanti sabbāpi micchādiṭṭhi ekantasāvajjattā aniṭṭhāya dukkhāya saṃvattatīti adhippāyena vuttaṃ. **Anantarasutteti** dasamasutte. **Yojetvā veditabbānīti** navamasutte viya yojetvā veditabbāni. **Cittaṭṭhapanāva patthanāti** ettha paṇidhi cāti vattabbaṃ.

Dutiyavaggavaṇṇanā niṭṭhitā.

16. Ekadhammapāli

(16) 3. Ekadhammapāli-tatīyavaggavaṇṇanā

308. Tatīyassa paṭhame **ayāthāvadiṭṭhikoti** aniccādiḷḷhāvesu dhammesu niccātiādinaṃ uppannadiṭṭhiko. Tenāha – **“tāyeva micchādiṭṭhiyā viparītadassano”**ti **saddhammāti** ettha santo pasattho sundaro dhammo, yo manussadhammotipi vuccati. Tato hi micchādiṭṭhiko paraṃ vuṭṭhāpeyya, na ariyadhammato. Tenāha – **“dasakusalakammaṭṭhaddhammato”**ti. **Evarūpāti** iminā pāthikaputtādike saṅgaṇhāti.

309. Sabbaññubodhisattoti sabbaññubhāgī bodhisatto. **Ādi-saddena** pūritapāramikā paccakabodhisattā ekaccasāvakabodhisattā ca saṅgayhanti.

310. Paramāti mahāsāvajjabhāvena paramā, ukkaṃsagatāti attho. Tesanti ānantariyakammānaṃ. Paricchedoti vipākavasena pariyoṣānaṃ. Vaṭṭassa mūlaṃ, tato taṃsamaṅgīpuggalo vaṭṭassa khāṇūti vuccati. Tenāha – “**tāyā**”tiādi. Tañce gāhaṃ na vissajjeti, tassa punapi tabbhāvāvahattā vuttaṃ – “**bhavato vuṭṭhānaṃ natthī**”ti, na pana sabbaso vuṭṭhānaṃ abhāvato. Yādise hi paccaye paṭicca ayaṃ taṃ dassanaṃ okkanto puna kadāci tappaṭipakkhe paccaye paṭicca tato sīsukkipanamaṃsa na hotīti na vattabbaṃ. Akusalañhi nāmetaṃ abalaṃ dubbalaṃ, na kusalaṃ viya mahābalaṃ. Aññathā sammattaniyāmo viya micchattaniyāmo accantiko siyā, na ca micchattaniyāmo accantiko. Teneva **papañcasūdaniyaṃ** (ma. ni. aṭṭha. 2.100) –

“Kiṃ panesa ekasmiṃyeva attabhāve niyato hoti, udāhu aññasmimpīti? Ekasmiṃyeva niyato, āsevanavasena bhavantarepi taṃ dīṭṭhiṃ roceti evā”ti –

Vuttaṃ. Tatoyeva ca **sumaṅgalavilāsiniyaṃpi** (dī. ni. aṭṭha. 1.170-172) vuttaṃ –

“Ye vā pana tesam laddhiṃ gahetvā rattiṭṭhāne divāṭṭhāne nisinnā sajjhāyanti vīmaṃsanti, tesam ‘karoto na karīyati pāpaṃ, natthi hetu, natthi paccayo, mato ucchijjati’ti tasmim ārammaṇe micchāsati santiṭṭhati, cittaṃ ekaggaṃ hoti, javanāni javanti. Paṭhamajavane satekicchā honti, tathā dutiyādīsu. Sattame buddhānampi atekicchā anivattino ariṭṭhakaṇṭakasadisā, tattha koci ekaṃ dassanaṃ okkamati, koci dve, koci tīṇipi, ekasmiṃ okkantepi dvīsu tīsu okkantesupi niyatamicchādīṭṭhikova hoti. Patto saggamaggāvaraṇaṇceva mokkhamaggāvaraṇaṇca, abhabbo tassattabhāvassa anantaraṃ saggampi gantaṃ, pageva mokkhaṃ, vaṭṭakhāṇu nāmesa satto pathavigopako, yebhuyyena evarūpassa bhavato vuṭṭhānaṃ natthī”ti.

Piṭṭhicakkavāleti jhāyamānacakkavāḷassa parato ekasmiṃ okāse. Yaṃ jhāyamānānaṃ ajjhāyamānānaṃ cakkavāḷānamantaraṃ, yattha lokantarikanirayasamaññā, tādise ekasmiṃ okāse. **Paccatiyevāti** cakkavāḷe jhāyamāne ajjhāyamānepi attano kammabaleṇa paccatiyeva.

311. Catutthe “mā khalī”ti vacanaṃ upādāya evaṃladdhanāmoti taṃ kira sakaddamāya bhūmiyā telaghaṭaṃ gahetvā gacchantaṃ, “tāta, mā khalī”ti sāmiko āha. So pamādena khalitvā patitvā sāmikassa bhayena palāyitvaṃ āradhā. Sāmiko upadhāvitvā sātākakaṇṭhe aggahesi. So sātakaṃ chaḍḍetvā acelako hutvā palāto paṇṇena vā tiṇena vā paṭicchādetumpi ajānanto jātarūpeneva ekaṃ gāmaṃ pāvīsi. Manussā taṃ disvā “ayaṃ samaṇo arahā appiccho, natthi iminā sadiso”ti pūvabhaddhāni gahetvā upasaṅkamitvā “mayhaṃ sātakaṃ anivattabhāvena idaṃ uppanna”nti tato paṭṭhāya sātakaṃ labhitvāpi na nivāsesi, tadeva ca pabbajjaṃ aggahesi. Tassa santike aññepi aññepīti pañcasatā manussā pabbajjīsu. Taṃ sandhāyetaṃ vuttaṃ – “mā khalīti vacanaṃ upādāya evaṃladdhanāmo tittakaro”ti.

Samāgataṭṭhāneti dvinnaṃ nadīnaṃ udakappavāhassa sannipātaṭṭhāne. **Dvinnaṃ udakānanti** dvinnaṃ udakappavāhānaṃ. Yathāvuttaṭṭhāne macchaggahaṇatthaṃ khipitabbato khippaṃ, kuminaṃ, tadeva idha **khippanti** vuttaṃ. Tenāha – “**kumina**”nti. **Ucchūhīti** udakaucchūhi. **Tucchapuriso** ariyadhammābhāvato. Jhānamattampi hi tassa nattheva, kuto ariyamaggo. **Manussakhippaṃ maññeti** manussā patitvā byasanappattiatthaṃ oṭṭitaṃ kuminaṃ viya. Tenāha – “**mahājanassā**”tiādi.

312. Pañcamādīsu bāhirakasāsananti avisesena vuttaṃ – tassa sabbassapi aniyānikattā satthupaṭiñṇassapi asabbaññubhāvato. Tenāha – “**tattha hī**”tiādi. **Gaṇoti** sāvakagaṇo. **Tathābhāvāyāti** ācariyena vuttākāratāya samaṅgibhāvattamaṃ. **Jaṅghasanti** bahū aneke satte. **Samakameva akusalaṃ pāpuṇātīti** tesam sabbesaṃ ekajjhaṃ samādapanepi tesam akusaleṇa samakameva akusalaṃ pāpuṇātīti ekajjhaṃ bahūnaṃ samādapanepi tathā ussahanassa balavabhāvato. Visuṃ visuṃ samādapane vattabbameva natthi. Yathā hi dhammacariyāyaṃ samakamevāti vattabbā kalyāṇamittatā, evaṃ adhammacariyāyaṃ akalyāṇamittatāti.

313. Suṭṭhu akkhātetī ekantato niyyānikabhāvena akkhāte. **Satthā ca sabbaññū hotīti** asabbaññuno niyyānikabhāvena kathetaṃ asakkuṇeyyattā. **Dhammo ca svākkhāto** sammāsambuddhappaveditattā. **Gaṇo**

ca suppaṭipanno satthārā suvinītattā. **Samādapako** hītiādi suppaṭipattiyā nidassanaṃ datṭhabbaṃ.

314. Pamāṇaṃ jānitabbanti “ayaṃ ettakena yāpeti, imassa ettakaṃ dātuṃ yutta”nti evaṃ pamāṇaṃ jānitabbam. **Atireke...pe... nibbānasampatti vā natthi** durakkhātattā dhammassa. **Tassāti** paṭiggāhakassa. **Appicchapaṭipadā nāma natthi** durakkhāte dhammavinayeti adhippāyo.

315. Dāyakassa vaso nāma uḷāruḷaratābhedo ajjhāsayo. Deyyadhammassa pana thokabahutāva **deyyadhammassa vaso** nāma. **Attano thāmoti** yāpanappamāṇaṃ. **Yadi hītiādi** “katha”ntiādinā saṅkhepato vuttassa atthassa vivaraṇaṃ. **Anuppanassāti** anuppanno assa puggalassa. **Cakkhubhūto hotīti** mahājanassa cakkhu viya hoti. **Sāsanam ciraṭṭhitam karotīti** anuppannalābhuppādanena mahājanassa pasāduppādanena ca ciraṭṭhitikaṃ karoti.

Kuṭumbariyavihāreti kuṭumbariyagāmasannissitavihāre. **Bhuñjanatthāyāti** tasmiṃyeva gehe nisīditvā bhuñjanatthāya. **Gahetvā gamanatthāyāti** gehato bahi gahetvā gamanatthāya. **Dhurabhattānti** niccabhattāni. **Cūlupaṭṭhākanti** veyyāvaccakaraṃ. **Vīmaṃsitvāti** yathā uddissa kataṃ na hoti, evaṃ vīmaṃsitvā. **Mahājano appiccho bhavitum maññatīti** mahājano sayam appiccho bhavitum maññati diṭṭhānugatiṃ āpajjanena. **Mahājanassāti** bahujanassa. **Avattharivāti** vitthārikaṃ katvā.

316. Pañcātapatappanaṃ catūsu passesu aggisantāpassa upari sūriyasantāpassa ca tappanaṃ, tañca kho gimhakāle. Chinnappapātapabbatasikharato patanaṃ **maruppapātapatanaṃ**. Pubbaṅhādīsu ādiccābhimukhāvaṭṭanaṃ **ādiccānuparivattanaṃ**.

317. Ayampīti svākkhāte dhammavinaye kusītopi. **Sāmaññanti** tapacaraṇaṃ. **Dupparāmaṭṭhanti** micchācaritaṃ saṃkiliṭṭhaṃ. **Nirayāyupakaḍḍhatīti** nirayadukkhāya naṃ kaḍḍhati.

318. Vuttappakāreti pañcātapatappanādike vuttappakāre.

319. Evanti vuttappakārāya cittappasādavhayasuppaṭipattiyā. Tena samaṇadhammakaraṇasukhañca saṅgaṇhāti.

320. Navakanipātetī imasmiṃyeva aṅguttaranikāye vakkhamānaṃ navakanipātaṃ sandhāyāha. **Nava puggalāti** sattakkhattuparamakolaṃkolādayo nava puggalā. **Sabbatthāti** imasmiṃ sutte vuttāvasiṭṭhesu sabbesu suttesu.

Tatiyavaggavaṇṇanā niṭṭhitā.

16. Ekadhammapāḷi

(16) 4. Ekadhammapāḷi-catutthavaggavaṇṇanā

322. Catutthassa paṭhame **saññāṇabhūtāti** upalakkhaṇabhūtā. **Pañcadasayojanāvaṭṭakkhandhāti** pañcadasayojanakkhandhaparikkhepā. **Yathā cāti ca**-saddena kadambarukkhādīnaṃ kappatṭhāyibhāvaṃ viya yojanasatubbedhādibhāvaṃ samuccinoti, na pana jambuyā jambudīpassa viya tehi aparagoyānādīnaṃ saññāṇabhāvaṃ. **Rāmaṇeyyakanti** ramaṇīyabhāvaṃ. **Sesapadesūti** vanarāmaṇeyyakādipadesu. Uggataṃ kūlaṃ ussitabhāvo etassāti **ukkūlaṃ**, vigataṃ apagataṃ kūlaṃ etassāti **vikūlanti** āha – “**unnataṭṭhānaṃ ninnatṭhāna**”nti ca. **Nandiyāvaṭṭamacchapiṭṭhenevāti** kujjakakulisakamacchasaṅghatapiṭṭheneva.

323. Dutiyādīsu **cattāro apāyā aññatra manussehīti adhippetā**, na devā aññatra manussehīti hīnāya jātiyā adhippetattā. **Upādāyupādāyāpi majjhimadeso labbhati**, yattha gati bhikkhūnaṃ bhikkhunīnaṃ upāsakānaṃ upāsikānaṃ aññesampi kammavādikiriyavādiviññujātikānaṃ, yo patirūpadesoti vuccati. Tenāha – “**sakalopi hī**”tiādi.

324. Eḷāti doso. Tenāha – “**niddosamukhāti attho**”ti.

326. Tathāgatassa guṇe jānitvā cakkhunāpi dassanaṃ dassanameva, ajānitvā pana dassanaṃ tiracchānagatānaṃpi hotiyevāti āha – “**ye tathāgatassa guṇe jānitvā**”tiādi.

327. **Pakāsetvā kathitanti** saccāni pakāsetvā kathitaṃ.

328. Sutānaṃ dhammānaṃ asammoso dhāraṇanti āha – “**dhārentīti na pammussantī**”ti.

329. **Atthānatthaṃ upaparikkhantīti** “ayaṃ imissā pāliyā attho, ayaṃ na attho”ti atthānatthaṃ upaparikkhanti. Anattaparīhārena hi atthaggaṇaṃ yathā adhammaparivajjanena dhammappaṭipatti.

330. **Anulomapaṭipadanti** nibbānassa anulomikaṃ paṭipadaṃ.

331. **Samvegajanakesu kāraṇesūti** samvegajanakesu jātiādīsu kāraṇesu. Samvejanīyesu thānesu sahotappañānaṃ samvego.

332. **Upāyenāti** yena upāyena vaṭṭupacchedo, tena upāyena. **Padhānavīriyaṃ karontīti** sammappadhānasaṅkhātaṃ vīriyaṃ karontī uppādentī.

333. Vavassajjīyanti vissajjīyanti ettha saṅkhārāti **vavassaggo**, asaṅkhatā dhātūti āha – “**vavassaggo vuccati nibbāna**”nti.

334. **Uttamannānanti** uttamānaṃ pañcannaṃ bhojanānaṃ. **Uttamarasānanti** uttamānaṃ rasānaṃ. **Uñchācārenāti** uñchācariyāya kassaci apariggahabhūtaṃ kiñci ayācitvā gahaṇaṃ uñchācāro. **Ettha cātiādīnā annādīnaṃ** aggabhāvo nāma manāpaparamo icchitakkhaṇalābho, na tesāṃ lābhītāmatanti dasseti. **Paṭilabhanīti** denti paṇītabhāvena. **Bhattassa ekapātīti** ekapātīpūraṃ bhattaṃ. **Idaṃ kiṃ nāmāti** “idaṃ annaggarasaggaṃ nāma hoti, na hotī”ti pucchati. **Uñchena kapālābhatenāti** missakabhattena. **Yāpenteti** yāpanasīsenā yāpanahetuṃ bhattaṃ vadati. **Upādāya aggarasaṃ nāmāti** taṃ taṃ upādāyupādāya annaggarasaggaṃ daṭṭhabbanti dasseti. Cakkavattīāhārato hi cātumahārājikānaṃ āhāro aggoti evaṃ yāva paranimmitavasavattidevā netabbaṃ.

335. **Attharaso nāma cattāri sāmāññaphalāni** “ariyamaggānaṃ phalabhūto raso”ti katvā. **Dhammaraso nāma cattāro maggā** “sāmāññaphalassa hetubhūto raso”ti katvā **vimuttiraso nāma amataṃ nibbānaṃ** “sabbasaṅkhārasamatho”ti katvā.

Catutthavaggaṇṇanā niṭṭhitā.

Jambudīpapeyyālo niṭṭhito.

17. Pasādakaradhammavaggaṇṇanā

366. **Addhamidanti** sandhivasena pāliyaṃ rassaṃ katvā vuttaṃ, ma-kāro padasandhikaroti āha – “**addhā ida**”nti. **Ekaṃso esāti** ekaṃso hetu esa lābhānaṃ. **Pāpakaṃ nāmāti** appakampi pāpaṃ nāma byattaṃ ekaṃsena na karoti. **Tathassāti** tathā sammāpaṭipajjamānassa assa. Āraññikattaṃ...pe... tecīvarikattanti imesaṃ dhutadhammānaṃ gahaṇeṇeva itaresampi taṃsabhāgānaṃ gahitabhāvo daṭṭhabbo. **Thāvarappattabhāvoti** sāsane thirabhāvappatti therabhāvo. **Ākappassa sampattīti** “añño me ākappo karaṇīyo”ti evaṃ vuttassa ākappassa sampatti. **Kolaputtīti** kolaputtīyanti āha – “**kulaputtabhāvo**”ti. **Sampannarūpatāti** upadhisampadā. **Vacanakiriyāyāti** vacanappayogassa madhurabhāvo mañjussaratā. **Tenassa lābho uppajjātīti** idaṃ na lābhuppādanūpāyadassanaparaṃ, atha kho evaṃ sammāpaṭipajjamānassa anicchantasseva lābho uppajjātīti lābhassa abyabhicārahetudassanaparaṃ

daṭṭhabbam. Yathāha –

‘‘Ākaṅkheyya ce, bhikkhave, bhikkhu lābhī assaṃ
cīvarapiṇḍapātasenaśānagilānappaccayabhesajjaparikkhārānanti, sīlessevassa paripūrakārī’’ti (ma.
ni. 1.65).

Pasādakaradhammavaggaṇṇanā niṭṭhitā.

18. Aparaccharāsaṅghātavaggaṇṇanā

382. Idampi suttanti ettha pi-saddo heṭṭhā vuttacūlaccharāsaṅghātasuttaṃ sampiṇḍeti.

Cūlaccharāsaṅghātasutte appanaṃ appattāya mettāya tāvamahanto vipāko dassito, kimaṅgaṃ pana imissā appanāppattāya mettāyāti dassetuṃ – ‘‘**appanāppattāya hi**’’tiādimāha. **Vipākakathāyeva natthīti** vipāke kathāyeva natthi, ayameva vā pāṭho. **Gaṇanānupubbatāti** gaṇanānupubbatāya. Paṭhamaṃ uppannantipi paṭhamaṃ, paṭhamaṃ samāpajjati idam pana na ekantalakkhaṇaṃ. Ciṇṇavasībhāvo hi aṭṭhasamāpattilābhī ādito paṭṭhāya matthakaṃ pāpentopi samāpajjituṃ sakkoti, matthakato paṭṭhāya ādiṃ pāpentopi, antarantarā okkantopi samāpajjituṃ sakkoti eva. Pubbupattiyatṭhena pana paṭhamaṃ nāma hoti. **Vibhaṅgeti** jhānavibhaṅge. Vipassanaṃ kayiramānaṃ **lakkhaṇūpaniijjhānakiccaṃ maggena sijjhati** taggatasammohavidhamsanato. Apica **vipassanāya lakkhaṇūpaniijjhānaṃ maggena uppannena sijjhati** itarathā parivattanato, tasmā **maggo lakkhaṇūpaniijjhānaṃ**, na aniccādilakkhaṇānaṃ ārammaṇakaraṇato. Yathā phalaṃ nibbānassa asaṅkhatalakkhaṇaṃ ārammaṇakaraṇavasena upaniijjhāyati, evaṃ maggopi. Evampissa lakkhaṇūpaniijjhānataṃ veditabbaṃ. **Vatṭabbameva natthi** arittajjhānatāya. **Sesaṃ** viśesaṃ, arittajjhānā evāti attho.

386-387. Hitapharaṇanti sattesu hitānurūpaṃ jhānassa pharivā pavattanaṃ. Cetopaṭipakkhato vimuccati etāyāti **cetovimutti**, appanāppattā mettā. Tenāha – ‘‘**idhā**’’tiādi. **Eseva nayoti** iminā karuṇādīnampi appanāppattataṃ atidisati. **Vatṭaṃ honti** kammavattabhāvato. **Vatṭapādā hontīti** vipākavattassa kāraṇaṃ honti.

390. Ajjhattaparikkammavasenāti attano kesādīsu parikkammakaraṇavasena. **Aṭṭhārasavidheti** aṭṭhārasappabhede. **Kāyeti** rūpakāye. Rūpakāyo hi idha aṅgapaccaṅgānaṃ kesādīnaṅca dhammānaṃ samūhatṭhena hatthikāyathakāyādayo viya kāyoti adhippeto. Samūhavisayatāya cassa kāyasaddassa samudāyūpādanatāya ca asubhākārassa ‘‘kāye’’ti ekavacanaṃ. Tathā ārammaṇādivibhāgena anekabhedabhinnampi cittaṃ cittabhāvasāmañña ekajjhaṃ gahetvā ‘‘citte’’ti ekavacanaṃ kataṃ. **Kāyānupassīti** imassa atthaṃ dassetuṃ – ‘‘**tameva kāyaṃ paññāya anupassanto**’’ti āha. **Tameva kāyanti** ca avadhāraṇena vedanādiānupassanaṃ nivatteti. Tena ca puna kāyaggahaṇassa payojanaṃ sūciantaṃ daṭṭhabbam. ‘‘Kāye’’ti hi vatvāpi puna ‘‘kāyānupassī’’ti dutiyaṃ kāyaggahaṇaṃ asammissato vavattānaghaṇavinibbhogādīdassanattaṃ kataṃ. Tena vedanādayopi ettha sitā, ettha paṭibaddhāti kāyavedanādiānupassanappasaṅgepi āpanne na kāye vedanānupassī cittānupassī dhammānupassī vā. Atha kho kāyānupassīyevāti kāyasaṅkhātavattusmiṃ kāyānupassanākārasseva dassanena asammissato vavattānaṃ dassitaṃ hoti. Tathā na kāye aṅgapaccaṅgavinimuttaekadhammānupassī, nāpi kesalomādivinimuttaithipurisānupassī. Yopi cettha kesalomādiko bhūtopādāyasamūhasaṅkhāto kāyo, katthapi na bhūtopādāyavinimuttaekadhammānupassī, atha kho rathasambhārānupassako viya aṅgapaccaṅgasamūhānupassī, nāgarāvayavānupassako viya kesalomādisamūhānupassī, kadalikkhandhapattavattīvinibbhujako rittamuṭṭhīvinivethako viya ca bhūtopādāyasamūhānupassīyevāti nānappakārato samūhavaseneva kāyasaṅkhātassa vatthuno dassanena ghaṇavinibbhogo dassito hoti. Na hettha yathāvuttasamūhavinimutto kāyo vā itthī vā puriso vā añña vā koci dhammo dissati, yathāvuttadhammasamūhamatteyeva pana tathā tathā sattā micchābhinivesaṃ karonti.

Aṭṭhārasavidhenāti aṭṭhārasavidhā. **Satipaṭṭhānabhāvakkassāti** satipaṭṭhānabhāvaṃ bhāventassa. Tīsu bhavesu kilese ātapeti **ātaṇṇo**, vīriyasettaṃ nāmaṃ. Yadihi hi kilesānaṃ pahānaṃ ātāpananti, taṃ sammādiṭṭhiādīnampi attheva. Ātapasaddo viya pana ātāpasaddopi vīriyeva niruḷho. Atha vā

paṭipakkhappahāne sampayuttadhammānaṃ abhussahanavasena pavattamānassa vīriyassa sātisayaṃ tadātāpananti vīriyameva tathā vuccati, na aññadhammā, tasmā ātāpoti vīriyassa nāmaṃ, so assa atthīti **ātāpī**. Ayañca ikāro pasamsāya atisayassa vā dīpakoti ātāpiggahaṇena sammappadhānasamaṅgitaṃ dasseti. Tenevāha – “**ātāpīti...pe... vīriyena vīriyavā**”ti. **Sampajānoti** sampajāññasañkhātena ñāṇena samannāgato. Tenāha – “**aṭṭhārasavidhena...pe... sammā pajānanto**”ti. Ayaṃ panettha vacanattho – sammā samantato sāmañca pajānanto **sampajāno**, asammisato vavatthāne aññadhammānupassitābhāvena sammā aviparītaṃ sabbākārappajānena samantato uparūparivisesāvahabhāvena pavattiyā sammā pajānantoti attho.

Kāyo ca idha lujjanappalujjanatṭhena lokoti adhippetoti āha – “**tasmiṃyeva kāyasañkhāte loke**”ti. **Pañcakāmaguṇikataṇhaṇti** rūpādīsu pañcasu kāmaguṇesu pavattamānaṃ taṇhaṃ. Yasmā panettha abhijjhāgahaṇena kāmacchando, domanassaggahaṇena byāpādo saṅgahaṃ gacchati, tasmā nīvaraṇapariyāpannalavadhammadvayadassanena nīvaraṇappahānaṃ vuttaṃ hotīti veditabbaṃ. Visesena cettha abhijjhāvinayena kāyasampattimūlakassa anurodhassa, domanassavinayena kāyavipattimūlakassa virodhassa, abhijjhāvinayena ca kāye abhiratiyā, domanassavinayena kāyabhāvanāya anabhiratiyā, abhijjhāvinayena kāye abhūtānaṃ subhasukhabhāvādīnaṃ pakkhepassa, domanassavinayena kāye bhūtānaṃ asubhāsukhabhāvādīnaṃ apanayanassa ca pahānaṃ vuttaṃ. Tena yogāvacarassa yogānubhāvo yogasamatthā ca dīpitā hoti. Yogānubhāvo hi esa, yadidaṃ anurodhavirodhavippamutto aratiratisaho abhūtapakkhepabhūtāpanayanavirahito ca hoti. Anurodhavirodhavippamutto cesa aratiratisaho abhūtaṃ apakkhipanto bhūtañca anapanento yogasamattho hotīti. **Suddharūpasammasanameva kathitanti** kevalaṃ kāyānupassanābhāvato vuttaṃ.

Sukhādibhedāsu vedanāsūti sukhadukkhaadukkhamasukhasāmisanirāmisabhedāsu vedanāsu. Tattha sukhayātīti **sukhā**, sampayuttadhamme kāyañca laddhassāde karotīti attho. Suṭṭhu vā khādāti, khanati vā kāyikaṃ cetasañca ābādhanati **sukhā**, sukaraṃ okāsādānaṃ etissāti vā **sukhā**. Dukkhayātīti **dukkhā**, sampayuttadhamme kāyañca pīleti vibādhanati attho. Duṭṭhu vā khādāti, khanati vā kāyikaṃ cetasañca sātanti **dukkhā**, dukkaraṃ okāsādānaṃ etissāti vā **dukkhā**. Dukkhasukhappaṭikkhepena **adukkhamasukhāti** upekkhā vuttā. Vedyati ārammaṇarasamānubhavātīti **vedanā**. **Vediyamānoti** anubhavamāno. **Sukhaṃ vedanaṃ vediyāmīti pajānātīti** kāyikaṃ vā cetasañca vā sukhaṃ vedanaṃ vediyamāno “ahaṃ sukhaṃ vedanaṃ vediyāmī”ti pajānātīti attho. Tattha kāmaṃ uttānaseyyakāpi dārakā thaññapivanādikāle sukhaṃ vedanaṃ vediyamānā “sukhaṃ vedanaṃ vediyāmā”ti pajānanti, na panetaṃ evarūpaṃ pajānaṃ sandhāya vuttaṃ. Evarūpañhi jānaṃ sattupaladdhiṃ na jahati, attasaññaṃ na ugghāṭeti, kammaṭṭhānaṃ vā satipaṭṭhānabhāvanā vā na hoti. Imassa pana bhikkhuno jānaṃ sattupaladdhiṃ jahati, attasaññaṃ ugghāṭeti, kammaṭṭhānañceva satipaṭṭhānabhāvanā ca hoti. Idañhi “ko vediyati, tassa vedanā, kiṃ kāraṇā vedanā”ti evaṃ sampajānantassa vediyanaṃ sandhāya vuttaṃ.

Tattha ko vediyātīti? Na koci satto vā puggalo vā vediyati. Kassa vedanāti? Na kassaci sattassa vā puggalassa vā vedanā. Kiṃ kāraṇā vedanāti? Vatthuārammaṇā ca panassa vedanāti. Tasmā esa evaṃ pajānāti “taṃ taṃ sukhādīnaṃ vatthubhūtaṃ rūpādīṃ ārammaṇaṃ katvā vedanāva vediyati, taṃ pana vedanāpavattiṃ upādāya ‘ahaṃ vediyāmī’ti vohāramattaṃ hotī”ti. Evaṃ “sukhādīnaṃ vatthubhūtaṃ rūpādīṃ ārammaṇaṃ katvā vedanāva vediyati”ti sallakkhento esa “sukhaṃ vedanaṃ vediyāmī”ti pajānātīti veditabbo.

Atha vā **sukhaṃ vedanaṃ vediyāmīti pajānātīti** sukhavedanākkhaṇe dukkhāya vedanāya abhāvato sukhaṃ vedanaṃ vediyamāno “sukhaṃ vedanaṃyeva vediyāmī”ti pajānāti. Tena yā pubbe bhūtapubbā dukkhā vedanā, tassā idāni abhāvato imissā ca sukhāya vedanāya ito paraṃ paṭhamaṃ abhāvato “vedanā nāma aniccā addhuvā vipariṇāmadhammā”ti itiha tattha sampajāno hoti. **Dukkhaṃ vedanaṃ vediyāmīti pajānātīti**ādīsipi eseva nayo.

Sāmisam vā sukhantiādīsu yasmā kilesehi āmasitabbato āmisā nāma pañca kāmaguṇā. Ārammaṇakaraṇavasena saha āmisehīti sāmisā, tasmā **sāmisā sukhā** nāma pañcakāmaguṇāmisānisitā chasu dvāresu uppannā chagehassitā somanassavedanā. **Sāmisā dukkhā** nāma chagehassitā domanassavedanā. Sā ca chasu dvāresu “iṭṭhārammaṇaṃ nānubhavissāmi nānubhavāmī”ti vitakkayato

uppannā kāmagaṇanissitā domanassavedanā veditabbā. **Nirāmisā sukhā** nāma chanekkhāmassitā somanassavedanā. Sā ca chasu dvāresu iṭṭhārammaṇe āpāthagate aniccādivasena vipassanaṃ paṭṭhapetvā ussukkāpetuṃ sakkontassa “ussakkitā me vipassanā”ti somanassajātassa uppannā somanassavedanā daṭṭhabbā.

Nirāmisā dukkhā nāma chanekkhāmassitā domanassavedanā. Sā pana chasu dvāresu iṭṭhārammaṇe āpāthagate anuttaravimokkhasaṅkhātaariyaphaladhammesu pihaṃ paṭṭhapetvā tadadhigamāya aniccādivasena vipassanaṃ paṭṭhapetvā ussukkāpetuṃ asakkontassa “imampi pakkhaṃ imampi māsaṃ imampi saṃvaccharaṃ vipassanaṃ ussukkāpetvā ariyabhūmiṃ pāpuṇituṃ nāsakki”nti anusocato uppannā domanassavedanā.

Sāmisā adukkhamasukhā nāma chagehassitā upekkhāvedanā. Sā ca chasu dvāresu iṭṭhārammaṇe āpāthagate guḷapiṇḍake nilīnamakkhikā viya rūpādīni anuvattamānā tattheva laggā laggitā hutvā uppannā kāmagaṇanissitā upekkhāvedanā. **Nirāmisā adukkhamasukhā** nāma chanekkhāmassitā upekkhāvedanā. Sā pana chasu dvāresu iṭṭhādiārammaṇe āpāthagate iṭṭhe arajjantassa, aniṭṭhe adussantassa, asamapekkhanena amuyhantassa uppannā vipassanāñāṇasampayuttā upekkhāvedanā. **Evam vuttanti** mahāsatiṭṭhānasutte vuttaṃ. **Sāva vedanā veditabbā**ti lujjanappalujjanaṭṭhena sā vedanā “loko”ti veditabbā.

Evam vitthāriteti “sarāgaṃ vā cittaṃ sarāgaṃ cittanti pajānāti, vītarāgaṃ vā cittaṃ...pe... sadosaṃ vā cittaṃ, vītadosaṃ vā cittaṃ, samohaṃ vā cittaṃ, vītamohaṃ vā cittaṃ, saṃkhittaṃ vā cittaṃ, vikkhittaṃ vā cittaṃ, mahaggataṃ vā cittaṃ, amahaggataṃ vā cittaṃ, sauttaraṃ vā cittaṃ, anuttaraṃ vā cittaṃ, samāhitaṃ vā cittaṃ, asamāhitaṃ vā cittaṃ, vimuttaṃ vā cittaṃ, avimuttaṃ vā cittaṃ, pajānāti”ti evaṃ satiṭṭhānasutte (dī. ni. 2.381; ma. ni. 1.114) vitthāretvā dassite soḷasavidhe citte.

Tattha **sarāganti** aṭṭhavidhaṃ lobhasahagataṃ. **Vītarāganti** lokiyakusalābyākataṃ. Idaṃ pana yasmā sammasanaṃ na dhammasamodhānaṃ, tasmā idha ekapadepe lokuttaraṃ na labbhati. Sesāni cattāri akusalacittāni neva purimapadaṃ, na pacchimapadaṃ bhajanti. **Sadosanti** duvidhaṃ domanassasahagataṃ. **Vītadosanti** lokiyakusalābyākataṃ. Sesāni dasa akusalacittāni neva purimapadaṃ, na pacchimapadaṃ bhajanti. **Samohanti** vicikicchāsahagatañceva uddhaccasahagatañcāti duvidhaṃ. Yasmā pana moho sabbākusalesu uppajjati, tasmā sesānīpi idha vattantiyeva. Imasmiññeva hi duke dvādasākusalacittāni pariādinnānti. **Vītamohanti** lokiyakusalābyākataṃ.

Saṃkhittanti thinamiddhānupatitaṃ. Etañhi saṅkucitacittaṃ nāma ārammaṇe saṅkocavasena pavattanato. **Vikkhittanti** uddhaccasahagataṃ. Etañhi pasaṭacittaṃ nāma ārammaṇe savisesaṃ vikkhepavasena visaṭabhāvena pavattanato. **Mahaggatanti** rūpāvacaraṃ arūpāvacaraṇca. **Amahaggatanti** kāmāvacaraṃ. **Sauttaranti** kāmāvacaraṃ. **Anuttaranti** rūpāvacaraṃ arūpāvacaraṇca. Tatrāpi sauttaraṃ rūpāvacaraṃ, anuttaraṃ arūpāvacarameva. **Samāhitanti** yassa appanāsamādhi vā upacārasamādhi vā atthi. **Asamāhitanti** ubhayasamādhivirahitaṃ. **Vimuttanti** tadaṅgavikkhambhanavimuttīhi vimuttaṃ. **Avimuttanti** ubhayavimuttirahitaṃ. Samucchedappaṭippassaddhinissaraṇavimuttīnaṃ pana idha okāsova natthi, okāsābhāvo ca sammasanacārassa adhippetattā veditabbo.

Upādānassa khandhā **upādānakkhandhā**, upādānassa paccayabhūtā dhammapuñjā dhammarāsayoti attho. Upādānehi ārammaṇakaraṇādivasena upādātābbā vā khandhā **upādānakkhandhā**. **Cha ajjhattikabāhirāyatanānti** cakkhu sotaṃ ghānaṃ jivhā kāyo manoti imāni cha ajjhattikāyatanāni ceva, rūpaṃ saddo gandho raso phoṭṭhabbo dhammāti imāni cha bāhirāyatanāni ca. Ettha pana lokuttaradhammā na gahetabbā sammasanacārassa adhippetattā. **Satta sambojjhaṅgā**ti satisambojjhaṅgādayo satta sambojjhaṅgā. Satiādayo hi sambodhissa, sambodhiyā vā aṅgāti **sambojjhaṅgā**. Tathā hi sambujjhāti āradhaviṭṭhāyā paṭṭhāyā yogāvacaroti sambodhi, yāya vā so satiādikāya sattadhammasāmaggiyā sambujjhāti, kilesaniddāto utṭhāti, saccāni vā paṭivijjhati, sā dhammasāmaggī sambodhi, tassa sambodhissa, tassā vā sambodhiyā aṅgāti **sambojjhaṅgā**.

Cattāri ariyasaccānīti “dukkhaṃ dukkhasamudayo dukkhanirodho dukkhanirodhagāminipaṭipadā”ti (saṃ. ni. 5.1071-1072) evaṃ vuttāni cattāri ariyasaccāni. Tattha purimāni dve saccāni vaṭṭaṃ pavattihetubhāvato. Pacchimāni vivaṭṭaṃ nivaṭṭatadadhigamūpāyabhāvato. Tesu bhikkhuno vaṭṭe kammaṭṭhānābhiniveso hoti sarūpato pariggahasambhavato. Vivaṭṭe natthi abhiniveso avisayattā avisayatte ca payoanābhāvato. **Pañcadhā vuttēsūti** satipaṭṭhānasutte vuttēsū. **Suddhaarūpasammasanamevāti** rūpena amissitattā kevalaṃ arūpasammasanameva. Khandhāyatanasaccakoṭṭhāsānaṃ pañcakkhandhasaṅgahato “**rūpārūpasammasana**”nti vuttaṃ. Pabbabhāgiyānampi satipaṭṭhānānaṃ saṅgahitattā “**lokiyalokuttaramissakāneva kathitānī**”ti āha.

394. Anibbattānanti ajātānaṃ. **Payogaṃ parakkamanti** ettha bhusaṃ yogo payogo, payogova parakkamo, payogasaṅkhātāṃ parakkamanti attho. **Cittaṃ ukkhipatīti** kosajjapakkhe patitūṃ apadānavasena ukkhipati. **Padhānavīriyanti** sammappadhānalakkhaṇappattavīriyaṃ. **Lokiyāti** lokiyasammappadhānakathā. **Sabbapubbabhāgeti** sabbamaggānaṃ pubbabhāge. **Kassapasamṃyuttapariyāyenāti** kassapasamṃyutte āgatasuttēna “uppannā me pāpakā akusalā dhammā appahīyamānā anathāya saṃvatteyyu”nti (saṃ. ni. 2.145) āgatattā. Sā lokiyāti veditabbā.

Samathavipassanāvāti avadhāraṇena maggaṃ nivattetvā tassa nivattane kāraṇaṃ dassento, “**maggo panā**”tiādīmāha. **Sakiṃ uppajjivāti** idaṃ bhūtakathanamattaṃ. Niruddhassa puna anuppajjanato “na koci guṇo”ti āsaṅkeyyāti āha – “**so hī**”tiādi. Anantameva yathā phalaṃ uppajjati, tathā pavattiyevassa paccayadānaṃ. **Purimasmimpīti** “anuppannā me kusalā dhammā uppajjamānā anathāya saṃvatteyyu”nti etthapi. **Vuttanti** porāṇaṭṭhakathāyaṃ. **Taṃ pana** tathāvuttavacanaṃ **na yuttaṃ** dutiyasmiṃ viya purimasmiṃ maggassa aggahaṇe kāraṇābhāvato. Purimasmiṃ aggahite magge anuppajjamāno maggo anathāya saṃvatteyyāti āpajjeyya, na cetāṃ yuttaṃ āpajjamāne tasmīṃ padhānatthasambhavato. **Catukiccasāadhanavasēnāti** anuppannākusalānuppādānādicatukiccasāadhanavasena.

Vuttanayenāti “asamudācāravasena vā ananubhūtārammaṇavasena vā”tiādīnā vuttanayena. **Vijjamānāti** dharamānasabhāvā. Khaṇattayapariyāpannattā uppādādisamaṅgino vattamānabhāvena uppannaṃ **vattamānuppannaṃ**. Tañhi uppādato paṭṭhāya yāva bhaṅgā uddhaṃ pannaṃ pattanti nipariyāyato “**uppanna**”nti vuccati. Anubhavitvā bhavitvā ca vigaṭaṃ bhutvāvigaṭaṃ. Anubhavanabhavanāni hi bhavanasāmaññena bhutvā-saddena vuttāni. Sāmaññameva hi upasaggena visesīyati. Idha vipākānubhavanavasena tadārammaṇaṃ avipakkavipākassa sabbathā avigaṭattā bhavitvāvigaṭamattavasena kammaṇca “**bhutvāvigaṭuppanna**”nti vuttaṃ. Na aṭṭhasālīniyaṃ viya rajjanādivasena anubhūtāpagataṃ javanaṃ uppajjivā niruddhatāvasena bhūtāpagataṃ saṅkhatam **bhūtāpagatuppannaṃ**nti. Tasmā idha **okāsakatuppannaṃ** vipākameva vadati, na tattha viya kammampi. Aṭṭhasālīniyañhi bhūtāvigaṭuppannaṃ okāsakatuppannaṃ aññathā dassitaṃ. Vuttañhi tattha (dha. sa. aṭṭha. 1 kāmāvacarakusalapadabhājanīya) –

“Ārammaṇarasam anubhavitvā niruddhaṃ anubhūtāpagatasāṅkhātāṃ kusalākusalaṃ, upādāditayaṃ anuppatvā niruddhaṃ bhūtāpagatasāṅkhātāṃ sesasaṅkhataṃ bhūtāpagatuppannaṃ nāma. ‘Yānissa tāni pubbe katāni kammānī’ti evamādinā nayena vuttaṃ kammaṃ atītampi samānaṃ aññaṃ vipākaṃ paṭibāhitvā attano vipākassokāsaṃ katvā ṭhitattā, tathākatokāsaṃ vipākaṃ anuppannampi samānaṃ evaṃ kate okāse ekantena uppajjanato okāsakatuppannaṃ nāmā”ti.

Idha pana sammohavinodaniyaṃ vuttanayeneva bhutvāvigaṭuppannaṃ okāsakatuppannaṃ dassitaṃ. Vuttañhi, **sammohavinodaniyaṃ** (vibha. aṭṭha. 406) –

“Kamme pana jahite ārammaṇarasam anubhavitvā niruddho vipāko bhutvāvigaṭaṃ nāma. Kammaṃ uppajjivā niruddhaṃ bhutvāvigaṭaṃ nāma. Tadubhayampi bhutvāvigaṭuppannanti saṅkhyam gacchati. Kusalākusalaṃ kammaṃ aññakammassa vipākaṃ paṭibāhitvā attano vipākassa okāsaṃ karoti. Evaṃ kate okāse vipāko uppajjamāno okāsakaraṇato paṭṭhāya uppannoti vuccati. Idaṃ okāsakatuppannaṃ nāmā”ti.

Tattha aṭṭhasāliniyā ayamadhippāyo – “satipi sabbesampi cittuppādānaṃ saṃvedayitasabhāvā ārammaṇānubhavane savipallāse pana santāne cittābhisāṅkhāravasena pavattito abyākatehi visiṭṭho kusalākusalānaṃ sātisayo visayānubhavanākāro. Yathā vikappaggāhavasena rāgādīhi tabbipakkhehi ca akusalaṃ kusalaṅca nipariyāyato ārammaṇarasam anubhavati, na tathā vipāko kammavegakkhattatā, nāpi kiriyā ahetukānaṃ atidubbalatāya, sahetukānaṃ khīṇakilesassa chaḷaṅgupekkhāvato uppajjamānānaṃ atisantavuttittā, tasmā rajjanādivasena ārammaṇarasānubhavanaṃ sātisayanti akusalaṃ kusalaṅca uppajjitvā niruddhatāsamañña sesasaṅkhataṅca bhūtāpagata”nti vuttaṃ. Sammohavinodaniyā pana vipākānubhavanavasena tadārammaṇaṃ avipakkapākassa sabbathā avigatattā bhavitvāvigatamattavasena kammaṅca bhutvāpagatanti vuttaṃ. Teneva tattha okāsakatuppannanti vipākamevāha, na kammampi, tasmā idhāpi sammohavinodaniyaṃ vuttanayeneva bhutvāpagatuppannaṃ okāsakatuppannaṅca vibhattanti daṭṭhabbaṃ.

Pañcakkhandhā pana vipassanāya bhūmi nāmāti sammasanassa ṭhānabhāvato vuttaṃ. **Tesūti** atītādibhedesu. **Anusayitakilesāti** appahīnā maggena pahātabbā adhippetā. Tenāha – “**atītā vā...pe... na vattabbā**”ti. Hontu tāva “atītā”ti vā “paccuppannā”ti vā na vattabbā, “anāgatā”ti pana kasmā na vattabbā, nanu kāraṇalābhe uppajjanārahā appahīnaṭṭhena thāmagatā kilesā anusayāti vuccantīti? Saccametam, anāgatabhāvopi nesaṃ na paricchinnō itarānāgatakkhandhānaṃ viyāti “anāgatā vāti na vattabbā”ti vuttaṃ. Yadi hi nesaṃ paricchinnō anāgatabhāvo siyā, tato “paccuppannā, atītā”ti ca vattabbā siyūṃ, paccayasamavāye pana uppajjanārahataṃ upādāya anāgatavohāro tattha veditabbo.

Idaṃ bhūmiladdhuppannaṃ nāmāti idaṃ yathāvuttaṃ kilesajātaṃ appahīnaṭṭhena bhūmiladdhuppannaṃ nāma kāraṇalābhe sati vijjamānakiccakaraṇato. **Tāsu tāsu bhūmisūti** manussadevādiattabhāvasaṅkhātesu upādānakkhandhesu. Ārammaṇakaraṇavasena hi bhavanti ettha kilesāti **bhūmiyo**, upādānakkhandhā. **Asamugghātagatāti** tasmim tasmim santāne anuppattidhammataṃ anāpādītāya samugghātaṃ samucchedaṃ na gatāti **asamugghātagatā**. **Bhūmiladdhuppannaṃ nāmāti** ettha laddhabhūmikaṃ bhūmiladdhanti vuttaṃ aggiāhito viya. Okāsakatuppannasaddepi ca **aṭṭhasāliniyaṃ** (dha. sa. aṭṭha. 1 kāmāvacarakusalapadabhājanīya) āgatanayena okāso kato etena kusalākusalakamma, okāso kato etassa vipākassāti ca duvidhatthepi evameva katasaddassa paranipāto veditabbo. Idha pana okāsakatuppannasaddena vipākasseva gahitattā “okāso kato etassa vipākassā”ti evaṃ viggaho daṭṭhabbo.

Khaṇattayasamaṅgitāya samudācārappattaṃ **samudācārappannaṃ**. Tenāha – “**sampati vattamānaṃyevā**”ti. Ārammaṇaṃ adhiggaṃyha daḷhaṃ gahetvā pavattaṃ **ārammaṇādhiggahituppannaṃ**. Vikkhambhanappahānavasena appahīnā **avikkhambhitā**. Samucchedaṃ appahānavasena appahīnā **asamugghātītā**. Nimittaggāhavasena ārammaṇassa adhiggahitattā taṃ ārammaṇaṃ anussaritānussaritakkhaṇe kilesupattihetubhāvena upatiṭṭhanato adhiggahitameva nāmaṃ hotīti āha – “**ārammaṇassa adhiggahitattā**”ti. Ettha ca āhaṭakhīrarukkho viya nimittaggāhavasena adhiggahitaṃ ārammaṇaṃ, anāhaṭakhīrarukkho viya avikkhambhitāya antogatakilesārammaṇaṃ daṭṭhabbaṃ. Nimittaggāhikā avikkhambhitakilesā vā puggalā vā āhaṭānāhaṭakhīrarukkhasadisā. **Purimanayenevāti** avikkhambhituppanne vuttanayeneva. **Vitthāretabbanti** “imasmim nāma ṭhāne nuppajjissanti”ti na vattabbā. Kasmā? Asamugghātītattā. Yathā kiṃ? Yathā sace khīrarukkhaṃ kuṭhāriyā āhaneyyūṃ, imasmim nāma ṭhāne khīraṃ na nikkhameyyāti na vattabbā, evaṃ. Idaṃ asamugghātītuppannaṃ nāmāti evaṃ yojetvā vitthāretabbā.

Imesu uppannesūti yathāvuttesu aṭṭhasu uppannesu. Idaṃ **na maggavajjhaṃ** appahātabbavattuttā. **Maggavajjhaṃ** maggena paheyyavattuttā. **Rattoti** rāgena samannāgato. Esa nayo **duṭṭho mūḷhoti** etthāpi. **Vinibaddhoti** mānasamyojanena virūpaṃ nibandhito. **Parāmatṭhoti** diṭṭhiparāmāseṇa dhammasabhāvaṃ atikkamma parato āmatṭho. **Aniṭṭhaṅgatoti** niṭṭhaṃ agato, saṃsayāpannoti attho. **Thāmagatoti** anusayavasena daḷhataṃ upagato. **Yuganaddhāti** pahātabbappahāyakayuge naddhā viya vattanakā ekakālikattā. **Samkilesikāti** samkilesadhammasahitā.

Pāḷiyanti paṭisambhidāpāḷiyaṃ (paṭi. ma. 3.21). Tikālikesupi kilesesu vāyāmābhāvadassanattaṃ ajātapalataruṇarukkho pāḷiyaṃ nidassito, aṭṭhakathāyaṃ pana jāto satto asamudāhaṭakilesō nāma natthīti “**jātapalarukkheṇa dipetabba**”nti vatvā tamattaṃ vivarituṃ “**yathā hī**”tiādi vuttaṃ. Atha vā

maggena pahīnakilesānameva atītādibhedena tidhā navattabbataṃ pākaṭaṃ kātuṃ ajātapahalarukkho upamāvasena pāliyaṃ ābhato, atītādīnaṃ appahīnatādassanattampi “**jātapahalarukkheṇa dīpetabba**”nti atthakathāyaṃ vuttaṃ. Tattha yathā acchinne rukkhe nibbattanārahāni phalāni chinne anuppajjamānāni kadāci sasabhāvāni ahesuṃ, honti, bhavissanti vāti atītādibhāvena na vattabbāni, evaṃ maggena pahīnakilesā ca daṭṭhabbā magge anuppanne uppattirahānaṃ uppanne sabbena sabbaṃ abhāvato. Yathā ca chede asati phalāni uppajjissantīti chedanassa sātthakatā, evaṃ maggabhāvanāya ca sātthakatā yojetabbā. **Nāpi na pajahatīti** uppajjanārahānaṃ pajahanato vuttaṃ. **Uppajjitvāti** lakkhaṇe tvā-saddo. Maggassa uppajjanakiriyāya hi samudayappahānanibbānasachikaraṇakiriyā viya khandhānaṃ parijānanakiriyā lakkhīyati.

Tepi pajahatiyevāti ye tehi kilesehi janetabbā upādinnakkhandhā, tepi pajahatiyeva tannimittassa abhisāṅkhāraviññāṇassa nirodhanato. Tenāha – “**vuttampi ceta**”ntiādi. **Abhisāṅkhāraviññāṇassa nirodhenāti** kammaviññāṇassa anuppattidhammatāpādanena. **Etthāti** etasmiṃ sotāpattimaggañāṇe hetubhūte. **Eteti** nāmarūpasāññitā saṅkhārā. **Sabbabhavehi vuṭṭhātiyevātipi vadantīti** arahattamaggo sabbabhavehi vuṭṭhātiyevāti vadanti taduppattito uddhaṃ bhavūpapattiyā kilesassapi abhāvato.

Ekacittakkhaṇikattā maggassāti adhippāyena “**kathaṃ anuppannānaṃ...pe... ṭhitiyā bhāvanā hoti**”ti pucchati. Maggappavattiyāyeva ubhayakiccasiddhito āha – “**maggappavattiyāyevā**”ti. **Maggo hīti**ādīnā tamatthaṃ vīvaratī. Anuppanno nāma vuccati, tasmā tassa bhāvanā anuppannānaṃ uppādāya bhāvanā vuttatī yojetabbā. **Vattuṃ vaṭṭatīti** yāvatā maggassa pavattiyeva ṭhiti, tattakāneva nibbattitalokuttarāni.

398-401. Kattukamyatāchandaṃ adhipatiṃ karitvā paṭiladdhasamādhī chandasamādhīti āha – “**chandaṃ nissāya pavatto samādhī chandasamādhī**”ti **padhānasaṅkhārāti** catukiccasādhakassa sammappadhānavīriyassettaṃ adhivacanaṃ. Tenāha – “**padhānabhūtā saṅkhārā padhānasaṅkhārā**”ti. Tattha **padhānabhūtāti** vīriyabhūtā. Saṅkhatasāṅkhārādinivattanattaṃ padhānaggahaṇanti. Atha vā taṃ taṃ viśesaṃ saṅkharotīti **saṅkhāro**, sabbaṃ vīriyaṃ. Tattha catukiccasādhakato sesanivattanattaṃ padhānaggahaṇanti, padhānabhūtā seṭṭhabhūtāti attho. Catubbidhassa pana vīriyassa adhippetatā bahuvacananiddeso kato. **Tehi dhammehīti** chandasamādhinā padhānasaṅkhārehi ca. **Iddhipādanti** ettha ijjhatīti iddhi, samijjhati nipphajjati attho. Ijjhanti vā etāya sattā iddhā vuddhā ukkaṃsagatā hontītipi iddhi. Paṭhamenatthena iddhi eva pādo **iddhipādo**, iddhikoṭṭhāsoti attho. Dutiyenatthena iddhiyā pādoti **iddhipādo**, pādoti patiṭṭhā, adhigamūpāyoti attho. Tena hi yasmā uparūparivisesasaṅkhātāṃ iddhiṃ pajjanti pāpuṇanti, tasmā pādoti vuccati. Tenāha – “**iddhiyā pādaṃ, iddhibhūtaṃ vā pādaṃ iddhipāda**”nti.

Atha vā **iddhipādanti** nipphattipariyāyena ijjhanaṭṭhena, ijjhanti etāya sattā iddhā vuddhā ukkaṃsagatā hontīti iminā vā pariyāyena iddhīti saṅkhaṃ gatānaṃ upacārājjhānādikusalacittasampayuttānaṃ chandasamādhīpadhānasaṅkhārānaṃ adhiṭṭhānaṭṭhena pādabhūtaṃ sesacittacetāsīkarāsinti attho. Teneva **iddhipādavibhaṅge** (vibha. 434-437) “iddhipādoti tathābhūtassa vedanākkhandho...pe... viññāṇakkhandho”ti vuttaṃ. Sā eva ca tathāvuttā iddhi yasmā heṭṭhimā heṭṭhimā uparimāya uparimāya tayo chandasamādhīpadhānasaṅkhārā pādabhūtā adhiṭṭhānabhūtā, tasmā vuttaṃ “iddhibhūtaṃ vā pāda”nti. Tathā heṭṭhā dhammā iddhipi honti iddhipādāpi, sesā pana sampayuttakā cattāro khandhā iddhipādāyeva. Vīriyacittavīmaṃsāsamādhīpadhānasaṅkhārasaṅkhātāpi tayo tayo dhammā iddhipi honti iddhipādāpi, sesā pana sampayuttakā cattāro khandhā iddhipādāyeva.

Apica pubbabhāgo pubbabhāgo iddhipādo nāma, paṭilābho paṭilābho iddhi nāmāti veditabbā. Ayamatto upacārena vā vipassanāya vā dīpetabbo. Paṭhamajjhānaparikammañhi iddhipādo nāma, paṭhamajjhānaṃ iddhi nāma. Dutiyajjhāna... tatiyajjhāna... catutthajjhāna... ākāsānañcāyatana... viññāṇañcāyatana... ākiñcaññāyatana... nevasaññānāsaññāyatanaṃ iddhipādo nāma, nevasaññānāsaññāyatanaṃ iddhi nāma. Sotāpattimaggassa vipassanā iddhipādo nāma, sotāpattimaggo iddhi nāma. Sakadāgāmi-anāgāmi-arahattamaggassa vipassanā iddhipādo nāma, arahattamaggo iddhi nāma. Paṭilābhenapi dīpetuṃ vaṭṭatiyeva. Paṭhamajjhānañhi iddhipādo nāma, dutiyajjhānaṃ iddhi nāma. Dutiyajjhānaṃ iddhipādo nāma, tatiyajjhānaṃ iddhi nāma...pe... anāgāmimaggo iddhipādo nāma, arahattamaggo iddhi nāma.

Sesesupīti vīriyasamādhiādīsūpi. Tattha hi vīriyaṃ, cittaṃ, vīmaṃsaṃ adhipatiṃ karitvā paṭiladdhasamādhi vīriyasamādhi, cittasamādhi, vīmaṃsāsamādhi attho veditabbo. **Chandādīsu ekanti** chandādīsu catūsu ādito vuttattā ādibhūtaṃ ekaṃ padhānaṃ chandanti adhippāyo. Tenevāha – “**tadāssa paṭhamiddhipādo**”ti. **Evam sesāpīti** etena vīriyaṃ cittaṃ vīmaṃsaṃ nissāya vipassanaṃ vaḍḍhetvā arahattaṃ pāpuṇānaṃ vasena dutiyavīriyiddhipādādayo yojetabbāti dasseti. Iminā hi suttantena catunnaṃ bhikkhūnaṃ matthakappattaṃ kammaṭṭhānaṃ dassitaṃ. Eko hi bhikkhu chandaṃ avassayati, kattukamyatākusaladhammacchandena atthanipphattiyaṃ sati “ahaṃ lokuttaradhammaṃ nibbattessāmi, natthi mayhaṃ etassa nibbattane bhāro”ti chandaṃ jeṭṭhakaṃ chandaṃ dhuraṃ chandaṃ pubbaṅgamaṃ katvā lokuttaradhammaṃ nibbatteti. Eko vīriyaṃ avassayati, eko cittaṃ, eko paññaṃ avassayati, paññāya atthanipphattiyaṃ sati “ahaṃ lokuttaradhammaṃ nibbattessāmi, natthi mayhaṃ etassa nibbattane bhāro”ti paññaṃ jeṭṭhakaṃ paññaṃ dhuraṃ paññaṃ pubbaṅgamaṃ katvā lokuttaradhammaṃ nibbatteti.

Kathaṃ? Yathā hi catūsu amaccaputtesu ṭhānantaraṃ patthetvā vicarantesu eko upaṭṭhānaṃ avassayati, eko sūrabhāvaṃ, eko jātiṃ, eko mantāṃ. Kathaṃ? Tesu hi paṭthamo upaṭṭhāne appamādaḥkāritāya atthanipphattiyaṃ sati labbhamānaṃ “lacchāmetaṃ ṭhānantara”nti upaṭṭhānaṃ avassayati. Dutiyō upaṭṭhāne appamattopi “ekacco saṅgāme paccupaṭṭhite saṅṭhātuṃ na sakkoti, avassaṃ pana rañño paccanto kuppissati, tasmīṃ kuppite rathassa purato kammaṃ katvā rājānaṃ ārādhetaṃ āharāpessāmetaṃ ṭhānantara”nti sūrabhāvaṃ avassayati. Tatiyo “sūrabhāvepi sati ekacco hīnajātiko hoti, jātiṃ sodhetvā ṭhānantaraṃ dento mayhaṃ dassatī”ti jātiṃ avassayati. Catuttho “jātimāpi eko amantaṇṇiyo hoti, mantena kattabbakicce uppanne āharāpessāmetaṃ ṭhānantara”nti mantāṃ avassayati. Te sabbe pi attano attano avassayabalena ṭhānantarāni pāpuṇiṃsu.

Tattha upaṭṭhāne appamatto hutvā ṭhānantaraṃ patto viya chandaṃ avassāya kattukamyatākusaladhammacchandena “atthanipphattiyaṃ sati ahaṃ lokuttaradhammaṃ nibbattessāmi, natthi mayhaṃ etassa nibbattane sāro”ti chandaṃ jeṭṭhakaṃ chandaṃ dhuraṃ chandaṃ pubbaṅgamaṃ katvā lokuttaradhammanibbattako daṭṭhabbo **raṭṭhapālatthero** (ma. ni. 2.293 ādayo) viya. So hi āyasmā “chande sati kathaṃ nānujānissanti”ti sattāhampi bhattāni abhuñjitvā mātāpitaro anujānāpetvā pabbajitvā chandameva avassāya lokuttaradhammaṃ nibbattesi. Sūrabhāvena rājānaṃ ārādhetaṃ ṭhānantaraṃ patto viya vīriyaṃ jeṭṭhakaṃ vīriyaṃ dhuraṃ vīriyaṃ pubbaṅgamaṃ katvā lokuttaradhammanibbattako daṭṭhabbo **soṇatthero** (mahāva. 243 ādayo) viya. So hi āyasmā vīriyaṃ dhuraṃ katvā lokuttaradhammaṃ nibbattesi.

Jātisampattiyaṃ ṭhānantaraṃ pattoviya cittaṃ jeṭṭhakaṃ cittaṃ dhuraṃ cittaṃ pubbaṅgamaṃ katvā lokuttaradhammanibbattako daṭṭhabbo **sambhūtatthero** (theragā. aṭṭha. 2 sambhūtattheragāthavaṇṇanā) viya. So hi āyasmā cittaṃ jeṭṭhakaṃ cittaṃ dhuraṃ cittaṃ pubbaṅgamaṃ katvā lokuttaradhammaṃ nibbattesi. Mantāṃ avassāya ṭhānantaraṃ patto viya vīmaṃsaṃ jeṭṭhakaṃ vīmaṃsaṃ dhuraṃ vīmaṃsaṃ pubbaṅgamaṃ katvā lokuttaradhammanibbattako daṭṭhabbo **thero mogharājā** (su. ni. 1122 ādayo; cūḷani. mogharājamāṇavapucchāniddeśo 85) viya. So hi āyasmā vīmaṃsaṃ jeṭṭhakaṃ vīmaṃsaṃ dhuraṃ vīmaṃsaṃ pubbaṅgamaṃ katvā lokuttaradhammaṃ nibbattesi. Tassa hi bhagavā “suññato lokaṃ avekkhassū”ti (su. ni. 1125; cūḷani. mogharājamāṇavapucchāniddeśo 88) suññatākathaṃ kathesi. Paññānissitamānaniggahatthañca dvikkhattuṃ pucchito paññaṃ na kathesi. Ettha ca punappunaṃ chanduppādanaṃ tosaṇaṃ viya hotīti chandassa upaṭṭhānasadisatā vuttā, thāmabhāvato vīriyassa sūrattasadisatā, “chadvārādhīpati rājā”ti (dha. pa. aṭṭha. 2.erakapattanāgarājavatthu) vacanato pubbaṅgamatā cittassa visiṭṭhajātisadisatā.

402-406. Attano saddhādhureti attano saddhāhicce saddahanakiriyāya. **Indaṭṭhaṃ kāretīti** anuvattanavasena sampayuttadhammesu indaṭṭhaṃ kāreti, tasmā ādhipateyyaṭṭhena saddhā eva indriyanti **saddhindriyaṃ**. Tathā vīriyādīnaṃ sakasakakiccesūti āha – “**vīriyindriyādīsūpi eseva nayo**”ti. **Visodhentoti** vipakkhavivajjanasapakhanisevanasariikkhūpanissayasāṅgaṇhanalakkhaṇehi tīhi kāraṇehi visodhanavasena sodhento.

Assaddhe puggale parivajjayatoti buddhādīsū pasādasinehābhāvena saddhārahite lūkhapuggale sabbaso vajjayato. **Saddhe puggale sevato**ti buddhādīsū saddhādhimutte vakkalittherasadi sevato.

Pasādanīyeti pasādāvahe sampasādanīyasuttādiḱe (dī. ni. 3.141 ādayo). **Paccavekkhatoti** pālīto atthato ca pati pati avekkhantassa cintentassa. **Visujjhatī** paṭipakkhamalavigamato paccayavasena sabhāvasaṃsuddhito visuddhaphalanibbattito ca saddhindriyaṃ visujjhati. Esa nayo sesesupi. **Sammappadhāneti** sammappadhānappaṭisaṃyutte (saṃ. ni. 5.651-662 ādayo) suttante. Esa nayo sesesupi. **Jhānavimokkheti** paṭhamajjhānādijjhānāni ceva paṭhamavimokkhādivimokkhe ca. Kāmañcettha jhānāniyeva vimokkhā, pavattiākāravasena pana viṣuṃ gahaṇaṃ.

Gambhīraññacariyanti gambhīraṇaṃ ñāṇānaṃ pavattiṭṭhānaṃ. Tenāha – “**saṃhasukhuma**”ntiādi. **Khandhantaranti** sabhāvajātibhūmiādivasena khandhānaṃ nānattaṃ. Esa nayo sesesupi. **Akatābhīnivesoti** pubbe akatābhāvanābhīniveso. **Saddhādhurādīsūti** saddhādhure paññādhure ca. **Avasāneti** bhāvanāpariyosāne. **Vivaṭṭetvāti** saṅkhārārammaṇato vivaṭṭetvā nibbānaṃ ārammaṇaṃ katvā. **Arahattaṃ gaṇhātī** maggaparamparāya arahattaṃ gaṇhātī. **Akampiyatṭhenāti** paṭipakkhehi akampiyabhāvena. Etenevassa sampayuttadhammesu thirabhāvopi vibhāvito daṭṭhabbo. Na hi sampayuttadhammesu thirabhāvena vinā paṭipakkhehi akampiyatā sambhavati. Sampayuttadhammesu thirabhāveneva hi akusalānaṃ abyākatānañca nesam balavabhāvūpapatti. **Assaddhiyeti** assaddhiyāhetu. Nimittatthe hetam bhummavacanaṃ. Esa nayo sesesupi.

418. Ādīpadānanti satiādīpadānaṃ. **Saraṇatṭhenāti** cirakatacirabhāsītānaṃ anussaraṇatṭhena. **Upaṭṭhānalakkhaṇāti** kāyādīsū asubhākārādisallakkhaṇamukhena tattha upaṭṭhānasabhāvā. Upaṭṭhānañca ārammaṇaṃ upagantvā ṭhānaṃ, avissajjanaṃ vā ārammaṇassa. **Apilāpanalakkhaṇāti** asamussanasabhāvā, udake alābu viya ārammaṇe plavitvā gantuṃ appadānaṃ, pāsāṇassa viya niccalassa ārammaṇassa ṭhapanam sāraṇaṃ asammūṭṭhakarānaṃ apilāpanaṃ. **Sāpateyyanti** santakaṃ. Apilāpanaṃ asammūṭṭhaṃ karoti **apilāpeti**, sāyaṃ pātāñca rājānaṃ issariyasampattiṃ sallakkhāpeti sāretīti attho. **Kaṇhasukkasappaṭibhāge dhammeti** kaṇhasukkasaṅkhāte sappaṭibhāge dhamme. Kaṇho hi dhammo sukkena, sukko ca kaṇhena sappaṭibhāgo. **Vitthāra**-saddo ādisaddattho. Tena “ime cattāro dhammā sammappadhānā, ime cattāro iddhipādā, imāni pañcindriyāni, imāni pañca balāni, ime satta bojjhaṅgā, ayaṃ ariyo aṭṭhaṅgiko maggo, ayaṃ samatho, ayaṃ vipassanā, ayaṃ vijjā, ayaṃ vimutti, ime lokuttaradhammāti evaṃ kho, mahārāja, apilāpanalakkhaṇā satī”ti (mi. pa. 2.1.13) imam pālisesam saṅgaṇhātī. **Therenāti** nāgasenattherena. So hi dhammānaṃ kiccaṃ lakkhaṇaṃ katvā asseti “apilāpanalakkhaṇā sati, ākoṭanalakkhaṇo vitakko”tiādinā. Evañhi dhammā subodhā hotīti. Sammosapaccanīkaṃ kiccaṃ asammo, na sammosābhāvamattanti āha – “**asammosarāsā vā**”ti. Yassa dhammassa balena sampayuttadhammā ārammaṇābhīmukhā bhavanti, sā sati. Tasmā sā tesam ārammaṇābhīmukhabhāvam paccupaṭṭhāpesi, sayam vā ārammaṇābhīmukhabhāvena paccupaṭṭhatīti vuttaṃ – “**gocarābhīmukhībhāvapaccupaṭṭhānā**”ti. Sammā pasattho bojjhaṅgoti **sambojjhaṅgo**. **Bodhiyā** vakkhamānāya dhammasāmaggiyā, **bodhissā vā** ariyasāvakaṃ aṅgoti bojjhaṅgo. **Yā hītiādinā** tameva saṅkhepato vuttamattham vivarati. “Yā hi ayaṃ dhammasāmaggī”ti etassa “bodhīti vuccatī”ti iminā sambandho. **Dhammasāmaggiyāti** dhammasamūhena, yāya dhammasāmaggiyāti sambandho. **Patiṭṭhānāyūhanā oghataraṇasuttavaṇṇanāyaṃ** (saṃ. ni. aṭṭha. 1.1.1) “kilesavasena patiṭṭhānaṃ, abhisāṅkhāravasena āyūhanā. Taṇhā diṭṭhivasena patiṭṭhānaṃ, avasesakilesābhisaṅkhārehi āyūhanā. Taṇhāvasena patiṭṭhānaṃ, diṭṭhivasena āyūhanā. Sattatadiṭṭhiyā patiṭṭhānaṃ, ucchedadiṭṭhiyā āyūhanā. Līnavasena patiṭṭhānaṃ, uddhaccavasena āyūhanā. Kāmasukhallikānuyogavasena patiṭṭhānaṃ, attakilamathānuyogavasena āyūhanā. Sabbākusalābhisaṅkhāravasena patiṭṭhānaṃ, sabbalokiyakusalābhisaṅkhāravasena āyūhanā”ti evaṃ vuttetu sattuṃ pakāresu idha avuttānaṃ vasena veditabbā. **Paṭipakkhabhūtāyāti** ettha līnappaṭṭhānakāmasukhallikānuyogaucchedābhīnivesānaṃ dhammavicayavīriyapītipadhānā dhammasāmaggī paṭipakkho, uddhaccāyūhanaattakilamathānuyogasattābhīnivesānaṃ passaddhisamādhiupekkhāpadhānā dhammasāmaggī paṭipakkho. Sati pana ubhayatthāpi icchitabbā. Tathā hi sā “sabbatthikā”ti vuttā.

Kilesasantānaniddāya utṭhahatī etena sikhāpattavipassanāya sahaṅgānampi satiādīnaṃ bojjhaṅgabhāvam dasseti. Vuṭṭhānagāminivipassanā hi kilese nirodhetī eva pavattatīti. **Cattāri vātiādinā** pana maggaphalasaṅgānānaṃ bojjhaṅgabhāvam dasseti. Sattahi bojjhaṅgehi bhāvitehi saccappaṭivedho hotīti kathamidam jānitabbanti codanaṃ sandhāyāha – “**yathāhā**”tiādi. **Jhānaṅgamaggaṅgādayo viyāti** etena bodhibojjhaṅgasaddānaṃ samudāyāvayavavisaṃyamaṃ dasseti. **Senāṅgarathāṅgādayo viyāti** etena

puggalapaññattiyā avijjamānapaññattibhāvaṃ dasseti.

Bodhāya saṃvattantīti bojjaṅgāti kāraṇattho aṅgasaddoti katvā vuttaṃ. Bujjantīti bodhiyo, bodhiyo eva aṅgāni bojjaṅgāntīti vuttaṃ – “**bujjantīti bojjaṅgā**”ti. Vipassanādīnaṃ kāraṇādīnaṃ bujjhitabbānañca saccānaṃ anurūpaṃ paccakkhabhāvena paṭimukhaṃ aviparītātāya sammā ca bujjantīti evaṃ atthavisesadīpakehi upasaggehi “**anubujjantī**”tiādi vuttaṃ. Bodhisaddo hi sabbavisesayuttabujjhanāṃ sāmāññena saṅgaṇhāti. Saṃ-saddo pasamsāyaṃ sundarabhāve ca dissatīti āha – “**pasattho sundaro ca bojjaṅgo sambojjaṅgo**”ti.

Dhamme vicinatīti **dhammavicayo**. Tattha **dhammeti** catusaccadhamme tabbinimuttassa sabhāvadhammassa abhāvato. Tato eva so **pavicayalakkhaṇo**. **Obhāsanarasoti** visayobhāsanaraso. Asammuyhanākārena paccupatiṭṭhatīti **asammohapaccupaṭṭhāno**.

Vīrassa bhāvo, kammaṃ vāti **vīriyaṃ**. **Īrayitabbatoti** pavattetabbato. **Paggahalakkhaṇanti** kosajjapakke patituṃ adavā sampayuttadhammānaṃ paggalhalakkhaṇaṃ. Tato eva sampayuttadhamme **upatthambhanarasam**. **Anosīdanam** asaṃsīdanam.

Piṇayatīti tappeti. Piṇanakiccena sampayuttadhammānaṃ viya taṃsamuttānāpanāṇitarūpehi kāyassābyapanam. Pharaṇapītivasena hetam lakkhaṇam vuttaṃ, tathā **rasoti**. Udaggabhāvo odagyaṃ, tam paccupaṭṭhapeti **odagyapaccupaṭṭhānā**. Ubbegapītivasena cetam vuttaṃ.

Kāyacittadarathappassambhanatoti kāyadarathassa cittadarathassa ca passambhanato vūpasamanato. Tenāha – “**upasamalakkhaṇā**”ti, kāyacittadarathānaṃ vūpasamanalakkhaṇānti attho. **Kāyoti** cettha vedanādayo tayo khandhā. **Daratho** sārāmbho, dukkhadomanassapaccayānaṃ uddhaccādīkānaṃ kilesānaṃ, tathāpavattānaṃ vā catunnam khandhānametaṃ adhivacanam. Darathanimmaddanena pariṭāhaparipphandanavirahito sītibhāvo **aparipphandanasītibhāvo**.

Sammā cittassa ṭhapanam **samādhānam**. **Avikkhepo** sampayuttānaṃ avikkhittatā. Yena sampayuttā avikkhittā hontī, so dhammo **avikkhepo**. **Avisāro** attano eva avisaraṇabhāvo. Atha vā vikkheppaṭṭipakkhatāya **avikkhepalakkhaṇo**. Nhānīyacuṇṇassa udakam viya sampayuttadhammānaṃ sampiṇḍanakiccatāya avisārabhāvena lakkhitabbo **avisāralakkhaṇo**. Nivāte dīpacchīṭṭhiti viya cetaso ṭhitibhāvena paccupatiṭṭhatīti **cittatṭhitipaccupaṭṭhāno**.

Ajjupekkhanatoti samappavattesu assesu sārathi viya sampayuttadhammānaṃ ajjupekkhanato. **Paṭisaṅkhānalakkhaṇānti** majjhatabhāve ṭhatvā vīmaṃsanasaṅkhātappaṭisaṅkhānalakkhaṇā. **Samavāhitalakkhaṇānti** samaṃ avisamaṃ yathāsakakiccesu sampayuttadhammānaṃ pavattanalakkhaṇā. Udāsīnabhāvena pavattamānāpi sesasampayuttadhamme yathāsakakiccesu pavatteti, yathā rājā tuṇhī nisinnopi atthakaraṇe dhammatṭhe yathāsakaṃ kiccesu appamatto pavatteti. Alīnānuddhatappavattipaccayattā **ūnādhikanivāraṇarasā**. **Pakkhapātupacchedanarasāti** “idaṃ nihīnakiccaṃ hotu, idaṃ atirekatarakicca”nti evaṃ pakkhapātanavasena viya pavatti pakkhapāto, tam upacchindantī viya hotīti **pakkhapātupacchedanarasā**. Sampayuttadhammānaṃ sakasakakicce majjhatabhāvena paccupatiṭṭhatīti **majjhatabhāvapaccupaṭṭhāno**. Bojjaṅgānaṃ uparūpari uppādanameva brūhanam vaḍḍhanañcāti āha – “**uppādeti**”ti.

Sati ca sampajaññañca **satisampajaññaṃ**, satipadhānaṃ vā sampajaññaṃ **satisampajaññaṃ**. Tam sabbattha satokāribhāvāvahattā satisambojjaṅgassa uppādāya hotī. Yathā paccanīkadhammappahānaṃ anurūpadhammasevanā ca anuppannānaṃ kusalānaṃ dhammānaṃ uppādāya hotī, evaṃ satirahitapuggalavivajjanā, satokāripuggalasevanā, tattha ca yuttatā satisambojjaṅgassa uppādāya hotīti imamattham dasseti, “**satisampajañña**”ntiādinā. **Sattasu ṭhānesūti** “abhikkante paṭikkante sampajānakārī hotī, ālokite vilokite sampajānakārī hotī, samīñjite pasārite sampajānakārī hotī, saṅghāṭipattacīvaradhāraṇe sampajānakārī hotī, asite pīte khāyite sāyite sampajānakārī hotī, uccārapassāvakamme sampajānakārī hotī, gate ṭhite nisinne sutte jāgarite bhāsīte tuṇhībhāve sampajānakārī hotī”ti (dī. ni. 2.376; ma. ni. 1.109) evaṃ

vuttesu abhikkantādīsu sattasu thānesu. **Tissadattatthero** nāma yo bodhimaṇḍe suvaṇṇasalākaṃ gaheṭvā “aṭṭhārasasu bhāsasu katarabhāsāya dhammaṃ kathemī”ti pariṣaṃ padhāresi. **Abhayattheroti** dattābhayattheramāha. **Abhinivesanti** vipassanābhinivesaṃ.

Paripucchakatāti pariyogāheṭvā pucchakabhāvo. Ācariye payirupāsivā pañcapi nikāye saha aṭṭhakathāya pariyogāheṭvā yaṃ yaṃ tattha gaṇṭhiṭṭhānabhūtaṃ, taṃ taṃ “idaṃ, bhante, kathaṃ, imassa ko attho”ti khandhāyatanādiatthaṃ pucchantassa hi dhammavicayasambojjhaṅgo uppajjati. Tenāha – “**khandhadhātu...pe... bahulatā**”ti.

Vatthuisadakiriyāti ettha cittacetāsikānaṃ pavattiṭṭhānabhāvato sarīraṃ tappaṭibaddhāni cīvarādīni ca vatthūnīti adhippetāni. Tāni yathā cittassa sukhāvahāni honti, tathā karaṇaṃ tesaṃ visadakiriyā. Tenāha – “**ajjhattikabāhirāna**”ntiādi. **Ussannadosanti** vātapittādivasena upacitadosaṃ. **Sedamalamakkhitanti** sedena ceva jallikāsaṅkhātena sarīramalena ca makkhitaṃ. **Ca**-saddena aññampi sarīrassa pīlāvahaṃ accāsanādiṃ saṅgaṇhāti. **Senāsaṇaṃ vāti vā**-saddena malaggahitapattādīnaṃ saṅgaho daṭṭhabbo. **Paribhaṇḍakaraṇādīhīti ādi**-saddena pattapacanādīnaṃ saṅgaho daṭṭhabbo. **Avisadeti** vatthumhi avisade sati, visayabhūte vā. Kathaṃ bhāvanamanuyuttassa tāni ajjhattikabāhiravatthūni visayo? Antarantārā pavattanakacittuppādasaseneva vuttaṃ. Te hi cittuppādā cittekaggatāya aparisuddhabhāvāya saṃvattanti. **Cittacetāsikesūti** nissayādiṃ paccayabhūtesu cittacetāsikesu. **Ñāṇampīti api**-saddo sampiṇḍanattho. Tena “na kevalaṃ vatthuyeva, atha kho tasmīṃ aparisuddhe ñāṇampi aparisuddhaṃ hotī”ti nissayāparisuddhiyā taṃnissitāparisuddhi viya visayassa aparisuddhatāya visayino aparisuddhiṃ dasseti.

Samabhāvakaraṇanti kiccatō anūnādhikabhāvakaraṇaṃ. **Saddhindriyaṃ balavaṃ hoti**, saddheyyavatthumhiṃ paccayavasena adhimokkhakiccassa paṭutarabhāvena paññāya avisadatāya vīriyādīnaṃ sithilatādīnā saddhindriyaṃ balavaṃ hoti. Tenāha – “**itarāni mandāni**”ti. **Tatoti** tasmā, saddhindriyassa balavabhāvato itaresaṅgaṃ mandattāti attho. Kosajjapakke patitūṃ adatvā sampayuttadhammānaṃ paggaṇhanaṃ anubalappadānaṃ paggaho. Paggahova kiccaṃ **paggahakiccaṃ**. Kātuṃ na sakkotīti ānetvā sambandhitabbaṃ. Ārammaṇaṃ upagantvā thānaṃ, anissajjanaṃ vā **upaṭṭhānaṃ**. Vikkhepappaṭipakkho, yena vā sampayuttā avikkhittā honti, so **avikkhepo**. Rūpagataṃ viya cakkhunā yena yāthāvato visayasabhāvaṃ passati, taṃ **dassanakiccaṃ kātuṃ na sakkoti** balavatā saddhindriyena adhibhūtattā. Sahajātadhammesu hi indaṭṭhaṃ kārentānaṃ sahapavattamānaṃ dhammānaṃ ekadesatāvaseneva atthasiddhi, na aññathā. **Tasmāti** vuttamevatthaṃ kāraṇabhāvena paccāmasati. **Tanti** saddhindriyaṃ. **Dhammasabhāvapaccavekkhaṇenāti** yassa saddheyyassa vatthuno ulāratādiguṇe adhimuccanassa sātisayappavattiyā saddhindriyaṃ balavaṃ jātaṃ, tassa paccayapaccayuppannatādivibhāgato yāthāvato vīmaṃsanena. Evañhi evaṃdhammatānaya yāthāvasarasato pariggayhamāne savipphāro adhimokkho na hoti “ayaṃ imesaṃ dhammānaṃ sabhāvo”ti parijānanavasena paññābyāpārassa sātisayattā. Dhuriyadhammesu hi yathā saddhāya balavabhāve paññāya mandabhāvo hoti, evaṃ paññāya balavabhāve saddhāya mandabhāvo hoti. Tena vuttaṃ – “**taṃ dhammasabhāvapaccavekkhaṇena hāpetabba**”nti.

Tathā amanasikārenāti yenākārena bhāvanamanuyuñjantassa saddhindriyaṃ balavaṃ jātaṃ, tenākārena bhāvanāya ananuyuñjanatoti vuttaṃ hoti. Idha duvidhena saddhindriyassa balavabhāvo attano vā paccayavisesena kiccuttariyato vīriyādīnaṃ vā mandakiccatāya. Tattha paṭhamavikappe hāpanavidhi dassito, dutiyavikappe pana yathā manasikaroto vīriyādīnaṃ mandakiccatāya saddhindriyaṃ balavaṃ jātaṃ, tathā amanasikārena vīriyādīnaṃ paṭukiccabhāvāvahena manasikārena saddhindriyaṃ tehi samarasam karontena hāpetabbaṃ. Iminā nayena sesindriyesupī hāpanavidhi veditabbo.

Vakkalittheravatthūti so hi āyasmā saddhādhimuttatāya katādhikāro satthu rūpadassanappasuto eva hutvā viharanto satthārā “kiṃ te, vakkali, iminā pūtikāyena diṭṭhena, yo kho, vakkali, dhammaṃ passati, so maṃ passati”tiādinā (saṃ. ni. 3.87) nayena ovaditvā kammaṭṭhāne niyojitoṃ taṃ ananuyuñjanto pañāmito attānaṃ vinipātetuṃ papātaṭṭhānaṃ abhiruhi. Atha naṃ satthā yathānisinnova obhāsavissajjanena attānaṃ dassetvā –

“Pāmojjabahulo bhikkhu, pasanno buddhasāsane;
Adhigacche padaṃ santam, saṅkhārūpasamaṃ sukha”’nti. (dha. pa. 381) –

Gātham vatvā “ehi, vakkalī”’ti āha. So teneva amatena abhisitto haṭṭhatuṭṭho hutvā vipassanaṃ paṭṭhapesi, saddhāya pana balavabhāvena vipassanāvīthim na otari. Taṃ ñatvā bhagavā tassa indriyasamattappaṭipādanāya kammaṭṭhānaṃ sodhetvā adāsi. So satthārā dinnanaye ṭhatvā vipassanaṃ ussukkāpetvā maggappaṭipāṭiyā arahattaṃ pāpuṇi. Tena vuttaṃ – “**vakkalittheravatthu cettha nidassana**”’nti. **Etthāti** saddhindriyassa adhimattabhāve sesindriyānaṃ sakiccākaraṇe. **Itarakiccabhedanti** upaṭṭhānādikiccavisesaṃ. **Passaddhādīti ādi**-saddena samādhiupekkhāsambojjhaṅgānaṃ saṅgaho. **Hāpetabbanti** yathā saddhindriyassa balavabhāvo dhammasabhāvapaccavekkhaṇena hāyati, evaṃ vīriyindriyassa adhimattatā passaddhiādibhāvanāya hāyati samādhipakkhiyattā tassā. Tathā hi samādhindriyassa adhimattataṃ kosajjapātato rakkhantī vīriyādibhāvanā viya vīriyindriyassa adhimattataṃ uddhaccapātato rakkhantī passaddhādibhāvanā ekamsato hāpeti. Tena vuttaṃ – “**passaddhādibhāvanāya hāpetabba**”’nti.

Soṇattherassa vatthūti sukhumālasoṇattherassa vatthu. So hi āyasmā satthu santike kammaṭṭhānaṃ gahetvā sītavane viharanto “mama sarīraṃ sukhumālaṃ, na ca sakkā sukheveva sukhaṃ adhigantaṃ, kilametvāpi samaṇadhammo kātabbo”’ti ṭhānacaṅkamameva adhiṭṭhāya padhānamanuyuñjanto pādātesu phoṭesu utṭhitesupi vedanaṃ ajjupekkhitvā dalhaviyāya karonto accāraddhavīriyatāya visesaṃ nibbattetuṃ nāsakkhi. Satthā tattha gantvā vīriyapamovādena ovaditvā vīriyasamatāyojanavidhiṃ dassento kammaṭṭhānaṃ visodhetvā gijjhakūṭaṃ gato. Theropi satthārā dinnanayena vīriyasamataṃ yojetvā bhāvento vipassanaṃ ussukkāpetvā arahatte patiṭṭhāsi. Tena vuttaṃ – “**soṇattherassa vatthu dassetabba**”’nti. **Sesesupīti** satisamādhipaññindriyesupi.

Samatanti saddhāpaññānaṃ aññamaññaṃ anūnādhikabhāvaṃ, tathā samādhivīriyānaṃ. Yathā hi saddhāpaññānaṃ visuṃ dhuriyadhamabhūtānaṃ kiccato aññamaññānavattanaṃ visesato icchitabbaṃ, yato nesaṃ samadhuratāya appanā sampajjati, evaṃ samādhivīriyānaṃ kosajjuddhaccapakkhikānaṃ samarasatāya sati aññamaññūpatthambhanato sampayuttadhamānaṃ antadvayapātābhāvena sammadeva appanā ijjhati. **Balavasaddhotīdi** byatirekamukhena vuttassevatthassa samatthanaṃ. Tassattho – yo balavatiyā saddhāya samannāgato avisadaññaṃ, so mudhappasanno hoti, na aveccappasanno. Tathā hi avatthusmiṃ pasīdati seyyathāpi titthiyasāvaka. **Kerāṭīkapakkhanti** sāṭṭheyyapakkhaṃ bhajati. Saddhāhīnāya paññāya atidhāvanto “deyyavatthupariccāgena vinā cittuppādamattenapi dānamayaṃ puññaṃ hotī”’tiādīni parikkappeti hetuppaṭirūpakehi vañcīto, evaṃbhūto sukkhatakkaviluttacitto paṇḍitānaṃ vacanaṃ nādiyati, saññattim na gacchati. Tenāha – “**bhesajjasamuṭṭhito viya rogo atekiccho hotī**”’ti. Yathā cettha saddhāpaññānaṃ aññamaññaṃ samabhāvo atthāvaho, anattāvaho visamabhāvo, evaṃ samādhivīriyānaṃ aññamaññaṃ avikkhepāvaho samabhāvo, itaro vikkhepāvaho cāti **kosajjaṃ abhibhavati**, tena appanaṃ na pāpuṇātīti adhippāyo. **Uddhaccaṃ abhibhavatīti** etthāpi eseva nayo. **Taṃ ubhayanti** saddhāpaññadvayaṃ samādhivīriyadvayaṃ. **Samam kattabbanti** samarasaṃ kātabbaṃ.

Samādhikammikassāti samathakammaṭṭhānikassa. **Evanti** evaṃ sante, saddhāya thokaṃ balavabhāve satīti attho. **Saddahantoti** “pathavī pathavīti manasikaraṇamattena kathaṃ jhānuppattī”’ti acintetvā “addhā sammāsambuddhena vuttavidhi ijjhissati”’ti saddahanto saddhaṃ janento. **Okappentoti** ārammaṇaṃ anuppavisitvā viya adhimuccanavasena avakappento pakkhandanto. **Ekaggatā balavatī vaṭṭati** samādhipadhānattā jhānassa. **Ubhinnanti** samādhipaññānaṃ. Samādhikammikassa samādhino adhimattatā viya paññāya adhimattatāpi icchitabbatī āha – “**samatāyapī**”’ti, samabhāvenapīti attho. **Appanāti** lokiyaappanā. Tathā hi “**hotiyevā**”’ti sāsākaṃ vadati. Lokuttarappanā pana tesam samabhāveneva icchitā. Yathāha – “samathavipassanaṃ yuganaddhaṃ bhāvetī”’ti (a. ni. 4.170; paṭi. ma. 2.5).

Yadi visesato saddhāpaññānaṃ samādhivīriyānaṃca samatāya icchitā, kathaṃ satīti āha – “**sati pana sabbattha balavatī vaṭṭati**”’ti. **Sabbatthāti** līnuddhaccapakkhikesu pañcasu indriyesu. Uddhaccapakkhike gaṇhanto “**saddhāvīriyapaññāna**”’nti āha. Aññāthāpīti ca gahetabbā siyā. Tathā hi **kosajjapakkhikena ca samādhinā**iceva vuttaṃ, na “passaddhisamādhiupekkhāhī”’ti. **Sāti** satī. Sabbesu rājakammesu niyutto

sabbakammiko. Tenāti tena sabbattha icchitabbatthena kāraṇena. **Āha** aṭṭhakathāyaṃ. Sabbattha niyuttā **sabbatthikā** sabbattha līne uddhate ca citte icchitabbattā, sabbena vā līnuddhaccapakkhiyena bojjhaṅgagaṇena atthetabbāti sabbatthā, sāva **sabbatthikā.** **Cittanti** kusalacittam. Tassa hi **satipaṭisaraṇaṃ** parāyaṇaṃ appattassa pattiyā anadhigatassa adhigamāya. Tenāha – “**ārakkhapaccupaṭṭhānā**”tiādi.

Khandhādibhedesu anogāḷhapaññānanti pariyattibāhusaccavasenaṃ khandhāyatanādīsu appaṭiṭṭhitabuddhīnaṃ. Bahussutasevanā hi sutamayaññāvahā. Taruṇavipassanāsamaṅgīpi bhāvanāmayaññāṇe ṭhitattā ekamsato paññāvā eva nāma hotīti āha – “**samapaññāsa...pe...puggalasevanā**”ti. Neyyadhammassa gambhīrabhāvavasena tapparicchedakaññāssa gambhīrabhāvaggahaṇanti āha – “**gambhīresu khandhādīsu pavattāya gambhīrapaññāyā**”ti. Tañhi ñeyyaṃ tādīsāya paññāya caritabbato gambhīraññācariyaṃ. Tassā vā paññāya tattha pabhedato pavatti gambhīraññācariyā, tassā paccavekkhaṇāti āha – “**gambhīrapaññāya pabhedapaccavekkhaṇā**”ti.

Pañcavidhabandhanakammakāraṇaṃ niraye nibbattasattassa yebhuyyena sabbapaṭṭhamam karontīti devadūtasuttādīsu ādito vuttattā ca āha – “**pañcavidhabandhanakammakāraṇato paṭṭhāyā**”ti. **Sakaṭavahanādikāleti ādi-**saddena tadaññaṃ manussehi tiracchānehi ca vibādhitabbakālaṃ saṅgaṇhāti. **Ekam buddhantaranti** idaṃ aparāparesu petesuyeva uppajjanakasattavasena vuttaṃ, ekaccānaṃ vā petānaṃ ekaccatiracchānānaṃ viya dīghāyukatā siyāti tathā vuttaṃ. Tathā hi kālo nāgarājā catunnaṃ buddhānaṃ sammukhībhāvaṃ labhitvā ṭhitopi metteyyassapi bhagavato sammukhībhāvaṃ labhissatīti vadanti, yatassa kappāyukatā vuttā.

Evaṃ ānisaṃsadassāvīnanti vīriyāyatto eva sabbo lokiyo lokuttaro ca vīsēdhigamoti evaṃ vīriye ānisaṃsadassanasīlassa. **Gamanavīthinti** sapubbabhāgaṃ nibbānagāminipaṭipadaṃ, saha vipassanāya ariyamaggappaṭipāṭi, sattavisuddhiparamparā vā. Sā hi “bhikkhuno vaṭṭaniyyānāya gantabbā paṭipajjitabbā paṭipadā”ti katvā gamanavīthi nāma.

Kāyadaḷhībahuloti yathā tathā kāyassa daḷhīkammappasuto. **Piṇḍapātanti** raṭṭhapiṇḍaṃ. Paccayadāyakānaṃ attani kārassa attano sammāpaṭipattiyā mahapphalabhāvassa karaṇena piṇḍassa bhikkhāya paṭipūjanā **piṇḍapātāpacāyaṇaṃ.**

Nīharantoti pattatthavīkato nīharanto. **Taṃ saddaṃ sutvāti** taṃ upāsikāya vacanaṃ paṇṇasālādvāre ṭhitova pañcābhiññāyā dibbasotena sutvā. Manussasampatti, dibbasampatti, nibbānasampattīti imā **tisso sampattiyo.** **Dātuṃ sakkhissasīti** tayi katena dānamayena veyyāvaccamayena ca puññakammena khettavisesabhāvūpagamanena aparāparaṃ devamanussānaṃ sampattiyo ante nibbānasampattiñca dātuṃ sakkhissasīti thero attānaṃ pucchati. **Sitaṃ karontoti** “akiccheneva mayā vaṭṭadukkhaṃ samatikkanta”nti paccavekkhaṇāvasāne sañjātapāmojjavasena sitaṃ karonto.

Nipparissayakāloti nirupaddavakālo, tadā bhikkhusaṅghassa sulabhā paccayā hontīti paccayahetukā cittapīḷā natthīti adhippāyo. **Passantānaṃyevāti** anādare sāmivacanaṃ. **Khīradhenuṃti** khīradāyikaṃ dhenuṃ. **Kiñcideva katvāti** kiñcideva bhatikammaṃ katvā. **Ucchuyantakammanti** ucchuyantasālāya kātabbaṃ kiccaṃ. **Tameva magganti** upāsakena paṭipannamaggam. **Upakaṭṭhāyāti** āsannāya. **Vippaṭipannanti** jātidhammakuladhammādilaṅghanena asammapaṭipannaṃ. **Evanti** yathā asammapaṭipanno putto tāya eva asammapaṭipattiyā kulasantānato bāhiro hutvā pitu santikā dāyajjassa na bhāgī, evaṃ **kusītopi** teneva kusītabhāvena na sammāpaṭipanno satthu santikā laddhabbaariyadhadāyajjassa na bhāgī. **Āraddhavīriyova labhati** sammāpaṭipajjanato. Uppajjati vīriyasambojjhaṅgoti yojanā, evaṃ sabbattha.

Mahāti sīlādiguṇehi mahanto vipulo anaññasādhāraṇo. Taṃ panassa guṇamahattaṃ dasasahasilokadhātukampanena loke pākāṇanti dassento “**satthuno hī**”tiādimāha.

Yasmā satthusāsane pabbajitassa pabbajjūpagamanena sakyaputtīyabhāvo sañjāyati, tasmā buddhaputtabhāvaṃ dassento “**asambhinnāya**”tiādimāha.

Alasānaṃ bhāvanāya nāmamattampi aṅānantānaṃ kāyadaḥhībahulānaṃ yāvadatthaṃ bhuñjitvā seyyasukhādiyanuyūñjanakānaṃ tiracchānagatikānaṃ puggalānaṃ dūrato vajjanā **kusītapuggalaparivajjanā**ti āha – “**kucchiṃ pūretvā ṭhitaajagarasadise**”tiādi. “Divasaṃ caṅkameṇa nisajjāya āvaraṇīyehi dhammehi cittaṃ parisodhessāmā”tiādinā bhāvanārambhavasena āradhaviṛiyānaṃ daḥaparakkamānaṃ kālena kālaṃ upasaṅkamaṇā **āradhaviṛiyapuggalasevanā**ti āha – “**āradhaviṛiye**”tiādi. **Visuddhimagge** (visuddhi. 1.64-65) pana jātimahattapaccavekkhaṇā sabrahmacāri mahattapaccavekkhaṇāti idaṃ dvayaṃ na gahitaṃ, thinamiddhavinodanāta sammappadhānapaccavekkhaṇāti idaṃ dvayaṃ gahitaṃ. Tattha ānisamsadassāvītāya eva sammappadhānapaccavekkhaṇā gahitā hoti lokiyalokuttaravisesādhigamassa vīriyāyattatādassanabhāvato, thinamiddhavinodanaṃ pana tadadhimuttatāya eva gahitaṃ hoti. Vīriyuppādane yuttappayuttassa thinamiddhavinodanaṃ atthasiddhamevāti. Tattha thinamiddhavinodanakusītapuggalaparivajjanaāradhaviṛiyapuggalasevanatadadhi-muttatāpaṭipakkhavidhamanapaccayūpasamhāravasena apāyabhayapaccavekkhaṇādayo samuttejanavasena vīriyasambojjhaṅgassa uppādakā daṭṭhabbā.

Buddhānussatiyā upacārasamādhiniṭṭhattā vuttaṃ – “**yāva upacārā**”ti. **Sakalasarīraṃ pharamā**noti pītisamuttāhānehi pañītarūpehi sakalasarīraṃ pharamāno, dhammasaṅghaguṇe anussarantassapi yāva upacārā sakalasarīraṃ pharamāno pītisambojjhaṅgo uppajjati evaṃ sesaanussatīsu, pasādanīyasuttantapaccavekkhaṇāya ca yojetabbaṃ tassāpi vimuttāyatanabhāvena taggatikkatā. **Evarūpe kāleti** “dubbhikkhabhayādīsū”ti vuttakāle. **Samāpatti...pe... na samudācarantī**ti idaṃ upasamānussatiyā vasena vuttaṃ. Saṅkhārānañhi vasena sappadesavūpasamepi nippadesavūpasame viya tathā saññāya pavattito bhāvanāmanasikāro kilesavikkhambhanasamattho hutvā upacārasamādhim āvahanto tathārūpapītisomanassasamannāgato pītisambojjhaṅgassa upādāya hotīti. Tattha “**vikkhambhitā kilesā**”ti pāṭho. **Na samudācarantī iti**-saddo kāraṇattho. Yasmā na samudācaranti, tasmā taṃ nesaṃ asamudācāraṃ paccavekkhantassāti yojanā. Na hi kilese paccavekkhantassa bojjhaṅguppatti yuttā, pasādanīyesu ṭhānesu pasādasinehābhāvena lūkhahadayatāya lūkhatā. Sā tattha ādaragāravākaraṇena viññāyatīti āha – “**asakkaccakiriyāya saṃsūcitalūkhabhāve**”ti.

Pañītabhojanasevanāti pañītasappāyabhojanasevanā. **Utuiriyāpathasukhaggahaṇa**na sappāyautuiriyāpathaggahaṇaṃ daṭṭhabbaṃ. Tañhi tividhampi sappāyaṃ sevyamānaṃ kāyassa kalyatāpādanavasena cittaṃ kalyataṃ āvahantaṃ duvidhāyapi passaddhiyā kāraṇaṃ hoti. Ahetukasattesu labbhamānaṃ sukhadukkanti ayameko anto, issarādivisamahetukanti pana ayaṃ dutiyo. Ete ubho ante anupagamma yathāsakaṃ kammunā hotīti ayaṃ majjhimā paṭipatti. Majjhato payogo yassa so majjhattapayogo, tassa bhāvo **majjhattapayogā**. Ayañhi sabhāvāsāradhātāya taṃpassaddhakāyatāya kāraṇaṃ hoti, passaddhidvayaṃ āvahati. Eteneva sāraddhakāyapuggalaparivajjanapassaddhakāyapuggalasevanānaṃ tadāvahanatā saṃvaṇṇitīti daṭṭhabbaṃ.

Vatthuisadakiriyā indriyasamattappaṭipādanā ca paññāvahā vuttā, samādhānāvahāpi tā honti. Samādhānāvahabhāveneva paññāvahabhāvato vuttaṃ – “**vatthuisadakiriyā...pe... veditabbā**”ti.

Kāraṇakosallabhāvanākosallānaṃ nānantariyabhāvato rakkhanākosallassa ca taṃmūlakatā “**nimittakusalatā nāma kaṣiṇanimitassa uggahakusalatā**”iceva vuttaṃ. **Kaṣiṇanimitassā**ti ca nidassanamattaṃ daṭṭhabbaṃ. Asubhanimittādikassapi hi yassa kassaci jhānuppattinimitassa uggahakosallaṃ nimittakusalatā evāti. **Atisithilavīriyatādīhīti ādi**-saddena paññāpayogamandataṃ payogavekallaṇa saṅgaṇhāti. **Tassa paggaṇhananti** tassa līnassa cittaṃ dhammavicayasambojjhaṅgādisamuṭṭhāpanena layāpattito samuddharaṇaṃ. Vuttañhettaṃ bhagavatā –

“Yasmiṇca kho, bhikkhave, samaye līnaṃ cittaṃ hoti, kālo tasmim samaye dhammavicayasambojjhaṅgassa bhāvanāya, kālo vīriyasambojjhaṅgassa bhāvanāya, kālo pītisambojjhaṅgassa bhāvanāya. Taṃ kissa hetu? Līnaṃ, bhikkhave, cittaṃ, taṃ etehi dhammehi susamuṭṭhāpayamaṃ hoti. Seyyathāpi, bhikkhave, puriso parittaṃ aggiṃ ujjaletukāmo assa. So tattha sukkhāni ceva tiṇāni pakkhipeyya, sukkhāni ca gomayāni pakkhipeyya, sukkhāni ca kaṭṭhāni pakkhipeyya, mukhavātaṇca dadeyya, na ca paṃsukena okireyya, bhabbo nu kho so puriso parittaṃ

aggim ujjāletunti? Evaṃ, bhante’’ti (saṃ. ni. 5.234).

Ettha ca yathāsakaṃ āhārasena dhammavicayasambojjhaṅgādīnaṃ bhāvanā samuṭṭhāpanāti veditabbā, sā anantaraṃ vibhāvītā eva.

Accāraddhavīriyatādīhīti ādi-saddena paññāpayogabalavataṃ pamoduppilāpanaṅca saṅgaṅhāti. Tassa niggaṇhananti tassa uddhatassa cittassa samādhisambojjhaṅgādisamuṭṭhāpanena uddhatāpattito nisedhanaṃ. Vuttampi cetam bhagavatā –

‘‘Yasmiṅca kho, bhikkhave, samaye uddhataṃ cittaṃ hoti, kālo tasmim samaye passaddhisambojjhaṅgassa bhāvanāya, kālo samādhisambojjhaṅgassa bhāvanāya, kālo upekkhāsambojjhaṅgassa bhāvanāya. Taṃ kissa hetu? Uddhataṃ, bhikkhave, cittaṃ, taṃ etehi dhammehi suvūpasamaṃ hoti. Seyyathāpi, bhikkhave, puriso mahantaṃ aggikkhandhaṃ nibbāpetukāmo assa, so tattha allāni ceva tiṇāni pakkhipeyya, allāni ca gomayāni nikkhipeyya, allāni ca kaṭṭhāni pakkhipeyya, mukhavātaṅca na dadeyya, paṃsukena ca okireyya, bhabbo nu kho so puriso mahantaṃ aggikkhandhaṃ nibbāpetunti? Evaṃ, bhante’’ti (saṃ. ni. 5.234).

Etthāpi yathāsakaṃ āhārasena passaddhisambojjhaṅgādīnaṃ bhāvanā samuṭṭhāpanāti veditabbā. Tattha passaddhisambojjhaṅgassa bhāvanā vuttā eva, samādhisambojjhaṅgassa vuccamānā, itarassa anantaraṃ vakkhati.

Paññāpayogamandatāyāti paññābyāpārassa appakabhāvena. Yathā hi dānaṃ alobhappadhānaṃ, sīlaṃ adosappadhānaṃ, evaṃ bhāvanā amohappadhānā. Tattha yadā paññā na balavatī hoti, tadā bhāvanā pubbenāparaṃ visesāvahā na hoti. Anabhisaṅgato viya āhāro purisassa, yogino cittassa abhiruciṃ na janeti, tena taṃ nirassādaṃ hoti. Tathā bhāvanāya sammadeva avīthipaṭipattiyā upasamasukhaṃ na vindati, tenapi cittaṃ nirassādaṃ hoti. Tena vuttaṃ – **‘‘paññāpayogamandatāyā...pe... nirassādaṃ hoti’’**ti. Tassa saṃveguppādanaṃ pasāduppādanaṅca tikicchananti taṃ dassento, **‘‘aṭṭha saṃvegavatthūnī’’**tiādimāha. Tattha jātijarābyādhimaraṅāni yathārahaṃ sugatiyaṃ duggatiyaṅca hontīti tadaññameva pañcavidhabandhanādikhuppipāsādiaññamaññaviheṭhanādihetukaṃ apāyadukkaṃ daṭṭhabbaṃ. Tayidaṃ sabbaṃ tesam tesam sattānaṃ paccuppannabhavanissitaṃ gahitanti aṭṭe anāgate ca kāle vaṭṭamūlakadukkāni viṣuṃ gahitāni. Ye pana sattā āhārūpajīvino, tattha ca uṭṭhānaphalūpajīvino, tesam aññehi asādhāraṇajīvitadukkaṃ aṭṭhamam saṃvegavatthu gahitanti daṭṭhabbaṃ. **Ayaṃ vuccati samaye sampahaṃsanatāti** ayaṃ bhāvanācittassa sampahaṃsitabbasamaye vuttanayeneva saṃvegajananavasena ceva pasāduppādanavasena ca sammadeva pahaṃsanā, saṃvegajananapubbakapasāduppādanena tosanāti attho.

Sammāpaṭipattiṃ āgammāti līnuddhaccavirahena samathavīthipaṭipattiyā ca sammā avisamaṃ sammadeva bhāvanāpaṭipattiṃ āgamma. **Alīnanti**ādisu kosajjapakkiyānaṃ dhammānaṃ anadhimmattatāya **alīnaṃ**, uddhaccapakkiyānaṃ anadhimmattatāya **anuddhataṃ**, paññāpayogasampattiyā upasamasukhādhigamena ca **anirassādaṃ**, tato eva ārammaṇe **samappavattaṃ samathavīthipaṭipannaṃ**. Alīnānuddhatāhi vā ārammaṇe **samappavattaṃ**, anirassādatāya **samathavīthipaṭipannaṃ**. Samappavattiyā vā **alīnaṃ anuddhataṃ**, samathavīthipaṭipattiyā **anirassādanti** daṭṭhabbaṃ. Tattha alīnatāya **paggahe**, anuddhatatāya **niggahe**, anirassādatāya **sampahaṃsane** na byāpāraṃ āpajjati. **Ayaṃ vuccati samaye ajjupekkhanatāti** ayaṃ ajjupekkhitabbasamaye bhāvanācittassa pagghaniggahasampahaṃsanesu byāvaṭatāsaṅkhātā paṭipakkaṃ abhibhuyya ajjupekkhanā vuccati. Paṭipakkhavikkhambhanato vipassanāya adhiṭṭhānabhāvūpagamanato ca upacārajjhānampi samādhānakiccanipphattiyā puggalassa samāhitabhāvasādhanamevāti tattha samadhurabhāvenāha – **‘‘upacāraṃ vā appanaṃ vā’’**ti. **Esa uppajjati** esa samādhisambojjhaṅgo anuppanno uppajjati.

Anurodhavirodhappahānavasena majjhatabhāvo upekkhāsambojjhaṅgassa kāraṇaṃ tasmim sati sijjhanato, asati ca asijjhanato, so ca majjhatabhāvo visayavasena duvidhoti āha – **‘‘sattamajjhattatā**

saṅkhāramajjhataṭṭā’ti. Tadubhayena ca virujjhanam passaddhisambojjhaṅgabhāvanāya eva dūrīkatanti anurujjhanasseva pahānavidhiṃ dassetuṃ – **“sattamajjhataṭṭā**’tiādi vuttaṃ. Tenāha – **“sattasaṅkhārakelāyanapuggalaparivajjanatā**’ti. Upekkhāya hi visesato rāgo paṭipakkho. Tathā cāha – **“upekkhā rāgabahulassa visuddhimaggo**’ti (visuddhi. 1.269). **Dvīhākārehīti** kammassakatāpaccavekkhaṇam, attasuññatāpaccavekkhaṇanti, imehi dvīhi kāraṇehi. **Dvīhevāti** avadhāraṇam saṅkhyāsamānatādassanattam. Saṅkhyā eva hettha samānā, na saṅkhyeyyam sabbathā samānanti. **Assāmikabhāvo** anattaniyatā. Sati hi attani tassa kiñcanabhāvena cīvaram aññaṃ vā kiñci attaniyam nāma siyā, so pana koci natthevāti adhippāyo. **Anaddhaniyanti** na addhānakkhamam, na ciratṭhāyī ittaṃ aniccanti attho. **Tāvakālikanti** tasseva vevacanam.

Mamāyatīti mamattaṃ karoti, mamāti taṇhāya pariggayha tiṭṭhati. **Dhanāyantāti** dhanam dabbam karontā.

419. Sammā dassanalakkhaṇāti sammā aviparītam aniccādivasena dassanasabhāvā. **Sammā abhiniropanalakkhaṇoti** sammadeva ārammaṇe cittassa abhiniropanasabhāvo. Caturāṅgasamannāgatā vācā janaṃ saṅgaṇhātīti tabbipakkhaviratisabhāvā sammāvācā bheda karamicchāvācāpahānena jane sampayutte ca pariggaṇhanakiccavatī hotīti **“pariggahalakkhaṇā**’ti vuttā. Viśamvādanādīkicatāya hi lūkhānam apariggāhākanam musāvādādīnam paṭipakkhabhūtā siniddhabhāvena pariggahaṇasabhāvā sammājappanakiccā sammāvācā tappaccayasubhāsitasampaṭiggāhake jane sampayuttadhamme ca pariggaṇhantī pavattatīti **pariggahalakkhaṇā**. Yathā cīvarakammādippayogasaṅkhāto kammanto kātabbam cīvararajanādīkam samuṭṭhāpeti nipphādeti, taṃtaṃkiriyaṇipphādako vā cetanāsaṅkhāto kammanto hatthacalanādīkam kiriyaṃ samuṭṭhāpeti, evam sāvajjakattabakiriyaṃsamuṭṭhāpakamicchākamantappahānena sammākammanto niravajjassa kattabbassa niravajjākārena samuṭṭhāpanakiccavā hotīti āha – **“sammāsamuṭṭhāpanalakkhaṇo**’ti. Sampayuttadhammānam vā ukkhipanam **samuṭṭhāpanam** kāyīkiriyaṃ bhārukkhipanam viya. **Sammāvodāpanalakkhaṇoti** jīvamānassa puggalassa, sampayuttadhammānam vā jīvitindriyavuttīyā, ājīvasseva vā sammadeva sodhanam vodāpanam lakkhaṇam etassāti sammāvodāpanalakkhaṇo. Atha vā kāyāvācānam khandhasantānassa ca saṃkilesabhūtamicchāājīvappahānena sammāājīvo **“vodāpanalakkhaṇo**’ti vutto. Sammāvāyāmasatisamādhīsu vattabam heṭṭhā vuttameva.

Paññāya kusalānam dhammānam pubbaṅgamabhāvato sabbepi akusalā dhammā tassā paṭipakkhāvāti vuttaṃ – **“aññehipi attano paccanīkilesehi saddhi**’nti. Atha vā **attano paccanīkilesā** diṭṭhekaṭṭhā avijjādayo paññāya ujupaccanīkabhāvato. **Passatīti** passantī viya hoti vibandhābhāvato. Tenāha – **“tappaṭicchādaka...pe... asammohato**’ti. Sammāsaṅkappādīnam micchāsaṅkappādayo ujuvipaccanīkāti āha – **“sammāsaṅkappādayo...pe... pajahantī**’ti. **Tathevāti** iminā attano paccanīkilesehi saddhinti imamattham anukaḍḍhati. **Visesatoti** sammādiṭṭhiyā vuttakiccato visesena. **Etthāti** etesu sammāsaṅkappādīsu.

Esā sammādiṭṭhi nāmāti lokiyaṃ lokuttaraṅga ekajjham katvā vadati missakatābhāvato. Tenāha – **“pubbabhāge**’tiādi. **Ekārammaṇā** nibbānārammaṇattā. **Kiccatotī** pubbabhāge dukkhādīhi ñāṇehi kātabbakiccassa idha nipphattito, imasseva vā ñāṇassa dukkhādippakāsanakiccato. **Cattāri nāmāni labhati** dukkhaparīññādicatukiccāsāadhanato. **Tīṇi nāmāni labhati** kāmasaṅkappādippahānakiccanipphattito. **Sikkhāpadavibhaṅge** (vibha. 703 ādayo) **“viraticetanā taṃsampayuttā ca dhammā sikkhāpadāntī**’ti vuttāni, tattha padhānānam viraticetanānam vasena **“viratīyopi hontī cetanādayopi**’ti āha. **“Sammā vadati etāyā**’tiādinā atthasambhavato **sammāvācādayo tayo viratīyopi hontī cetanādayopi**. Musāvādādīhi viramaṇakāle viratīyo, subhāsītādivācābhāsanādīkāle cetanādayo yojetabbā. **Maggakkhaṇe pana viratīyova** maggalakkhaṇappattito. Na hi cetanā niyyānasabhāvā. Atha vā ekassa ñāṇassa dukkhādīññatā viya ekāya viratīyā musāvādādiviratībhāvo viya ca ekāya cetanāya sammāvācādīkiccattayasādhanasabhāvā sammāvācādībhāvāsiddhito **“maggakkhaṇe viratīyovā**’ti vuttaṃ.

Cattāri nāmāni labhatīti catusammappadhānacatusatipatṭhānavasena labhati. Maggakkhaṇeti ānetvā sambandho. **Pubbabhāgepi maggakkhaṇepi sammāsamādhi evāti** yadipi samādhiupakāraṇam

abhiniropanānumajjanasampiyāyanabrūhanasantasukhānaṃ vitakkādīnaṃ vasena catūhi jhānehi sammāsamādhi vibhatto, tathāpi vāyāmo viya anuppannākusalānuppādanādicatuvāyāmakiccaṃ, sati viya ca asubhāsukhāniccānattesu kāyādīsu subhādīsaññāpāhānalakkhaṇaṃ catusatikiccaṃ, eko samādhi catujjhānasamādhikiccaṃ na sādhetīti pubbhāgepi paṭhamajjhānasamādhi, paṭhamajjhānasamādhi eva maggakkhaṇepi, tathā pubbhāgepi catutthajjhānasamādhi, catutthajjhānasamādhi eva maggakkhaṇepīti attho.

“Kiṃ panāyaṃ maggadhammānaṃ desanānukkamo, kevalaṃ vācāya kamavattinibhāvato, udāhu kañci visesaṃ upādāyā”ti vicāraṇāyaṃ kañci visesaṃ upādāyāti dassento āha – “**imesū**”tiādi. Tattha bhāvanānubhāvā hitaphalāya sātisayaṃ tikkhavisadabhāvappattiyā acchariyabbhutasamatthāyogena sabbaso paṭipakkhavidhāmanena yāthāvato dhammasabhāvabodhanena ca sammādiṭṭhiyā bahukārātā vedītabbā. Tenāha – “**ayaṃ hī**”tiādi.

Tassāti sammādiṭṭhiyā. Bahukāroti dhammasamapaṭivedhe bahūpakāro. Idāni tamatthaṃ upamāhi vibhāvetuṃ, “**yathā hī**”tiādi vuttaṃ.

Vacībhedassa kārako vitakko sāvajjānavajjavacībhedanivattanappavattanākārāya sammāvācāyapi upakārako evāti āha – “**svāyaṃ...pe... sammāvācāyapi upakārako**”ti. Sammāsaṅkappo hi saccavācāya virativācāyapi visesapaccayo micchāsaṅkappatadekatṭhakilesappahānato.

Samvidahitvātiādīsu sammā vidahanaṃ kammantappayojanañca ekantānavajjavacīkāyakkammavasena icchitabbanti virativācāvasena saṃvidahanaṃ viratikammantasseva payojanañca nidassitanti daṭṭhabbaṃ. Evaṃ hissa sammāvācāya sammākammantassāpi bahukārātā jotitā siyā. Vacībhedanīyamikā hi vacīduccaritavirati kāyikakiriyanīyamikāya kāyaduccaritaviratiyā upakārikā. Tathā hi viṣaṃvādanādīmicchāvācato avirato micchākammantatopi na viramateva. Yathāha – “**ekaṃ dhammaṃ atītassa...pe... natthi pāpaṃ akāriya**”nti. Tasmā avisaṃvādanādisammāvācāya ṭhito sammākammantampi pūreṭiyevāti vacīduccaritavirati kāyaduccaritaviratiyā upakārikā.

Yasmā ājīvapārisuddhi nāma dussīlyappahānapubbikā, tasmā sammāvācākammantānantaraṃ sammāājīvo desitoti dassetuṃ – “**catubbidhaṃ panā**”tiādi vuttaṃ. **Ettāvatāti** parisuddhasīlājīvikāmattena. **Idaṃ vīriyanti** catusammappadhānavīriyaṃ.

Vīriyārambhopi sammāsati pariggahito eva nibbānavaho, na kevaloti dassetuṃ – “**tato**”tiādi vuttaṃ. **Sūpaṭṭhitāti** bahiddhāvikkhepaṃ pahāya suṭṭhu upaṭṭhitā kātābbā. **Samādhissa upakāradhammā** nāma yathāvuttavattuvisadakiriyaḍayo. Tappaṭipakkhato **anupakāradhammā** vedītabbā. **Gatīyoti** nipphattīyo. **Samanvesitvāti** sammā pariyesitvā.

427. Yathā itthīsu kathā pavattā adhiṭṭhīti vuccati, evaṃ attānaṃ adhikicca pavattā **ajjhattaṃ**. “Evaṃ pavattamānā mayāṃ ‘attā’ti gahaṇaṃ gamissāmā”ti iminā viya adhippāyena attānaṃ adhikicca uddissa pavattā sattasantati pariyaṇāpanā ajjhattaṃ. Tasmīṃ **ajjhatarūpe**, attano kesādivatthuke kaṣiṇarūpeti attho. **Parikkammavasena ajjhattaṃ rūpasāññīti** parikkammakaraṇavasena ajjhattaṃ rūpasāññī, na appanāvasena. Na hi paṭibhāganīmittārammaṇā appanā ajjhattavisayā sambhavati. Taṃ pana ajjhattaṃ parikkammavasena laddhaṃ kaṣiṇanimittaṃ avisuddhameva hoti, na bahiddhā parikkammavasena laddhaṃ viya visuddhaṃ. Tenāha – “**taṃ panā**”tiādi.

Yassevaṃ parikkammaṃ ajjhattaṃ uppananti yassa puggalassa evaṃ vuttappakārena ajjhattaṃ parikkammaṃ jātaṃ. **Nimittaṃ pana bahiddhāti** paṭibhāganīmittaṃ sasantati pariyaṇāpanaṃ na hoṭīti bahiddhā. **Parittānīti** yathā laddhāni suppasarāvamattāni. Tenāha – “**avaḍḍhitāni**”ti. **Parittavasenevāti** vaṇṇavasena ābhoge vijjānānēpi parittavaseneva idaṃ abhibhāyatanaṃ vuttaṃ parittatā hettha abhibhavanassa kāraṇaṃ. Vaṇṇābhoge satipi asatipi abhibhavaṭīti abhibhu, parikkammaṃ, ñāṇaṃ vā. Abhibhu āyatanaṃ etassāti **abhibhāyatanaṃ**, jhānaṃ. Abhibhavītabbaṃ vā ārammaṇasaṅkhātaṃ āyatanaṃ etassāti **abhibhāyatanaṃ**. Atha vā ārammaṇābhibhavanato abhibhu ca taṃ āyatanañca yogino

sukhavisesānaṃ adhiṭṭhānabhāvato manāyatanadhammāyatanabhāvato cāti sasampayuttajjhānaṃ **abhibhāyatanam**. Abhibhāyatanabhāvanā nāma tikkhapaññasēva sambhavati, na itarassāti āha – “**ñāṇuttariko puggalo**”ti. **Abhibhavitvā samāpajjati** ettha abhibhavanaṃ samāpajjanañca upacārajjhānādhiḡamanasamanantaramēva appanājhānuppādananti āha – “**saha nimittuppādenēvettha appanam pāpeti**”ti. **Saha nimittuppādenāti** ca appanāparivāsābhāvassa lakkhaṇavacanametam. Yo khippābhīṇoti vuccati, tatopi ñāṇuttarasseva abhibhāyatanabhāvanā. **Etthāti** etasmiṃ nimitte. **Appanam pāpeti**ti bhāvanāppanam neti.

Ettha ca keci “uppanne upacārajjhāne taṃ ārabba ye heṭṭhimantena dve tayo javanavārā pavattanti, te upacārajjhānapakkhikā eva, tadanantaram bhavaṅgaparivāsena upacārasevanāya ca vinā appanā hoti, saha nimittuppādenēva appanam pāpeti”ti vadanti, taṃ tesam matimattam. Na hi pārivāsikaparikammaena appanāvāro icchito, nāpi mahaggaṭappamāṇajjhānesu viya upacārajjhāne ekantato paccavekkhaṇā icchitabbā. Tasmā upacārajjhānādhiḡamato param katipayabhavaṅgacittāvasāne appanam pāpuṇanto “**saha nimittuppādenēvettha appanam pāpeti**”ti vutto. **Saha nimittuppādenāti** ca adhippāyikamidaṃ vacanam, na nītattham, tatha adhippāyo vuttanayeneva veditabbo. **Na antosamāpattiyam** tadā tathārūpassa ābhogassa asambhavato. **Samāpattito vuṭṭhitassa ābhogo** pubbabhāgabhāvanāvasena jhānakkhaṇe pavattam abhibhavanākāram gahetvā pavattoti daṭṭhabbam. Abhidhammaṭṭhakathāyaṃ pana “imināssa pubbābhogo kathito”ti vuttam. Antosamāpattiyam tadā tathā ābhogābhāve kasmā jhānasaññāyapīti vuttanti āha – “**abhibhavaśaṇṇā hissa antosamāpattiyampi atthi**”ti.

Vaḍḍhitappamāṇānīti vipulappamāṇānīti attho, na ekaṅguladvaṅgulādivaḍḍhiṃ pāpitāni tathā vaḍḍhanassevettha asambhavato. Tenāha – “**mahantāni**”ti. **Bhattavaḍḍhitakanti** bhuñjanabhājane vaḍḍhetvā dinnam bhattam, ekāsane purisena bhuñjitabbhattato upaḍḍhabhattanti attho.

Rūpe saññā rūpasaññā, sā assa atthīti rūpasaññī, na rūpasaññī **arūpasaññī**. Saññāsīsena jhānam vadati. Rūpasaññāya anuppādanamevettha **alābhita**. **Bahiddhāva uppananti** bahiddhāvatthusmiṃyeva uppannam. Ettha ca –

“Ajjhattam rūpasaññī bahiddhā rūpāni passati parittāni suvaṇṇadubbaṇṇāni. Ajjhataṃ rūpasaññī bahiddhā rūpāni passati appamāṇāni suvaṇṇadubbaṇṇāni. Ajjhataṃ arūpasaññī bahiddhā rūpāni passati parittāni suvaṇṇadubbaṇṇāni. Ajjhataṃ arūpasaññī bahiddhā rūpāni passati appamāṇāni suvaṇṇadubbaṇṇāni”ti (dī. ni. 3.338, 358; a. ni. 8.65; 10.29) –

Evamidha cattāri abhibhāyatanāni āgatāni. **Abhidhamme** (dha. sa. 244-245) pana “ajjhataṃ arūpasaññī bahiddhā rūpāni passati parittāni suvaṇṇadubbaṇṇāni, appamāṇāni suvaṇṇadubbaṇṇāni”ti evamāgatāni. Tatha ca kāraṇam abhidhammaṭṭhakathāyaṃ vuttameva. Tathā hi vuttam aṭṭhasālīniyaṃ (dha. sa. aṭṭha. 204) –

“Kasmā pana yathā suttante ‘ajjhataṃ rūpasaññī eko bahiddhā rūpāni passati parittāni’tiādi vuttam, evaṃ avatvā idha catūsūpi abhibhāyatanesu ajjhataṃ arūpasaññītāva vuttāti. Ajjhatarūpānam anabhibhavanīyato. Tatha vā hi idha vā bahiddhā rūpāneva abhibhavitabbāni, tasmā tāni niyamato vattabbāni”ti.

Tatrāpi idhapi vuttāni “ajjhataṃ rūpasaññī ajjhataṃ arūpasaññīti idaṃ pana satthu desanāvilāsamattamevā”ti. Ayaṃ panettha adhippāyo – idha vaṇṇābhogarahitāni sahitāni ca sabbāni parittāni suvaṇṇadubbaṇṇāni abhibhuyyāti. Pariyāyakathā hi suttantadesanāti. Abhidhamme pana nippariyāyadesanattā vaṇṇābhogarahitāni visuṃ vuttāni, tathā sahitāni. Atthi hi ubhayattha abhibhavanavisesoti. Tathā idha pariyāyadesanattā vimokkhānampi abhibhavanapariyāyo atthīti “ajjhataṃ rūpasaññī”tiādinā paṭhamadutiyaabhibhāyatanesu paṭhamavimokkho, tatiyacatutthaabhibhāyatanesu dutiyavimokkho, vaṇṇābhībhāyatanesu tatiyavimokkho ca abhibhavanapattito saṅgahito. Abhidhamme pana nippariyāyadesanattā vimokkhābhībhāyatanāni asaṅkarato desetum vimokkhe vajjetvā abhibhāyatanāni kathitāni. Sabbāni ca vimokkhakiccāni jhānāni vimokkhadesanāyaṃ vuttāni. Tadetam

“ajjhattaṃ rūpasaññī”ti āgatassa abhibhāyatanadvayassa abhidhamme abhibhāyatanesu avacanato “rūpī rūpāni passatī”tiādīnañca sabbavimokkhakiccāsādhāraṇavacanabhāvato vavatthānaṃ katanti viññāyati.

Ajjhattarūpānaṃ anabhibhavanīyatoti idaṃ abhidhamme katthacipi “ajjhattarūpāni passatī”ti avatvā sabbattha yaṃ vuttaṃ – “bahiddhā rūpāni passatī”ti, tassa kāraṇavacanāṃ. Tena yaṃ aññahetukaṃ suttante “bahiddhā rūpāni passatī”ti vacanaṃ, taṃ tena hetunā vuttaṃ. Yaṃ pana desanāvīlāsahetukaṃ ajjhattaṃ arūpasaññītāya eva abhidhamme vacanaṃ, na tassa aññaṃ kāraṇaṃ maggitabbanti dasseti. Ajjhattarūpānaṃ anabhibhavanīyatā ca tesāṃ bahiddhārūpānaṃ viya avibhūtattā. Desanāvīlāso ca yathāvuttavavatthānavasena vedittabbo veneyyajjhāsayasasena vijjamānapariyāyakathanabhāvato. Desanāvīlāso hi nāma veneyyajjhāsayanurūpaṃ vijjamānassa ca pariyaṃyassa vibhavanaṃ, na yassa kassaci, tasmā “idha pariyaṃyadesanattā”tiādīnā vuttappakāraṃ vavatthānaṃ desanāvīlāsanibandhananti daṭṭhabbaṃ.

Suvaṇṇadubbaṇṇānīti eteneva siddhattā na nīlādiabhibhāyatanāni vattabbānīti ce? Na nīlādīsu katādhikāraṇaṃ nīlādibhāvasseva abhibhavanakāraṇattā. Na hi tesāṃ parisuddhāparisuddhavaṇṇānaṃ parittatā appamāṇatā vā abhibhavanakāraṇaṃ, atha kho nīlādibhāvo evāti. Etesu ca parittādikaṣiṇarūpesu yaṃyaṃcaritassa imāni abhibhāyatanāni ijjhanti, taṃ dassetuṃ – “imesu panā”tiādī vuttaṃ.

Sabbasaṅgāhikavasenati nīlavaṇṇanīlanidassananīlanibhāsānaṃ sādharmaṇavasena. **Vaṇṇavasena**ti sabhāvavaṇṇavasena. **Nidassanavasena**ti passitabbatāvasena, cakkhuvīññānavīthiyā gahetabbatāvasena. **Obhāsavasena**ti sappabhāsātāya avabhāsanasena. **Vaṇṇadhātuyā vāti** añjanarajatavatthādivaṇṇadhātuyā. **Lokiyāneva** rūpāvacarajjhānabhāvato.

435. Rūpīti ettha yenāyaṃ sasantatipariyāpanna rūpena samannāgato, taṃ yassa jhānassa hetubhāvena viṣiṭṭharūpaṃ hoti. Yena viṣiṭṭhena rūpīti vucceyya, tadeva sasantatipariyāpannarūpanimittaṃ jhānaṃ. Idha pana paramatthato rūpibhāvasādhakanti āha – “ajjhattaṃ kesādīsū”tiādī. **Rūpajjhānaṃ rūpanti** uttarapadalopena vuttaṃ – “rūpūpapattiyā”tiādīsū (dha. sa. 160-161, 185-190 ādayo, 244-245 ādayo; vibha. 625) viya.

Subhantveva adhimutto hotīti ayaṃ tatiyavimokkho. Idha suparisuddhanīlādivaṇṇakasiṇajjhānavasena vuttoti dassetvā idāni paṭisambhidāpāliyaṃ tassa brahmavihārajjhānavasena āgatabhāvaṃ dassetuṃ – “paṭisambhidāmagge panā”tiādī āradhamaṃ. Idha pana uparipāliyaṃyeva brahmavihārānaṃ āgatattā taṃ nayaṃ paṭikkhipitvā parisuddhanīlādivaṇṇakasiṇavaseneva subhavamokkho anuññāto.

443. Parikammapathaviyāpīti akatāya vā katāya vā daḷhamaṇḍalādīsaṅkhātaparikamma pathaviyāpi. Uggahanimittādīnaṃ pathavīkasiṇanti nāmaṃ nissite nissayaavohārasena vuttanti daṭṭhabbaṃ, yathā “mañcā ukkuṭṭhiṃ karontī”ti.

Sīlānīti pātimokkhasaṃvarādīni cattāri sīlāni. **Sodhetvāti** anāpajjanena āpannavuṭṭhāpanena kilesehi appaṭipīlanena ca visodhetvā. Tividhañhi sīlassa visodhanaṃ nāma – anāpajjanaṃ āpannavuṭṭhāpanaṃ kilesehi ca appaṭipīlananti. Kammatthānabhāvanaṃ paribundheti uparodheti pavattituṃ na detīti **palibodho** rakārassa lakāraṃ katvā, paribandhoti attho. **Upacchinditvāti** samāpanna saṅgāhaṇena vā uparundhitvā, apalibodhaṃ katvāti attho. **Kalyāṇamittaṃ upasaṅkamitvāti** –

“Piyo garu bhāvanīyo, vattā ca vacanakkhāmo;
Gambhīrañca kathaṃ kattā, no caṭṭhāne niyojako”ti. (a. ni. 7.37) –

Evamādiguṇasamannāgataṃ ekantahitesiṃ vuddhipakkhe ṭhitāṃ kalyāṇamittaṃ upasaṅkamitvā.

Ananurūpaṃ vihārenti aṭṭhārasannaṃ dosānaṃ aññatarena samannāgataṃ. Vuttañhetāṃ

aṭṭhakathāsu –

‘‘Mahāvāsaṃ navāvāsaṃ, jarāvāsañca panthanim;
Soṇḍim paṇṇañca pupphañca, phalaṃ patthitameva ca.

‘‘Nagaraṃ dārunā khettaṃ, visabhāgena paṭṭanaṃ;
Paccantasīmā sappāyaṃ, yatha mitto na labbhati.

‘‘Aṭṭhāresetāni ṭhānāni, iti viññāya paṇḍito;
Ārakā parivajjeyya, maggaṃ sappaṭibhayaṃ yathā’’ti. (visuddhi. 1.52);

Anurūpeti gocaragāmato nātidūranaccāsannatādīhi pañcahi aṅgehi samannāgate. Vuttañhettaṃ bhagavatā –

‘‘Kathañca, bhikkhave, senāsanaṃ pañcaṅgasamannāgataṃ hoti? Idha, bhikkhave, senāsanaṃ nātidūraṃ hoti naccāsannaṃ gamanāgamanasampannaṃ divā appākiṇṇaṃ rattiṃ appasaddaṃ appanigghosaṃ appaḍaṃsamakasaṃvātātapasaṃsapasamphassaṃ. Tasmim kho pana senāsane viharantassa appakasirena uppajjanti cīvarapaṇḍapātasenaṃsanagilānapaccayabhesajjaparikkhārā. Tasmim kho pana senāsane therā bhikkhū viharanti bahussutā āgatāgamā dhammadharā vinayadharā mātīkādharā. Te kālena kālaṃ upasaṅkamitvā paripucchati paripaṇḥati ‘idaṃ, bhante, kathaṃ imassa ko attho’ti. Tassa te āyasmanto avivaṭaṇṇeṃva vivaranti, anuttānīkathañca uttāniṃ karonti, anekavihitesu ca kaṅkhāṭṭhāniyesu dhammesu kaṅkhaṃ paṭivinodenti. Evaṃ kho, bhikkhave, senāsanaṃ pañcaṅgasamannāgataṃ hoti’’ti (a. ni. 10.11).

Ettha ca nātidūraṃ naccāsannaṃ gamanāgamanasampannanti ekaṃ aṅgaṃ, divā appākiṇṇaṃ rattiṃ appasaddaṃ appanigghosanti ekaṃ, appaḍaṃsamakasaṃvātātapasaṃsapasamphassanti ekaṃ, tasmim kho pana senāsane viharantassa...pe... parikkhārāti ekaṃ, tasmim kho pana senāsane therā...pe... kaṅkhaṃ paṭivinodentīti ekanti evaṃ pañcaṅgaṇi veditabbāni.

Khuddakapalibodhaṃ upacchinditvā dīghakesanakhalomānaṃ chedanena cīvarakamma cīvararajanapattapacanamañcapīṭhādīsodhanavasena khuddakapalibodhaṃ upacchinditvā.

453. Uddhumātakādīsūti ettha ādi-saddena

vinīlakavipubbakavicchiddakavikkhāyitakahatavikkhittakalohitakapuḷavakaṭṭhikānaṃ saṅgaho daṭṭhabbo. Tattha bhasā viya vāyunā uddhaṃ jīvitapariyādānā yathānukkamaṃ samuggatena sūnabhāvena dhumātattā uddhumātaṃ, uddhumātameva **uddhumātakam**, paṭikūlattā vā kucchitaṃ uddhumātanti **uddhumātakam**, tathārūpassa chavasārīrassetaṃ adhivacanaṃ. Vinīlaṃ vuccati viparibhinnanīlavanṇaṃ, vinīlameva **vinīlakam**, paṭikūlattā vā kucchitaṃ vinīlanti **vinīlakam**, maṃsussadaṭṭhānesu rattavaṇṇassa, pubbasannicayaṭṭhānesu setavaṇṇassa, yebhuyyena ca nīlavanṇassa nilaṭṭhāne nīlasāṭakapārutasseva chavasārīrassetaṃ adhivacanaṃ. Paribhinnaṭṭhānesu vissandamānapubbaṃ vipubbaṃ, vipubbameva **vipubbakam**, paṭikūlattā vā kucchitaṃ vipubbanti **vipubbakam**, tathārūpassa chavasārīrassetaṃ adhivacanaṃ. Vicchiddaṃ vuccati dvidhā chindanena apadhāritam, vicchiddameva **vicchiddakam**, paṭikūlattā vā kucchitaṃ vicchiddanti **vicchiddakam**, vemajjhe chinnassa chavasārīrassetaṃ adhivacanaṃ. Ito ca etto ca vividhākārena soṇasiṅgālādīhi khāyitaṃ vikkhāyitaṃ, vikkhāyitameva **vikkhāyitakam**, paṭikūlattā vā kucchitaṃ vikkhāyitanti **vikkhāyitakam**, tathārūpassa chavasārīrassetaṃ adhivacanaṃ.

Vividhā khittaṃ vikkhittaṃ, vikkhittameva **vikkhittakam**, paṭikūlattā vā kucchitaṃ vikkhittanti **vikkhittakam**, aññena hatthaṃ, aññena pādaṃ, aññena sīsanti evaṃ tato tato vikkhittassa chavasārīrassetaṃ adhivacanaṃ. Hatañca taṃ purimanayeneva vikkhittakañcāti **hatavikkhittakam**, kākapadākārena aṅgapaccaṅgesu satthena hanitvā vuttanayeneva vikkhittassa chavasārīrassetaṃ adhivacanaṃ. Lohitaṃ kirati vikkhipati ito cito ca paggharatīti **lohitakam**, paggharitalohitamakkhitassa chavasārīrassetaṃ adhivacanaṃ. Puḷavā vuccanti kimayo, puḷave kiratīti **puḷavakam**, kimiparipuṇṇassa

chavasarīrassetaṃ adhivacanaṃ. Aṭṭhiyeva **aṭṭhikaṃ**, paṭikūlattā vā kucchitaṃ aṭṭhīti **aṭṭhikaṃ**, aṭṭhisāṅkhalikāyapi ekaṭṭhikassapi etaṃ adhivacanaṃ. Imesu dasasu asubhesu paṭhamajjhānameva uppajjati, na dutiyādīni. Tenāha – idha “**paṭhamajjhānasahagatā saññā**”ti. Tathā hi aparisaṅghitajalāya sīghasotāya nadiyā arittabaleneva nāvā tiṭṭhati, vinā arittena na sakkā ṭhapetuṃ. Evamevaṃ dubbalattā ārammaṇassa vitakkabaleneva cittaṃ ekaggaṃ hutvā tiṭṭhati, vinā vitakkena na sakkā ṭhapetuṃ. Tasmā paṭhamajjhānamevettha hoti, na dutiyādīni. Ārammaṇassa dubbalatā cettha paṭikūlabhāvena cittaṃ ṭhapetuṃ asamattatā.

“Rukkho mato, lohaṃ mata”ntiādīsu yaṃ khandhappabandhaṃ upādāya rukkhādisamaññā, tasmim̐ anupacchinnepi allatādivigamaṇaṃ nissāya matavohāro **sammutimaraṇaṃ**. Saṅkhārānaṃ khaṇabhaṅgasāṅkhātāṃ **khaṇikamaraṇaṃ**. **Samucchedamaraṇanti** arahato santānassa sabbaso ucchedabhūtaṃ maraṇaṃ. Vipassanābhāvanāvasena cetāṃ vuttaṃ. Maraṇānussatibhāvanāyaṃ pana tividhampetaṃ nādhippetāṃ asaṃvegavatthuto anupaṭṭhahanato abāhullato ca. Maraṇānussatiyañhi ekena bhavena paricchinnassa jīvitindriyappabandhassa vicchedo maraṇanti adhippeto saṃvegavatthuto upaṭṭhahanato bāhullato ca. Idāni imameva maraṇaṃ sandhāya vikappantaraṃ dassento, “**heṭṭhā vuttalakkhaṇā vā**”tiādīmāha.

Asitapītādibhedeti asitapītakhāyitasāyitappabhede, asitabbakhāditabbasāyitabbavibhāgeti attho kālabhedavacanicchāya abhāvato yathā “duddha”nti. Kabaḷaṃ karīyatīti kabaḷikāro, āharīyatīti āhāro, kabaḷikāro ca so āhāro cāti **kabaḷikārāhāro**. Vatthivasena cetāṃ vuttaṃ. Savatthuko eva hi āhāro idha kammaṭṭhānabhāvena adhippeto. Ojālakkhaṇo pana āhāro ojaṭṭhamakaṃ rūpaṃ āharatīti āhāroti vuccati. So idha nādhippeto paṭikūlakāraggaṇassa asambhavato. **Nava paṭikūlanīti** gamanapariyesanaparibhogāsayanidānaaparipakkaparipakkaphalanissandappaṭikūlavasena nava paṭikūlanī. Samakkhanappaṭikūlaṃ pana paribhogādīsu labbhamānattā idha visuṃ na gahitaṃ, aññathā tena saddhiṃ “dasa paṭikūlanī”ti vattabbaṃ. **Visuddhimagge** (visuddhi. 1.303-304) pana samakkhanaṃ paribhogādīsu labbhamānampi nissandavasena visesato paṭikūlanti visuṃ gahetvā dasahākārehi paṭikūlatā vuttā.

Uppajjanakasaññanti paṭikūlakāraggaṇavasena uppajjanakasaññaṃ. Saññāsaddo cāyaṃ “rūpasaññā saddasaññā”tiādīsu (saṃ. ni. 3.57) saññānalakkhaṇe dhamme āgato, “aniccasaññā dukkhasaññā”tiādīsu vipassanāya āgato, “uddhumātakasaññāti vā sopākarūpasaññāti vā ime dhammā ekaṭṭhā, udāhu nānaṭṭhā”tiādīsu samathe āgato. Idha pana samathassa parikamme daṭṭhabbo. Āhārehi paṭikūlakāraggaṇaṃ, tappabhāvitaṃ vā upacārajjhānaṃ idha “āhāre paṭikūlasaññā”ti adhippetāṃ.

Ukkaṅghitasaññanti nibbindanākārena uppajjanakasaññaṃ. **Aniccasaññanti** ettha aniccaṃ khandhapañcakaṃ uppādavayaññathattabhāvato, hutvā abhāvato vā, tasmim̐ anicce khandhapañcake aniccanti uppajjamānā aniccalakkhaṇapariggāhikā saññā aniccasaññā. Tenāha – “**pañcannaṃ upādānakkhandhāna**”ntiādi. Tattha **udayo** nibbattilakkhaṇaṃ, **vayo** vipariṇāmalakkhaṇaṃ, **aññathattaṃ** jarā. Udayabbayaññathattaggaṇena aniccalakkhaṇaṃ dasseti. Uppādavayaññathattabhāvato hi khandhapañcakaṃ aniccanti vuccati. Yassa ca sabhāvena khandhapañcakaṃ aniccanti vuccati, taṃ **aniccalakkhaṇaṃ**. Tena hi taṃ aniccanti lakkhīyati, aniccalakkhaṇaṇca udayabbayaṇaṃ amanasikārā santatiyā paṭicchannattā na upaṭṭhāti, udayabbayaṃ pana pariggahetvā santatiyā vikopitāya aniccalakkhaṇaṃ yāthāvasarasato upaṭṭhāti. Na hi sammadeva udayabbayaṃ sallakkhentassa pubbāpariyena pavattamānaṃ dhammānaṃ aññoññabhāvaṃ sallakkhaṇena santatiyā ugghāṭitāya dhammā sambandhabhāvena upaṭṭhahanti, atha kho ayosalākā viya asambandhabhāvenāti sutṭhutaraṃ aniccalakkhaṇaṃ pākātaṃ hoti.

“Yadaniccaṃ, taṃ dukkha”nti (saṃ. ni. 3.15, 45, 46, 76, 77, 85; 2.4.1, 4) vacanato tadeva khandhapañcakaṃ abhiṅghappaṭipīlanato dukkhaṃ, abhiṅghappaṭipīlanākāro pana dukkhalakkhaṇaṃ. Tenevāha – “**anicce khandhapañcake...pe... saññaṃ bhāveti**”ti. Tattha paṭipīlanaṃ nāma yathāpariggahitaṃ udayavayavasena saṅkhārānaṃ nirantaraṃ paṭipīliyamānatā vibādhiyamānatā. Dukkhalakkhaṇaṇca abhiṅghasampaṭipīlanassa amanasikārā iriyāpathehi paṭicchannattā na upaṭṭhāti, abhiṅghasampaṭipīlanaṃ pana manasī karitvā iriyāpathe labbhamānadukkhaṇapaṭicchādakabhāve ugghāṭite dukkhalakkhaṇaṃ yāthāvasarasato upaṭṭhāti. Tathā hi iriyāpathehi paṭicchannattā dukkhalakkhaṇaṃ na

upaṭṭhāti, te ca iriyāpathā abhiñhasampaññānaṃ manasikārena paṭicchādakā jātā. Ekasmiñhi iriyāpathe uppannaṃ dukkhassa vinodakaṃ iriyāpathantaraṃ tassa paṭicchādakaṃ viya hoti, evaṃ sesāpi. Iriyāpathānaṃ pana taṃtaṃdukkhapatitākārabhāve yāthāvato ñāte tesaṃ dukkhappaṭicchādakabhāvo ugghāṭito nāma hoti saṅkhārānaṃ nīrantaraṃ dukkhābhīnunnatāya pākāṭabhāvato. Tasmā abhiñhasampaññānaṃ manasi karitvā iriyāpathe labbhamānadukkhappaṭicchādakabhāve ugghāṭite dukkhalakkhaṇaṃ yāthāvasarasato upaṭṭhāti.

“Yaṃ dukkhaṃ, tadanattā”ti vacanato tadeva khandhapañcakaṃ avasavattanato anattā, avasavattanākāro pana anattalakkhaṇaṃ. Tenāha – “**paṭipīḷanaṭṭhena**”tiādi. Anattalakkhaṇaṃ nānādhātuviniḃbhogassa amanasikārā ghanena paṭicchannattā na upaṭṭhāti, nānādhātuyo pana viniḃbhujitvā “aññā pathavīdhātu, aññā āpodhātu”tiādinā, “aññā phasso, aññā vedanā”tiādinā ca visuṃ visuṃ katvā ghanaviniḃbhoge kate samūhaghane kiccārammaṇaghane ca bhedite anattalakkhaṇaṃ yāthāvasarasato upaṭṭhāti. Yā hesā aññamaññūpatthambhesu samuditesu rūpārūpadhammesu ekattābhīnivesavasena aparimadditasāṅkhārehi mamāyamānā samūhaghanatā, tathā tesaṃ tesaṃ dhammānaṃ kiccabhedassa satipi paṭinīyatabhāve ekato gayhamānā kiccaghanatā, tathā sārammaṇadhammānaṃ satipi ārammaṇakaraṇabhede ekato gayhamānā ārammaṇaghanatā. Sā catūsu dhātūsu ñāṇena viniḃbhujitvā dissamānāsu hatthena parimaddiyamāno pheṇapiṇḍo viya vilīnaṃ āgacchati, yathāpaccayaṃ pavattamānā suññā ete dhammamattāti avasavattanākārasāṅkhātānaṃ anattalakkhaṇaṃ pākāṭataraṃ hoti.

Aparaaccharāsaṅghātavaggaṇṇanā niṭṭhitā.

19. Kāyagatāsativaggaṇṇanā

563. Cetasā phuṭoti cittena pharito. Cittena pharaṇaṃca samuddassa dvidhā sambhavatīti āha – “**duvidhaṃ pharaṇa**”ntiādi. **Purimena atthenāti** “sampayogavasena vijjā bhajantī”ti vuttana atthena. **Paccimena**ti “vijjābhāge vijjākoṭṭhāse vattantī”ti vuttana.

564. Mahato saṃvegāya saṃvattatītiādisu ayaṃ pana aparo nayo. Yāthāvato kāyasabhāvappavedanato mahato saṃvegāya saṃvattatī. **Atthāyāti** diṭṭhadhammikādiatthāya. **Yogakkhemāyāti** catūhi yogehi khemabhāvāya. **Satisampajaññāyāti** sabbattha satiavippavāsāya sattaṭṭhānīyasampajaññāya ca. **Ñānadassanappaṭilābhāyāti** vipassanāññādhigamāya. **Vijjāvimutti phalasaṃcchikiriyāyāti** tisso vijjā cittassa adhimutti nibbānaṃ cattāri sāmāññaphalānīti etesaṃ paccakkhakarāṇāya.

584. Paññāpaṭilābhāyātiādisu soḷasasu padesu paññāpaṭilābhāya paññāvuddhiyā paññāvepullāya paññābhāhullāyāti imāni cattāri paññāvasena bhāvavacanāni, sesāni dvādasa puggalavasena bhāvavacanāni. **Sappurisaṃsevoti** sappurisaṇaṃ bhajanaṃ. **Saddhammassavananti** tesaṃ sappurisaṇaṃ santike silādippaṭipattidīpakassa saddhammavacanassa savanaṃ. **Yoniso manasikāroti** sutānaṃ dhammānaṃ atthūparikkhāvasena upāyena manasikāro. **Dhammānudhammappaṭipattīti** lokuttaradhamme anugataṃ silādippaṭipadādhammassa paṭipajjanaṃ.

Channaṃ abhiññāñānanti

iddhividhadibbasotacetopariyapubbenivāsadibbacakkhuāsavakkhayaññānaṃ. **Tesattatīnaṃ ñāṇānanti** **paṭisambhidāpāḷiyam** (paṭi. ma. 1.1-2 mātikā) “sotāvadhāne paññā sutamaye ñāṇaṃ, sutvāna saṃvare paññā silamaye ñāṇa”ntiādinā ñāṇakathāya niddiṭṭhānaṃ sāvakaśādhāraṇāsādhāraṇānaṃ ñāṇānaṃ. Imesañhi tesattatīñāṇānaṃ sutamayaññāñānīni sattaṭṭhīñāṇāni sāvakaśādhāraṇāni, “indriyaparopariyatte ñāṇaṃ, sattānaṃ āsayānusaye ñāṇaṃ, yamakapāṭihīre ñāṇaṃ, mahākaraṇāsamaṅgatiyā ñāṇaṃ, sabbaññūtaññānaṃ, anāvaraṇāñña”nti (paṭi. ma. 1.68-73 mātikā) imāni cha asādhāraṇāñānīni sāvakehi.

Sattasattatīnaṃ ñāṇānanti ettha –

“Jātipaccayā jarāmarañanti ñāṇaṃ, asati jātiyā natthi jarāmarañanti ñāṇaṃ. Atītampi addhānaṃ jātipaccayā jarāmarañanti ñāṇaṃ, asati jātiyā natthi jarāmarañanti ñāṇaṃ. Anāgatampi addhānaṃ jātipaccayā jarāmarañanti ñāṇaṃ, asati jātiyā natthi jarāmarañanti ñāṇaṃ. Yampissa taṃ dhammaṭṭhitiñāṇaṃ, tampi khayadhammaṃ vayadhammaṃ virāgadhammaṃ nirodhadhammanti ñāṇaṃ. Bhavapaccayā jātīti ñāṇaṃ...pe... upādānapaccayā bhavoti ñāṇaṃ, taṇhāpaccayā upādānanti ñāṇaṃ, vedanāpaccayā taṇhāti ñāṇaṃ, phassapaccayā vedanāti ñāṇaṃ, saḷāyatanapaccayā phassoti ñāṇaṃ, nāmarūpapaccayā saḷāyatananti ñāṇaṃ, viññāṇapaccayā nāmarūpanti ñāṇaṃ, saṅkhārapaccayā viññāṇanti ñāṇaṃ, avijjāpaccayā saṅkhārāti ñāṇaṃ, asati avijjāyā natthi saṅkhārāti ñāṇaṃ, atītampi addhānaṃ avijjāpaccayā saṅkhārāti ñāṇaṃ, asati avijjāyā natthi saṅkhārāti ñāṇaṃ, anāgatampi addhānaṃ avijjāpaccayā saṅkhārāti ñāṇaṃ, asati avijjāyā natthi saṅkhārāti ñāṇaṃ, yampissa taṃ dhammaṭṭhitiñāṇaṃ, tampi khayadhammaṃ vayadhammaṃ virāgadhammaṃ nirodhadhammanti ñāṇa’nti –

Bhagavatā **nidānavagge** (saṃ. ni. 2.34-35) jarāmarañādīsu ekādasasu paṭiccasamuppādaṅgesu paccakaṃ satta satta katvā vuttāni sattasattatiñāṇāni.

Tattha **dhammaṭṭhitiñāṇanti** paccayākārañāṇaṃ. Paccayākāro hi dhammānaṃ pavattisaṅkhātāya ṭhitiyā kāraṇatā “dhammaṭṭhiti”ti vuccati, tattha ñāṇaṃ dhammaṭṭhitiñāṇaṃ, “jātipaccayā jarāmarāṇa”ntiadinā vuttasseva chabbidhassa ñāṇassettaṃ adhivacanaṃ. **Khayadhammanti** khayagamanaśabhāvaṃ. **Vayadhammanti** vayagamanaśabhāvaṃ. **Virāgadhammanti** virajjanasabhāvaṃ. **Nirodhadhammanti** nirujjhanasabhāvanti attho.

Lābhotiādīsu lābhoyeva upasaggena visesetvā “**paṭilābho**”ti vutto. Puna tasseva atthavivaraṇavasena “**patti sampatti**”ti vuttaṃ. **Phusanāti** adhigamanavasena phusanā. **Sacchikiriyāti** paṭilābhasacchikiriyā. **Upasampadāti** nipphādanā.

Sattannaṅca sekkhānanti tisso sikkhā sikkhantīti sekkhasaññitānaṃ sotāpattimaggaṭṭhādīnaṃ sattanaṃ. **Puthujjanakalyāṇakassa cāti** nibbānagāminiyā paṭipadāya yuttatā sundaraṭṭhena kalyāṇasaññitassa puthujjanaśa. Vaḍḍhitāṃ vaḍḍhanaṃ ekāyāti **vaḍḍhitavaḍḍhanā**. Yathāvuttānaṃ aṭṭhannampi paññānaṃ vasena visesatova arahato paññāvasena **paññāvuddhiyā**. Tathā **paññāvepullāya**.

Yassa kassacipi visesato anurūpadhammassa mahantaṃ nāma kiccāsiddhiyā veditabbanti tadassa kiccāsiddhiyā dassento “**mahante atthe pariggaṇhāti**”tiādimāha. Tattha atthādīnaṃ mahantabhāvo mahāvisayatāya veditabbo, mahāvisayatā ca tesāṃ paṭisambhidāmagge āgatanayena veditabbā. Sīlakkhandhassa pana hetumahantatāya, paccayamahantatāya, nissayamahantatāya, pabhedamahantatāya, kiccamahantatāya, phalamahantatāya, ānisaṃsamahantatāya ca mahantabhāvo veditabbo. Tattha **hetu** alobhādayo. **Paccayo** hirottappasaddhāsativīriyādayo. **Nissayo** sāvakabodhipaccekabodhiniyatatā taṃsamaṅgino ca purisavisesā. **Pabhedo** cārittavārittādivibhāgo. **Kiccaṃ** tadaṅgādivasena paṭipakkhavidhamaṇaṃ. **Phalaṃ** saggasampadā nibbānasampadā ca. **Ānisaṃso** piyamaṇapatādī. Ayamettha saṅkhepo, vitthāro pana **visuddhimagge** (visuddhi. 1.9) **ākaṅkheyyasuttā**dīsu (ma. ni. 1.64 ādayo) ca āgatanayena veditabbo. Iminā nayena samādhikkhandhādīnampi mahantatā yathārahaṃ niddhāretvā vattabbā. Ṭhānāṭṭhānādīnaṃ mahantabhāvo pana mahāvisayatāya veditabbo. Tattha ṭhānāṭṭhānānaṃ mahāvisayatā bahudhātukasuttā dīsu āgatanayena veditabbā.

Vihārasamāpattīnaṃ mahāvisayatā samādhikkhandhe mahāvisayatāniddhāraṇanayena veditabbā, ariyasaccānaṃ sakalāyānaśaṅgāhakato **saccavibhaṅge** (vibha. 189 ādayo) **taṃsamvaṇṇanāsu** (vibha. aṭṭha. 189 ādayo) ca āgatanayena, satipaṭṭhānādīnaṃ **satipaṭṭhānavibhaṅgā**dīsu (vibha. 355 ādayo) **taṃsamvaṇṇanā**dīsu (vibha. aṭṭha. 355 ādayo) ca āgatanayena, sāmaññaphalānaṃ mahato hitassa mahato sukhasa mahato atthassa mahato yogakkhemassa nipphattibhāvato santapaṇītaatakkāvacaraṇaḍḍitavedanīyabhāvato, abhiññānaṃ mahāsambhārato mahāvisayatato mahākiccato mahānubhāvato mahānīpphattito, nibbānassa madanimmadānādīmahatthasiddhito ca mahantabhāvo veditabbo. **Pariggaṇhātīti** sabhāvādīto paricchijja gaṇhāti jānāti, paṭivijjhatīti attho.

Puthupaññāti etthāpi vuttanayānusārena attho veditabbo. Ayam pana viseso – **puthu nānākkhandhesu ñāṇaṃ pavattatī** “ayam rūpakkhandho nāma...pe... ayam viññāṇakkhandho nāmā”ti evaṃ pañcannaṃ khandhānaṃ nānākaraṇaṃ paṭicca ñāṇaṃ pavattati. Tesupi ekavidhena rūpakkhandho... pe... ekādasavidhena rūpakkhandho. Ekavidhena vedanākkhandho...pe... bahuvadhena vedanākkhandho. Ekavidhena saññākkhandho...pe... bahuvadhena saññākkhandho. Ekavidhena sañkhārakkhandho...pe... bahuvadhena sañkhārakkhandho. Ekavidhena viññāṇakkhandho...pe... bahuvadhena viññāṇakkhandhoti evaṃ ekekassa khandhassa ekavidhādivasena atītādivasenapi nānākaraṇaṃ paṭicca ñāṇaṃ pavattati.

Puthu nānādhātūsūti “ayam cakkhūdhātu nāma...pe... ayam manoviññādhātu nāma. Tattha soḷasa dhātuyo kāmāvacarā, dve cātubhūmikā”ti evaṃ dhātūsu nānākaraṇaṃ paṭicca ñāṇaṃ pavattati. Tayidaṃ upādinnadhātuvāsena vuttaṃ. Paccakabuddhānañhi dvinnāṇa aggasāvakaṇaṃ upādinnadhātūsu eva nānākaraṇaṃ paṭicca ñāṇaṃ pavattati, tañca kho ekadesatova, na nippadesato. Bahiddhā anupādinnadhātūnaṃ nānākaraṇaṃ tesam avisayova, sabbaññubuddhānaṃyeva pana “imāya dhātuyā ussannattā imassa rukkhassa khandho seto hoti, imassa kāḷo, imassa maṭṭho, imassa kharo, imassa bahalataco, imassa sukkhataco. Imassa pattam vaṇṇasaṅghānādivasena evarūpaṃ. Imassa pupphaṃ nīlaṃ, pītaṃ, lohitaṃ, odātaṃ, sugandhaṃ, duggandhaṃ, missakagandhaṃ. Phalaṃ khuddakaṃ, mahantaṃ, dīghaṃ, vaṭṭaṃ, suvaṇṇaṃ, dubbaṇṇaṃ, maṭṭhaṃ, pharusaṃ, sugandhaṃ, duggandhaṃ, madhuraṃ, tittakaṃ, ambilaṃ, kaṭukaṃ, kasāvaṃ. Kaṇṭako tikhiṇo, atikhiṇo, ujuko, kuṭilo, tambo, nīlo, lohito, odāto”tiādina dhātunānattaṃ paṭicca ñāṇaṃ pavattati.

Puthu nānāyatanesūti “idaṃ cakkhāyatanaṃ nāma...pe... idaṃ dhammāyatanaṃ nāma. Tattha dasāyatana kāmāvacarā, dve cātubhūmakā”ti evaṃ āyatanānattaṃ paṭicca ñāṇaṃ pavattati.

Puthu nānāpaṭiccasamuppādesūti ajjhatabhiddhābhedato santānābhedato ca nānappabhedesu paṭiccasamuppādaṅgesu. Avijjādiṅgāni hi paccakaṃ paṭiccasamuppādasaññitāni. Tenāha – sañkhārapīṭake “dvādasa paccayā dvādasa paṭiccasamuppādā”ti (saṃ. ni. tī. 1.1.110).

Puthu nānāsuññatamanupalabbhesūti nānāsabhāvesu niccasārādivirahitesu suññāsabhāvesu, tato eva itthipurisaattattaniyādivasena anupalabbhamānasabhāvesu. **Ma-kāro** hettha padasandhikaro.

Puthu nānāatthesūti atthapaṭisambhidāvisayesu paccayuppannādinānāatthesu. **Dhammesūti** dhammapaṭisambhidāvisayesu paccayādinānādhamesu. **Niruttisūti** tesam yeva atthadhammānaṃ niddhāraṇavacanasākhātesu nānāniruttisu. **Puthu nānāpaṭibhānesūti** atthapaṭisambhidāvisayesu imāni ñāṇāni idamatthajotakānīti tathā tathā paṭibhānato upatiṭṭhanato paṭibhānānīti laddhanāmesu nānāñānesu.

Puthu nānāsīlakkhandhesūtiādīsu sīlassa puthuttaṃ nānattañca vuttameva, itaresaṃ pana vuttanayānusārena suviññeyyattā pākāṭameva. Yaṃ pana abhinnaṃ ekameva nibbānaṃ, tattha upacāravasena puthuttaṃ gahetabbanti āha – “**puthu nānājanasādhāraṇe dhamme samatikkammā**”ti. Tenassa madanimmadānādivasena puthuttaṃ paridīpaṃ hoti.

Vipule attheti mahante atthe. Mahantapariyāyo hi vipulasaddo. **Gambhīresūti** sasādīhi viya mahāsamuddo anupacitāñānasambhārehi alabbhaneyyappatiṭṭhesu khandhesu ñāṇaṃ pavattatīti visayassa gambhīratāya ñāṇassa gambhīratā vibhāvītā.

Tikkhavisadabhāvādiviṅṇehi asādhāraṇattā paresaṃ paññāya na sāmanta, atha kho suvidūravidūreti **asamantapaññā** ākārasa rassattaṃ katvā. Keci “asamatthapaññā”ti paṭhanti, tesam yathāvuttagaṇehi aññehi asādhāraṇattā natthi etissā kāyaci samatthanti asamatthā paññāti yojanā. **Atthavavatthānatoti** atthappabhedassa yathāvato sannitṭhānato. **Na añño koci sakkoti abhisambhavituntī** ñāṇagatiyā sampāpuṇiṭṭhaṃ na añño kocipi sakkoti, tasmā ayam suvidūravidūreti asamantapaññā. Idāni puggalantaravasena asamantapaññānaṃ vibhāvetuṃ, “**puthujjanakalyāṇakassā**”tiādi āradhāṃ.

“Paññāpabhedakusalo abhinnañāṇo adhigatappaṭisambhido catuvesārājappatto dasabaladhārī

purisāsabho purisasīho purisanāgo purisājañño purisadhorayho anantañño anantatejo anantayaso aḍḍho mahaddhano balavā netā vinetā anunetā paññāpetā viniyjhāpetā pekkhatā pasādetā. So hi bhagavā anuppanassa maggassa uppādetā, asañjātassa maggassa sañjanetā, anakkhātassa maggassa akkhātā, maggaññū maggavidū maggakovido. Maggānugāmī ca pana etarahi sāvakā viharanti pacchā samannāgatā.

“So hi bhagavā jānaṃ jānāti, passaṃ passaṃ, cakkhubhūto ñāṇabhūto dhammabhūto brahmabhūto vattā pavattā atthassa ninnetā amatassa dātā dhammassāmī tathāgato, natthi tassa bhagavato aññātaṃ adiṭṭhaṃ aviditaṃ asacchikataṃ aphassitaṃ paññāya. Atūtaṃ anāgataṃ paccuppannaṃ upādāya sabbe dhammā sabbākārena buddhassa bhagavato ñāṇamukhe āpāthaṃ āgacchanti, yaṃ kiñci neyyaṃ nāma atthi taṃ sabbaṃ jānitabbaṃ, attattho vā parattho vā ubhayattho vā diṭṭhadhammiko vā attho samparāyiko vā attho uttāno vā attho gambhīro vā attho gūlho vā attho paṭicchanno vā attho neyyo vā attho nīto vā attho anavajjo vā attho nikkilesso vā attho vodāno vā attho paramattho vā attho, sabbaṃ taṃ antobuddhaññaṃ parivattati.

“Sabbāṃ kāyakammaṃ buddhassa bhagavato ñāṇānuparivatti, sabbaṃ vacīkammaṃ buddhassa bhagavato ñāṇānuparivatti, sabbaṃ manokammaṃ buddhassa bhagavato ñāṇānuparivatti. Atīte buddhassa bhagavato appaṭihatāṃ ñāṇaṃ, anāgate buddhassa bhagavato appaṭihatāṃ ñāṇaṃ, paccuppanne buddhassa bhagavato appaṭihatāṃ ñāṇaṃ, yāvatakaṃ neyyaṃ, tāvatakaṃ ñāṇaṃ. Yāvatakaṃ ñāṇaṃ, tāvatakaṃ neyyaṃ. Neyyapariyantikaṃ ñāṇaṃ, ñāṇapariyantikaṃ neyyaṃ, neyyaṃ atikkamitvā ñāṇaṃ nappavattati, ñāṇaṃ atikkamitvā neyyapatho natthi, aññamaññāpariyantaṭṭhāyino te dhammā, yathā dvinnaṃ samuggapaṭalānaṃ sammā phusitānaṃ heṭṭhimaṃ samuggapaṭalaṃ uparimaṃ nātivattati, uparimaṃ samuggapaṭalaṃ heṭṭhimaṃ nātivattati, aññamaññāpariyantaṭṭhāyino, evamevaṃ buddhassa bhagavato neyyaṃca ñāṇaṃca aññamaññāpariyantaṭṭhāyino. Yāvatakaṃ neyyaṃ, tāvatakaṃ ñāṇaṃ. Yāvatakaṃ ñāṇaṃ, tāvatakaṃ neyyaṃ, neyyapariyantikaṃ ñāṇaṃ, ñāṇapariyantikaṃ neyyaṃ, neyyaṃ atikkamitvā ñāṇaṃ nappavattati, ñāṇaṃ atikkamitvā neyyapatho natthi. Aññamaññāpariyantaṭṭhāyino te dhammā. Sabbadhammesu buddhassa bhagavato ñāṇaṃ pavattati.

“Sabbe dhammā buddhassa bhagavato āvajjanappaṭibaddhā ākaṅkhappaṭibaddhā manasikārappaṭibaddhā cittuppādappaṭibaddhā, sabbasattesu buddhassa bhagavato ñāṇaṃ pavattati. Sabbesaṃ sattānaṃ buddho āsayāṃ jānāti, anusayāṃ jānāti, caritaṃ jānāti, adhimuttiṃ jānāti, apparajakkhe mahārajakkhe tikkhindriye mudindriye svākāre dvākāre suviññāpaye duviññāpaye bhabbā sabbe satte pajānāti, sadevako loko samārako sabrahmako sassamaṇabrāhmaṇī pajā sadevamanussā antobuddhaññaṃ parivattati.

“Yathā ye keci macchakacchapā antamaso timitimiṅgalaṃ upādāya antomahāsamudde parivattanti, evameva sadevako loko samārako sabrahmako sassamaṇabrāhmaṇī pajā sadevamanussā antobuddhaññaṃ parivattati. Yathā ye keci pakkhino antamaso garuḷaṃ venateyyaṃ upādāya ākāssa padese parivattanti, evameva yepi te sārīputtasamā paññāya, tepi buddhaññaṃ padese parivattanti, buddhaññaṃ devamanussānaṃ paññaṃ pharivā atighamsivā tiṭṭhati. Yepi te khattiyapaṇḍitā brāhmaṇapaṇḍitā gahapatipaṇḍitā samaṇapaṇḍitā nipuṇā kataparappavādā vāavedhirūpā, vobhindantā maññe caranti paññāgatena diṭṭhigatāni, te te paññaṃ abhisaṅkharitvā abhisaṅkharitvā’ ti (paṭi. ma. 3.5) –

Ādinā niddiṭṭhapāliṃ peyyālamukhena saṃkhipitvā dassento “**paññāpabhedakusalo pabhinnañño... pe... te paññaṃ abhisaṅkharitvā abhisaṅkharitvā**”tiādīmāha.

Tattha **pabhinnañño**ti atthādīsu pabhedagatañño. “Pabhedañño”tipi paṭhanti, soyeva attho. **Te pañhanti** te te attanā adhippetāṃ paññaṃ. **Niddiṭṭhakāraṇā**ti vissajjitakāraṇā. **Upakkhittakā**ti bhagavato paññāveyyattiyena samīpe khittakā antevāsikā sampajjanti.

Bhavati abhibhavatīti bhūri. Kiṃ? Rāgādiṃ. Upasagge satipi tadeva padaṃ tamatthaṃ vadatīti

upasaggena vināpi so attho viññeyyo anekatthattā dhātūnanti vuttam – “**abhibhuyyati**”ti. Kārakabyattayena cetam vuttam, tasmā **rāgam abhibhuyyati**ti sā sā maggapaññā attanā attanā vajjham rāgam abhibhuyyati abhibhavati, madati attho. Abhibhavati sā sā phalapaññā tam tam rāgam bhavi abbhavi madditi **bhūripaṇṇā**. “Abbhavitā”ti vā pāṭho, “abbhavitvā”tipi paṭhanti. Abbhavitvāti ca kiriyāya siddhabhāvadassanam. Paññā ce siddhā, rāgabbhavo ca siddho evāti. Sesesupi eseva nayo.

Rāgādīsu pana rajjanalakkhaṇo **rāgo**. Dussanalakkhaṇo **doso**. Muyhanalakkhaṇo **moho**. Kujjhanalakkhaṇo **kodho**, upanandhanalakkhaṇo **upanāho**. Pubbakālam **kodho**, aparakālam **upanāho**. Paragunamakkhanalakkhaṇo **makkho**, yugaggāhalakkhaṇo **palāso**. Parasampattikhīyanalakkhaṇā **issā**, attano sampattiniggūhanalakkhaṇam **macchariyam**. Attanā katapāpappaṭicchādanalakkhaṇā **māyā**, attano avijjamānagunappakāsanalakkhaṇam **sāṭheyam**. Cittassa uddhumātabhāvalakkhaṇo **thambho**, karaṇuttariyalakkhaṇo **sārambho**. Unnatilakkhaṇo **māno**, abhunnatilakkhaṇo **atimāno**. Mattabhāvalakkhaṇo **mado**, pañcakāmaguṇesu cittavossaggalakkhaṇo **pamādo**. Bhavati abbhavati arinti **bhūri** asarūpato parassa akārassa lopam katvā. Tenāha – “**arim maddanipaṇṇāti bhūripaṇṇā**”ti. Bhavati ettha thāvarajāgamanti **bhūri vuccati pathavī** yathā “bhūmī”ti bhūri viyāti **bhūripaṇṇā** vitthatavipulaṭṭhena sabbam sahatāya ca. Tenāha – “**tāyā**”tiādi. Tattha **pathavisamāyāti** vitthatavipulaṭṭheneva pathavisamāya. **Vitthatāyāti** pajānitabbe visaye vitthatāya, na ekadese vattamānāya. **Vipulāyāti** ulārabhūtāya. **Samannāgatoti** puggalo. **Iti**-saddo kāraṇatthe, iminā kāraṇena puggalassa bhūripaṇṇāya samannāgatattā tassa paññā bhūripaṇṇā nāmāti attho. “Bhūripaṇṇassa paññā bhūripaṇṇapaññā”ti vattabbe ekassa paññāsaddassa lopam katvā “bhūripaṇṇā”ti vuttam.

Apicāti paññāpariyāyadassanattham vuttam. **Paññāyametanti** paññāya etaṃ. **Adhivacananti** adhikam vacanam. **Bhūriti** bhūte atthe khandhādike ramati saccasabhāvena, diṭṭhi viya na abhūtetī bhūri. **Medhāti** asani viya siluccaye kilese medhati hiṃsatīti medhā, khippam gahaṇadhāraṇaṭṭhena vā medhā. **Parināyikāti** yassuppajjati, tam sattam atthitappaṭipattiyam sampayuttadhamme ca yāthāvalakkhaṇappaṭivedhe pariṇetīti pariṇāyikā. Imeheva aññānīpi paññāpariyāyavacanāni honti.

Paññābahullanti paññā bahulā assāti paññābahulo, tassa bhāvo paññābahullam. Tañca paññāya bahullam pavatti evāti tamattham paññāgarukassa puggalassa vasena dassento, “**idhekacco paññāgaruko hoti**”tiādimāha. Tattha **idhekaccoti** puthujjanakalyāṇako, ariyo vā. Paññā garu ekassāti **paññāgaruko**. Paññāya carito pavattito **paññācarito**, paññāya caritam pavattam assāti vā **paññācarito**. Anulomikakhantiādivibhāgā paññā āsayo etassāti **paññāsayo**. Paññāya adhimutto tanninnoti **paññādhimutto**. Samussitaṭṭhena paññā dhajo etassāti **paññādhajo**. **Paññāketūti** tasseva vevacanam. Paññānimittam ādhipateyyam etassāti **paññādhigateyyo**. Paññāsaṅkhāto vicayo, dhammasabhāvavicinanam vā bahulam etassāti **vicayabahulo**. Nānappakārena dhammasabhāvavicinanam bahulam assāti **pavicayabahulo**. Okkhāyanam yāthāvato dhammānam upaṭṭhānam bahulam etassāti **okkhāyanabahulo**. Paññāya tassa tassa dhammassa sammāpekkhanā sampekkhā, sampekkhāya ayanam pavattanam sampekkhāyanam, sampekkhāyanam dhammo pakati assāti **sampekkhāyanadhammo**. Sampekkhāyanam vā yāthāvato dassanadhammo sabhāvo etassāti **sampekkhāyanadhammo**. Sabbam dhammajātam vibhūtam vibhāvitaṃ katvā viharāṇasīloti **vibhūtavihārī**.

Taccaritotiādīsu tam-saddena paññā paccāmaṭṭhā, tasmā tattha “paññācarito”tiādinā attho veditabbo. Sā paññā caritā garukā bahulā assāti **taccarito taggaruko tabbahulo**. Tassam paññāyam ninno poṇo pabbhāro adhimuttoti **tanninno tappoṇo tappabbhāro tadadhimutto**. Sā paññā adhipati tadadhipati, tadadhipatito āgato **tadādhigateyyo**. **Paññāgarukoti**ādīni “kāmam sevantaṃyeva jānāti, ayam puggalo nekkhammagaruko”tiādīsu (paṭi. ma. 1.114) viya purimajātito pabhuti vuttāni. **Taccaritoti**ādīni imissā jātiyā vuttāni. Idāni vuttamevattham nidassanavasēnapi dassetum – “**yathā**”tiādi vuttam. **Evamevanti**ādīni dassitabbanigamanam.

Sīghapaññāti attano visaye sīghappavattikā paññā, yā samāradhā attano paññākiccam adandhāyantī avitthāyantī khippameva sampāpeti. Tenāha – “**sīgham sīgham silāni paripūreti**”tiādi. Tattha **sīgham sīghanti** bahūnam silādīnam saṅghattham dvikkhattum vuttam. **Silānti** cārittavārittavasena paññāntāni

pātimokkhasaṃvarasīlāni, t̥hapetvā vā indriyasamvaram tassa visum gahitattā itarāni tividhasīlāni. **Indriyasamvaranti** cakkhādīnaṃ channaṃ indriyānaṃ rāgappaṭighappavesam akatvā satikavātena nivāraṇaṃ thakanam. **Bhojane mattaññutanti** paccavekkhitaparibhogavasena bhojane pamāṇaññubhāvaṃ. **Jāgariyānuyoganti** divasassa tīsu koṭṭhāsesu rattiyā paṭhamamajjhimakoṭṭhāsesu ca jāgarati na niddāyati, samaṇadhamameva karotīti jāgaro, jāgarassa bhāvo, kammaṃ vā jāgariyaṃ, jāgariyassa anuyogo jāgariyānuyogo, taṃ jāgariyānuyogaṃ. **Silakkhandhanti** sekkhaṃ vā asekkhaṃ vā silakkhandhaṃ. Evamitarepi khandhā veditabbā. **Paññākkhandhanti** maggapaññā ca sekkhāsekkhānaṃ lokiyapaññā ca. **Vimuttikkhandhanti** phalavimutti. **Vimuttiñāḍassanakkhandhanti** paccavekkhaṇaññānaṃ. Sīghapaññāniddeśasadiṣoyeva lahupaññāniddeśo, tathā hāsapaññāniddeśo. Javanapaññāniddeśo pana kalāpasammasanāyena pavatto. Tikkhapaññāniddeśo vīriyassa ussukkāpanavasena, nibbedhikapaññāniddeśo sabbaloke anabhiratasaññāvasena pavatto. Tattha turitakiriya **sīghatā**. Adandhatā **lahutā**. Vegāyitattaṃ **khippatā**.

Hāsbahuloti pītībahulo. Sesapadāni tasseva vevacanāni. Atha vā **hāsbahuloti** mūlapadaṃ. **Vedabahuloti** tassā eva pītīyā sampayuttasomanassavedanāvasena niddesapadaṃ. **Tuṭṭhibahuloti** nātibalavapītīyā tuṭṭhākārasena. **Pāmojjabahuloti** balavapītīyā pamuditabhāvavasena. **Sīlāni paripūretīti** haṭṭhappahaṭṭho udaggūdaggo sampiyāyamaṇo sīlāni sampādeti. Pītīsomanassasahagatā hi paññā abhirativasena ārammaṇe phullitā vikaṣitā viya pavattati, na evaṃ upekkhāsahagatāti.

Aniccato khippaṃ javatīti “khandhapañcakaṃ anicca”nti vegāyitena pavattati, paṭipakkhadūrībhāvena pubbābhisañkhārasa sātīsayattā indena vissaṭṭhavaṃjiraṃ viya lakkhaṇaṃ avirajjhantī adandhāyanti aniccalakkhaṇaṃ vegasā paṭivijjhati, tasmā sā javanapaññā nāmāti attho. Sesapadesupi eseva nayo. Evaṃ lakkhaṇārammaṇikavipassanāvasena javanapaññaṃ dassetvā balavavipassanāvasena dassetuṃ – “**rūpa**”ntiādi vuttaṃ. Tattha **khayaṭṭhenāti** yattha yattha uppajjati, tattha tattheva bhijjanato khayasabhāvattā. **Bhayaṭṭhenāti** bhayānakabhāvato. **Asāraṭṭhenāti** attasāravirahato niccasāradīvirahato ca. **Tulayitvāti** tulābhūtāya vipassanāpaññāya tuletva. **Tīrayitvāti** tāya eva tīraṇabhūtāya tīretva. **Vibhāvayitvāti** yāthāvato pakāsetvā pakāṭaṃ katvā. Atha vā **tulayitvāti** kalāpasammasanāvasena tulayitvā. **Tīrayitvāti** udayabbayānupassanāvasena tīretva. **Vibhāvayitvāti** bhaṅgānupassanādivasena pakāṭaṃ katvā. **Vibhūtaṃ katvāti** sañkhārupekkhānulomavasena phuṭaṃ katvā. **Rūpanirodheti** rūpakkhandhassa nirodhabhūte nibbāne. **Khippaṃ javatīti** ninnapaṇapabbhārasena javati pavattati. Idāni sikhāpattavipassanāvasena javanapaññaṃ dassetuṃ, puna “**rūpa**”ntiādi vuttaṃ.

Ñāṇassa tikkhabhāvo nāma savisesaṃ paṭipakkhasamucchindanena veditabboti “**khippaṃ kilese chindatīti tikkhapaññā**”ti vatvā te pana kilese vibhāgena dassento, “**uppannaṃ kāmavitakka**”ntiādimāha. Samathavipassanāhi vikkhambhanatadaṅgavasena pahīnampi ariyamaggena asamūhatattā uppattidhammataṃ anatītatāya asamūhatuppannanti vuccati, taṃ idha “**uppanna**”nti adhippetam. **Nādhivāsetīti** santānaṃ āropetvā na vāseti. **Pajahatīti** samucchadavasena pajahati. **Vinodetīti** khipati. **Byantiṃ karotīti** vīgatantaṃ karotī. **Anabhāvaṃ gametīti** anu abhāvaṃ gameti, vipassanākkamena ariyamaggaṃ patvā samucchadavaseneva abhāvaṃ gamayati attho. Ettha ca kāmappaṭisaṃyutto vitakko **kāmavitakko**. “Ime sattā marantū”ti paresaṃ maraṇappaṭisaṃyutto vitakko **byāpādavitakko**. “Ime sattā vihiṃsiyantū”ti paresaṃ vihiṃsāpaṭisaṃyutto vitakko **vihiṃsāvitakko**. **Pāpaketi** lāmake. **Akusale dhammeti** akosallasambhūte dhamme. Tikkhapañño nāma khippābhīṇho hoti, paṭipadā cassa na calatīti āha – “**ekamhi āsane cattāro ariyamaggā**”tiādi.

“Sabbe sañkhārā aniccā dukkhā vipariṇāmadhammā sañkhatā paṭiccasamuppannā khayadhammā vayadhammā virāgadhammā nirodhadhammā”ti yāthāvato dassanena saccappaṭivedho ijjhanti, na aññathāti kāraṇamukhena nibbedhikapaññaṃ dassetuṃ – “**sabbasañkhāresu ubbegabahulo hoti**”tiādi vuttaṃ. Tattha **ubbegabahuloti** “sabbe sañkhārā aniccā”tiādinā (dha. pa. 277) nayena sabbasañkhāresu abhiṇhappavattasaṃvego. **Uttāsbahuloti** ñāṇabhayavasena sabbasañkhāresu bahuso utrastamānaso. Tena ādīnavānupassanāmaṃha. **Ukkaṇṭhanabahuloti** sañkhārato uddhaṃ visañkhārābhimukhatāya ukkaṇṭhanabahulo. Iminā nibbidānupassanāmaṃha. **Aratibahuloti**tiādinā tassā eva aparāparūpapattim. **Bahimukhoti** sabbasañkhārato bahibhūtaṃ nibbānaṃ uddissa pavattaññaṃamukho. Tathā

pavattitavimokkhamukho. Nibbijhanaṃ paṭivijjanaṃ nibbedho, so etissā atthīti nibbedhikā, nibbijhatīti vā nibbedhikā, sā eva paññā **nibbedhikapaññā**. **Anibbidhappubbanti** anamatagge saṃsāre antaṃ pāpetvā anividdhappubbaṃ. **Appadālitappubbanti** tasveva atthavacanaṃ, antakaraṇeṇeva appadālitappubbanti attho. **Lobhakkhandhanti** lobharāsiṃ, lobhakoṭṭhāsaṃ vā.

Kāyagatāsativaggavaṇṇanā niṭṭhitā.

20. Amatavaggavaṇṇanā

600-611. Natthi ettha mataṃ maraṇaṃ vināsoti **amataṃ**, nibbānanti āha – “**maraṇavirahitaṃ nibbānaṃ paribhuñjantī**”ti. Amatassa vā nibbānassa adhigamahetutāya amatasadisaatappakasukhapatitatāya ca kāyagatāsati “**amata**”nti vuttā. **Paribhuñjantīti** jhānasamāpajjanena vaḷaṅganti. **Viraddhanti** anadhigamena virajjhitaṃ. Tenāha – “**virādhitā nādhigata**”nti. **Āraddhanti** sādhitāṃ nipphāditaṃ. Tañca paripuṇṇaṃ nāma hotīti āha – “**āraddhanti paripuṇṇa**”nti. **Pamādiṃsūti** kālabiyattayenedaṃ vuttanti āha – “**pamajjantī**”ti.

Amatavaggavaṇṇanā niṭṭhitā.

Iti manorathapūraṇiyā aṅguttaranikāya-aṭṭhakathāya

Ekakanipātavaṇṇanāya anuttānatthadīpanā samattā.

Paṭhamo bhāgo niṭṭhito.